

BIBLIOTECA NAZ.
Vittorio Emanuele III

XLVIII

C

27

NAPOLI



Nov 22 - 24th





D E
ABASSINORVM
R E B V S,

Déque Æthiopia Patriarchis

IOANNE NONIO BARRETO,
&

ANDREA OVIEDO,

LIBRI TRES:

P. NICOLAO GODIGNO

Societatis I E S V Auctore.

Nunc primum in lucem emissi.




LVGDVN I,
Sumptibus Horatij Cardon.

M. DC. XV.
SVPERIORVM PERMISSV.



AMASSIA





ILL^{MO} AC REV^{MO}

D. FERNANDO

MARTINIO MASCARE-
gnæ Algarbiorum Episcopo,

NICOLAUS GODIGNVS
felicitem precatur.

A MOR me magis, quàm
res alia perpulit, ut rem
offerrem tibi granditate
tua parum dignam. Igno-
scédum Amori, qui vix videt quid de-
ceat. Si Patronum huic operi quære-
rem, reperire nollem alium, quàm te,
in quo summa sunt omnia, quæ ad pa-
trocinandum valent, Generis ampli-
tudo, Vitæ sanctitas, Rerum sciëntia, A-
nimi mansuetudo, Comitatus in officiis,

ad benefaciendum. Propensio , & si
quid est aliud, quod hanc partem com-
mendet. Sed mihi tantum in animo
est, hoc breui munusculo voluntatem
testari in te meam ; & apertum facere,
quod, credo, non ignoras, tantum me
addictum esse rebus tuis, quantum qui
maximè. Vale.

LECTO



LECTORI S.



Erè à sapiente quodam dictum est, nihil
 esse tam firmum, ac tam constans, quod sit
 omnino à criminatione tutum; adeò in
 disidia proclivis est natura mortalium. Quis cre-
 deret hac tempestate, quando Abassinorum omnia
 tantopere sunt per orbem nota, reperiri posse, qui
 gentem illam assereret à Romana fide neque modo
 esse, neque umquam fuisse alienam? Repertus ta-
 men est, qui tanta utrumque contentione defendat,
 ut ne pro aris quidem ac focis agere queat conten-
 tiosius. Quid de hominis animo dicam, non habeo.
 Laudare factum non possum; quia poterat is, nec
 difficile, vera verèque scribere, si vel modicam ad-
 hibere vellet in perquirenda veritate diligentiam;
 qua adhibita rem faceret nec indecoram sibi, nec
 perniciosam aliis. Ego cum Ioannis Nonij Barreti,
 & Andree Ouiedi Aethiopia Patriarcharum res
 gestas statuissem mandare literis, nonnihil dubita-
 ui, an esset opera, curare, quæ essent ab hoc auctore
 scripta; ac pæne decreueram nullam eius habere ra-
 tionem, memor dixisse Augustinum, quæ à verita-
 te non veniunt, plerumque cadere nullo impellen-
 te, ac se ipsa subvertere. Fuere tamen, qui ex Seneca
 monerent, Rem falsam & inanem, nisi coargua-
 tur, habere nonnumquam fidem; multosque esse

homines iudicij parum firmi, qui nihil audiant legantve, quod non credant, nisi refutatum sciant: his ab scriptore verace medendum esse. Hac mihi causa, cur ex plurimis, quæ de Abasfinorum moribus falsò scripta sunt, pauca selegi, quæ referrem ac refellerem. Id tu, Lector, ex sequentibus planius intelliges. Interim vale.



CLAVDIVS AQUAVIVA, SOCIETATIS IESU Præpositus Generalis.

CVM opus de *Abassinorum rebus, &que Æthiopie Patriarchis Ioanne Nonio Barreto, & Andrea Oniedo, à P. Nicolao Godigno, nostra Societatis sacerdote* conscriptum, tres eiusdem Societatis, quibus id commisimus, recognouerint, & in lucem edi posse probauerint; facultatem concedimus, vt typis mandetur, si iis, ad quos pertinet, ita videbitur. In quorum fidem has literas, manu nostra subscriptas, & sigillo nostro munitas dedimus Romæ 3. Nouembris 1614.

CLAVDIVS AQUAVIVA.

Facultas R. P. Prouincialis Societatis IESU in Prouincia Lugdunensi.

ANTONIUS SVFFREN Prouincialis Societatis Iesu, in Prouincia Lugdunensi, iuxta Priuilegium eidem Societati à Regibus Christianissimis Henrico III. 10. Maij. 1583. Henrico IV. 20. Decembris 1606. & Ludouico XIII. nunc regnante, 14. Februar. 1611. concessum, quo Bibliopoli omnibus prohibetur, ne libros ab eiusdem Societatis hominibus compositos, absque superiorum permissione imprimant, permittit HORATIO CARDON Lugdunensi Bibliopole, vt librum de *Abassinorum rebus, &que Æthiopie Patriarchis Ioanne Nonio Barreto, & Andrea Oniedo, P. Nicolao Godigno Societatis nostre Auctore*, ad sex primos annos imprimere, ac libere diuendere possit. Datum Lugduni j. Iulij 1615.

S V F F R E N.

*

A P P R O B A T I O.

IOANNES CLAVDIVS DEVILLE, in sacra Theologia Magister, & diuini verbi Prædicator in S. Pauli huiusce ciuitatis Canonicus, & in hac Lugdunensi diœcesi à Dn. Dionysio Simone de Marquemôt, Illustrissimo & Reuerendissimo Archiepiscopo, Librorum censor designatus: Fidem facimus, nos Tractatum hunc *de Abassinorum rebus, deque Ethiopia Patriarchis Ioanne Nonio Barreto, & Andrea Oniedo: P. Nicolao Godigno Societatis Iesu Auctore*, perlegisse, in quo nihil fidei Catholicæ contrarium animaduersum. Lugduni apud S. Paulum Calend. Iulias. M. DC. XV.

IOANNES CLAVDIVS DEVILLE.

R. D. D. Thome de Meschatin la Faye, huius libri imprimendi facultas.

THOMAS DE MESCHATIN LA FAYE, Comes, Canonicus, & Camerarius Ecclesiæ Lugdunensis Vicarius Generalis in Archiepiscopatu Lugdunensi. Tractatus qui inscribitur, *de Abassinorum rebus, deque Ethiopia Patriarchis Ioanne Nonio Barreto, & Andrea Oniedo, libri tres: Auctore P. Nicolao Godigno Societatis Iesu*, vt in lucem edatur, facultatem concedo, Lugduni 8. Iulij 1615.

MESCHATIN LA FAYE.

CONCESSIO.

Librum hunc *De Abassinorum rebus, deque Æthiopia Patriarchis Ioanne Nonio Barreto, & Andrea Oniedo, P. Nicolao Godigno Societatis Iesu Auctore;* Ego Iacobus Daueyne Regis Procurator typis mandari, cum demum in lucem exponi consentio.

DAVEYNE.

Tractatus hic *De Abassinorum rebus, deque Æthiopia Patriarchis Ioanne Nonio Barreto, & Andrea Oniedo, P. Nicolao Godigno Societatis IESU Auctore,* vt HORATIO CARDONE Bibliopolâ lucem videat permittimus: simul ne quis citra factam ei ab ipso potestatem denuo excudat interdicimus. Lugduni 12. Iulij 1615.


SEVE.

INDEX
LIBRORVM ET
CAPITVM.

LIBER PRIMVS

De Abassinorum rebus.

Seriem capitum hanc habet.

- I.  *Quo tempore res Abassinorum nobis probè cognita.* pag. 1.
2. *In quo terrarum loco Abassia sit, & unde illi hoc nomen.* p. 7.
3. *Quàm latè patere dicatur Abassini Principis Imperium.* p. 9.
4. *Quinam Abassini Imperij fines.* p. 12.
5. *Vnde Abassino Imperatori Preteciannis, seu Presbyteri Ioannis nomen.* p. 18.
6. *Quanta olim fuerit, quanta hodie sit Preteciannis potentia.* p. 24.
7. *Vnde Abassinorum Imperatorum feratur ductum genus.* p. 32.
8. *Hereditate, an electione fiat Abassinus Imperator.* p. 37.
9. *Vbi*

9. *Vbi sit Abassini Imperatoris sedes.* p. 49.
10. *Qualis Abassini soli conditio.* p. 58.
11. *Quid de Abassini soli natura & fertilitate ve-
re sentiendum* p. 66.
12. *Quales Abassina gentis mores.* p. 71.
13. *Quæ sit apud Abassinos Reipubl. gubernanda
ratio.* p. 79.
14. *Qua ratione in Iudicum vitam & mores apud
Abassinos inquiri dicatur.* p. 84.
15. *De Latino quodam Senatu, qui apud Abassinos
esse dicitur, de quæ aliis ad Imperij administra-
tionem pertinentibus.* p. 89.
16. *Quæ scelera, quibus pœnis in Abassia punian-
tur.* p. 94.
17. *De puerorum institutione & usu literarum
apud Abassinos.* p. 102.
18. *Quo tempore veri Dei religio in Aethiopia cœ-
perit.* p. 113.
19. *Qualis Abassinorum in sacra propensio.* p. 119.
20. *Quibus ceremoniis dicatur uti Imperator certis
quibusdam anni diebus* p. 126.
21. *Quanta Abassini pietate templa veneren-
tur.* p. 130.
22. *De Abassinorum festis, & aliis ad sacra perti-
nentibus.* p. 134.
23. *Quibus argumentis ostendi videatur num-
quam Abassinos à vera Christi fide decessisse.*
p. 141.

INDEX LIBRORVM

24. *Quomodo Abassini ab hæresis suspitione videantur defendi.* p.150.
25. *Auctorum testimoniis probari videtur Abassinorum fides.* p.155.
26. *Vnde videatur ortum ut Abassini apud nos schismatici habeantur.* p.158.
27. *Abassinos à recta fide defecisse.* p.164.
28. *In quibus prius erroribus Abassini fuisse, in iisdem adhuc persistere.* p.170.
29. *Quæ argumenta pro tuenda Abassina gēis religione proposita sunt, nullam vim habere.* p.176.
30. *Neque Abassinorum errores aptè excusari, neque eorum fidem auctorum testimoniis rectè probari.* p.183.
31. *Commentitias esse causas, ex quibus orta fingitur deserta religionis in Abassinos infamia.* p.189.
32. *Sintne ulli in Abassia sacrorū Antistites.* p.195.
33. *Sintne vlla apud Abassinos religiosorum familia.* p.199.
34. *An præter religiosum Magni Antonij ordinem aliquis alius in Abassia sit.* p.206.
35. *Quæ sacramenta, qualisque eorum usus apud Abassinos sit.* p.212.
36. *Qualia apud Abassinos Ordinis, & Matrimonij sacramenta* p.219.

LIBER SECVNDVS

De Ioanne Nonio Barreto Patriarcha.

Seriem capitum hanc habet.

1. Vbi & quibus parentibus natus Ioannes, quomodo à pueritia instituitur. p. 228.
2. Melchior Nonius Barretus in Societatem à Deo premititur, ut Ioanni fratri viam aperiat. p. 230.
3. Alfonso Barretus fratrum motus exemplo Societatem amplectitur, & egregijs facinoribus yrociniū illustrat. p. 234.
4. Ioannes impedito studiis sine religiosa vitæ desiderio pulsatur. p. 242.
5. Melchior ut Ioannem ad Societatem pertrahat, illum conuenit, irritò successu. p. 245.
6. Ioannes litantem Fabrum per quietem videt, & à Deipara monitus Conimbricam petit. p. 253.
7. Ioannem Faber prius instructum ac probatum in Societatem cooptat. p. 255.
8. E' Lusitania in Africam mittitur Ioannes, & Sepeperem Christianam egregie promouet. p. 260.
9. Ioannes cum socijs Tituanum ingressus captiuorum commoda impensè curat. p. 265.
10. Ioannes & socij circa captiuos iuuandos sacerdotis Contrerie exemplum imitantur. Oppressus

INDEX LIBRORVM

- morbo Camer Septam repetit.* p. 269.
11. *Profecto Camera, Ioannes Tituani remanens in iisdem persistit caritatis operibus.* p. 273.
 12. *Suam quoque infidelibus operam Ioannes impendit.* p. 280.
 13. *Ioannes in Lusitaniam rediens, Aethiopia Patriarcha designatur.* p. 285.
 14. *Quamobrem missi in Aethiopiam Patriarcha.* p. 290.
 15. *Quae de Patriarcha Ioannis & sociorum missione à nouo auctore scripta sunt.* p. 295.
 16. *Quantum à vero absit superior narratio* p. 301.
 17. *Quomodo Ioannes se gesserit, postquam Patriarcha creatus est.* p. 308.
 18. *Legatione missa exploratur quo animo sit Abassinus Imperator ad recipiendum Patriarchas, & socios.* p. 314.
 19. *Qualis fuerit Imperatoris Claudij in Romanam Ecclesiam, & ad recipiendum Patriarcham animus.* p. 327.
 20. *Patriarcha cum Ouiedo Episcopo & aliis sociis Olisipone in Indiam soluit.* p. 330.
 21. *A Mosambico Patriarcha Goam peruenit, & ibi manet, misso in Aethiopiam Ouiedo.* p. 334.
 22. *Vitae praesenti praeclaris virtutum operibus exercite finem Patriarcha imponit.* p. 338.

LIBER TERTIVS

De Patriarcha Andrea Ouiedo, & Sociis.

Seriem capitum hanc habet.

1. De ingressu Ouiedi in Societatem, & in virtutibus progressu. p. 344.
2. Creatus Andreas Episcopus & Noni Patriarchæ successor mira prabet submissionis animi exempla. p. 347.
3. Andreas Eborensem diæcesim, Henrici principis rogatu, cum fructu & exemplo illustrat. p. 350.
4. Ex Lusitania Goam, inde in Æthiopiam Ouiedus profisciscitur. p. 356.
5. De ingressu Andreae in Æthiopiam, de accessu ad Imperatorem, & quæ inter illos gesta. p. 360.
6. Quid postea inter Ouiedum & Claudium actum, deque morte Claudij, atque eius successore. p. 364.
7. Sequit in Andream Adamas, eumque in exilium eiicit. p. 367.
8. Abasinos suos Adamas persequitur, & Andream iterum in exilium mittit. p. 369.
9. Tertium Andreas cum Catholicis exilio mulctatur, & variis modis affligitur. p. 373.
10. Graui bello scelerum suorum pœnas luit Impe-

rator

rator *Adamas*, *Andreas* cum sociis diuinitus
seruatur. p. 379.

11. *Quid in Imperio*, *quid Ouiedo* acciderit mor-
tuo *Adama*. p. 382.

12. *Iubetur Andreas* à *Pio V.* Pontifice maximo
Æthiopiam relinquere, & ad *Iaponios* ac *Sinas*
proficisci. p. 385.

13. *Ouiedi Patriarchæ* circa suum ex *Æthiopia* e-
xitum responsio. p. 388.

14. De quibusdam *Andree Patriarchæ* virtutibus.
p. 394.

15. De aliis *Andree* virtutibus, & obitu. p. 400.

16. *Quales Andree socij*, quomodo vitam fini-
erint. p. 406.

17. & ult. De *Francisco Lupio*, *Patriarchæ* socio,
qui omnium postremus diem obiit. p. 411.

DE





DE

ABASSINORVM

REBUS

LIBER PRIMVS

*A quo tempore res Abassinorum nobis
probè cognita.*

CAPVLT I.



E rebus Abassinorum nihil reperio
separatim dixisse veteres, præter
ea, quæ de orientali Æthiopia, cum
vel terrarum orbem describerent,
vel de Æthiopie populis priuatim
agerent, communiter & promiscuè
tradiderunt. Recentiores aliqui non pauca scripsere,
quæ ad soli cœlique naturam, ad instituta, civilia, ad
mores, ad religionem spectant. Ex his vnus, cæteris
recentior, parum abest, quin & ipsi cœlo cœlitum
domicilio Abassiam præferat. Nihil eius solo apud
hunc auctorem amœnius, nihil auri & argenti, nihil
gemmarum & metallorum feracius, nihil eius, aura
benignius & salubrius, nihil gente humanius, nihil
moribus suauius, nihil urbibus pulchrius, nihil statu-

A tis

tis æquius, nihil Imperio moderatius. Præ vna Abassina viles apud illum sunt reliquæ gentes oræque terrarum. Id nos quàm verum sit, cum erit opus, detegemus. Sed antequam de regionis natura, & gentis moribus proponam aliquid, lectorem moneo, tantam in hoc Abassinorum Imperio factam esse per hosce annos rerum mutationem, adeoque & externis & domesticis bellis omnia esse concessa, vix vt vlla nunc appareant vestigia eius magnitudinis, quæ superioribus seculis dicitur fuisse. Rerum caducarum ista conditio est, quo attolluntur alijus, eo profundius ruunt. Illud quoque sit compertum, si quid erit de hac gente scriptum, quod videatur dignum fide, id nobis esse patefactum opera Lusitanorum, ab eo ferme tempore [centum hodie & decem circiter anni sunt] cum Petrus Conillanij, ad res Indicas & Preteianis terras explorandas cum Alfonso Payua à Ioanne secundo Lusitanorum Rege missus, illas adiit Abassinorum regiones: quamquam & tunc quidem, & multorum postea decursu annorum, cum icto inter Abassinum ac Lusitanum fœdere, aliquot utraque ex gente legati vltro citroque commearunt, rebus nondum planè exploratis, multa sunt ab hisdem Abassinis magnificè narrata, vulgo credita, & à quibusdam ex nostris memoriæ tradita, quæ falsa esse certò postea deprehendimus. Inde factum, vt Damianus Goëz, & Ioannes Barrius, alijque, alioquin diligentes, & amantes veritatis auctores, non pauca hoc de genere scripserint, quæ longè à vero distare, nullus ferè Lusitanorum ignorat. Damianum & alios ea tempestate fefellit Zagazabus, quem ad Ioannem Regem Abassinus Imperator oratorem misit. Hic enim non contentus res suas nimium exaggerare, & in maius attollere, pluri-

ma insuper commentus est, quæ homines sinceri, ac minimè mali, cum à veritate abhorrere ne suspicari quidem possent, pro veris accepta posteritati commendarunt. Sed cuiusmodi illa essent, anni insequentes patefecerunt. Itaque etsi ab eo, quo dixi tempore, aliquam habere cœpimus Abassini Imperij cognitionem; id tamen nō ante nobis probè cognitum, quàm & Ioannes Bermudius Patriarcha, de quo postea nonnihil referam, à Romano Pontifice ex Italia missus, illuc iisset; & Stephanus Gama, Dux Lusitanus, cum armata militum manu ad easdem terras ex India traiecisset; & multi postea ex nostris diu ibidem commorantes per se paulatim singula fuissent experti. Ab anno quidem nati Christi 1560. quo religiosi Societatis Iesu in Abassiam sunt ingressi, sic omnia Lusitanis patuere, vt non secus ea, quàm propria & domestica norint; adeoque res constant, vt si quis nūc de Abassinorum Imperio scribat quidquam, aut proferat, quod vel leuiter à vero deflectat, illicd coargui possit falsitatis. Cæterum vt leuis animi est, facile credere cuiquam dicenti, præsertim cum ea dicuntur, quæ dicentis exigunt auctoritatem; ita profectò ingenij maligni est, ac planè inuidi, iis negare fidem, qui vitæ suæ ratione probantur, idque veluti iure suo sunt assecuti, vt veraces existimentur. At quæ summo Pontifici, & Lusitano Regi causa fuerit mittendi in Æthiopiam Patriarchas, aliquanto altius altero libro repetendum erit. Sufficerent quidem ea, quæ Ioannes Petrus Maffei, & scriptores alij hac de re non ita pridem fideliter tradiderunt; nisi nuper extitisset, qui licentius, quàm par erat, contrariam illis ingressus viam, quæ erant extra omnem posita controversiam, nec vulgo tantùm sine difficultate credita, sed planè

explorata, non vertit in dubium, quod videri tolerabilius poterat, sed argumentis partim debilibus, partim captiosis falsa esse ostendere conatus est. Longè sanè latèque parentem offerebat locus hic rixandi campus, si quem reperisset rixarum amantem. Sic enim auctor iste veritatem deseruit, ut iusto in opere pauca quædam, in quibus aliquod apparet veri vestigium, innumeris commentis commacularit. Deceptum ab aliquo credo; quia verosimile non est, ea voluisse ex libidine fingere, ex quibus ignorare non poterat, nihil se, præter iustissimam proborum hominum indignationem, & quod est consequens, non nullam dedecoris notam comparaturum. Quomodo cumque tamen res habeat, ait ipse, quæ de Abassinorum tam sacris, quàm profanis rebus, deque tota eorum Monarchia literarum monumentis commendavit, ea se magna ex parte à quodam eiusdem gentis homine, atque ex quibusdam eius scriptis fideliter accepisse: quem hominem, quod, videlicet Abassinus esset, non dubitarit credere, rerum istiusmodi esse peritissimum, & ab omni alienū mendacio. Quasi æquū sit, ut Pontificiis diplomatis, & regiis literis, & gravissimis scriptoribus, qui summo labore ac diligentia rei veritatem inuestigarunt, & locupletissimis testibus, quorum multi, quo tempore res istæ memoriæ mandantur, adhuc in viuis sunt, vnius fides sit anteferenda. Cuius autem spiritus afflatu sua homo ille fuderit oracula, quæ hic auctor tanta suscepit veneratione, ut nihil ipsis iudicari in terris verius, satis cognosci potest ex quodam eius opusculo de militari & monastico equitum magni Antonij ordine, Valentianæ edico, quo in opusculo nihil ferè est, quod cōmentitium non sit. Quæ de re cum à viro graui at-

queretur,

gueretur, hoc tantum habuit quod responderet, sua illa commenta nemini posse officere, celsèque longè ab iis diuersa, quæ sunt ab illo alio auctore tradita, quibus multorum fama læditur, existimatio polluitur, auctoritas violatur. Idem ipse Abassinus visus nobis Romæ est, & cognitus; de quæ hisce rebus familiariter rogatus, ita se purgauit, ut in hunc alium auctorem omnem culpam deriuaret. Non est inficiatus, quædam se de Æthiopico imperio, de quæ gentis moribus, & ecclesiasticis ritibus illi dedisse, quæ etsi vera non essent, nemini tamen crederet iniuriosa; eum tamen multas de suo addidisse fabulas, quarum ipse nec auctor fuerit, nec suasor. Quin potius mirari se vehementer, quonam pacto eius professionis homo, res tales ausus sit in vulgus prodere, quæ sine grauissima omnium ordinum offensione legi non possunt. Et quod sibi quoque, suæque existimationi maximè ab illò fuerit incommodatum, questum se in Hispania esse per supplices literas apud regem, & tærentæ licentiæ inuidiam deprecatum. Nos igitur auctorem hunc, quem nouum appellabimus, & similes alios; qui superioribus annis leuitate quidem pæne pari, sed animo fortassis candidiore, nonnulla de Abassinis prodidere prisca fabulis similia, quantum instituti nostri postulabit ratio, apologetico magis quàm historico more (sic enim opus est) falsitatis, ubi oportebit, damnabimus. Quæ tamen fideli nostræ non nocebunt, ea nos etsi futilia erunt, ac vana, & forsitan etiam noxia, non multum curabimus. Aliorum ea cura esto. Parcam nomini ob reuerentiam Ordinis: quamquam non credo, quæ sunt à quibusdam priuatis hominibus perperam acta, aut dicta, ea in ordinis totius ignominiam redundare, aut eius no-

mini & dignitati quidquam obesse; cùm nemo nesciat, haud vllam esse tam sanctam in terris societatem, quæ ab hisce aduersis rerum euentibus immuni sit. Et verò si scriptoris huius nomen proderem, illud me ab omni religione exolueret, quòd nec primus id facerem, nec primus demonstrarem, qua fide scripserit. Satis id ante me vulgatum ab aliis: ex quibus vnus est Fernandus Guerrerius, vir probitatis, & modestiæ singularis; cùmque rebus aliis valde præstans, tum in hisce barbararum gentium recentioribus historiis multorum cum fructu diligentissimè versatus. Is cùm de huius auctoris libro esset admonitus, vidissetque in eo quàm indignè & iniuriòse Pontificum, & Regum, & aliorum excellentium hominum auctoritas tractaretur; iusto stimulatus dolore, abstinere non potuit, quin calamum arriperet, & in ipsum auctorem distringeret stilum; quæque ille fictè in lucem protulit, non leui testimoniorum & rationum pondere obrueret. Fecit, vt debuit. Mihi etià, qui Ioannis & Andreæ Patriarcharum historias, cùm quibus Æthiopica ista coniuncta sunt, scribere constitui, necessariò in eundem stringendus stilus est. Sed neque agam hostiliter, neque aliquid dicam, quod alio fine, quàm aperiendæ veritatis dictum velim. Quinetiam quammaximè opto, ne quod mihi verbum per imprudètiā excidat, vnde quisquam meritò offendi queat. Sciens certè & volens neminem, ne leuiter quidem, pungam: tantùm vbi opus & fas erit, ius meum tuebor; id verò est, vt non solum scribam vera: sed eorum quoque, quæ cum nostris pugnant, falsitatem aperiam. Cæterùm de Abassinorum religione, de Patriarchis Nonio, & Ouiedo; eorùmque sociis, ac demum de re tota, quæ circa

rem

rem Æthiopicam versatur, nihil ponam pro certo, nisi quod vel ex iuratis testibus, vel ex eorum hominum, quibus etiam iniuratis abrogate fidem nefas est, literis & narratione mihi constiterit.

*In quo terrarum loco Abassia sit, & unde illi
hoc nomen.*

CAPVT II.

INter eas Africæ partes, quibus veteres Geographi Æthiopiæ nomen indiderunt, ea videtur esse præcipua, quæ ad Orientem Solem propius accedit, & Æthiopiam sub Ægypto iidem veteres appellauere. Dicta est à multis India, ob eam causam, quod varij olim populi ex iis plagis, quas Indus interfluit gregatim profecti, fixam ibi posuere sedem. Pars autem hæc, & in diuinis libris, & apud sacros scriptores multas sortita est appellationes, quas hîc referre instituti mei non est. Quod quidam voluere, omnem Æthiopiam ad Abassiam pertinere, omnesque Æthiopes, tam Hesperios, & Eoos, quàm qui inter hos medij sunt, quique priscis Geographis fuerunt ignoti, Abassinos dici, id quidem in falsis oportet numerare. Certum est, neque Madianiticam Æthiopiam, de qua loco alio locutus sum; neque Hespericam, quæ per interiorem Libyam funditur; neque illam, quæ Zanzibarîs terras continet, neque eam demum, ad quam Congi, Angolæ, cæteraque Guinææ ac vicinarum prouinciarum regna pertinent; quàmque intratam prisci reliquere, Abassîæ nomine ceuseri: sed illam solum, quæ sub Ægypto est, & eos dumtaxat cō-

plectitur *Æthiopes*, qui orientales *Africæ* incolunt regiones. At neque populos omnes, qui in hac *Æthiopia* degunt, rectè *Abassinos* dici, sed eos tantum, qui illi Principi, quem nunc *Præteiannem* vulgo appellamus, iure subduntur, reperi à quibusdam scriptoribus obseruatum; quod num verum sit, nihil atinet in præsentia decernere. Constat, istam, de qua nunc agimus, *Æthiopiam* hisce limitibus circumscribi. Ab Oriente fretum habet *Erythræum*; cuius ferme in faucibus incipiens, indèque à gradu circiter decimo vsque ad vndeuigesimum versùs *Boream* porrecta, in insulam, & eiusdem nominis maritimam urbem definit, quam *Suaquenum* recentiores *Geographi*, *Aspidem* veteres appellant. Ab Occidente celsis definitur montium iugis, longissimo tractu propter *Nili* fluentia præcurrentibus. Lætera binis hinc inde terminantur lineis. Vna ab *Suaqueno* ad eam insulam, quæ olim *Meroe* dicta est, in arcticum polum recto tramite deducitur. Altera ab occidua *Nili* parte versùs *Austrum* exiens eò vsque protenditur, donec *Auiæ* regnum, quo nullum ibi est à *Septentrionibus* remotius, arcuato cursu pertingit. Hinc rursus in Orientem egrediens ad *Adelum* se fundit; id *Saracenorum* regnum est, cuius caput urbs *Ara*, quæ nouem ab *Æquatore* gradibus ad polum arcticum recedit; vniuersa pæne regio à quatuor, quibus clauditur, lateribus, leucas colligit prope septuaginta supra sexcentas. Quidam septingentas, & amplius; octingentas numerant alij, sed quod posui à peritioribus *Geographis* magis probatum. De *Abassiarum* vocabulo à multis quæsitum scio. Satis constat, non ita eam veteres nominasse. Sunt ex recentioribus, qui sentiant corruptum accepisse nomen.

ab vrbe regia, dicta Ptolomæo Auxume, cuius ciuem fuisse ferunt Reginæ Candacis Eunuchum illum, in Actis Apostolicis Philippi Diaconi baptismo celebrum. Alij ab Abato, nonnulla literarum mutatione, ortam volunt Abassie vocem. Aiunt verò Abaton terræ plagam significare, auro, argento, gemmis, rebûsque aliis pretiosis abundantem, ciuium nobilitate & præstantia insignem, ædificiis illustrem, & omnium optimarum rerum copia affluentem. Talem demum eam regionem esse dicunt, quam Abassiam vocamus. Aliis placet Arabica, Turcica, & Æthiopica lingua idem Abassiam esse, ac gentem liberam, quæ nulli umquam externo Principi seruerit, nullius fuerit armis subacta, nullius tyranni sub imperium missa. Hos & proximè superiores ex imperitia linguarum, & earum rerum, quas Abassie attribuunt, falsitate facile possem refutare, si vellem: sed pretium non est. Ortum ctedo ab Ægyptiis nomen. Illi, ut Strabo ait, Abases vocant habitatas regiones, locis desertis & incultis circumseptas, quales istas esse, in quibus Abassia est, Strabo idem affirmat. Vero igitur similis, hanc nominis huius esse originem, sicut non paucis placet. Quando verò apud ipsam gentem usurpari cœperit, ignoro; nec vllum auctorem reperi, qui hac de re probabile quidpiam scriptum reliquerit.

Quàm latè patere dicatur Abassini Principis Imperium.

C A P V T III.

NOuus auctor, cuius illæ duæ sunt, quas nuper recensui, de Abassie nomine sententiæ, inter

extremas mediæ, prodigiosa tradit de Abassini Imperatoris potentia. Rarè enim sectatur communia, qui sponte discedit à recto. Ait ergo omnium Africano-
rum Regum esse primum; nulli Asiatico secundum; regnorum multitudine superare Regem Persarum; opibus & copiis Regem Sinarum; magno esse æqualem Chamo; latius, quàm Mosconitam dominari; Imperatore Turcarum esse maiorem, cùmque habere beneficiarium: denique quotquot per orbem vniuersum maximi & potentissimi Principes sunt (vnum dumtaxat auctor excipit) imperio, diuitiis, omni genere copiarum cedere Abassino. Quamquam verò huius Imperatoris potentia iam olim summa fuit, esse tamen his temporibus multo maximam; eo quòd Alexander I I I. sic Imperatorem quemdam nominat, quem anno dicit obiisse millesimo sexcentesimo sexto, & qui nunc regnat Zeras Chaureatus, præter eam regnorum multitudinem, quam à maioribus acceperunt, Rege Adeli acie victo, multa alia sibi regna subiecerint. Ergo Imperatorem Abassinum, præter ipsam Æthiopiam, cuius tantam ait esse longitudinem, ac tantam ferme latitudinem, quanta est Europæ totius, vastos insuper per oram maritimam possidere tractus terrarum. Per eam enim partem, qua Bonæ-spei promontorium in mare præcurrit, à flumine Spiritus sancti, quod à Lunæ montibus exiens tendit in meridiem, vsque ad Aromata (cui promontorio Guardafu hodie nomen est) leucis extendi plusquam octingentis. Extra fauces Erythræas ad partem occiduam, vbi est Babelmandel (ita locum appellant) ab vrbe Zeila, Aualite olim dicta, vsque ad Aromata, leucas habere centum viginti. Tandem ad Oceanum Meridianum ab ortu in occasum, leucas colligere

colligere octoginta. Plurima item per illas Africæ regiones habere regna, quæ pulsus Saracenis habitatoribus vi & armis occuparit. In his Doaram esse, quo in regno leucæ numerantur longitudinis nonaginta, quinquaginta latitudinis: esse Magadoxum longum leucis plusquam ducentis, quâ triginta, quâ quinquaginta latum: esse Gorgam, cuius in longitudine plus octoginta leucæ sunt, in latitudine viginti: esse Sibar longum leucas sex & quinquaginta, latum viginti esse Turutum centum triginta, & aliquot amplius leucas in longitudinem continens, quoad latitudinem aliis regnis par. Adhæc, plurimos esse reges potentissimos idolorum addictos superstitionibus, qui tributa Abassino pendant; partim, quodd ab eo armis domiti, sub eius venerint ditionem; partim quodd ad res suas tuendas magnum sibi esse videant in huius Monarchæ amicitia & societate præsidium: neminem enim ausurum bello lacessere, cui Æthiopicus faueat Imperator. Inter eos verò reges, qui eiusdem Abassini amicitiam donis ac tributis ambiunt, numerari Beafaranum, Medranum, Baramesensem, Jalosum, Sofalensem, Barbisinum, Sapensem, & præter complures alios, illum Monamotapæ clarissimum æquè, ac potentissimum Imperatorem, cuius ditioni præter vastissimas illas regiones, quæ ad Bonæ spei promontorium, qua ex parte se Lunæ montes in sublimem erigunt, longè latèque diffunduntur, innumeræ parent aliæ, leucas pæne octingentas immenso intervallo per oram maritimam complexæ. Denique reges illos, quibus diuisa est insula Madagascar, S. Laurentij vulgo dicta, cui nulla vniuerso in mari videtur esse magnitudine æqualis, vt sibi tanti principis beneuolentiam concilient, eiúsque fauore ab hostium armis

armis securi sint, illius se imperio sponte submittere, & tributa soluere. Hæc auctor ille, & alia multo plura, quæ referte piget. Vix autem dici potest, quantum omnia abhorreant à vero. In geographicis descriptionibus, in situ terrarum, in iplis regionum nominibus, tota denique in re apertissimi sunt errores, quos facio missos, quodd à quouis, vel mediocriter harum rerum perito, facillimè deprehendi possunt; & mihi abs re esse videtur, in hisce refutandis operam perdere. Qualis quidem Abassini Imperatoris hac tempestate potentia sit, quando auctor iste tantam esse dicit, quanta antea numquam fuit, inde colligatur, quodd èd deuenerit, vt non ab externis tantum, sed nec à suis etiam tutari se ac sua queat. Anni enim aguntur amplius quinquaginta, cum & aduersus vicinos Saracenos, ac Turcas, & aduersus Galos (gens Nigritarum est ipsi iure subiecta) imperium detrectantes, & in prouincias vi & armis irruentes, ab Lusitano Rege implorat auxilium, sine quo certum est extremum adesse Imperio periculum. Sed hac de re plura dicentur postea, vbi patebit in eas esse angustias redactum, vt parum ablit, quin prouinciis omnibus spoliatur; cum iam ex iis, quas prius habebat, non paucas amiserit.

Quinam Abassini Imperij fines.

C A P V T I V.

QUæ hîc proponam, ea nobis tradidit Ioannes Gabriel. Vnus hic est de primariis Lusitanis, qui in Abassia versantur; quique iam illic Lusitanorum legioni

legionibus cum summo imperio præfuit, expertus bello vir, fidèque, auctoritate, & consilio domi, ac militiæ clarus, nec morum tantum vitæque exemplo spectabilis, ac religiosè pius, sed multarum etiam peritus linguarum; & iis in rebus, quæ sinceræ fidei sunt, tantum eruditus, quantum est satis, vt cum doctissimis Abassix monachis, in quibus rerum diuinarum putatur esse scientia, cum certa victoriæ spe de religione congrediatur. Dignus tandem homo, cuius hîc laudes hoc elogio commendemus, quod & transferendis à Lusitano idiomate in Abassinum libris, fidei morumque doctrinam continentibus, assiduam valdèque vtilem Romanæ Ecclesiæ operam nauat; & eiusdem Ecclesiæ auctoritatem apud illas Æthiopum gentes omni ope tuetur; & matrem habet singulari vitæ sanctimonia insignem, quæ iam semel pro Romana fide publicè palàmque prædicata, ac defensa, leonibus fuit obiecta; quamquam ab iis diuino munere intacta è canea exiit, & vegetior corpore, & veritatis studio inflammator. Tradidit hic Gabriel, Abassinum Imperium sex & viginti regna, quatuordecim distributa regionibus, antiquo iure completti: ea verò vna includi linea, quæ ab Septentrione versùs Austrum, per vicina Rubri maris littora ad Oceanum ducitur; indèque modico in Occasum flexu, loca pertingit regno Melindi proxima; ex quibus ab Austro rursus in Septentrionem flectens ad Cairum; quam Memphim olim fuisse nonnulli volunt, terminatur. Octo priora regna ab insula Suaqueno alia post alia excutunt, versùs Solis occasum. Primum ex his quidam Tigrain, alij Tigrim appellant; longè latèque patet, & tractus continet iustæ magnitudinis septendecim, quorum cuique suus est præfectus, à quo

quo in bello æquè & in pace publicæ res administrantur. In hoc regno loca maritima tenent Turcæ; proximam continentem Saraceni; interiora Ethnici promiscuè, & Christiani. Miserè viuunt ob inopiam rerum. Nigro colore sunt & deformes. Nulla his in tota hac Æthiopia gens viuendi ratione & moribus peior. Tigrim excipit Dancali, sic aliud regnum vocant, quod ab ortu Solis, Rubri maris fluctibus aluitur; & inde tractu terræ perbreui, & infœcundo, versùs Occidentem extenditur. Incolæ Mauri genere, secta Mahumetani sunt, Abassino Imperatori vectigales. Sequitur Angote; aliud regnum est quod ab Eoa plaga Tigrim contingit, à mari remotius. Quartum regnum Boa dicitur; quintum Amara; sextum Leca. Ista quatuor solos Christianos habent incolas. Septimum peramplum est, septemdecim continens tractus, in quibus habitant partim Christiani, partim Ethnici, Abagamedri vocant. Sequitur deinde Dambea, duos tantum habens tractus; & permixtos cum Ethnicis Christianos. Ab altero Dancalis latere versùs Erythræas fauces, secundum maritimam oram, procurrit Aucaguerle, quod Oari fluuio irrigatur. Mauri habitant Abassino Imperatori re nulla subditi. Adelum sequitur gradibus ab Æquatore ad arcticum polum distans duodecim; vrbs in eo nunc Zeila, quondam, vt dixi, Aualites, mercatorum frequentia, in hoc etiam orbe, clara. Totum regnum Mauris incolitur, Abassino Principi infestissimis. Ex eo ille prodiit Gragna Mahumetanus Rex, qui cum iam ferè totam hanc Æthiopiam armis subegisset, ab Lusitanis postea multis victus præliis, & ad extremum captus, præscisso ab cernicibus capite, meritis nequitie suæ pœnas persoluit. Post hoc est Dahali, quod

quod regnum versùs Mombazam ad Æquatorem tendit. Incolæ partim Christiani, partim Sataceni, Abassino pendunt stipendia. Inde sequitur Oecie, quod intorsum vergit, & Abassino subiicitur, Mahumetanis pariter, & Ethnicis habitatum. Sequuntur deinde Arium, Fatagar, Zingerum. Hoc Ethniconum est, duo priora Christianorum. Decimum sextum vocant Rozanagum, Christiani habitant, Abassini imperio neutiquam subiecti. Hinc alia rursus in Septentrionem ab Austro funduntur regna. Roxa decimum septimum est, quod colunt Ethnicis. Goma vocatur, quod huic propinquum, Ethnicos, & Christianos Imperatori obedientes mixtim habens. Ad eam partem, qua Monomotapa est, Nerea vergit, regnum per amplum; incolæ, & Christiani, & Ethnici. Sequitur Zethè, cultum ab Ethnicis, Imperatori subiectis. Dein iacent Conche, Mahaola, Goroma. Duo illa haud grandia sunt, & solos habent Ethnicos. Tertium latissimè patet, Christianorumque, & Ethniconum viginti tractus continet. Magna ex parte circumcingitur Nilo, & pæne in eo insula est. Vix umquam vacat bello, variis hinc inde hostibus, aduersa signa circumferentibus: victus copia sic abundat, ut plures simul alere possit exercitus. Agri fertilitas causa est, cum bellis gerendis expetatur; cum Æthiopes isti alia in exercitu cibaria ferre non soleant, quàm quæ quisque sibi parauit; quibus consumptis in ea vertuntur, quæ rapere aliunde possunt. Quâ verò transeunt, locustarum more, demunt omnia. Soli tamen tanta est fecunditas, ut simul atque collectæ fruges, mox dentur terræ semina. Præeunt messorum, eos à tergo seminatores insequuntur: alia terræ cultura opus non est. Ex altera Nili

parte

parte, Ægyptum versùs, tria vltima iacent regna, Damote, Sua, Fasculum. Sua patrio idiomate Imperij cor dicitur, ob id, quòd prioribus annis præcipua eius fuerit sedes. Fasculum ad Cairum vrbem terminatur; Mahumetanos habet ex genere, Maurorum. In hoc regno ea via est, qua singulis annis Quadragesime tempore vis magna peregrinorum religionis causa ex Dambeæ regno Hierosolymam agminatim proficiscitur. Prouinciæ huiusmodi traduntur hac tempestate nomina. Prima Dubane dicitur, in regno Tigris est, Ethnicis Castribus habitata. Secunda Xuncho, in eodem sita regno: gentem habet genere Saracenam, secta Mahumetanam. Tertia Daraita in regno Angote, quam incolunt Christiani. Quarta Bora dicitur, inter Tigrim iacet, & Abagamedrim. Quinta Calaoa. Sexta Agaj, in his tribus homines viuunt Christiani nomine, cætera Ethnici. Septimam appellant Arimam, regno Dahali proximam. Octauam Arhum, in eam Xancalam, Zingero conterminam. Huic finitimam Xancoram, quæ decima est. Undecima, & duodecima Mahumetanos promiscuè habet, & Christianos; illi Suggamo. huic Bergamo nomen. Decimatertia, quæ Aris dicitur, vltra Nilum iacet, Mauris culta. Decimaquarta Euara nuncupatur, simul cum Mauris Ethnicos habens. Ex numeratis regnis præter Tigrim, Abagamedrim, Dambeam Goromam, vix aliud est, quod nunc Abassino principi obediat. Fatetur Æthiopes tertiam omnium partem, Lusitano Regi iure deberi, quod ita inter ipsos, & Christophorum Gamam Lusitanorum ducem conuenerit, quando is loca illa cum exercitu adiens, aduersus perfidas Mahumetanorum gentes cum iisdem Abassinis vires coniunxit, vsq; fœda superstitio

perstitutione, superbâque tyrannide communibus armis Æthiopiam liberarent. Cæterum nisi vi & armis Mahumetani pellantur, haudquaquam promptum est aliis artibus aut litibus occupatæ terræ possessionem quærere. Addam hîc quæ de amnibus & lacubus idem Gabriel narrauit. Quatuor esse dixit potissima flumina, quæ hanc Æthiopiam interluunt; totidem diuersis locis interiacere eximiæ magnitudinis lacus. Amnis primus, cui Tauceæ nomen, ab Austro tendens in Septentrionem, multis ante oram maritimam miliaribus arenosa absorbetur terra, occultisque subterlabitur meatibus. Vicinos habet montes mirandæ altitudinis, aditu pæne imperuios, loco munitissimos, in quibus Abassini habitant genere Iudæi, qui veteres etiamnum Mosaicæ legis caeremonias seruant: tanta sunt ferocitate, vt reliquis populis terrorem incutiant. Secundum flumen vocant Oaram: aquarum copia Nilum superat, & Zeilanum in pelagus se exonerat. Non iniucundos habet ad potum liquores: sed Abassini Christiani ob eam causam ab eis abstinent, quod Mahumetanorum irrigans terras, alimenta ipsis ad vitam suppeditet. Inanis superstitio. Tertius amnis Gabea dictus versùs Mombazam influît in mare. Quattus Nilus est, de quo cum à multis plurima dicantur, hîc ego dicam nihil. Lacus primus cæteris magnitudinè cedit, in regno Angote est, Aicha dicitur. Vocatur secundus Dambeabahar, quod nomen sonat Dambeæ mare; non procul distât à Gubbai, vbi nûc Imperatoris aula, si quando ex castris ad urbem se recipit; sexaginta circiter longus est miliaria, latus quinque prope, & viginti: vno ex latere Nilum findit: multa gignit piscium genera, multos item hippopotamos, à

quibus nonnullum est nauigantibus periculum. Cum proximis annis duo ex Societate religiosi ab Imperatore vocati scirpea rate lacum istum traicerent, tanta in eos irruit huiusmodi bestiarum multitudo, ut essent pæne desperati, nisi affuisset vis diuina, periclitantium precibus conciliata. Non pauca, sed exigua in hoc lacu insulae sunt, ad quas ablegantur coniuratores, nisi mulctentur morte. Lacus tertius in regno Oecie est ad Adelum, & Morabazam spectans, Zella dicitur. Quartus Xacala non procul distans à tertio; tanta utriusque longitudo est, quanta die vno percurri potest. Antonius Fernandus Societatis Iesu Sacerdos, ex quo deinceps non pauca referam, in Epistola quadam de Æthiopicis rebus anno 1620. sub initium Iunij ex Abassia Romam missa, Abassino Imperio plusquam quadraginta attribuit prouincias. Sed nihil à Gabriele differt; huius enim tractus multo longius, quàm Antonij prouinciæ diffunduntur.

Vnde Abassino Imperatori Preteiannis, seu Presbyteri Ioannis nomen.

C A P V T V.

QUOD Abassino Monarchæ regna multa, ut dixi, iure subiecta essent, Imperatoris obtinuit appellationem; patria enim lingua Acegus dicitur, quod Imperatorem sonat; quamquam & à nostris Rex, & à suis quoque Nigus, quod regem significat, sæpissime nuncupatur. Dicendum nobis hoc loco est, cur à quibusdam Pretiosus Ioannes, ab aliis Preteiannes, seu Presbyter Ioannes communiter appelletur. Quod
alij

alij Petrum Ioannem dixerunt, nimis abs re est; Pre-
teianum verò pro Presbytero Ioanne nominari. dua-
bus dictionibus, facilioris pronuntiationis causa, in
vnam coeuntibus, haud est ambiguum: vt autem
Pretiosum Ioannem auctores quidam appellarent,
causam Abassini dedere. Hi enim cum primum in
Europam venissent, & Imperatorem suum Presbyte-
rum Ioannem vulgo apud nos vocari agnoscerent,
speciosum titulum, quamuis errore, vt dicam, attri-
butum, retinere cupientes, multa & varia ex propria
lingua quæ fuerunt vocabula, vnde illam Presbyteri
Ioannis appellationem assererent deriuatam. Qui-
dam ergo finxere Belulgian, alij Beldigian, voces alij
alias, ex quibus Presbyteri Ioannis nomen irrepsisse
affirmarunt. Ex iis, qui primi Belulgiani vocem in
hæc loca induxere, vnus fuit Zagazabus ille, de quo
suprà narraui, Æthiopici Imperatoris ad Ioannem
III. Lusitanæ regem legatus. Alter eodem tem-
pore Petrus quidam Abassinus, qui Franciscum Al-
uarum Lusitanum Sacerdotem, ad Clementem VII.
ab eodem Imperatore missum, in Italiam est co-
mjatus. Prior ille Damianum Goëz, vt dixi, hic
posterior Paulum Iouium, vterque forsitan sine dolo,
in errorem induxit, dum à nobis pro Belulgian Pres-
byterum Ioannem dici affirmabant. Sed & vocem
hanc Belulgian aiebant ex duabus esse dictionibus
compositam; quarum prima, quæ est Belul, pretio-
sum, altera Ioannem significet; ac si nomine ipso vel-
lent indicare, nihil in orbe esse Abassinorum Impera-
tore pretiosius. Quod nouus auctor scribit, Zaga-
zabum non Belulgian voce duplici, sed vna tantum
Beldigian dixisse, Damianum verò, quia Lusitanus
erat, non percepisse Æthiopicam pronuntiationem,

nugæ sunt, cum cæteris reponendæ. Addit verò Beldigian dignitatis esse nomen, pretiosum dominum, siue inæstimabilis pretij gemmam denotans; aded antiquum, vt celeberrimæ illius Sabæ Reginae ætatem superet; in Amara enim, nobilissimo Æthiopiarum monte, vetustissima reperiri monumenta literarum, in quibus Abassini Imperatores ante eius Reginae ortum hoc iam titulo insigniri essent soliti. Hæc & quædam paria, quæ hac de re scribit nouus auctor, missa facio. Et id volo pro comperto haberi, Presbyteri Ioannis nomen, neque à Belulgian, neque à Beldigian, neque, vt alij voluere, à Naudgian, vel à simili alia Æthiopica voce esse deriuatum: sed Abassino Imperatori cum primum à Lusitanis cœpit agnosci, errore fuisse tributum. Nemo est, qui ambigat, sicut olim Ægyptiorum reges primùm Pharaones, deinde Ptolemæi, Mauritianorum Seriphij, Persarum Xerxes quondam & Artaxerxes, nunc Sophi dicuntur, ita Presbyteri Ioannis nomē regiam quorundam Christianorum Principum à longo iam tempore denotare dignitatem; hos verò non apud Æthiopes, aut in vlla alia Africæ parte, sed in Asia imperasse, peritiores conueniunt. Quo tamen loco Imperium habuerit, non est omnino compertum. Nam quod quidam scripsere, eos fuisse reges Cathai, magis dubiam rem facit; cum hisce proximis annis cognitum sit, quidquid Cathaium est, ad Sinas pertinere; nec urbem esse vllam, aut regnum hac dictum voce, quod nunc extra Sinarum terminos reperiatur; sic enim à Matthæo Ritio Maceratensi, Societatis Iesu religioso apud Sinas Præposito, geographica demonstratione prius inuentum, & postea à Benedicto Goëz eiusdem Societatis homine ex Goa profecto, Cathaiumque terrestri

stri itinere ex industria inuestigante, satis exploratum. Non crederem ego procul dissitum à vero, præter illam terræ partem, quæ Cathai nomine intra Sinarum limites à nostris reperta est, aliam esse orbis plagam multo ampliorem per Asiaticos Scythas, & Massagetas, vicinósque circum effusam populos, Sinarumque finibus à meridie & occasu coterminam, cui & Cathai, siue Chethai nomen fuit, & in qua is, de quo nunc agimus, Presbyter Ioannes maiorum nostrorum ætate principatum tenuerit. Nolo hîc proponere omnia, quæ de re præsentî apud varios auctores reperi. Duo dicam, quæ non videntur ab instituto aliena. Primum est, quid de vero Presbytero Ioanne opiner probabilius. Alterum, quæ Lusitanis fuerit errandi occasio, cum nomen istud Abassino Imperatori tribuere. Vt à primo ordiar, Magnus Indiarum Presbyter Ioannes (sic enim antiquiores historici ipsum vocant) Christianus erat, eorum de numero quos veneno suo Nestorius infecerat. In illis imperabat regionibus, quas ea continet Scythia, quam extra montem Imaum Ptolemæus constituit, à qua fortè nihil illæ provinciæ differunt, quas Paulus Venetus Teuduchum, Abrahamus Ortelius Argum, Ayton Armenius Tarsen, vocabulis aliis appellarunt alij. Ferunt tam longè latèque fuisse dominatum, ut duos & septuaginta reges, partim Christianos, partim Ethnicos sive subditos habuerit ditioni. Præterea in honorem Ionæ Vatis, dictum apud suos Ionanam: id autem fuisse omnium, qui Imperium illud tenebant, commune nomen, ut de Ægyptio Pharaone, de Mauritano Seriphio, de Sophi Persico dictum est. In his tamen occiduis Ecclesiæ Latinæ partibus Ioannem solitum appellari, addito presby-

teri vocabulo; non quòd is Sacerdos esset, sed quia Archiepiscopi primatis more, quando pacificis rebus prodibat in publicum, vnum habebat in comitatu, qui erectam crucem præferret. Ad bellum verò proficiscèntem duo præibant cruciferi, ex quibus auream vnus, alter ex pretiosissimis constantem gemmis gestabat crucem. Nec deerat cæremoniæ significatio. Ipso Crucis signo Christianæ se religionis defensorem Preteiannes prædicabat; ex aurea verò, gemmeaque salutaris signi materia volebat intelligi, quantum aurum gemmæque metallis ac lapidibus antestant cæteris, tantum se aliis totius orbis principibus excellere. Multos hoc Imperium annos floruit, donec ad Dauidem quemdam ventum, qui à quodam suo Duce, Cinge dicto, victus prælio, & Imperij gloria, & Presbyteri Ioannis nomini finem imposuit. Victor enim Cinges anno salutis centesimo octogesimo septimo supra millesimum, Imperator ab exercitu creatus, & à Scythiis receptus; pro Presbytero Ioanne Vlarcanus cœpit nūcupari. Inde quoque rerum Christianarum ingens strages consecuta. Sensim enim præualere contra Christianos Ethnici; diminui religio; gentilica sacra & inanum Deorum cultus inferri. Vnus tunc superfuit ex tanta calamitate Rex, qui Nestorianas collegit reliquias; nec ipse tamen dum vixit, nec deinde alij contra prævalentes Tartarorum vires, caput amplius erigere potuere. Et sunt hoc tempore per ea loca sub grauissimo barbarorum iugo plures huiusmodi Christianorum diuersæ turmæ, quibus inconsutilem Christi discidissè tunicam, haud impunè est; eadèmq; illi sors miserissima, quæ Græciæ pari piaculo contaminatæ. Non ignoro aliquos ab his dissentire, quæ de Presbytero

Ioanne

Ioanne dixi, sed ista mihi visa sunt vero magis similia; possemque rei propositæ non contemnendas in medium coniecturas asserere, si mea interesset, assensum a legentibus extorquere. Quo tamen errore Presbyteri Ioannis nomen Abassino Imperatori datum sit, iam apertum facio. Eo tempore quo novas terrarum plagas mariimo cursu Lusitani inquirebant, magna per Europam celebritate ferebatur Presbyteri Ioannis nomen. Dicebatur enim esse Imperator potentissimus, multorum regnorum dominus, religione Christianus; quo tamen esset orbis loco, erat incognitum. Ergo cum Petrus Couillanius, quem Ioannes secundus Lusitaniæ Rex ad eum Principem per mediterraneum primum mare, terrestri deinde itinere inuestigandum miserat in Asiatica India, ad quam deuenerat, audisset, in ea Æthiopia, quæ sub Ægypto est, principem quemdam esse longè maximum, qui Christianam profiteretur religionem, ad ipsum se contulit. Cumque multa apud illum reperisset, quæ de vero Presbytero Ioanne, constanti fama apud Europæos percrebuerant, credidit illum ipsum esse, qui Presbyter Ioannes dicebatur. Hic igitur primus fuit qui Abassinum Imperatorem eo cepit nomine appellare. Eum deinde cæteri imitati, qui consequentibus annis Æthiopiam sunt ingressi, eundem errorem facile in Europam inuexere. Licit nobis nunc quoties libitum erit, idem iam communi usu detritum vsurpare vocabulum, cum de Abassino loquemur.

*Quanta olim fuerit, quanta hodie sit Pre-
teciannis potentia.*

CAPVT VI.

Magnam huius Principis olim fuisse potentiam, nemo de rebus Æthiopicis scripsit, qui non id memoriæ prodiderit. Nec derogabit fidem, qui tot ipsum per Æthiopiam regna, tot prouincias, quot suprâ retuli, sub imperio suo habuisse animaduertet. Constare tamen debet, quod iam dixi, multo maximam tantæ huius potentiæ partem iisse pessum, & in dies singulos Abassinum Imperium magis magisque præcipitare; vt meritò timeri possit, ne paucos post annos miserabili percussam ruina penitus dilabatur. Oram enim maritimam sæuo premunt imperio Saraceni, qui magna ex parte Turcarum Tyranno vel beneficiario iure tributa pendunt, vel subiectionis subduntur lege. Per continentem terram plurimi partim Ethnici, partim Mahumetani sunt, qui ab eiusdem fide & obedientia, vt dictum est, recedentes, vel Turcarum Monarcham, vel nullum superiorem agnoscunt, suôq; iure viuunt, & arbitrio. Vt igitur Abassinus Imperator plurimum olim valuerit, nunc sic eius copiæ sunt accisæ, sic opes fractæ, & vires debilitatæ, vt imperatorium nomen vix sustineat, & contra vicinos hostes subditosque per totum Imperium in ipsius caput conspirantes ab externis principibus, vt iam dixi, auxilium cogatur implorare. Cùm florentes erant res, ad ostentandam maiestatem, non secus ac si diuinum quoddam esset Numen, ab omni
se

se hominum reliquorum consortio, vt ferunt, separabat; nec ab vlllo nisi difficile, multisque interpositis cæremoniis videri sinebat. Mahon etiam Tigrius, & Barnagassus, non spernendi reges, vix poterant eius alloquendi obtinere facultatem. Cùmque ipsius in conspectum dabant sese, ea erant externa corporis submissione, vt mancipia credi possent, principes non possent. Vbi quis de toto Imperio quacumque esset dignitate & magnitudine præditus, aliquem ad se Imperatoris nuntium venire audiebat, illic à superiori corporis parte detractis vestibus exibat domo, atque ad prima nuntij verba inclinato deorsum capite, terram manu tangebatur. Regum quoque legati ipsum adire erant prohibiti. Per imperatorios ministros tractabant negotia, iamque discessuri venerationis ergò ad pedis osculum accedebant: at ne tunc quidem digni habiti, qui Preteiannis faciem intuerentur, quam ille cyaneo habebat amictam velo, quoties in publicum prodibat. Ter se tantum in anno dabat populo conspiciendum, velo detracto; semel in ipsis Christi natalitiis; iterum eo die quo se idem Christus Magis præbuit adorandum; tertio cum assumptæ Virginis Deiparæ festus dies agebatur; cibum sumebat aureo in monopodio, nulla tecto mappa. Ferunt inter edendum ex veteri consuetudine fuisse solitum ante oculos habere vitreum vas cinere plenū, cuius aspectus diem extremum obiiceret comedenti; vt ea territus memoria rectam inter epulas teneret rationis semitam. Similia legimus fecisse alios viros principes, ne aut tumerent inter honores, aut inter voluptates diffuerent. De apparatu, de magnificentiâ, de multitudine ministrorum, deque aliis ad hoc munus spectantibus, maiora à scriptoribus dicuntur,

quàm credam. Ea si vera sunt, licebit in hoc imperio, ut in multis aliis, rerum humanarum considerare inconstantiâ, quàmque nihil inter mortales sit, quod magno in pretio haberi debeat. Ex hac enim magnitudine, ne vestigium quidem hodie conspicias, ut is tibi solus, & suspiciendus sit, & quærendus, qui semper idem ipse est, cuiusque anni numquam deficiunt. Subiiciam hîc, quoniam locus est, quæ novus auctor de Abassini Imperatoris redditibus & thesauris comminiscitur. Plurimis ille quidem, & amplissimis verbis supra fidem rem attollit. Nobis sat erit simpliciter & summatim referre, quæ scribit, & ea breviter, sed verè refellere, ut hac etiam ex parte constet, quàm nulla sit in reliquis, quæ ad nos spectant, & maius habent momentum, dignus fide. Quanti igitur sint annui redditus, ex tributis, quæ hac etiam tempestate à subiectis regnis Imperatori solui perhibet, vult colligamus. Ait regnum Goyame (in quo asserit ex lacu Cafate Nilo esse principium) annis singulis tributum loco præter immensam auri copiam, mittere tria mularum millia, totidem millia equorum, totidem ex gossypio telas, totidem denique basutos; sic appellari vult quædam lectorum stragula, quibus utuntur nobiles, aded pretiosa, ut nullum minus quàm undecim, multa viginti, ac triginta, non pauca etiam quadraginta & quinquaginta nummis aureis constent. Modum præterea describit, quo allata ex regnis offeruntur Imperatori tributa, planè ridiculum. Vbi inquit is, cui hoc negotium commissum (dici tributorum præfectus potest) ad Imperatoris palatium, siue papilionem peruenit, foris consistit, & contenta voce ter clamat, *A alto, a alto, a alto*, his vocibus Dominum vocat. Mox ab interiori parte vox auditur
alia,

alia, qua bis quæritur, quisnam aduenerit. Respondet
Præfectus, adesse quemdam, qui omnium sit dome-
sticorum minimus, quippe qui frænos equis, capistra
mulis imponat, aliæque eiusmodi abiecta & humi-
lia exequatur officia. Postquam verba ista ter repe-
tit, transire iubetur cum toto comitatu. Tum vene-
rationis ergò submittens caput, præter imperatoriam
domum hoc ordine transit. Præit ipse. Mox equi
sequuntur à singulis agasonibus singuli habenis du-
cti. Primi triginta ephippiis exornati, reliqui nudi.
Post equos modo eodem incedunt mulæ. Post mulas
feruntur basuti, à singulis hominibus singuli. Post ba-
sutos telæ gossypinæ complicatæ, & quibusdam vel-
uti capsulis inclusæ. Vnaquæque capsula recipit
telas decem. Capsulas singulas singuli portant baiu-
li. Tum ij sequuntur, qui vectant aurum. Permulti
sunt, & suam quisque in capite fert cistellam, serico
tectam tapete, partim rubri, partim viridis coloris.
Multa à tergo sequuntur militum millia, tributis cu-
stodiæ & securitati assignata. Atenim hæc tam im-
mensa bestiarum hominûmque caterua decem circi-
ter, vel duodecim consumit pertranscundo horas. Et
ista quidem è regno Goyamis. Barnagassium quot-
annis centum & triginta pendit equos, omnium, qui
possunt reperiri, optimos; qui propterea saltantes per-
transeunt, & veluti congregientes. Mittit etiam plu-
rimam valdeque pretiosam ex serico & gossypio ve-
stem, hominum multorum portatam humeris, &
militum armis custoditam. Regnum Tigrimahon
sericæ vestis, qua abundat, infinita propè mittit volu-
mina, ducentos insuper valentissimos equos, qui si-
cuti illi alij, veluti congregientes pertranseunt. Ita regna
cætera mittunt multa, & pretiosa, ex iis præcipue re-
bus.

bus, quarum sunt feracia. Præter hæc in quolibet Imperij regno, in quo proprius Rex est, vnam Imperator ciuitatem habet, quæ quod erat tributum suo regi persolutura, id Imperatori persoluit; ob hoc imperatoria ciuitas dicta. At hæc non semper eadem in eodem regno, sed annis singulis ab Imperatore noua ac diuersa deligitur. Habet item regna tria, quæ ad Imperatoris pertinent patrimonium, neque vllum alium præter ipsum agnoscunt regem. Hæc sunt Saba, Zambra, Cafate, in quibus ingentes diuitiæ sunt, & auri argentique fodinæ quamplurimæ. Regna imperatoria quintam soluunt rerum omnium partem, cætera decimam. Exercitus, quos vel ducit Imperator, vel ad hostes debellandos aliò mittit, expensis aluntur ciuitatum. Eadem ipsæ non militibus tantum, qui versantur in bello, sed iis etiam, quibus tum Imperatoris, tum montis Amara commissa custodia, stipendia soluunt. Cùm ergo Imperator præter eos, quos facit in alenda familia sumptus, nulla in re alia de suo quidquam expendat; quidquid verò auri tam facti quàm infecti à stipendiariis populis recipit, atque immensam opum aliarum copiam separatim reponat; efficitur vt ne cogitatione quidem comprehendere quis possit, quàm immensos habeat thesauros: de quibus iam per se ex mente eiusdem noui auctoris aliquid dicendum. In monte Amara (vt ait) cœnobium est, quod à sancta Cruce nominatur. In eo Abassini Imperatoris thesauri sunt, in quibus tanta est auri & gemmarum copia, quantam nullus omnino totum per orbem princeps, siue ex iis, qui nunc sunt, siue ex iis, qui vñquam fuere, habuisse narratur. Possuntque & Babylonij, & Persæ, & Græci, & Romani Imperatores, quibus amplissimas legimus

mus fuisse diuitias, si cum vno Preteianne conferantur, pauperes aestimari. Quinetiam magnum Alexandrum, de cuius opibus incredibilia memorantur, longè hac in re à Preteianne vinci, facile deprehendet, qui rem attentius considerabit. Isti enim Abassini thesauri, vt latè per Æthiopiam traditur, à vetere illa Regina Sabæ (tria iam sunt annorum millia, & amplius) initium accepere. Cùm igitur ab eo tempore immensæ quotannis illum in locum inferantur diuitiæ, quas quinquaginta nouem regna copiosè fundunt; nec inde quidquam, cùm opus non sit, vniquam auferatur: quantum diuitiarum necesse est in eos thesauros esse congestum? Denique vbi nouus auctor admodum multa & valde mirabilia hac de re profert, cui etiam videtur diuinæ fidei auctoritatem, adducto quodam è sacris libris testimonio, velle conciliare; ad extremum ex sententia quorundam, vt ait, Venetorum, ac Lusitanorum, qui quatuor amplissimas domos videre auro refertas, summam colligens, affirmat, tantum illic auri esse, vt vnaquæque domus, vsurpata nunc voce vtar, plusquam trecentos contineat milliones. Hæc de auro. Quod attinet ad gemmas, ait idem auctor, prope illa auri receptacula, aliã esse domum longè amplissimam ingentibus refertam capsis, partim ex cedro, partim ex ebeno fabricatis, egregiè politis, & firmiter obseratis; vnamquamque gemmarum esse plenam; rem verò ita dispositam, vt gemmæ omnes, quæ eiusdem generis sunt, iisdem separatim capsis contineantur. Cùm autem domus sit eximiè capax, & arcæ plurimæ, apertissimum esse, gemmarum varietatem esse maximam, numerum propè infinitum. Ad primum statim domus ingressum reperiri ait Smaragdos, nonnullis capsis inclu-

fos,

sos, cósque omnes pretiosissimos, quales solet *Æthio-*
pia gignere. Alias deinde capsas esse plenas adamā-
 tibus, humanam taxationem pretio, opinionem ma-
 gnitudine superantibus. Deceptos *Plinium*, ac *Solinum*, qui negarint, vllum esse nuce auellana maio-
 rem: in illis namque *Preteiannis* thesauris plurimos
 reperiri, qui digitum vincant longitudine, volam ma-
 nus latitudine. Varium in iis colorem cerni; sic o-
 mnes candicare, vt in aureum quidam, in cæruleum
 alij, in pallidum nonnulli exeant nitorem; atque his
 postremis multo maximam auctoritatem esse. Alias
 præterea reperiri arcas plenas pyropis, quorum in ni-
 gro flumine magna est copia, & laus potissima: tan-
 tam in quibusdam magnitudinem, vt pollicis æquen-
 tur. Ingenti in numero esse *Iaspidas ærizusas* ex la-
 cteo in cæruleum tendentes; *sapphiros* ex rubro ni-
 gricantes; fulgentes auro *Topasios*; *Balaxas* rosis pur-
 pureis similes; rubentes igne *Hyacinthos*. Quasdam
 esse capsas plenas *Chrysolitis*, quibus in *Æthiopia*
 minor est inter gemmas auctoritas; alias quoque pre-
 tiosis aliis refertas lapillis, quorum ex numero ingens
Achatum copia, & genus multiplex, colore distin-
 ctum; in quibusdam cum nigrore maculas esse albi-
 cantes; interlitum in alijs auro ruborem; in multis no-
 tas versicolores, & diuersis variegatum maculis splē-
 dorem. Plurimas item capsas *Margaritis* esse refer-
 tas; earum quasdam in Oceano Indico, alias in Nigro
 flumine, in Persico alias ortas mari; atque has postre-
 mas firmitate, colore, nitore cæteris præstare. Non
 eandem omnibus figuram; esse quasdam æqualiter
 rotundas, alias ouatas, alias feretes, alias planas, alias
 retortas; tantæ nonnullas magnitudinis, vt periti gem-
 marum compositores asseruerint, haud esse minores
 duabus

duabus illis, quas fama celebrat apud Cleopatram fuisse; centies sextertium æstimatas. Addit in eadem domo esse saxosæ cuiusdam rupis partem, pæne tri-
 palmarem, in Nigro amne repertam, in qua mille
 gemmarum differentiæ à natura sint insertæ. Appa-
 rere in ea Adamantas plusquam centum & sexagin-
 ta, quorum alij sint volæ pares, alij duos ac tres lati
 digitos; nullus auellana nuce minor; primæ omnes
 auctoritatis. Apparere plus quàm trecentos Smara-
 gdos, maiores quosdam, alios minores; plusquam
 quinquaginta carbunculos, omnium, qui possunt vs-
 quâ reperiri, maximos; apparere Sapphiros, Iaspides,
 Balaxas, Amethystos, Topasios, Hyacinthos, Chryso-
 litos, & bonam partem aliarum gemmarum, qua-
 rum adhuc ignorantur nomina, quæ etsi magnæ non
 sunt, pulchritudine tamen nullis cedunt. Addit item
 Imperatorem Davidem habuisse in animo hoc ad-
 mirabile, vt ita dicam, gemmarum textum, naturæ
 manibus in vno lapide fabricatum, Apostolicæ sedi
 dono mittere, cùm Paulus I I I. date illi in matrimo-
 nium Victoriæ Farnesiæ cogitabat: verum sicut
 ob ipsius Pontificis mortem initum matrimonium
 non est, ita neque donum missum. Hæc omnia scri-
 bit de Abassini Imperatoris opibus nouus auctor, &
 multa alia planè admiranda, tam promptè, tam con-
 stanter, & confidenter, ac si nihil esse verius queat.
 Ea tamen, & quædam alia, quæ de gemmarum com-
 positoribus à magno Hetruriæ duce Francisco Medi-
 ceo, in Æthiopiam missis, adiungit, ita perspicuè fal-
 sa sunt, vt superuacanea sit omnis refutatio. Quis
 enim tam hebeti erit iudicio, vt talia legens, non sta-
 tim videat fabulas narrari? Illud tantum hoc loco
 dicam, quod verissimū est, & à Michaelē Castagnoso
 memoriæ

memoriæ proditum; quo tempore nonnullas imperij sui terras à rege Zeilæ occupatas Lusitanorum militum armis Preteiannes recuperavit, aded thesauros nullos habuisse, vt cum eorundem militum quosdam, quibus erat in Indiam redeundum, remunerare cuperet, aliquot ipsis gemmas à matre, & ab alijs ad eam rem acceptas, veluti mercedis loco obtulerit, modestè inopiam excusans. At illi, inter quos Castagnosus erat, gratum regiæ voluntati animum exhibentes, dona recipere recusarunt. Quas verò in miseras, quantàmque in egestatèm, vt res humanæ sunt, hac tempestate Abassinus princeps deiectus sit, ex litteris eorum, qui in Abassia sunt, postea cognoscetur.

*Vnde Abassinorum Imperatorum feratur
ductum genus.*

C A P V T V I I.

QVi à generali orbis inundatione Æthiopiam per longa secula imperio tenuerint, quibusque appellati nominibus sint, auctores nonnulli scripsere: nec sunt veriti, quæ sub tantæ vetustatis latent tenebris, pro comperto tradere; aded nihil est quod humana inquisitio inausum relinquat, aut intentatum. Non ausim ego tam alè inuestigare harum rerum exordia: neque à Chuso incipiam Chami filio, quem ferunt aui sui Noëmi iussu in Æthiopiam profectum, illius iecisse fundamenta Imperij, quod Abassinorum postea fuit. Illud quoque omitto libens, quod est à Iosepho Hebræo traditum, & ab alijs acceptum,
Mosem

Mosē Israēlitici olim ductorem populi, dum adhuc in Ægypto sub Termutis filix Pharaonis tutela viveret, superatis bello Æthiopibus, cum eorum regis filia matrimonium simulate contraxisse, perque annos aliquot in Æthiopia regnasse. Opinor longè hoc à veritate abesse, quemadmodum eiusdem generis per multa, quæ hisce de rebus quidam, vel ad libidinem finxere, vel ab aliis ficta minus cautè approbarunt, & literarum monumentis dederunt. Vetustiora relinquo. Proponam aliquid, quod etsi ipsum quoque satis vetustum est, ut tamen ab illa antiquitate magis remotum, ita forsitan videri poterit magis propinquum vero. Constans est Abassinorum non magis sententia, quàm gloriosa quædam prædicatio, Imperatores suos ab Salomone Iudæorum rege genus ducere. Res ab iis accepta hunc in modum narratur. Insula in Nilo est, nunc aliqui vocant Elsamam, aliter alij. Iosephus ille, de quo suprà, nec pauci alij scribunt, eam à tempore Cambisis Persarum regis, à Meroe eiusdem Regis sorore, ibi defuncta, Meroem appellari cœptam, cum antea Saba diceretur. Ab hac insula, ubi tunc erat Æthiopiæ caput, profectam volunt Austri Reginam, ad tentandam per ænigmata sapientiam Salomonis. Ab urbe regia, ut aiunt, cum multo comitatu egressa Mazuam venit; conscensis ibi navibus Erythræum mare traiecit, appulitque ad Arabicum littus, ex quo terrestri itinere octo ferè dierum spatio, Hierosolymam petuenit. A Salomone filium dicitur suscepisse Melicham, seu Melilechum nomine: Hunc asserunt aliqui, ante matris in patriam regressum, in eadem natum urbe Hierosolymitana; & matre discedente in patris aula & cura relictum; ibique ad septimum vsque, aut octauum ætatis annum

sedulò educatum, atque ad matrem postea missum. Scribunt alij, discessisse Reginam conceptu grauidum, & in itinere puellū peperisse, in Æthiopia apud se educasse, vigintique agentem annos, cū iam esset imperio aptus, Hierosolymam misisse, vť ei pater, & aliquid impertiret infusæ sibi à Deo sapientiæ, & coram Arca testamenti diadema imponeret Æthiopici Imperij. Addunt insuper, cū sceptrum Melilechus sumpsit, aui sui nomen simul sumpsisse, & Dauidem vocatum; acceptisque à Salomone patre duodecim viris, sapientia & virtute præstantibus, singulis ex singulis Israëlitis tribubus, à quibus diuinam legem & sacras literas edoceretur, in Æthiopiam cum duodecim Iudæorum millibus discessisse. Ab hoc igitur Melilecho volunt Abassini, suos Imperatores ducere originem; neque illo ex tempore ad hodiernum vsque diem apud eos ex regia Dauidis stirpe defuisse, qui in Æthiopia imperarent. Hanc opinionem, quam ego apud Europæos ab Æthiopibus autumo natam, confirmat nouus auctor, sed parum firmè. Argumenta sunt, quòd ita esse in Abassinorum reperiat scriptū archiuis. Quòd & stemmata, quibus Æthiopicus vtitur Imperator, & tituli, quibus insignitur, rem eandem satis videantur indicare; leonem enim ipsi esse pro insigni, cum hac inscriptione, *Vicit Leo de tribu Iudæ*; eoque reges Dauidem, ac Salomonem, totamque Iudæ tribum fuisse vsam. Tituli in ea videri possunt descriptione, in qua cū Imperator genus declarat suum, ex Iudæ stirpe ortum se, dicit, Dauidisque & Salomonis appellat filium. Illud etiam eidem firmandæ sententiæ additur argumentum, quòd idem Imperator in urbem Hierosolymitanam, vti in paternum bonum, ius sibi arrogat hæreditarium. Sed quan-
ti

ti rationes istæ sint, haud libet expendere. Certum est, non minus incerta esse ex his quædam, quæ ad probandum assumuntur, quàm illa ipsa sunt, quæ proponuntur probanda. Nec mihi dubium, quin auctor iste, quæ in Abassinorum archiuis asseruari dicit rerum monumenta, numquam adierit; nec legerit librum, quem fingit sub hac inscriptione, *Historia Davidis, qui Melilechus aliter dictus est*, per vniuersam Æthiopiam lectitari. Militaria quidem huius Imperatoris signa cum effigie crucis leonem habere, nonnulli asserunt. Quod nouus auctor de inscriptione adiicit, etsi non credo, non tamen refuto. Scio Imperatores aliquot ex hisce recentioribus ad summum Pontificem literas scripsisse, nullo eorum proprio obsignatas sigillo, curatùmque à quibusdam Europæis in Abassia degentibus, vt aliquod ex Lusitania mitteretur, quod factum est. Non satis habet nouus auctor asserere per tot ætates, ac sæcula regium Davidis sanguinem, perpetua virorum serie, in Abassinis Imperatoribus integrum hucusque atque inuiolatum permansisse; verumetiam ait, eosdem Imperatores semper diligentissimè curasse, vt eas haberent in matrimonio fœminas, quæ claritate generis, & auita sanctimonia maximè essent illustres. Ob hanc causam lege fuisse cautum, ne vllus Imperator aliam uxorem duceret, quàm quæ ad vnum aliquem ex tribus illis regibus, qui iacentem olim in stabulo infantem Christum cum donis inuisere, genus referret suum. Vnum quidem ex regibus nomine Gasparem, affirmat fuisse patria Æthiopem, Melchiorem Arabem, Balthasarem Persam. Gasparis posteros auitum regnum, quod erat Saba, cuiusdam Imperatoris iussu cum Bernagasso permutasse: qui autem ex reli-

quorum regum erant stirpe, eos sæuiente per Arabiam ac Persidem Arianæ hærescos tempestate coactos fuisse solum vertere, regnisque relictis in Æthiopiam, in qua tunc integra ac sincera Christi fides erat, confugisse; ibi Imperatorem Ioannem, quem Sanctum Æthiopes vocant, Fatigaris regnum posteris Balthazaris, regnum Soæ Melchioris nepotibus dono dedisse. Ita factum, ut omnes, qui ex tribus illis sanctissimis regibus essent progeniti, in Æthiopia degerent; quorum masculis illud ait accidere mirabile, quod ab ipso statim ortus sui primordio, in altero corporis latere stellam habeant diuinitus insertam; idque adeo certum esse, ut anno Iubilæi 1575. ex tribus Magorum familiis tres Romæ visi fuerint adulescentes, in quibus illud stellæ signum à Gregorio XIII. Pontifice maximo, & à multis purpuratis patribus, aliisque principibus viris, qui religionis causa ad Urbem concurrerant, obseruatum sit. Cæterum hæc, & alia id generis à nouo auctore tradita, ob eam causam refero, ut intelligi ex iis queat, quam mereatur fidem reliqua de Abassinorum rebus ab ipso scripta, quæ videri possunt legentibus probabilia. Et verò quod de Abassinorum Imperatorum narratur genere, ab Salomone per Melilechum deriuato, rectè, ut opinor, docti & graues auctores docent, fabellam esse ineptissimam, neque creditu, neque auditu dignam. Non sum nescius, sic apud incolàs narrari, quod in illa, quam dixi, epistola Fernandius scribit. Sed ea Lusitanorum culpa fuit, quod illam ab ipsis acceptam Abassinis facile crediderint, literisque mandarint. Qui refutatam volet, eos legat, qui de Salomonis rebus non ita pridem scripsere. Nobis hîc otium non est. Certè ex prisceis scriptoribus, qui de Salomone,

& regi

& regina Sabæ tam multa tradiderunt, ne vnus quidem est, qui hac de re verbum fecerit, non scriptores sacri, non Rabbini, non Iosephus Iudaicarum rerum auidissimus amplificator, non denique vllus alius, cui haberi fides queat.

Hereditate, an electione fiat Abassinus

Imperator.

C A P. V T. VIII.

PROponam hîc breuiter, quæ apud varios historicos hac de re scripta legi. Sunt, qui dicant, Imperatorum filios ex ætatis prærogatiua solitos parentibus succedere: si filij desint, vnum deligi ex propinquis, non qui sit natu maior, aut mortuo Imperatori coniunctior, sed qui virtute cæteris excellat. Tradunt alij, liberum esse patri, quem velit ex filiis sibi decedenti substituere, nulla habita ætatis ratione. Apud alios est, rem hanc electione peragi; non ita quidem, vt ex vniuerso Æthiopum grege, aut ex qualibet eorum familia, sed ex imperatoria dumtaxat Imperator deligatur. Paucis hîc referam, quæ plurimis de hac electione nouus auctor componit. Describit primùm montem Amaram, quem indicat à terrestri paradiso diuersum non esse. Illum certè reliquis orbis terrarum locis longè antefert; paradiso verò ipsi, bonorum omnium vbertate, varietate, copia, rebûsque aliis, in quibus commendatio est, prorsus exæquat, si tamen ab eo differt. Monet deinde, Franciscum Aluatum, Lusitanum Sacerdotem, de quo dictum suprâ, quique montem vidit, cum multa de illo scripserit, nihil ferè

scripsisse, quod non abhorreat à veritate. Fuisse autem facile hominem decipi, quòd esset peregrinus, & Æthiopici ignarus idiomatis. Sibi tamen omnino vult haberi fidem, eo quòd omnia, quæ scribit, à suo illo, de quo dixi, antesignano cum cura acceperit, & ex fide referat. Ait ergo montem istum in media situm esse Æthiopia, Æquatori subiectum; figuram habere circularem; æquabili camporum planitie per octoginta circiter passuum millia in orbem circumdari; sic esse editum, vt dies integer ad ascensum necessarius sit; ita natura munitum, vt duro viuóque saxo vndique cingatur; sic extrema parte, qua saxeus est, læum, lenémque, vt humana industria & arte videatur politus. Saxum verò, quod montem ambit, vbi ad summum peruenit, omni ex parte æqualiter prominere, labrúmque efficere, quod vndique mille passibus foras prodit, & à parte externa ascensum ad montem penitus impedit; huic labro murum esse impositum affabrè & eleganter factum, ne inclusæ intra montem feræ, dum venatores fugiunt, ad extremitates cæco impetu delatæ ex alto præcipitent. In montis cacumine latissimum effundi camporum æquor, plusquam viginti continens in orbem leucas. Hoc in æquore meridiem versùs molliter collem exurgere, qui speculæ instar cuncta circum loca, quibus nihil esse queat aspectu iucundius, oculis subiiciat. Eodem in colle fontem erumpere perennibus pellucidisque affluentem aquis; & varios diuisum in riuulos, multiplici mæandro arua, prata, hortósque irrigare; ac tandem, collectis rursus hinc inde liquoribus, ad montis radicem præcipiti lapsu ex alto defluere, & lacum modicum efficere, ex quo fluuius exit, non longo inde locorum spatio suos cum Nilo latices permiscens.

Nullam

Nullam profus esse ad hunc montem viam, cum turris in modum æqualiter vndique erigatur. Vnam duntaxat portam esse, vt in arcibus solet, qua ingressus pateat; eamque & forma pulcherrimam, & materia robustissimam, & valida militum manu optimè munitam. Ab hac parte cochleam sine gradibus, in ipso excauatam saxo, varijs hinc inde fenestellis luminis peruiam, in sublime ferri; ita latam & ascensu facilem, vt ab imo ad summum nullo negotio eue-
dant equi. In medio cochleæ fabricatam ipso in saxo patentem aulam, tribus illuminatam fenestris. Hic rursus aliam esse portam à militibus alijs custoditam, per quam ad montis verticem exitus est. Nullum reperiri in toto monte oppidum, nullum pagum, aut vicum, sed quatuor & triginta perampla palatia magnificentissimè constructa, locisque latè diuisa, in quibus cum familiaribus suis habitant Imperij principes. Milites, & quicumque sunt alij, qui montem incolant, tabernacula habere, ac tentoria pro arbitratu mobilia. Duo esse vetustate, magnificentia, & artificio miranda delubra. Ante Sabæ Reginæ tempora vnum ex iis dicatum Soli, alterum Lunæ fuisse. Sed à Reginæ Candacis ad Christum conuersione, quod Solis erat, Spiritui sancto, quod erat Lunæ, sanctæ Cruci fuisse consecratum. Duobus hisce templis adiuncta esse cœnobيا duo, Magni Antonij Archimandritæ signata nomine, & statutis administratæ; mille & quingentos in vnoquoque religiosos vivere, partim monachos, partim equites, partim familiares, domesticis addictos ministerijs, & à sacrorum functionibus alienos. Esse in eodem monte hortos amœnissimos, floribus herbisque odoriferis, & arboribus confitos, mira varietate commendatis: quasdam

enim arbores vmbre, alias aspectui, alias gustui inferuire; nec paucas esse, quas nulla ferat pars reliqui orbis. Cum hisce numerari illam, quam Cubaium vocant; eius fructum esse malocotoneo magnitudine similem, intus album, foris croceum; comedi ut forbam, cum maturescit; fructus omnes, quos terra gignit, salubritate superare; restituere vites, & in longum vitam protrahere. Plurimos in eodem monte fontes esse, arte & natura eximie ornatos; plurima genera auicularum, modulata canentium, quas & versicolores pennae ita conuestiunt, ut videri nihil possit elegantius; rostra, cristae, barbae, quaedamque similia istis ignota locis, ita distinguunt, ut nihil esse queat peregrinis mirabilius. Nulla hic venenata gigni animalia, non bestiolas visu turpes, aut tactu molestas, non saevas, aut noxias animantes: sed illas tantum, quae humanis visibus, & venationi sunt accomodae. Hic mons ille est, ubi nonus auctor dicit, & Pretetiannis thesauros seruari, & bibliothecam esse, qua nulla ab orbe condito fuit, aut erit umquam librorum numero, aut antiquitate, aut praestantia, aut dignitate par; de qua nos aliquid postea referemus. Ait nulli aduenae hunc montem ascendere, vel adire concessum: ab eo quoque arceri foeminas, & a tempore Reginae Candacis, quae cum Eunuchis Indica illuc est introgressa, ut Imperij principes inibi tunc commorantes lustrali aqua mundaret, ad hunc usque diem nulli alij foeminae ingressum patuisse. Ait praeterea, omnes Imperatoris filios ubi octauum aetatis attingunt annum, ad hunc montem deferri; ibi educari, ibi adolescere, nunquam inde egredi, sed tamdiu persistere, donec vel ad imperatoriam euehantur dignitatem, vel reddant naturae debitum. Affirmat autem, consuetudinem hanc impera

imperatorios pueros in monte Amara includendi, ab Iosue Salomonis, & Regina Sabæ nepote fuisse institutam. Cùm verò postea Imperatores aliqui, naturali filiorum amore emolliti, eam intermiserint, Imperatorem aliùm nomine Abrahamum, cœlesti monitum oraculo, eandem iterum reuocasse. Principes, qui in hoc Amarano siue paradiso, siue carcere communiter degunt, aliquando esse sex, nonnumquam octo, quandoque duodecim, & plures. Vnumquemque suos habere famulos, suumque palatium mille diuersi generis, atque ingentis pretij peripetasmatis pulcherrimè exornatum; ex quo, si velit, ad simile aliud possit transmigrare. Esse enim, vt dixi, quatuor & triginta magnificentissimè præparata. Conuenire eos inter se, quoties lubet, vt vel de rebus variis serant sermones, vel tempus fallant ludo, vel deambulare eant, aut venatum, vel quid præstent aliud, quod ipsis placitum. Debere omnes rei diuinæ simul interesse, nisi quem morbus præpediat: ad id in destinatum locum conuenire; magno inde ministro- rum & cæremoniarum paratu in templum pergere. Plurima huius generis scribit idem auctor, quæ non vacat referre. Videamus iam quonam modo iuxta eius sensum ex his principibus Imperator deligatur. Ita rem proponit. Vbi mortuo parentatum est, vt successoris electio prosperè succedat, indicitur toto Imperio triginta dierum ieiunium, quod nemo, cuiuscumque sit status, & conditionis, debeat violare. Diebus iisdem de Spiritu sancto per omnia delubra sacrum fit. Interim supremus Senatus, penes quem in hoc interregno absoluta est imperij gubernandi potestas, statuit, vt quatuor ex iis regibus, qui Imperio subditi sunt, vt tres itidem Patriarchæ, totidem Ar-

chiepiscopi, tres Episcopi, omnes demum, qui tunc in Curia sunt cæterorum regum legati, in montem Amaram illicò proficiscantur, quo possint noui Imperatoris electioni interesse. Vetitum his, dum ad Amaram pergunt, vllum ad oppidum diuertere. Patientem in campo debent esse sub tentoriis, ac tabernaculis; ibi ipsis abundantissimè suppeditantur omnia, quæ ad victum necessaria. Postquam ij ad radices montis conuenere, legatus magni Abbatis, qui totius ordinis sancti Antonij magister est, coram adest, & certum ad electionem designat diem. Eo adueniente Imperatorij principes, qui in monte sunt, conueniunt inter se, & ad cœnobiū Spiritus sancti vnà tendunt, ibique animos confessione expiant, ac cœlesti cibo confirmant. Id ubi factum, ad suum quisque deducitur palatium, in quo veluti in conclaui, ita clauduntur, vt adiri, aut videri ab externis, vllumve nuntium vel ad aliquem mittere, vel ab aliquo accipere, nullo modo queant. Id verò vt incorruptè seruetur, custodes quidam, quibus id negotium seriò commissum, diligentissimè curant. Reductis ad palatia, & conclusis inibi principibus, tunc verò Reges, Antistites, & cæteri ad electionem vocati, qui ad radices montis præstolantur, intro recepti, montem ascendunt, & sancti Spiritus cœnobiū petunt. In eius cœnobij templo, aptis ad præsentem celebritatem induci vestibus, suo quisque sedet loco. Abbates duo, ad quos Imperatoris pertinet electio (ii sunt, qui Spiritus sancti, & sanctæ Crucis cœnobiis præfunt) sua habent in medio templo subsellia. Cum iis duo alij sedent eorundem cœnobiorum Abbates, quos vocant militares, quòd sint equitibus præpositi, & duodecim insuper ex iisdem familiis consiliarij. His compositis legatus

gatus magni Abbatis, qui totius ordinis, ut dixi, magister est, templum ingreditur, atque inter mediam sedens concionem, pauca quædam de electione præfatur. Tum Patriarcha vnus, is nimirum, qui ad sinistrum sedet altaris cornu, hymnum quemdam, in quo eadem, quæ in illo, *Veni creator Spiritus*, est sententia, iubet Spiritui sancto Chaldaica lingua decantari. Eo finito ordinis magister accersit ad sese Abbates electores, & aperto Euangeliorum libro iureiurando adigit, ut omni improbo animi affectu prorsus deposito, integrè ac sincerè ad interrogata respondeant, nihilque aliud in ipsa Imperatoris electione respiciant, nisi quod gratum Deo, & communi Imperij bono perutile fore iudicarint. Rogat igitur primùm, quot sint in illo monte Imperij principes, ex regia stirpe Davidis profecti. Deinde quam eorum quisque habeat ætatem. Postremò, ad quæ vel prouisi sint mala, vel propensi bona; quibúsque aut infecti vitiis, aut præditi virtutibus. Vbi hæc expedita; Abbates electores procumbunt in genua, eosque quidam alius Patriarcha, cui id munus datum, contenta voce, ita breuiter alloquitur. Vobis, Patres, hi Principes probè noti sunt, illorum enim, & prædagogi estis, & magistri. Non ignoratis, quonam illorum propendeant ingenia, quibúsque instituti moribus sint; rectè etiam tenetis, quo res Imperij sint in statu, & qualem exigant Rectorem. Ex iis ergo vnum deligite, quem creditis ad imperandum aptiorem, qui non suis, sed suorum seruiat vtilitatibus, idque rebus in omnibus potissimum sectetur, quod viderit æterno Imperatori magis acceptum. His dictis, Abbas Spiritus sancti, cuius primæ in hac electione partes sunt, eum nominans, quem magis idoneum iudicat. Hic, inquit, tales

les habet animi dotes, talia virtutum decora, & morum ornamenta; ob hanc causam dignum cenſeo, qui præferatur cæteris, & Imperij accipiat gubernacula. Meo igitur illum ſuffragio creo, declaroque Æthiopicum Imperatorem. Poſt hæc Abbas ſanctæ Crucis ſuam profert eadem de re ſententiam. Et verò ſi cū alio Abbate conuenit, Imperator eſt, quem conſenſu legunt: ſi autem alium iudicat præferendum, quod numquam adhuc contigit, ad Abbates militares, & duodecim conſiliarios res deferitur: iſque Imperator fit, quem ipſi creant. Eo autem creato Patriarcha idem electoribus præcipit, vt electum principem adeant, & in templum ducant. Ita faciunt. Palatium ingreſſi, paludamento quodam, ſancti Antonij inſignibus diſtincto, Principem induunt, mediūque recipientes ducunt in templum, & à quo ſit Imperatore genitus, coram omnibus patefaciunt. Tum princeps is ante aram maximam flexuens genua, dicentem audit Patriarcham, cuius talis fertur eſſe oratio:

Inclyte Princeps, te Spiritus ſanctus elegit, vt nobis imperio & auctoritate præſis. Idem te diuinus Spiritus regat, gubernet, illuminet, & cuncta doceat, qua ad munus tibi impoſitum riè ac rectè obeundum neceſſaria ſunt. Suam quoque tibi impertiat gratiam, vt quàm longiſſimam vitam proſperè traducas, atque omni & ſpiritualium & corporalium bonorum genere cumueris. Ab hac precatione magni Abbatis legatus, detracto paludamento, geminam principi togam induit. Interior bombycina eſt coloris albi, ad talos viſque demiſſa; poſterior cærulei, laciniata ſubſuta purpura, aureiſque in-texta ſtellulis. Illa candidos in ipſo mores deſiderat, vitamque ſine fallaciis, atque dolis, & ab omni alienam fuco. Hæc cælo ſimilem requirit, & aurea incenſum

centum charitate. Talibus induto principe vestibus, aureum Patriarcha monile, aureis quoque stellatum bullis, cum pendente inæstimabilis pretij gemma, in qua Apostoli Matthæi Æthiopiæ protectoris ac patroni insculpta effigies, in manus accipit, atque eius collo iniicit. Mox aureum capiti imponit diadema gemmis distinctum. Aureum item porrigit sceptrum in crucis speciem efformatum. Huic enim solum principi inter omnes, quotquot in toto orbe sunt, crux est pro sceptro. Hisce Imperator decoratus insignibus, postquam est ab eodem Patriarcha faustis precationibus ex veteri ritu diuinæ commendatus providentiæ, editum ascendit solium, miro constructum opere, umbellæque suppositum magnificentissimæ. Eo sedente, quatuor illi reges, suam quisque rem manibus gestans, ad solium accedunt. Ensem primus districtum tenet; Alter demortui hominis caput, impositum pateræ; Tertius vas terra plenum; Quartus foculum cum igne. Quibus ordine dispositis, Patriarcha rem quamlibet per se sumens, manûque tenens, quid quæque significet, longissima oratione explicat, de humana diuinæque iustitia differens multa, de siue rerum humanarum non pauca, multa de charitate principis in subditos, multa de felicitate perpetua iustis conferenda, deque æternis Inferorum flammis, quibus non minus regum, quam hominum cæterorum scelera puniuntur. Post hæc à sellis surgunt omnes, è templo exeunt, & vicinum peristylum solemnî pompa lustrant supplicantes. Hic autem procedentium ordo. Præit quidam de numero equitum: pectus illi tectum thorace ex elephanti confecto pelle; phæcasiis pedes; suræ purpureis atque auratis indutæ cothurnis; sub sericum gestat vexillum

lum coloris crocei, in quo depicta Imperij stemmata, niger nimirum leo pede dextero anteriori rubram tenens crucem, cum Æthiopica inscriptione, quam latinè reddes, *Vicit Leo de tribu Iuda, Æthiopia præueniet manus eius Deo*. Vexilliferum clauigeri sequuntur quatuor; aureæ illis in manibus clauæ; vestes humeris attalicæ ad mediam demissæ tibiam; caputum tegmenta polymita; tres in iis potissimum colores, candidus, cæruleus, ruber; addita plummea crista miræ pulchritudinis. Post clauigeros procedunt viri sex, ætate maturi, dignitate senatores, rectoribus urbium officio pares. Hos togæ tegunt, coloris atrii, quibus longæ laxæque manicæ; tales videntur, quales qui Venetiis dicuntur S. Marci Procuratores. Capita illis pilei operiunt, iis figura similes, quos Venetiarum vtuntur Duces; sequuntur regum legati; dein magni Senatus consilij; postea Reges: tum cum Patriarcha Imperator, dextram partem tenens, cui vestis sinum colligit magni Abbatis legatus. Postremò agmen claudunt quatuor illi cœnobiorum tum spirituales, vt vocant, tum militares Abbates, atque eorum consilij, hymnos, & psalmos, & quædam alia hunc in finem comparata decantantes. Perlustrato semel peristyllo, reditur in templum; vbi rursus Imperator solium ascendit, simulque reliqui suas repetunt sedes. Post hæc sex illi Senatores, vnà cum quatuor Abbatibus, atque eorum consilijis, ea se conferunt in palatia, quibus Imperij principes sunt inclusi, eosque militaribus sancti Antonij indutos vestibus deferunt ad Imperatorem; ad quem bini accedunt venerabundi, ipsique manum deosculantes fidelitatis & obedientiæ iusiurandum præstant. Idem post eos faciunt, primùm reges, cœnobiorum deinde præfecti,

fecti, & eorum consiliarij, tandem regum legati. His expeditis dimittitur concio. Ad ædes Abbatis Imperator, ad alia loca diuertunt alij; & quod est diei reliquum, cum sequenti nocte priuatim transigunt. Hæc nouus auctor de Abassini Imperatoris creatione, quæ falsitatis vitio laborare, sicut & plura alia eodem spectantia, quæ deinceps subdit, perspicuum est. Quod ad rem ipsam attinet, non est expeditu facile, quid olim fieri consueuerit: quid autem nunc fiat, haud est ambiguum. Certò scimus, quod apertius postea monstrabitur, euehi nunc ad Imperium, qui legitimum Imperatorem vita functum cognationis iure propius attingit, nisi ab aliquo conspiratore præpediatur. Præpediri autem non rarò solet, idque ex innata oritur facilitate, qua gens vniuersa ad coniurationes fertur esse proiecta. Hinc enim multa per hosce annos inter consanguineos exorta de Imperio bellæ; ac non ita pridem inter Iacobum, & Sacinum patrueles, postquam vltimus ante illos Imperator in bello occubuit. Hæc igitur tempestate si ius spectetur, constat hæreditate, non electione, acquiri Imperium; semper ita fuisse, non ausim dicere, sed probabilius. Quæ hac de re in antè memoratis Antonij literis scripta reperi lubet subiicere. Israël, inquit, nomine appellantur omnes, qui de imperatoria stirpe sunt. Nec vllus, nisi Israël, hoc est, ea de gente assumi potest ad Imperij fastigium. Ob hanc causam ne masculus vnquam ex hac progenie desit, qui Æthiopicum teneat principatum, curatum iam olim, vt imperatorium semen diligentissimè seruetur. Plurimi igitur ex eo etiam nunc in quadam prouincia degunt; altos ibi habitant montes, agros colunt, armenta & pecora pascunt. Si quando contingit, vt nemo
super

superfit, qui defuncto succedat Imperatori, ex rusticis illis eligitur vnus, & summo in solio collocatur. Quāquam verò Imperatores vnā dumtaxat legitimam habent vxorem; omnes tamen eorum filij, ex damnato licet nati consortio, patria siue lege, siue consuetudine parentibus succedunt. At is plerumque regnat, qui plus vi potest; has enim apud gentes, vti & apud non paucas alias, regnandi ius in armis esse creditur. Quæ de monte Amara tam portentosa & inaudita idem auctor scribit, quorum ne partem quidem minimam attigisse videor, valde ignorans erit, qui commentitia esse non intelligat. Quæ nobis tradiderunt, tum Abassini hac de re sine fuco loquentes, tum alij externi, qui ea loca peragrarunt, ipsūque montem sunt ingressi, & attentè contemplati, longè aliter se habent. Dicunt, præaltum esse, & situs natura munitum, atque in orbem efformatum. Quæ in cacumine planities est, non leucas plusquam viginti, vt ille ait, sed leucam circiter continere vnā; non item triginta quatuor ibi esse palatia, sed ædes tantū vnas, nec opere pulchras, nec aptè instructas. Aquam nullam, præter pluuialem exceptam cisternis in saxo excavatis. Cœnobium, quo tempore montem adiit Michael Castagnosus, vnicum erat, & ad quinquaginta sex in eo religiosi. Quæ fruges ex seminato solo singulis annis colligi possunt, vix homines mille sufficiunt alere. Est ibi pro terreni portione ouium, gallinarum, anserum, & occharum abundantia. Bibliotheca nulla, vt dicam postea; nulli neque auri, neque gemmarum thesauri. Arceri ab ingressu fœminas, & externos homines, planè falsum. Quando enim Christophorus Gama ad illum locum cum exercitu accessit, Emanuele de Acugna, & Franciscum Vellium, Lusitanorum

norum militum præfectos, cum aliis in montē misit, ut reginæ Claudij matri, cum tribus filiis, vno masculo, & duabus foeminis, grandique ancillarum cœtu, annos iam quatuordecim ibi degenti, aduentum suū nunciarent; & ad colloquium descendentem comitarentur. Hi duo præfecti aduenæ erant, & montem sunt ingressi, omniæque lentè & attentè lustrarunt oculis, ac sine fallaciis tradiderunt. Sed vereor, ne auctor iste dicat, nihil eos rectè potuisse obseruare, quia Æthiopici idiomatis erant ignari: nam & in Frāncisco Aluaro linguæ accusat imperitiā, & ex ea ortum asserit, quominus obseruare rectè potuerit, quæ oculis perspexit; quasi in Æthiopia non oculi tantum, sed os etiam atque lingua ad videndum requirantur.

Vbi sit Abassini Imperatoris sedes.

C A P V T IX.

A Pud diuerfos auctores diuersa reperiuntur hac de re literis tradita. Iouius in Xeuana eum provincia constituit, quod illa soli vbertate, cœli temperie, hominum ingenio cæteris Æthiopiæ regionibus excellat. In eadem multas ait esse Imperatori regias, & augustiora delubra. Apparet, ex hac provincia fuisse Petrum illum Abassinum, à quo se Iouius hisce de rebus instructum dicit. Apud alios legi in regno Cafatis Imperatorem esse. Ex his nouus auctor est, qui hoc in regno illum ait incolere urbem pulcherriam, ac florentissimam intra torridæ Zonæ latitudinem; quatuordecim ab Æquatore, versùs Austrum, dissitam gradibus; Zambram vocat. Celeberrima, inquit

quit, vrbs Zambra est. Incolarum numero, & ædificiis longè præstat cæteris, quæ tota sunt in Æthiopia. Triginta mille complectitur domos, ingentem in his habitantium multitudinem. Qui ad eam vndique perpetuò confluunt, numerari non possunt. Est in regno Cafatis prope Cafatem lacum, qui & vulgo lacus Zambrae ex ea dicitur. Quoniam verò omni rerum genere abundat, idcirco Abassini Imperatores, arua tandem, camposque & peregrinationes exosi, sedem ibi Imperij collocarunt. Habet latas, & rectas, ac spatiosas plateas; muros præaltos; firma propugnacula; amplas & magnificas ædes; delubra multa, & mito opere exornata; inter hæc imperatorium palatium est, & specie pulcherrimum, & maiestate augustissimum, & magnitudine amplissimum. In eo Preteciannes ipse habitat cum subditorum sibi regum filiis natu maioribus, & Augusta cum duabus & quadraginta regum filiabus, earumque pedissequis: habitant etiam vtriusque Senatus, Magni scilicet & Latini Consiliarij, de quibus dicam postea. Ad annum salutis millesimum quingentesimum septuagesimum ædificata est. Peritissimi illam architecti & opifices delinearunt, atque erexerunt, quos ea de causa magnus dux Hetruriæ ad Alexandrum III. Imperatorem in Æthiopiam misit. Huius vrbs forma eadem illa, quæ Florentiæ in Italia est. Æquabili iacet loco, & longa vndique præcingitur camporum planicie. Amoenissimos habet hortos, fontesque plurimos, & optimis ad potum aquis scaturientes. Cælo gaudet temperato, læto, sereno, salubri, in quo neque vmquam coguntur nubes, neque concreescunt nebulae, rarò pluuiæ gignuntur. Portus illi capax, & opportunus in lacu Cafate, ex quo ingens egressus a-

mnis,

mnis, urbē totam circumfluit, paululūque decurrēs,
& Aquilundæ fluuio commillūs, meridiem versūs
falsis Oceani fluctibus dulces latices cōiungit. Quid-
quid ad hanc urbem pertinet ad humana vota ex-
plenda credas comparatum. Si venatio expetatur,
non procul saltus sunt, omni genere ferarum abun-
dantes. Si placeat aucupium, plurimæ diuersæque in
vicinis agris ac syluis auium species; si piscatio dele-
ctet, Cafates adest omni piscium varietate refertissi-
mus. Si quid ergo est, quod in humanis rebus siue
ad vsum, siue ad voluptatem optari queat, id Zam-
bra, & ea quę circa Zambram, cumulatē suppeditant.
Hæc & alia auctor ille de sua Zambra, quam posset
aptius Nusquamiam appellare, quòd nusquam sit.
Aduertit autem, licet Preteciannes his temporibus in-
tra urbem degat, semper tamen in vicinis campis,
more pristino, Augustale habere, quod simul septem
mille & quingenti pedites, ab Imperij ciuitatibus
missi, & ex militari magni Antonij ordine sex equi-
tum millia vndique circumstant: at præter hos alia
sex equitum millia ex eadem Magni Antonij militia
ad Imperatoris custodiam in vrbe consistere. Hæc
omnia, & quædam alia, quæ de quodam Zambrae
amphiteatro lacui Cafati vicino, de ludis ferarum,
magno totius aulæ concursu & celebritate committi
solitis, de quę sexcentis aliis eiusdem generis idem au-
ctor scribit, commentitia sunt, ad ingenij magis osten-
tationem, quàm ad veritatis cognitionem composita.
Neque enim in tota Æthiopia vrbs vlla est, quæ
Zambra dicatur. Numquam is fuit, de quo sæpissime
loquitur, Alexander III. Imperator. Etiam nunc in
castris Imperatores habitant; quamuis in regno Dam-
beæ nonnumquam ad urbem diuertant, cui Gubay

nomen: sed ea urbs nec magna est, nec visu pulchra, nec illas habet ad usum vitæ, & animi oblectationem, quæ ab auctore finguntur, commoditates. Ostendam nunc, quod in hac parte caput est, numquam apud Abassinos extitisse Imperatorem illum Alexandrum, de quo nouus auctor tam multa scribit, quemque plurimis operis sui locis mirifice commendat. Ait in primis hunc Alexandrum mortuo Panusio accepisse Imperij habenas: Panusium autem Naumo successisse. Sed constat, Naumum patrem fuisse illius Dauidis, qui eo tempore, quo Rodericus Limacum Francisco Aluaro, & aliis triginta comitibus ex mandato Emanuelis Lusitani Regis Abassiam adiit, adolescens imperabat, & ad Clementem V I I. atque ad ipsum regem Lusitaniæ sub idem tempus legatos misit. Rursum cum de fundatione agit Romanæ domus sancti Stephani, quæ, ut ait, Indorum dicitur, eundem Alexandrum asserit successisse in Imperio Menæ; qui Menas, ut paulo post dicam, Adamas etiam vocabatur. Si fortè dicat Panusium etiam fuisse binominem, nec alium, quàm Dauidem Naumi filium (cuius tamen assertionis nullum poterit laudare auctorem) quoniam pacto tuebitur, Menam, & Panusium non fuisse diuersos, cum Menas hic, qui alius esse non potest, quàm Adamas, Dauidis fuerit filius, & Claudio fratri, anno prope vigesimo post mortem patris, in Imperio successerit? Loco alio scribit, hunc Alexandrum obiisse diem quo tempore viginti quatuor, ut ait, legati ad Pium V. ab eodem Alexandro destinati, sedente Gregorio X I I I. Pij successore Romam peruenerunt: alibi tamen affirmat, eundem Alexandrum anno millesimo sexcentesimo sexto è vita cessasse; quam inter mortem, & primam illam, anni intercessere circiter triginta.

triginta. Scribit præterea hunc Alexadrū anno Christi millesimo quingentesimo septuagesimo pepulisse omnes ex suis regnis Iudæos, & lege cauisse; ne quis eorum de genere pedem ampliùs in Æthiopia poneret; qui secus facere deprehenderetur, perpetuæ illum seruitutis pœnam incursum. Iterum verò alibi asseuerat, eundem Alexandrum eo ipso septuagesimo anno eiecisse tandem ex omnibus Imperij locis quotquot in iis erant per totam maritimam oram vsque ad Bonæ-spei promontorium de stirpe Saracenorum; & ea ratione Mahumetanis sordibus adedò terras suas perpurgasse, vt Imperium illud numquam antea, cunctis retro seculis, ad tantam magnitudinem & felicitatem sit erectum. Quando autem hæc contigisse narrat, adedò lapsum erat Imperium, vt nullo antè tempore maiori fuerit miseriorum mole depressum. Sed quid opus in re facili immorari? Qui credere potuerit, hunc Alexandrum bis fuisse natum, bis mortuum, bis in Imperio successisse, & fecisse plurima, quæ numquam facta sunt; is etiam credat, eum aliquando extitisse, & Æthiopiam gubernasse. Cæterùm neque ab annis prope sexaginta, quo ex tempore Religiosi Societatis in illis Abassæ regionibus commorantur; neque à centum, & ampliùs, cùm easdem peragrarè Lusitani cœpere, talem inibi Imperatorem fuisse, omnino compertum est. Nam quo tempore Rodericus Lima Lusitani Regis legatus Preteiannem conuenit, gubernacula Imperij tractabat Dauid, de quo dictum suprà. Vixit hic in Imperio annos triginta sex. Secutus deinde est Claudius eius filius, qui annos prope viginti rerum potitus, anno Christi millesimo quingentesimo quinquagesimo nono in bello occubuit. Claudio successit Adamas, siue Mena, eius

frater , qui quatuor tantum imperauit annos , & millesimo quingentesimo sexagesimo tertio , Februario mense abiit è viuis. Post Adamam tenuit Imperium Sarfa Denghel eius filius, qui Malac Seguetus, relicto priori nomine , voluit appellari , & ad annos Christi mille quingentos nonaginta sex, cum prius tres & triginta imperasset, naturæ concessit. Huic filius successit natus paruo, Iacobus nomine, qui post annos septem à suis captus, atque in Nereæ regnum missus cessit imperio , quod quidam eius frater patruelis armis occupauit. At hic vix vno exacto anno cum mille sexcenti & quatuor Christi nati agerentur, occisus à suis est. Rediit ad Imperium Iacobus , ex quo alterum post annum ab alio fratre patruele , cui nomen Sacinos, expulsus in bello occubuit. Satis constat ex hac Imperatorum serie , quam plurimis nostrorum Patrum literis certam esse scimus, longè esse à vero abhorrentia , quæ sunt de Alexandro illo tertio à nouo auctore composita. Sed eò forsitan confugiet , vt asserat Imperatorem illum , qui anno viuebat quingentesimo septuagesimo supra millesimum , plura habuisse nomina, & ex his vnum fuisse illud Alexandri, quod tot locis tanta ab ipso magnificentia celebratur. Nihilo tamen secius nodos, quibus se irretiit, neque hoc modo dissoluit. Is quidem, qui tunc temporis imperabat, Adamæ erat filius; ante aditum Imperium Sarfa Dêghel, postea Malac Seguetus, vt dixi, appellatus. At hic neque Naumo successit , qui ante annos circiter septuaginta decesserat; sed patri Adamæ, seu Menæ, sub initium anni millesimi quingentesimi sexagesimi tertij; neque obiit tempore Gregorij XIII. Pontificis maximi , nec proinde anno sexcentesimo sexto supra millesimum , sed millesimo quingentesimo nonagesimo

ſimo ſexto , annis ſcilicet vndecim poſt obitum Gregorij,totidem ferè ante ſextum & ſexcentefimum;neque vllos Romam legatos miſit,vt ſuum Pontifici offerret obſequiũ , & Romanæ ſedis auctoritatẽ profiteretur;quippe qui parẽtum ſuorum ſecutus veſtigia, hæreticis ſemper opinionibus adhæſit;neque Iudæos, aut Saracenos ex Imperio eiecit , cùm eo tempore, quo eiectos nouus auctõr fingit , & annos antè ſeptẽ, decẽmque , aut vndecim poſtea ita fuerit ciuilibus bellis , aſſiduĩſque ſuorum conſpirationibus oppreſſus,vix vt vñquam,dum vixit,refpirare potuerit.Imò per eadem tempora vna ex parte Galæ domeſtici hoſtes , ex altera finitimi Turcæ ingentes ſæpius in toto Imperio ſtrages ediderunt. Iam verò quod ait , ſuum illum Alexandrum,Ouiedi ſuaſu,Latium quemdam Senatũ , in quo res ad Europam ſpectantes tractarentur , de nouo inſtituiſſe , eĩque ipſum Ouiedum præfeciffe , haud poteſt cum veritate cohærere. Seguetus enim ab eo ſtatim tempore,quo imperare cõpit , vſque ad mortem Ouiedi , à Tigrenſi regno , in quo Ouiedus erat,vnius ſaltem menſis itinere ſemper abſens fuit;totõſque ipſos ſedecim, aut ſeptemdecim annos, quos idem Ouiedus Segueto imperante vixit, neque Imperatorem vidit, neque vllas ad eum literas dedit;quod ipſe eiũſque ſocij ad Goanos,& Europęos patrẽs non ſemel ſcripſere.Addendum inſuper neque Alexandrum illum, qui numquam fuit, neque Imperatorem alium , qui temporibus illis fuerit ex Æthiopia Iudæos pepuliſſe:quin etiam ipſos Abaſſinos Moſaicam legem cum Chriſtiana coniungere ; & plurimos adhuc apud eos degere genere , & ſecta Hebræos,vt iam dictum eſt,& iterum dicetur. Quod ad Saracenos attinet , nihil dici poteſt à veritate diſtan-

tius,quàm quodd eiekti omnes ab Æthiopia sint,quot-
 quot per oram maritimam vsque ad Bonæ-spei pro-
 montorium illas occupabant regiones. Quis enim
 vniquam Preteciannis ditionem ita latè extendit , vt
 promontorium illud ad eam senferit pertinere? Nam
 etli olim aliquot in Erythræo mari portus tenebat,
 quos tamen omnes vi & armis Turcæ occuparunt;
 Oceani quidem fines numquam ditione attigit; ne-
 que principes illi, qui iis in locis, multoque minus,
 qui in insula Madagascare, dominabantur, ipsi vni-
 quam stipendiario iure fuere obligati. Sed iam com-
 mentitio hoc Alexandro tantarum tamque mirabi-
 lium rerum patratore omisso, ad rem propositam re-
 deamus. Reperio Abassinum Imperatorem, cùm res
 Imperij florerent, in castris & tentoriis habitare, at-
 que infinita hominum stipatum multitudine huc &
 illuc vagari solitum; cùm imperatoria celsitudine, &
 dignitate (sicut olim Arabes, Persæ, & Parthi) repu-
 taret indignum, in vrbibus commorari. Vbicumque
 tamen ponebat castra, vrbs derepente ex holoserica
 varij generis & coloris materia, vt ferunt, consurge-
 bat, qua nulla ex cæmento & calce, ex latere ac li-
 gno multos per annos strai posset elegantior, aut ar-
 chitecturæ legibus magis consona. Erant suis quæ-
 que locis aptè disposita, cælitum delubra, ædes, offi-
 cinæ, tabernæ. Nulla munerum perturbatio, nulla in
 operibus confusio. Nemo ignorabat ad quam cœli
 plagam haberet domicilium: vbi templa surgerent,
 ad quæ precandi causa vellet accedere; qua ad illa
 eisset eundum via. Latæ inibi erant plateæ, variis se-
 mitis ac tramitibus intersectæ. Non deerant biuia,
 triuia, & quadriuia; quique ad alios vsus vel actus in
 vrbibus, vel angiportus solent inservire. Viscebantur
 ædificia

ædificia quædam, alicuius straguli communione veluti muro, aut pariete coniuncta; alia proprio cincta circuitu, insulisque discreta. Vnum cauponæ locum, alium Xenodochia, diuersum occupabāt nosocomia: Ad pinsendam subigendamque farinam, & conficiendos panes, erant pistrina, & loca cætera, quæ ad idem ministerium necessaria. Ad superfluos barbæ capitisque capillos refecandos, tonstrinæ. Ad efficienda ac reficienda calceamenta, sutrinæ. Multiplex tota vrbe forum; multiplex macellum. Variæ pergulæ, quibus singula mercium discriminabantur genera, venum exposita. Vt quæque fors hominum officiis, ita locis vicisque distinguebatur. Habebat iuuentus vbi ludere, aut exercere se posset; siue de equorum pernecitate certando, hippodromos; siue imaginario prælio inter se concurrente, catadromos; siue lucta vires experiundo, palæstras. Denique quidquid in magna ac bene constituta exigitur vrbe, id in ea reperiēbatur; cuius tanta fuisse fertur magnitudo, vt à principali foro, quod vrbe erat in media, ad ipsum Imperatoris augustalē lata rectaque via quatuor pæne milliaria continerentur. Solebat in editiori loco Imperatoris figi tabernaculum, vt ex eo, qui ad maius illud forum populi concursus fieret, quove ibi tumultu res agerentur, commodè conspici posset. Aiunt vrbs huius dimentientem lineam ad decem ferè milliaria, ambientem ad triginta solitam excurrere. Vt ea ab vno loco mutaretur in alium, quod frequenter fiebat, præter infinitam baiulorum multitudinem, magnamque vim camelorum portandis oneribus comparatam, mulæ erant ad id munus plus decem mille clitellis instructæ; quæ tamen omnia tantæ machinæ vertendæ, vix sufficiebant. Habitat etiam nunc, vt

dixi, in castris Imperator; nisi cum Gubaym diuertitur, quod facit aliquando: sed illius veteris magnificentiæ vix vllum hac ætate vestigium conspicitur.

Qualis Abassini soli conditio.

C A P V T X.

NOuus auctor, quas prisca auctores generatim de terra laudes proferunt, eas vult omnes Æthiopiæ suæ potissimum deberi, quod nulla pæne res sit ad humanæ vitæ siue necessitatem, siue vtilitatem, siue oblectationem comparata, & inuenta, quæ in Æthiopia desideretur. Omnium, ait, abundare metallorum fodinis. Auri tantam esse copiam, ut non solum eruatur è terra, sed in fluminibus etiam, ac præsertim Nigro, inque ipsa soli aquis pluuiialibus aliquantulum excauati extima superficie copiosè reperiatur. Plures in regno Damute, quàm in quouis alio, auri fodinas reperiri; & aurum ibi, quem alibi, multo esse pretiosius; ideoque maiorem ex eo loco, quàm ex alio, ad Preteiannem copiam deferri. Ex regno quoque Goyamæ, ubi Nili fontes sunt, multum auri extrahi. In eo paucas quasdam ad proprios sumptus accepisse auri fodinas Helenam Augustam, atque ex iis erutum aurum, ex quo puro ac defæcato templi cuiusdam, quod ipsa suæ dicauit sepulturæ, tota atque integra ara maxima suo cum frontali, & immane simulacrum, eidem aræ impositum, miro artificio fabricata sunt. Argenti tantam esse abundantiam, ut fiat nihil, & ob eam causam in Preteiannis thesauris locum non habere. Præteritis annis antequam cum Europæis

Europæis commercia *Æthiopes* haberent, magno in pretio salem fuisse, & præcipuam magisque communem pecuniæ materiam. In *Balgada* prouincia è lapidicinis, vt nunc in *Catalomnia*, frustatim extrahi solitum. Frusta singula longa fuisse palmum cum dimidio, digitos lata quatuor, alta tres. Vt quæque regio magis minúsve à salis loco distabat, sic in ea maius minúsve pretium illa frusta habuisse. Nunc & huiusce pecuniæ extinctum vsum, & valde diminutum salis valorem, cum *Æthiopes* ex marina aqua illud efficere sint edocti. Quod ad fruges & fructus attinet, nihil *Æthiopico* solo fingi posse feracius; tritico, secali, ordeo, oriza, milio, panico, cicere, phascolo, eruo, erulia, lente, & plurimo alio abundare legumine, nobis ignoto. Nullum verò eius genus esse, ex quo simul, & panem ad vescendum, & vinum ad potandum non conficiant. Duo gigni tritici genera; alterum *Abassinum* dici, quod perfectius; alterum *Ægyptium*, minus perfectum. Huius grana magnitudine pineos adæquare: ita crescere, vt calami celsitudo hominem superet equo infidentem. Singulis annis in eodem terreno vtrumque seminari. *Ægyptium* Ianuario mense meti; *Abassinum* Septembri. Omnia legumina in eadem terræ parte ter quotannis prouenire. Sic & milium, idque ad iustam hominis excrecere altitudinem. Multas olerum, multas herbarum esse species, quas terræ nostræ non ferunt, esui aptissimas; cepe, & allia in eo solo non gigni: sæpius id tentatum, numquam respondisse. Vtrumque genus in pretio esse, illucque è *Perside* importatum, & donis inferuire, & mensis lautioribus. Plantarum tum specie, tum varietate differentium nullum esse numerum. Neque ipsos *Æthiopes* habere nomina, quibus tot genera distinguant.

Multis

Multis locis sic esse spissas, & inter se coniunctas, ut nullus supersit ad ingrediendum aditus. Glandes, castaneas, nuces, robora omnino desiderari, nec magnam utriusque populi, albæ, & nigre, esse copiam. Cupressum nullibi surgere, neque crassiorē, neque proceriorem. In cœmeteriis frequentem cerni, ut præflagam mortis & mœstitiæ indicem. Defuisse prius oliuam; aliunde adductam fructum reddere abundantissimum. Quæ medicæ citriæque mali de genere sūt, terræ sponte procreari, vlla sine cultura. Platanum, cedrum, ebenum, pluresque alias pretiosæ materiæ arbores ingenti esse in numero. Non deesse, quæ dulces ferant fructus, ficum, pyrum, malum punicam, & plātas similes, inter quas tum Palmam, tum etiam illam, quæ Indica ficus dicitur, figura, fructu, utilitate, significatione omnibus seculis planè mirabiles. Fuisse prius vites in tota Æthiopia perpaucas, ex quibus modicum colligebatur vinum, Preteianis, & Abunæ sacrorum prælidis potui vix sufficiens; Hispanos, ubi illic sunt ingressi, vineas plantasse, tantamque hoc tempore esse vini copiam, ut inde in Libyam, Nubiam, Congum, omnesque Nigritarum regiones, in Arabiam, in Persidem, in Indiam, in Taprobanam, in regiones Sinarum, multasque alias Orientis provincias inter reliquas merces vinum exportetur. Infinitam propemodum produci florum multitudinem, & varietatem; sicque agris omnibus, & hortis ultro atque omni tempore innasce, ut Æthiopiam iure possis florentem terram, & ver perpetuum appellare. Omnes ibi, quotquot in Europa, atque in Peruana, & Mexicana regionibus sunt, florum species reperiri, permultasque alias cæteris peregrinas locis. suum cuique speciei odorem, suum colorem, suam pulchritudinem, suas

suas demum proprietates, ac vires, bene incolis no-
 tas. Inter floriferas herbas vnam esse, quæ aliis ab lo-
 cis omnino exulat; longum habere scapum, heliotro-
 pij instar, frondes hederæ similes, florem in capite vnū
 magnitudine eximia; in eo flore folia mille, tanta co-
 lorum varietate distincta, vt nullus ibi deesse videatur
 ex iis, qui cæteris sunt in rebus. Nihil eodem flore ex-
 cogitari posse, aut visu pulchrius, aut odoratu suauius.
 Præ illo sordere rosas, lilia, hyacinthos, violas, narcis-
 sos; foetere moschum, zibethum, ambarum, & quæ-
 cumque alia in toto orbe odoramenta sunt, & odo-
 rum compositiones. Solis motum sequi, longè diuer-
 sa ab aliis solaribus herbis ratione. Cum primum Sol
 à meridie in occasum declinare incipit, florem istum
 paulatim pandere sese, & folia explicare; quo verò
 magis aperit sinus, redolere efficacius. Sub noctem
 omnino explicatum, quàm longissimè suauissimum
 halitum eiaculari. Vbi ad noctem mediam ventum,
 tum verò Solis accessu veluti indignatum colligere
 folia, odorémque retrahere; atque ita ad meridiem
 vsque clausum permanere. Inde iterum paulatim ape-
 riri, & odorem exhalare. Æthiopes vocare hunc flo-
 rem Ghoyaulam, hoc est, florem Lunæ, eo quòd no-
 ctem & eius astrum videatur amare, diei ac Solis ini-
 micus. Addit præterea, suo naturam flori diligentem
 adhibuisse custodiam. Auiculam enim pulcherrimam
 esse, Supiniminim ab Æthioplous dictam, innumeris
 distinctam coloribus, figura & magnitudine cardueli
 parem. Hanc à meridie ad noctem mediam, quo tem-
 pore explicatus flos est, haud vmquam ab eo recede-
 re. Perpetuò circum volitare, nec pati, vlla vt avis aut
 bestiola prope accedat. Parua animalia, arrepta rostro,
 vel deuorare, vel ore comminuta & occisa deiicere
 in

in terram. Alites maiores, & viribus magis pollentes, cum quibus congregari non audent, magnis, & oris vociferationibus, & alarum clangoribus procul abigere. In minores irruere violenter, easque rostro, alis, pedibus, ac toto corpore à flore suo arcere. Cum omnino apertus flos est, si quid in eo videtur sordescere, rostro mundare, singulatim eius folia percurrere, aptando, concinnando, adornando. Deinde alis expansis toto pectore spiratum excipere odorem, halitumque ebibere sibi salutarem. Demum insidere flori, & suavisimum inibi solui in concentum. Hunc esse excubantis auiculæ à meridie ad noctem usque mediam assiduum laborem: tunc enim, flore penitus clauso, recedere, quod lubet, usque dum iterum incipit aperiri: eo namque tempore rursum redire, commissum à natura fidei suæ florem custodituram. Dura infelicis auiculæ conditio, quæ pro floris sui defensione cogatur assidue rixari, & bonam semper noctium partem insomnem ducere. Pergit idem auctor Æthiopicas explicare gazas. Magnam ait telæ bōbycinæ omnibus locis esse copiam, & nobilitatem. Vermiculos partim in ipsis moris, quarum frondibus aluntur, partim intra domos, adhibita artis industria, procreari, & adulescere. Apum examina nullibi plura, nec ad mel & ceram aptiora; causam esse florum tum copiam, tum præstantiam. Terrestrialium animantium tantam multitudinem, & varietatem, quanta, & mensis ad victum, & theatris ad voluptatem potuit natura largiri. Rhinocerotæ esse, peregrinum Hispanis, sed notum animal, *Abadam* vulgo dictum: Græcum nomen Latinis receptum, habere à cornu, quod surgit à nare, quatuor longum pedes à lato desinens in acutum, cum modica cuspidis ad superiorem partem inclinatione. Colorem

lorem bestię buxum ; corporis machinam tribus simul bobus parem magnitudine. Breuia habere crura pro vastitate corporis;oculos exiguos, paruas auriculas, easque acutas, & rectà in altum tendentes , equinis similes. Ingens illi caput;caudam sine pilis, & contractam. Toto corpore crustis tegi, testisve adè duris, nullo vt telo , vel ferreo globo vi ignea contorto penetrari queat. Cum elephanto , quo cum naturales gerit inimicitias, pugnam initurum , cornu acutere ad saxa;vt hostis aluum, quæ illi pars mollior est, in dimicatione petat. Animal esse natura sylvestre , indomitum, ferox, superbum; nulla arte viuum capi, postquã adoleuit. In regno Goyamæ ad radices montis Lunæ, vbi Nili fontes , non alibi reperiri. Ibi à venatoribus occidi dolo alicuius simiæ, extensum eius in terra corpus blandè & fraudulenter tiuillant. Cornu contra venena expeti. Putari efficacius , cùm certo Lunæ tempore bestia interficitur. Esse in eadē Goyamæ regno Monocerota, sed rariù visum : inaccessos incolere Lunæ montes ; inde ad plana aliquando descendere, cornua mutare, vt ceruum; & hæc ab agricolis reperta indicio esse, bestiam montem habitare. Haud esse illi, qui vulgo pingitur, similitudine parem; corpus habere elephanto pæne æquale , & similes pedes ; colore ac pilis referre bubalum; capite aprum; cōditione suem, cùm cænosa amet loca. Nigrum illi media in fronte cornu, durum, & cuspidatum ; linguam sentibus plenam ; dum lambit, carminare. Elephantorum magnā copiam ; quinquaginta turritos ad bellum conducere Preteiannem, cùm lubet. Animalia illa, ex quibus zibethum colligitur (Hispani ob similitudinem feles vocant) adè multa esse , vt quælibet domus aliquot ex iis nutriat. Notū satis, qua natura sint, qua forma,

quo

quo loco zibethum gignant, quo pacto genitum red-
dant. Esse & alias odoriferas animantes, quarum non
ignoti in Europa odores. Camelos, seu Dromedarios
(eiusdem enim videri esse naturæ) plurimos, atque in
vectandis oneribus valde utiles, & vsitatos. Equos
etiā plurimos, & optime plerosque notæ. Omnia item
iumentorum genera, vectaria, plaustraria, molaria. In-
ter hæc mulas ad equitandum præstantissimas. Vrsos,
tigres, leones, ceruos, capreas, lepores, cuniculos, & id
genus animantes forma & natura diuersas. Nonnullam
ouium differentiam; quasdam ingentes habere auri-
culas, gallici instar canis, & longissima colla, vt ha-
bent ærui, aut peruani galli. Alias habere caudas
adeò crassas, & pingues, vt quindecim, aut sedecim
libras singulæ pendant. Caput his cum collo nigrum,
cætera alba. Alias toto albas corpore, barbas habe-
re capris similes, longitudine tanta, vt iis, cum gra-
diuntur, humum verrant, quod & caudis faciunt:
omnibus his carnem esse ad vescendum optimam.
Bouum quoque miram varietatem; omnes magnitu-
dine & firmitate superare Europæos. Syluestres gre-
gati ingredi, trecenos, & quadragenos; magnam
pascentes inferre agris stragem; ob id colonis, à qui-
bus sagittis & sclopetis configuntur, grauiter inuisos.
Inter syluestres colore quosdam prorsus nigro, &
cornibus ramosis, qualia sunt ceruis; alios vnum dum-
taxat in fronte habere, vix palmo maius. Simiorum
ingentem numerum, & varietatem. Hos quoque
gregati per agros syluâsque vagari ad ducentos
simul, ac trecentos. Quosdam admodum exiguos
esse: alios magnitudine tanta, vt cum posterioribus
solum nituntur pedibus, in altum leuatis prioribus,
iustam hominis adæquent staturam. Nonnullos ef-
fe

se rostro porcis similes, pectore leonibus, cætera simios. Maximam his inesse feritatem, & sæuitiem. Omnibus communiter inuatum calliditatem, ac turpitudinem. Quidquid apud nos vel ancillæ domi, vel in vrbe serui, vel in agris operæ faciunt, id in Æthiopia præstare simios. Nec lupos, nec vulpes, nec canes tellurem ferre. Hosce vltimos aliunde sæpius delatos paulatim extabuissè. Canum loco esse pantheras; per vrbes vagari, neque nocere, aut sæuire, nisi irritatas. Inferuire venationi, equorum clunibus post equitem insidentes. Inde in lepores & cuniculos impetum facere, saltibus velocissimis: nisi tertio prædam teneant, à persequendo desistere, nec moueri loco, donec impetitæ bestię in tuto sint. Hæc omnia, & multo plura, quæ non vacat referre, de Æthiopiarum fœcunditate à nouo auctore traduntur. Scio alios ante illum fuisse, qui de Abassini soli fertilitate scripserunt multa, quæ si quis de vniuersa Abassia credat vera esse, longè à recto discedet. Constat, regionem hanc aliquot in locis rerum earum, quæ hominum generi ad victum & cultum sunt necessaria, non modò feracem non esse, sed infœcundam. Vbi fluminalibus aquis irrigantur agri, magna vbertas est. Ob hanc causam, & in regno Tigrio, vbi riuuli frequētes sunt, & in Goyama, quod regnum Nilus circumfluit, fertilis est natura soli, & fruges quotannis bis ferre apta. Incolæ magna ex partē pigri & inertes. Tantum terreni quisque plerumque colit, quantum ipsi satis, vt ea recipiat, quibus tenuiter vitam toleret. Sed è re præsentī erit, quæ hoc de genere in relatis Antonij literis legi, seorsim perscribere.

*Quid de Abassini soli natura & fertilitate
verè sentiendum.*

C A P V T X I.

Latina faciam Antonij verba, nihil ex sententia immutabo. Abassina, inquit, tellus maiori ex parte cœuerna est, & meatibus profundissimis dehiscit. In media camporum planitie passim ex prærupto saxo in miram altitudinem se rupes attollunt, quæ sæuiente belli procella pro arcibus sunt. Vniuersa regio metallorum & metallicorum medicaminum scatet venis. Sed incolæ partim inertia, partim metu, quia valde timent, ne si ista hîc esse malorum irritamenta agnoscant, Turcæ regnum armis inuadant, latere sinunt omnia in terræ visceribus. Solum ferri tantum accipiunt, quantum in ipsâ superficie sine fossione reperiunt. Locis multis vbertim proueniunt sata, & caules terra gignit, & allia, & cepe, & quæcumque in Europa sunt legumina, & permulta alia Europæis ignota. Arborum non modica varietas: sed parum iucundi & sine pretio earum fructus. Vnus est impensè vitæ utilis. Cùm ex carnibus, quas Æthiopes isti crudas edere consuerunt, vermes ipsis in aluo gignantur; ab iis intestina corrosi haud dubiè intereunt, nisi mensibus singulis fructu isto purgent sese; in eo quippe præstitum iis à natura remedium: sumptus quippe, vbi ad stomachum peruenit, lumbricos illic occidit, & ventrem exonerat. Malum Persicam, punicam, medicam, & ficum Indicam, ac pergulanam vitem terrenum procreat; sed nec passim, nec copiosè. Non desunt lepores, caprei, cerui,

apri,

apri,elephantes,cameli,bubali,leones , pantheræ , tigris,rhinocerotes,& eiusdem generis animâtes aliæ; quas inter vna est magnitudinis adedò enormis, vt equo insidens homo subter eius alnum rectus pertranseat. Est illi figura camelo similis, sed natura diuersa. Vescitur frondibus,quas erecto collo è summis arboribus decerpit. Riuli permulti sunt, permulta etiam flumina,& lacus,quibus in omnibus innumeri hippopotami, valde noxiæ fungibus bestię. Immanem habent corporis molem, & adedò vastum os,vt ad cubitum cum dimidio diducant rictus. Nocturno tempore ab aquis exeunt in agros, pascendi causa; herbis enim victitant; ac nisi tunc excubias agant agricolæ, nocte vna extremam frugibus inferunt vastitatem. Dum sub aquis sunt, nihil ipsis audacius: ferocium canum in morem impetunt homines;& immaniter discerpunt quos apprehendunt.Sic ignem fugiunt,vt puerulus vnus facem accensam tenens,multa eorum millia in fugam dedat. Quoddam hîc genus hominum est,quod belluas istas lanceis & sagittis insequitur,earumque vescitur carnibus, quæ nulla ferè in re differunt à bouina. Reperitur etiã in hisce amnibus & lacubus torpedo piscis Philosophorum opinionibus & altercationibus notissimus. Multorum constat experientia, tale huic pisci ingenium esse,vt si ab aliquo manu teneatur, ibique immotus sit,nihil efficiat; sin verò paululum se moueat, adedò tenentis corpus eo motu torqueat,vt arteriæ,articuli,nerui, iuncturæ partium, quotquot demum toto in corpore habet membra,ingentem cum stupore quoddam sentiant cruciatum. Vbi è manu dimittitur, omnis illicò dolor & stupor recedat. Æthiopes isti superstitiosè credunt,valere hunc piscem ad pellen-

dos dæmones ex humanis corporibus; quasi ipsi nequam spiritus iisdem, quibus corpora, torqueantur cruciatibus. Ferunt exploratum (rem ego per me non sum expertus) si inter mortuos pisces viuens torpedo ponatur, & inibi se moueat, eos, quos tetigerit, interno quodam & arcano motu ita cieri, vt viuere videantur. Causam scrutentur, qui rerum naturas inuestigant; quærantque, quænam ea vis motionis sit, quam mortuis piscibus torpedo impertit. Magna huius piscis copia in Nilo reperitur, ad extremos prouinciæ Goyamæ fines, vbi palus est fundo catens, perennes habens atque mirabiles ebullientium aquarum scaturigines. Hic Nilo principium est. Exiguus surgit; primûmque vno ferè die cum dimidio in orientem plagam tendit. Deinde lacum ingreditur, quo nullus toto in orbe putatur esse maior, neque etiam par. Tum per lacum ipsum quasi medium concordibus atque impermixtis aquis rapidissimo decurrit impetu; seque ex altissimis præcipitans rupibus, & æquor nactus liberiùs tantisper spatiat: sed mox profundissimis terræ hiatibus veluti absorptus ita ripis constringitur, vt locis aliquot passu vno transiri queat. Postquam verò quinque dierum itinere versùs orientem Solem profluit, ad occidentem rursus cursum flectit, & in Ægyptiam Memphim prægrandi onustus mole aquarum pro temporis varietate nunc lenior, nunc torrentior contendit. Affirmant Æthiopes, haud esse difficile, huius amnis cursum aliò detorquere, & infœcundam reddere Ægyptum. Vereor, vt hoc dictu facile sit, factu difficillimum. Talia fuere alia, quæ visa priùs prope leuia, nulla tamen humana industria vinci potuere. Abassinum cœlum tepida plurimum aura vitali calore temperat. Vbi depres-

rior

fior terra ex reflexis Solis ardoribus vapore immodice æstuante parum salubris aër. Hyems hîc sub Maij finem incipiens ad initium Septembris recedit. Tunc in Erythræo incipit mari. Expertus sum hoc fretum ab ortu Lunæ vſque ad plenitudinem quatuordecim continuos dies sine intermiſſione fluere; & dies totidem ad eiſdem Lunæ decrementum continenter refluere; vt longè mihi falli videantur malè feriati quidam philoſophiæ profeſſores, qui æſtus marini cauſam aliò, quàm ad Lunæ motum referunt. Cùm in his regionibus hyems eſt, dies ferè nullus ſine pluuiæ: vt hæc plerumque modica, ſempérque à meridie, nec ſine tonitru. Ex hoc, iſt quo degimus Dambeæ regno vterque conſpicitur cœli vertex; ſublimior antarcticus. Prope illum ſtellæ variæ ſunt, crucem ſitu figurantes: vnde apud nos datum huic polo à Cruce nomen; credo & apud Europæos uſurpatum. Apparet in hoc cœli tractu quædam veluti macula, nubis inſtar; opinamur partem eſſe cæteris non ſtellatis magis raram. Sed fortaſſe fallimur. Conſiderent Philoſophi. Circa hanc maculam plurima micant ſidera, minora iis, quæ alterum illuſtrant polum. Annus in his locis cum vere incipit, primo nimirû Septembris die. Quolibet in anno menſes ſunt duodecim, vt apud gentes alias: ſed menſes ſinguli triginta continent dies, non pauciores, nec plures; qui ſuperſunt ab Auguſti fine vſque ad Septembris ingreſſum, non habent in menſibus locum, ſed per ſe ſeorſim numerantur. Hæc omnia eodem pæne ordine in ſuis literis Antonius, ex quibus apertum eſt, inania eſſe multa ex iis, quæ ex auctore nouo ſuprà retuli. Non multo poſt hæc apud Antonium. Nulla re magis Abaſſini iſti, quàm edendo potandóque lætitiâ ſignifi-

cant; nec ipsis vlla sine cibo & potu probata exultatio est. Quo facile festis diebus trahantur ad sacra, circa templa, quæ plurimis vndique vmbra efficiendæ circumdata sunt arboribus, amphoræ constituuntur per multæ quodam plenæ liquore, qui apud ipsos pro vino est. Tunc imposito rei diuinæ fine, aded plerumque poculis se ingurgitant, vt ad crapulam primùm & ebrietatem; deinde, quæ communes sunt ebriorum leges, ad probra & conuitia; tandem ad arma & concertationes bene poti deueniant. Conficere quoque solent ex melle vinum; idque addito opio sic temperant, vt nec gustui sit iniucundum, nec parum conferat sanitati, si moderatè sumatur. Hæc ille. Quæ igitur de vitis vino nouus auctor scribit, mirum, quãtopere distent à vero. Et quæri ab eo posset, si nihil aliud, quam ratione in Congum, in Nubiam, Libyam, Arabiam, Persidem, atque in cætera, quæ numerat, loca conuehatur? Terrestrine an maritimo itinere? Neutro certè fieri posse, notissimum est. Etenim, vt dictum est, in mari rubro nullum Preteiannes portum habet; quos olim habuit, Turcæ ac Saraceni hostes occupant. Terrestre iter occludunt montes inaccessi, & vicina cælo iuga, & impenetrabiles rupes, quæ interiacent. Denique tam remota ac tam dissita regna siue mediterraneo, siue maritimo Abassinorum commercio communicari posse nemo, nisi imperitissimus, credet. Et compertissimum est, Abassinorum terras aded vitis vino carere, vt cum est vuarum tempus expresso musto vtantur in sacrificiis Sacerdotes; reliquo anno ex vuis passis ad hæc ministeria succum exprimant modo à me antè commemorato. Sæpe etiam accidit, vt Patres Societatis, qui illic sunt, quemadmodum ex iisdem per literas accepimus

mus, eo quòd prorsus vinum desit, à faciendo abstineant. Nec diu est, cùm Petrus Paëz ad nos scripsit, se anno 1604. apud Imperatorem fuisse, illúmque optasse, atque etiam petiisse, vt Romano ritu rem diuinam faceret, quæsitúmque ad id per totum locum diligenter vinum: at ne guttam quidem fuisse reperi- tam; vnde factum, vt Preteianis votis satisfacere ne- quierit. Vbi ergo Abassinum vinum est ex vuis con- fectum, cuius adeò auctor ille commendat copiam, vt eo magis, quàm pluuiæ aqua ingentes ex lapide cisternæ impleantur? Prætermitto cætera, quæ sunt æquè futilia; nec minus falsa. Accedo ad illa, quæ ad vrbiũ regimen, & gentis mores pertinent, de qui- bus quid auctor idem scribat, iam dicendum.

Quales Abassina gentis mores.

C A P V T X I I .

IN singulis, inquit, ciuitatibus sex eliguntur recto- res, patritij duo, totidem ciues, totidem plebei. Or- dinis quisque sui causas agnoscunt; patritiorum patri- tij, ciuium ciues, plebeiorum plebei. Est autem in qualibet vrbe vnus supremus gubernator, cui sex illi subsunt rectores. Hic quotannis de nouo ex patri- tiorum ordine, nunc ex vna, nunc ex alia familia vi- cissim creatur. Vt verò omnis auferatur malè iudi- candi occasio, quam & ipsi supremo gubernatori pra- ua aliqua animi affectio potest subministrare, statu- tum est, vt in cognoscenda & iudicanda eius, qui reus agitur, causa duo illi affideant ex eiusdem Rei paro- chia Sacerdotes. Quoniam verò nullo ferè ex vitio

maiora,quàm ex otio, damna in Republica nasci solent,lege cauetur, vt ab vno loco nemo se transferat ad alium absque publico iudicum loci illius testimonio;vnde cognoscatur cuias,& quisnam sit. Nam si quis vel scelus suscepisse, vel absque legitima causa vagari deprehendatur,graui multatur pœna. Eadem externis,vel etiam strictior,statuta lex. Nullus ex iis in aliquem Imperij locum ingredi sinitur, quin priùs patentes offerat literas, ex quibus constet, ipsum & Catholicæ religionis professorem esse, & egregiis moribus efformatum. Ita verò res habet.Vbi ad primam Imperij vrbe peregrinus aduenit, literas exhibet. Itæ mox in curiam mittuntur, vt earum ibi veritas expendatur. Interim ille in eadem detinetur vrbe,donec approbatis literis facultatem accipiat ingrediendi. Ea accepta pergit porrò. Quò accedit, communibus excipitur expensis hominum eorum, quorum ex ordine est; nobilis enim apud nobiles, apud ciues ciuis, apud plebeios hospitatur plebeius; & ipsi quidem aduenæ,& cæteris,quos habet in comitatu,omnia gratis & largè suppeditantur, nec is de suo quidquam infumit. Quolibet etiam in oppido datur illi viæ dux vsque ad oppidum propinquius;donec eò perueniat,quò iter intendit. Infidelium principum legati, externique mercatores adire ad interiora Imperij seuerè vetantur. Consistunt in finibus, indèque per alios negotia gerunt. Quælibet ciuitas tres diuisa in regiones est;in vna nobiles,in altera ciues,in tertia habitant plebei,sic omnes locis discreti,vt nullo modo misceantur. Magna in habitu inter omnes distinctio. Concessum nobili veste vti heteromalla,bombycina,holoserica,attalica; & cuiusque alterius conditionis, collúmque & brachia argento,

& auro,

& auro, gemmisque adornare. Vetitum cui integram vestem gestare bombycinam, aut subsericam, integroque ex auro, aut gemmis uti ornamento; aliquid undulati aut pilosi indumenti admisceat necesse est; addere poterit, si velit, meandros, & segmenta ex pretiosa materia. Plebeius non alio uti potest vestimento, nisi ex pilis confecto; usus enim laneæ vestis in Æthiopia non est. Itaque omnes habitu ipso discriminantur; moxque ubi quis comparet, quo sit ex ordine, dignoscitur. Semper in plebeiis comitiis aliquis civis, & in comitiis civium aliquis nobilis interest; ut quisque quid ibi actum sit, referat ad suum ordinem, isque principi renuntiet; ne toto in regno quid fiat, quod ipsum lateat. Immobilia omnium bona principis dominio ita subiecta sunt, ut nemini liceat ex iis quidquam alienare. Ea conditione eorum habent usum, ut transferre in alios illum nequeant. Secus res habet in rebus mobilibus. Vendi ista possunt, aut dono dari; id tamen sine magistratus consensu & facultate facere, haud ulli fas. Paterna bona ex integro ad filium natu maiorem hæreditario iure pertinent. Nihil ex iis pater testamento, aut codicillo potest adimere; reliquos fratres, si quos habet, hæres aliter pro sua quemque conditione. Tantum verò assignare unicuique debet, quantum & parochiæ vicarius, & ij, qui sunt ipsis sanguine propinquiore, iustum iudicant. Efficitur hinc, ut omnis intercludatur ad lites aditus. Fœminæ cuiusque dos linteis quibusdam vestibus, & aliquot gemmis tota atque integra continetur. Hæc ad hæredem fratrem redit, si ipsa absque liberis decedat. Si qua in familia masculus desit, ad Imperatoris fiscum eius bona deveniunt. Ne quis Abassinus in externis regnis quidquam possideat,

vxorémve ducat, aut dignitatem accipiat, imperato-
 ria lege adeò strictè cautum est, vt si quis secus faxit,
 non omnibus solum, quas in Æthiopia habet, facul-
 tatibus spoliatur, sed iram quoque incurrat Impera-
 toris; atque alterius cuiusque Abassini familiaritate
 & colloquio priuetur. Ioannes Imperator, is, qui vul-
 go Sanctus dicitur, & post illum Philippus V I I. sta-
 tuerant, ne quis vmquam ordinem mutaret; sed eo
 quisque contineretur, in quo eius fuere maiores.
 Quamobrem nulla prorsus de causa aut ciuis gradum
 patritij, aut plebeius gradum ciuis assequi poterat.
 Imperatores tamen alij optimis de causis legem il-
 lam abrogarunt. Aditum igitur ad nobilitatem aper-
 tum illis esse voluerunt, qui septem ingentia ederent
 in bello facinora; qualia sunt, siue regem, siue supre-
 mum exercitus ducem, siue militaria hostium signa in
 bello capere. Inimicam aciem vi perumpere; & id
 genus alia: quæ vbi ab aliquo facta esse, equitum
 sancti Antonij testificatione Imperator agnoscit, cõ-
 tinuò illum albo nobilium adscribit, & nobilitatis
 ipsi priuilegia concedit, assignatque stemma, quod
 domus suæ valuis possit affigere. Primis tamen de-
 cem ab acquisita nobilitate annis, ius non habet, vt in
 nobilium comitiis suffragio suo quidquam decernat,
 aut ad munus aliquod deligatur. Ciuitatis gradus
 vno vel altero ex prædictis facinoribus à Plebeio ob-
 tinetur. Vestitus Abassinis idem ferè, qui Persis, qui
 Armeniis, qui aliis orientalibus populis. Capitis mu-
 tarunt tegumenta post agnitos Hispanos, quos liben-
 ter imitantur, quibûsque similes videri percipiunt.
 Solus olim Imperator petaso utebatur, adeò in or-
 bem diffuso, vt eius sub vmbra simul homines de-
 cem sedere possent; nunc eius tegumenti vsus ad re-
 liquos

liquos extensus. Agricolaꝝ ob ingentem Solis calorem nonnumquam crudo corio, quandoque gossipio tantum pudenda tegunt. Cum inuicem obuiam fiunt, varium seruant inter se salutandi morem. Si Prete-
iannes occurrit, cæteri prope accedentes, detracto galero vnā imponunt capiti, aut fronti manum, ter-
ram altera contingunt, Negum, aut Acegum appel-
lantes; idque singuli faciunt ter. Inter alios ita res
habet, inferiores detecto capite, & imposita pectori
manu honorem exhibent superioribus; hi manum
tantummodo imponunt pectori, cum illos salutant;
hoc ipsum inter eos vsitatum, qui sunt conditione
pares. Viliores bouina coria, aut tegetes substernunt
lectis. Mensas habent à terra eleuatas, & sedendo,
non accumbendo sumunt cibos. Vasa communiter
ex creta vel luto. Rubris imponunt frigida esculen-
ta, nigris calida. Conficiendi vitri ignota erat prius
ratio: aliquot tam abhinc annis accepta ab iis artifi-
cibus, quos ad Preteiannem misit Cosmus Mediceus
magnus dux Hetruriæ: nam & inter illos erant vitria-
rij. Antequam vitis vinum in vsu esset, omni ferè ex
re conficiebatur; ex nulla tamen, quam ex melle, pre-
tiosius. Triticeo communiter vescuntur pane; eius
loco aliquando est orizæ farina, aquæ permixta. Quæ
apud nos, eadem apud ipsos in vsu sunt carnes. Has
elixas edunt, & assas, vt cuique lubet. Francisco Alua-
ro visum, crudis eos victitare: sed in hoc, vt in aliis,
deceptus est. Pigmentario enim quodam puluere
rubri coloris aspersas vidit, cum comederent; cruen-
tatas credidit, ac subinde crudas. Hic enim illis hoc
in genere mos. Carnes accipiunt, & leuiter primum
feruefaciunt: deinde varias in partes intercidunt, &
aromatibus condiunt: tum vasis quibusdam receptas
absque

absque noua concoctione paulatim comedunt. Franciscus igitur rei ignarus, quæ ex adiecto pigmento rubræ apparebant, existimauit crudas. Nullibi in tota Æthiopia, præterquam in loco ubi Preteiannis est, macellariæ tabernæ sunt. Domi quisque suæ animalia ad esum occidit, & panes conficit. Statis hebdomadæ diebus venum exponuntur merces in communi foro. Nullæ sunt cauponæ; neque iis viatores indigent: frequentissima enim, ut dictum, occurrunt oppida, ubi cuique gratis suppeditantur omnia. Reperiuntur passim leprosi cum cætero vulgo commixti; non desunt, qui facile ipsis quidquid habent opus, ex pietate præstant. Vfus aberat literas inuicem mittendi, iam adscitus est. Plurima sunt musica instrumenta, & nostris similia. Reges olim, & viri primarij, cum ad Imperatorem adibant, vna tantum leonis pelle humeros induti, corpore reliquo eius se oculis obiciebant nudos. Ita magnitudinem animi ostentabant, cum significare vellent, aut propter Imperatorem egregia se in bello facinora edidisse, aut propriis manibus interemisse leones. Sic enim erant aliqui stultè temerarij, ut ad vires experiundas, & nomen aliquod parandum, ligno vel gladio leones ultro ad pugnam irritarent. Qui aliquem occidebat, eius trahebat pellem, eaque humeris imposita, veluti alter Hercules, comparebat in aula gloriosus; ea specie indicans, haud esse quidpiam, quod ad tuendum Imperatoris honorem, non facile aggrederetur, qui ausus esset cum leone congredi. Hæc tamen, & alia quædam, in quibus aliquid inerat vel stolidæ feritatis, vel repugnans urbanitati, iam nunc omnino explosa; & diligenter ab Imperatoribus curatum, ut quæ videbuntur à nostris moribus abhorrere, ea ab
toto

toto Imperio procū abigantur ; adeò Europæas probant consuetudines. A temporibus priscis hæc Abassini habebant arma, gladios, tela, sagittas, æneis thoraces, loricas, galeas, scuta. A Clementis VI. & Caroli V. tempore introductus in Abassiam nitrati, sulphureique pulveris usus, qui nunc cum omni æneorum tormentorum genere frequentissimus est. Olim deferebant in bellum leones caueis inclusos, & instructa utraque acie, ut signum pugnae dabatur, soluebant in hostes. At id utrique parti parum erat tutum; solutæ enim bestię non minus sæpe in suos, quàm in aduersarios irruebant. Omissus igitur communiter hic usus, & apud Tubacatubos, & Goragos, qui Æthiopum populi sunt, tantummodo retentus. Hæc omnia nonus auctor; ex quibus pauca sunt, quæ congruant cum veritate. De Abassinorum vestitu sic Antonius. Ditiores ab Saracenis emunt vestes, quibus eorum more se induunt. Reliqui siue mares, siue fœminæ, tegendis corporibus vel aliqua pelle aut corio, vel vna utuntur crassa & rudi ex lino tela, non alio, quàm quod ex textrina tulit, expolita artificio. Cum reuerentiam exhibent alicui, telam hanc deiciunt ex humeris usque ad umbilicum, & seminudi apparent. Comam nutriunt; eaque ipsis pro galero, proque extero capitis tegumento est. Elegantia causa variis modis intorquent capillos, & butyro inungunt; quos sic inunctos, cum solares excipiunt radios, herbas credas matutino rore madentes. Atenim ne capillamenta & cincinni disturbentur; cum eunt cubitum, furculam quisque suam pede vno defigit in terra, & inter media cornua immittit collum; atque ita pendente capite somnum capit. Solent sibi toto in corpore, præsertim in vultu, inurere stigmata. In minimis

minimis quoque manuum digitis ungues sinunt ex-
 crescere ad quantam possunt longitudinem; iis-
 que oblongis imitari cupiunt gallorum alitum calcaria;
 quæ iisdem ex gallis nonnumquam refecant, & ipsis
 adoptant digitis. Quo simul truculenti, simul spe-
 ctabiles videantur, manuum pedumque, quibus nudis
 incedunt, colorem adulterant succo cuiusdam corti-
 cis ex albo rubescentis. Eum vi exprimunt, & vasis
 excipiunt; dein manus inibi ac pedes dies aliquot
 immergunt, donec peregrinum contrahant ruborem.
 Hæc ex Antonio. Ex eo quoque & aliis habemus
 Abassinam gentem communiter inertem esse ac de-
 sidem. difficilèque sibi, quæ sunt ad vitam necessaria,
 præ ignavia comparare. Nec piscationi dant ope-
 ram, nec venationi. Cùmque exiguo negotio parare
 sibi possint ex pecore lanam, ex irriguis locis linum,
 ex aliis gossipium, unde texi telæ, & confici vestes
 queant: qui de vulgo sunt paucis exceptis, ob innatam
 segnitiam, more bestiarum, rudibus pellibus ob-
 nubunt corpora: & vnam tantum quisque ex ariete
 gestat, ad pedem ac manum extremis partibus alliga-
 tam. Boun coriis sine culciis & lodicibus incubant.
 Mensarum vice conchas habent ex ligno prægran-
 des, impolitè excavatas. In his sine mappis, sine
 mantilibus sumunt cibos. Vasis vtuntur ex nigra
 creta. Præter eos, qui sunt genere Saraceni, pauci
 alij, paucisque locis exercent mercaturam. Pars ma-
 gna colunt agros. Nobiles militiam, & Imperatoris
 aulam communiter frequentant. Maioribus carent
 urbibus: pagos passim habitant, nullis septos mœni-
 bus, nulla arte munitos. Oppidum inter eos maxi-
 mum vix mille sexcentas numerat domus. Novus au-
 ctor asserit, hac tempestate intra terram continentem
 multa

multa esse oppida muris circumdata, multa castella, arces multas, multa demum propugnacula. Sed in hoc etiam lectorem fallit. Domus exiguae sunt, absque vlla contiguatione, sine elegantia sine dignitate, & pæne sine arte. Formam habent communiter rotundam, & tetra paleaque teguntur. Nullus etiam nunc apud eos epistolarum vsus, neque ea, quæ publico iudicio decernuntur, neque aliud quidquam notare literis consuevere. Præter libros diuinos, eosque, quibus continentur sacra, alij non sunt, nisi quos habent regiis opibus præfecti, ut accepti & expensi rationes consent. Nonnihil hoc de genere à nostris introductum est, doctrinæ causa.

Quæ sit apud Abassinos Reipublicæ gubernandæ ratio.

C A P V T XIII.

Scribit nouus auctor ab antiquissimis temporibus fuisse, apud Abassinos, hodièque perseverare Senatum quemdam summa verendum maiestate: magnum vocat, & in eo triginta ait esse consiliarios, qui iam tunc ante susceptam Christi fidem eximie fuerint auctoritatis, & probitatis. A prædicatione Apostoli Matthæi, à quo sacra & religionem Abassia accepit, eodem retento numero, conditionem personarum mutatam; cum successerint Ethnicis Christi ini; Patriarchæ sex, totidem Archiepiscopi, sex Episcopi, sex ex religiosa magni Antonij familia Abbates, totidem ex eadem equites, in quibus omnibus cum singulari doctrina, excellens vitæ sanctimonia, & præclara

clara rerum prudentia coniunguntur. Designari quoque ait ex ordine ciuium viros aliquot iudicio præstantes, qui à secretis sint. Ad hunc Senatum omnes omnino cuiuscumque generis deferri cāſas, atque ex toto conſiliariorum numero, quinque ſelegi, Patriarcham vnum, alterum Archiepiſcopum, tertium Episcopum, quartum Abbatem, quintum Equitem, qui hebdomadis ſingulis de controuerſiis ad triginta viratum delatis cum Imperatore priuatim agant. Communem huius Senatus ſedem eſſe eandem, quæ Imperatoris eſt urbem videlicet Zambram, Imperij caput. Cum tamen vel loca Imperij luſtrat Imperator, vel aliò ſe confert, partem Senatorum dimidiam, tres nimirum Patriarchas, tres Archiepiſcopos, tres Episcopos, tres Abbates, tres Equites, ſolitum habere in comitatu; reliquos in vrbe, & imperatorio palatio remanere. Eſſe quidem in vnaquaque ciuitate proprios iudices, qui ius ciuibus dicant, de quibus iam antè dictum à nobis: eſſe item in ſingulis regnis peculiareſ magistratus, qui communibus præſint regni cauſis: hunc tamen ſupremum Senatum ad vniuerſum pertinere Imperium, poſſeque ad illum à cæteris regnorum & urbium iudicibus controuerſias auocari. Centum viginti ſeptem eſſe ſtatuta, in maiori urbis cuiuſque foro palàm & publicè expoſita, quorum ad præſcriptum ferti ſentētias oporteat: idcirco neque patronis, neque cauſidicis, neque cognitoribus, neque rabulis, neque vllis demum iuris peritis eſſe opus: ſi quid occurrat, quod iuxta ſcriptas illas leges nequeat iudicari, id boni viri committi arbitrio. Deinde parum factam fabulam nouus auctor adiungit. Scribit enim, cū Panuſius quidam Æthiopici Imperij clauum teneret, multos legum Doctores à Luſitano rege miſſos cum

cum grandi sarcina librorum (in quibus erant Bartolus, Baldus, & permulti alij generis eiusdem) eo animo ad illum venisse, vt canonicas & Cæsareas leges, iurisque vtriusque peritiam in Abassiae regna introducerent. Cùm Imperator tam copiosam videret librorum supellectilem, miratùm rogasse, quid nam in illis libris scriptum esset; respondisse Doctores, Ecclesiasticas & Ciuiles leges: se iuris esse consultos, ad quos regnorum, prouinciarum, vrbiū, oppidorūque omnium gubernatio pertineret; quorūque esset causas diiudicare, controuersias dirimere, lites aestimare, ius suum cuique reddere: tam ob rem illa secum volumina deportasse. Post hæc, quod cuique libro nomen esset, quæ ratio nominis, qua de re in quoque ageretur, singulatim exposuisse. Ipsis tandem silentibus Panusium, qui ore hiscente dicentes intuebatur, eorūque in reddenda voluminum ratione inanem sollicitudinem & laborem irridebat, cùm nec verbum vllum intelligeret, ad hunc modum dixisse. Quæ igitur ex hac vestra tam proluxa oratione nobis licet colligere, ista sunt. Primùm vos Doctores vocari: sed ego Doctores alios non agnosco, nisi eos, quos agnoscit Ecclesia, Augustinum, Hieronymum, Athanasium, Basilium; nec in his regionibus, quæ sub nostra ditione sunt, præter sacros Theologos vllum permittimus Doctorem dici. Deinde hisce libris, quos attulistis, leges contineri: sed ego præter Christi legem non recipio aliam; nec alia est, quæ hoc nomen mereatur: cæteras, quas vos leges dicitis, nos Constitutiones appellamus. Item ad vos litium causarūque negotia pertinere, vestrique muneris esse controuersias agitare, facultates quibusdam auferre, aliis dare, & his patia sententiis vestris efficere: sed ego

in regnis meis nec lites habeo , nec habere volo ; nemo in illis absque mea facultate quidquam vendit, aut emit; nemo decedens quidquam alteri testamento relinquit, nisi nostram ad id habeat potestatem; & hac ratione omnis litium materies ab his nostris regionibus quamlongissime abest. Vestro igitur labore nobis opus nō est. Quamobrem vos precor, ut nos quietos & pacatos esse sinatis , atque in Lusitaniam vestram quamprimum reuertamini; intrāque paucos dies his oris relictis , quocumque libuerit , vestris cum libris abeatis ; alioquin & illos , & vos vnā cum illis, si parere imperio nostro recusabitis , in fluentem Nilum, quā profundior est , proiici imperabo. Cū Doctores Panusium vidissent trucibus oculis , terribili aspectu, verbis minacibus effundentem iras, nulla interposita mora , naui conscensa Goam petiere. Hæc prædictus auctor, quæ risum quibusdam , iram fortè aliis mouebunt. Quis esse nugas neget? An ista de supremo Senatu, deque legū Doctoribus à suo Abassinno acceperit , nescio ; ab auctore certè alio non scribuntur; & fabulas esse nemo, qui leget, dubitabit. Sed pacatè quæramus, quis tam multos in Abassia creat Patriarchas, Archiepiscopos , Episcopos , vbi præter vnum Abunam, de quo postea , certum est , Patriarcham alium, aliūve Archiepiscopum , aut Episcopum non esse? Quinam illi Equites sunt, quos absque dubio Abassia non nouit? Sed hæc , & quædam talia seridè insectari, inane fortasse fuerit, cū facile se ipsa prodant. Illud tamen non prætereundum. Ecquisnam ille fuit Imperator Panusius, quæ ætate vixit? A tempore quidem , quo Petrus Couillanius Lusitanorum primus Abassiam intrauit, ad hodiernum vsque diem Panusius Imperator nullus fuit , quod est à nobis

bis suprà demonstratum. Quæ præterea illa fuit, Doctorum caterua tam grandi librorum sarcina onusta? Constat enim præter milites Lusitanos, qui Præfecto Gama Æthiopiam adiere, & Societatis religiosos, qui ad eadem loca diuersis postea temporibus missi sunt, paucosque alios, de quibus partim suprà memini, partim dicam postea, haud ullos alios fuisse homines ab Lusitano Rege illuc missos. Si qui tamen, quales fingit, missi fuissent, ecqua illius commentitij Imperatoris in recipiendis aduenis, à præstantissimo & amicissimo rege ad se missis, tanta esset imprudentia? Cogitari certè nihil posset ullo in principe, quamuis barbaro, ac rudi, magis ineptum, nec magis indecorum. Adeò verò fallum est, leges nostras ab Æthiopicis Imperatoribus contemni, ut quod ex literis Petri Paëz, Societatis Iesu sacerdotis, nobis est comperitum, anno 1604. is, qui tunc imperabat, & postea Sacinos, qui successit, eas habere summopere optarent. Pergit nouus auctor describere cætera. Prætorium, inquit, ubi causæ tractantur, tanta apud omnes in veneratione est, ut nullus equo, vel mulæ insidens audeat prope pertransire, aut quacumque ex causa ad illud, veluti ad asylum, confugere. In aula tredecim sunt ex ferro sedes, corio insutæ, non ad sedendum, sed ad ostentationem expositæ. Diebus singulis afferuntur de nouo, iterumque remouentur. Quæ media est, inter duodecim eminet. Cùm iudices litigantium causas audiunt, humi sedent, in duos diuisi ordines. Sua cuique ordini potestas; sua ad reos detinendos custodia. Hic vtriusque partis dicendi mos. Quidquid accusator habet opponendum reo, continenter dicit. Eo silente, suam reus inchoat defensionem, eamque sine interruptione ad exitum perducit.

Rursum si quid habet accusator, quod obiciat, profert in medium. Respondet iterum reus, si lubet; & qua ratione potest, culpa se purgat. Hunc in modum tamdiu actor & reus contendunt, donec finitis utrimque rationibus, ultro quiescunt. Tum ex iis, qui adsunt, quidam veluti assessor, quæ sunt pro utraque parte allata, fideliter repetit, & utra sibi causa magis probetur, breui oratione patefacit. Post hunc Iudices ipsi suas singulatim proferunt sententias. Tandem is, qui Senatui præest, quid sit agendum, suo iudicio decernit. Hæc autem verbis omnia, nihil scripto fit. Ita nouus auctor, quem ex illis ipsis Antonij literis apertè postea confutabo. Nunc pergo ad alia.

*Quaratione in Iudicum vitam & mores apud
Abassinos inquiri dicatur.*

C A P V T X I V .

INter cunctas orbis nationes ait nouus auctor, vna Æthiopica est, quæ in re iudiciaria largitiones munerum seuerissimè prohibet. Hinc ortum, ut Philippus IX. ad Imperij culmen euectus, cum nouisset nonneminem ex Iudicum numero, inter regni tempora munus accepisse, statuerit, ut magni Senatus pars dimidia singulis septenniis montem Amaram peteret, quo posset in Senatores ipsos diligens super hac re fieri inquisitio. Hæc autem ab eo est statuta forma, quæ hodieque seruatur. Primum acciri ad se iubet Imperator omnes magni Senatus consiliarios. Ex iis deinde quindecim deligit (hæc dimidia totius numeri pars est) ipsiſque præcipit, ut cum vno ex regum

gum primogenitis, quos habet in famulatu, & mille prætorianis equitibus dictum in montem proficiſcatur. Illic obediunt; & ſe omnes in viam dant, vno ex equitibus præeunte, & ſericum vexillum pallidi coloris cum Imperij inſignibus præferente. Simul atque ad montis radices veniunt, ex equis Senatores deſiliunt. Regius ille princeps, qui eſt cum Senatoribus miſſus, Abbates militares, qui ad ipſos Senatores excipiendos deſcendunt, equo inſidens ita breuiter alloquitur. Ex Imperatoris auguſtiſſimi, omnium Abaſſinorum regum ſupremi, ſemper Dauidis, domini mei mandato, vobis trado hos quindecim magni Senatus conſiliarios, quos videtis; illos habete apud vos, dum erit opus. Curate, ne incommodè ſint. Haud plura his, ad Imperatorem ſtatim regreditur, eique peracti negotij reddit rationem. Tunc Imperator omnes Imperij ciuitates per earum procuratores, qui ſemper in curia ſunt, conſeſtim monet, vt ſi quis erit, qui ab vſlo ex iſſdem illis conſiliariis affectus iniuria fuerit, id planum faciat, quò poſſit, ſi deliquiſſe probabitur, pro meritis plecti. Cognita per vrbes Imperatoris denuntiatione, mox in vnaquaque cum parte cleri conuenit nobilitas, & præconis voce edicitur, vt quicumque ab aliquo conſiliario vllam, accepit iniuriam, chirographum ea de re conſiciat, in quo, & ipſius, & conſiliarij nomen, & quæ fuerit inferendæ iniuriæ occaſio, quo etiam tempore illata ſit, dilucidè contineatur. Ad excipienda iſtiusmodi, ſi qua erunt, ſcripta, figitur publico in foro capſa, anguſtum deſuper habens foramen, quo extrahi nequeant. quæ erūt intromiſſa, quales ad eleemoſynas excipiendas eſſe in templis ſolent. Hæc firmiter eſt obſerata, nec ab vſlo præter Imperatorem, qui ſolus clauem habet, po-

test referari. Dies octo in eo loco perseverat; quibus elapsis vnaquæque ciuitas, suam, ita ut est, cum bona militum custodia ad Imperatorem capsam mittit. Vnus ex ciuibus agmen ducit, explicatum manu præferens ciuitatis suæ signum. Cùm ad palatium ventum, vocat Imperator cubiculi præfectum (is vnus est ex regum primogenitis natu antiquior) quamdam illi clauem porrigit, inbêtque conclaue aperiat ad hoc designatum, & allatam in illud capsam intromittat. Ea recepta datur iis, qui detulerant, ad suos redeundi facultas. Postquam capsæ omnium ciuitatum eo, quo dictum est, modo in egiam sunt deportatæ, & in prædictum conclaue intromissæ, Imperator omnibus regum primogenitis, & aliis viginti aulicis comitatus conclaue ingreditur; referari iubet capsas, colligi chirographa, quæ cuiusque ciuitatis sunt, separatim poni, omnia demum voluminibus distincta, & inscripto cuique volumini propriæ ciuitatis nomine, in alia prægrandi capsâ simul recondi, & attrato vehiculo impositam legato magni Abbatis ordinis militaris sancti Antonij tradi; ut is cum trecentis equitibus eam deferat in urbem Sabam, & committat eiusdem urbis sacerdotibus, ad quos pertinet ea de re sententiam ferre. Ad urbem legatus cum capsâ perueniens, magno cum apparatu, & celebritate excipitur; deferiturque ad exedram capsâ, ibique diligenter custoditur. Id ubi factum, legatus cum sociis ad curiam reuertitur. Post hæc è templo exeunt Sabæ sacerdotes cum nobili comitatu, velatis capitibus, ut Abassinis sacerdotibus mos est; exedram ingressi, circa delphicam mensam in orbem sedentes, capsam aperiunt, arbitris remotis; volumina extrahunt; legunt chirographa; querelas scripto notant, & ad suam quasque
bona

bona cum cura mittunt ciuitatem, vt proprij sacerdot-
es simul cum nobilibus rei veritatem sedulò inuesti-
gent. Si quem consiliarium accusatum reperiunt, per
nuntium, vel literas ipsum confestim monent, vt cer-
tum intra tempus obiecta purget. Is monitione ac-
cepta ad purgandum sese ex monte Amara vnum
equitem mittit. Si probatione res eget, dicti sacerdo-
tes ad eum locum, vbi de ipsa agendum est, equitem
eumdem delegant, vt rogandis testibus, & rebus cæte-
ris, quas ad aperiendam veritatem fieri oportebit,
præsens adsit. Tum verò si constet, consiliarium cul-
pa vacare, sacerdotes Sabæ ad eius vrbis, cuius accu-
sator incola est, sacerdotes scribunt, vt ipsum pœna
puniant talionis, quo sint aliis documento, ne dein-
ceps per artem calumniandi insidias innocentix mo-
liantur. His tandem peractis sacerdotes Sabæ cun-
cta, quæ reperere, & suam de vnaquaque re senten-
tiam, cedrina includunt arca, pèrque certos, quos eam
in rem destinant, sacerdotes ad Imperatorem mit-
tunt. Antequam hi curiam adeant, sub tentoriis tan-
tis per subsistunt; dùmque ibi sunt vni ex regum pri-
mogenitis præcipit Imperator, vt cum centum nobi-
libus ad illos excipiendos egrediatur. Abit hic, &
humanè benignèque salutato ad Imperatorem du-
cit, vultus & capita de more velatos. Vbi in aula ven-
tum, illis se Imperator cum eximia quadam amoris
significatione præbet videndum; capsamque recipiēs
ab iis traditam, suo in cubiculo reponi iubet. Post-
quam verò & de hac ipsa re, & de permultis aliis be-
neuolos cum ipsius sermones confert, ab se dimit-
tit; atque vt Sabam redeant, liberum facit. Eo-
dem illi modo, quo sunt in curiam ingressi, suam
repetunt urbem. Imperator autem lectis sacerdotum

test referari. Dies octo in eo loco perseverat; quibus elapsis vnaquæque ciuitas, suam, ita ut est, cum bona militum custodia ad Imperatorem capsam mittit. Vnus ex ciuibus agmen ducit, explicatum manu præferens ciuitatis suæ signum. Cùm ad palatium ventum, vocat Imperator cubiculi præfectum (is vnus est ex regum primogenitis natu antiquior) quamdam illi clauem porrigit, iubetque conclaue aperiat ad hoc designatum, & allatam in illud capsam intromittat. Ea recepta datur iis, qui detulerant, ad suos redeundi facultas. Postquam capsæ omnium ciuitatum eo, quo dictum est, modo in egiam sunt deportatæ, & in prædictum conclaue intromissæ, Imperator omnibus regum primogenitis, & aliis viginti aulicis comitatus conclaue ingreditur; referari iubet capsas, colligi chirographa, quæ cuiusque ciuitatis sunt, separatim poni, omnia demum voluminibus distincta, & inscripto cuique volumini propriæ ciuitatis nomine, in alia prægrandi capsâ simul recondi, & attrato vehiculo impositam legato magni Abbatis ordinis militaris sancti Antonij tradi; ut is cum trecentis equitibus eam deferat in urbem Sabam, & committat eiusdem urbis sacerdotibus, ad quos pertinet ea de re sententiam ferre. Ad urbem legatus cum capsâ perueniens, magno cum apparatu, & celebritate excipitur; deferiturque ad exedram capsâ, ibique diligenter custoditur. Id ubi factum, legatus cum sociis ad curiam reuertitur. Post hæc è templo exeunt Sabæ sacerdotes cum nobili comitatu, velatis capitibus, ut Abassinis sacerdotibus mos est; exedram ingressi, circa delphicam mensam in orbem sedentes, capsam aperiunt, arbitris remotis; volumina extrahunt; legunt chirographa; querelas scripto notant, & ad suam quasque bona

bona cum cura mittunt ciuitatem, vt proprij sacerdotes simul cum nobilibus rei veritatem sedulò inuestigent. Si quem consiliarium accusatum reperiunt, per nuntium, vel literas ipsum confestim monent, vt certum intra tempus obiecta purget. Is monitione accepta ad purgandum sese ex monte Amara vnum equitem mittit. Si probatione res eget, dicti sacerdotes ad eum locum; vbi de ipsa agendum est, equitem eundem delegant, vt rogandis testibus, & rebus cæteris, quas ad aperiendam veritatem fieri oportebit, præsens adsit. Tum verò si constet, consiliarium culpa vacare, sacerdotes Sabæ ad eius vrbs, cuius accusator incola est, sacerdotes scribunt, vt ipsum pœna puniant talionis, quo sint aliis documento, ne deinceps per artem calumniandi insidias innocentiae moliantur. His tandem peractis sacerdotes Sabæ cuncta, quæ reperere, & suam de vnaquaque re sententiam, cedrina includunt arca, perque certos, quos eam in rem destinant, sacerdotes ad Imperatorem mittunt. Antequam hi curiam adeant, sub tentoriis tantisper subsistunt; dùmque ibi sunt vni ex regum primogenitis præcipit Imperator, vt cum centum nobilibus ad illos excipiendos egrediatur. Abit hic, & humanè benignèque salutato ad Imperatorem ducit, vultus & capita de more velatos. Vbi in aula ventum, illis se Imperator cum eximia quadam amoris significatione præbet videndum; capsamque recipiēs ab iis traditam, suo in cubiculo reponi iubet. Postquam verò & de hac ipsa re, & de permultis aliis beneuolos cum ipsis sermones confert, ab se dimittit; atque vt Sabam redeant, liberum facit. Eodem illi modo, quo sunt in curiam ingressi, suam repetunt urbem. Imperator autem lectis sacerdotum

Sabæ sententiis, in montem Amaram literas mittit ad principem Imperij natu maiorem, eique mandat, ut ad obeunda sua munera quamprimum remittat senatores; quorum si quis in literis excluditur, in culpa esse intelligitur, & pœnæ loco consiliarij officio perpetuò priuatur. Discedunt ergo ab monte senatores, eo comitante, qui literas detulit, & duodecim mille prætorianis equitibus stipati. Cùm Zambæ vicini sunt, tendi iubent tabernacula, in iisque manent usque ad insequentem diem. Tunc ad primam lucem cum tubis, tibiis, tympanis, aliisque musicis instrumentis, atque ingenti exultatione & tripudio ad eos exit aulica nobilitas; lætantérque exceptos ad Imperatoris palatium comitatur. Is inter primogenitos regum filios imperatoria augustus maiestate, crucem pro sceptro manu tenens, sublimi sedet duodecim graduum solio pretiosissimis tapetibus circumuestito. Accedunt prope senatores; curuant poplites; tamdiuque ante Imperatorem ita sunt, quibusdam oblongis innixi scabellis, dum magni Abbatis legatus suggestum conscendens pauca verba pronunciat. Ea sunt: En habes coram te, Imperator auguste, eos homines, quorum opera & consilio in gubernandis populis feliciter vteris. De mandato tuo in monte Amara hucusque fuere, donec in eorum actiones inquisitum est. Probat, & omni immunes culpa redeunt ad te, suã tibi ac tuis operam, ut deinceps præstare pergant. His dictis, ingens in tota concione excitatur acclamatio; vox omnium hæc vna est, Vivat Imperator, qui ad honorem Dei, & Petri ac Pauli Apostolorum principum, Imperij sui statuta conseruat, quæque à Ioanne sancto, & Philippo VII. latæ sunt leges, iubet obseruari. Imperator læto atque hilari vultu cunctos ex
folio

folio despiciens, grata sibi esse ostendit eorum studia, & acclamationes. Ita nouus auctor, quem non possum non mirari, quod tales excogitarit examinandorum iudicum tricas, vel ab alio excogitatas acceperit, suoque nomine in lucem prodiderit. Nemo sanè tam crasso est iudicio, cui queant ista probari; cum eiusmodi sint, ut esse falsa statim appareat? sed & memorie lapsu peccat hic auctor, loquiturque pugnantia, & affirmat postea, quæ prius negarat. Pulsos Æthiopia dixit à suo Panusio Lusitanos legum Doctores, quia, ut nullæ ibi erant lites, nec litium causæ, ita neque ad eas tractandas, aut ullus iuris peritus, aut vlla iuris peritia requirebatur. Postea & litigatores admittit, & litigandi præscribit modum, & per omnes Imperij vrbes adiudicandas causas, & controuersias componendas multos iudices distribuit.

De Latino quodam Senatu, qui apud Abasinos esse dicitur, deque aliis ad Imperij administrationem pertinentibus.

CAPVT XV.

SCRIBIT nouus auctor Æthiopia patefacta, coepisse Sex his Europæ partibus multorum hominum, præcipuè mercatorum, ingentem illuc concursum fieri. Id cum videret Alexander III. Andrea Ouiedo suadente, Senatum instituisse, quem Latinum placuit appellari, quod ea, quæ Latini orbis sunt, ad eum spectarent. Sex in eo creasse consiliarios, duos ex Ve-

neta gente, duos ex Florentina, duos ex Lusitana, eccellente homines sanctitate, & rerum multarum experientia insignes; iis & Ouiedum ipsum præfecisse, & pingua stipendia assignasse. Huius Senatus munus esse; primò vt de Europæis rebus, quoad opus erit, certiore faciant Imperatorem. Secundò, vt si quis ex hoc orbe vel negotiandi, vel Abassiam videnti gratia illuc intrarit, id statim Imperatori renuntient, eique insuper exponant cuias, & cuius conditionis sit; quid in illis velit regionibus; num quas vel aliorum principum, vel Abassinorum, qui Romæ habitant, literas ferat; & quæ sunt generis eiusdem. Tertiò vt quæ ad Imperatorem ab Latinis oris epistolæ mittuntur, eas ipsi interpretentur, iisque, qui scripserunt, quo necesse erit idiomate, respondeant. Ita hic auctor de Latino Senatu; quem tam verum est apud Abassinos esse, quàm exstitisse aliquando Alexandrum illum tertium, qui eius fingitur institutor. At eiusmodi Alexandrum commentitium esse, iam est à nobis apertè demonstratum. Quo autem honoris loco apud hosce Abassinos Imperatores Ouiedus fuerit, & tetigi suprà, & latè postea videbitur, nunc dicere supersedeo. ne sæpius eadem repetantur. At ingentem illum ab Latino orbe in Abassiam cõcursum, satis constat fictitium esse, & prorsus inanem, cum & valde tenuis illic sit mercaturæ vsus, quod paulo antè dixi, iisque testantur, qui illis in locis versati sunt, & Saracenorum, Turcarumque armis ita aditus sit interclusus, vix vt vllus aduena queat intrò penetrare. Quæramus deinde ecqui nam ibi sint Veneti, Florentini, & Lusitani mercatores? Illic ne ex Europa immigrarunt, vxorésque suas ibidem habent, & familias; an in portandis atque exportandis mercibus questum

stum faciunt, euntque sæpius, & redeunt, haud fixum
ibi domicilium habentes? Vtrouis de genere sint, mi-
rum est, iis, qui apud nos sunt, prorsus esse ignotos.
Veneti, & Florentini rogati, an vlli ex suis in Abassia
mercatores sint, iocosam magis rem, quàm seriam se
rogati crediderunt. Verùm ad alia. Scribit præterea,
Abassinos Imperatores, cùm fidem Christianam &
Catholicam eximiè colant, in procurandis Imperij
negotiis adeò esse sollicitos, vt non satis habeant, à iu-
dicibus, & consiliariis de rebus ad Reipublicæ pacem
& tranquillitatem attinentibus bis in qualibet heb-
domada certiores fieri, sed velint etiam per se vel à
litigatoribus, vel ab eorum Aduocatis causas & con-
trouersias audire, vt modum statuunt, quo possint
iustè, & quoad res ferent, quam breuissimè absolui. Si
ad bellum, inquit, negotia spectent, ea Imperator ipse
agnoscit, & magni Abbatis legatum adsciscit consi-
liarium, vt quod videbitur fieri oportere, quamocyf-
sime fiat. Singulis septenniis totum Imperator lustrat
Imperium. Talis autem hac in re seruatur modus. Ap-
petente profectionis tempore, duodecim primùm pa-
rantur vexilla, quæ ante Imperatorem ferri erecta &
explicata solent; deinde papiliones, & tentoria, sub
quibus & ipse Imperator, & tota eius habitat familia;
numquam enim, dum huiusmodi munus obit, in op-
pidis hospitatur. Ad custodienda tentoria tres ex vna-
quaque vrbe custodes assignantur, nobilis vnus, ciuis
alter, tertius plebeius. qui omnes septem millium &
quingentorum efficiunt numerum. Tres isti in partes
diuisi ita se habent, vt primùm per se nobiles, deinde
ciues, tum plebei excubent ad Imperatoris tentoria;
rursùmque redeatur ad caput, ordóque vnus alteri
succedat. Pedibus plebei, equis cæteri conficiunt iter.

Præter

Præter hanc papilionum custodiam numquam ab Imperatoris latere discedunt prætoriani milites, qui duodecim mille sunt, omnes sancti Antonij equites. Hoc tamen ex numero deliguntur trecenti; quorum centum plebeis, totidem ciuibus præsumt; reliquis centum data cura per vicinas vrbes cibaria procurandi. Vrbes hi nequaquam ingrediuntur, sed cuiusque ad portas duos habent paratos ministros, quorum hac in re vtuntur opera. Cùm Imperator alicui vrbi propinquat, figi in apto loco iubet tentoria; & ibi proximam agit noctem. Die insequente Imperatorio ornatus habitu, atque elephanto vectus ad urbem progreditur. Abest tunc ab ea rex; ante Imperatoris enim aduentum ex præscripto iure alium in locum abire cogitur; nec ante eiusdem discessum potest reuerti. In ipso aditu rectores ciuitatis (sex numero in vnaquaque sunt) Imperatorem excipiunt, damascenis nigri coloris induti vestibibus, vsque ad talos demissis; inter hos quidam est ex nobilibus, qui vexillum tenet cum ciuitatis insignibus. Adfunt, & vrbs eiusdem sacerdotes quorum vnus in manibus librum habet missalem. Adest & supremus vrbs gubernator, breuem manu gestans virgam, & atrum amiculum, stolæ in morem, ex humeris appensum, in quo & aureæ circum fimbriæ, & stemmata sunt Imperatoris dignitatis. Ad vrbs ingressum descendit Imperator ex elephanto, manúque sacrum librum tangens à sacerdote porrectum, iurat se tum Florétini Concilij, sedisque Apostolicæ constitutiones, tum Ioannis, qui Sanctus nominatur, & Philippi VII. statuta seruaturum. Mox ad illum cuncti sacerdotes, vt reuerentiam exhibeant, bini accedunt; post illos Gubernator, & ceteri rectores, qui præstita sub iureiurando obedientia,

dientia, Imperatori promittunt, se ex tribus filiis ad Imperij defensionem vnum duros. Vbi hæc peracta, urbem pedes ingreditur Imperator. Ingredientem comitantur duo & quadraginta regum filij, quindecim magni Senatus consilij, legatus magni Abbatis, nobiles aliquot ex orbe Latino: multitudo reliqua manet in tentoriis. Hoc septus comitatu, quatuor, quæ in vrbe sunt, parochias primùm adit: deinde ad S. Antonij se confert abbatiam; tum domum intrat, in quam ad tractanda negotia conueniunt nobiles, vbi de seruandis Imperij statutis breuiem ad eos habet concionem: suamque ad id, quantum opus erit, opem offert. Inde ad puellarum accedit gynæceum (in vnaquaque vrbe vnum est) quæ habeant, quibus egeant, sciscitatur, & suppeditari iubet necessaria. Si qua inter eas est, quæ matrimonio velit copulari, potestatem ei facit; vetitum enim aut regis filium sine Imperatoris, aut nobilem sine regis, aut ciuem sine nobilium, aut plebeium sine ciuium facultate coniugium inire; cui tamen vult Imperator, eam concedit; id ipsi liberum. Hæc auctor ille, quæ non minus, quàm superiora fictitia esse extra dubium est. Haud opus singula refellere. Satis erit ostendere, quod paulo pòst faciam, Abassinos Imperatores non modò Apostolicæ sedis nihil decreta curare; sed plerosque ex iis, qui proximis annis Imperium tenere, Romanam fidem, noménque hostili animo fuisse insectatos. Quæ verò de Imperij lustrandi forma, de vexillis, de papilionum custodibus, de prætorianis equitibus, de urbium ingressu, de imperatorio comitatu, de quatuor vbis parochiis, de S. Antonij Abbatia, de nobilium dómibus, de puellarum gynæceis, deque eiusmodi aliis dicuntur, me tacente, facile quiuis intelli

telliget fabulas esse. Videbitur paulo pòst, num sit credibile, tam exhaustos principes, tantisque iactatos & oppressos bellorum calamitatibus, tanta cum magnificentia & celebritate Imperij terras lustrare posse, quippe qui sicuti sæpe iam dixi, ut ab domo pellant hostes, seque ab eorum armis tueantur, ad externas opes cogantur confugere.

Quæ scelera, quibus pœnis in Abassia puniantur.

C A P V T X V I.

DE pœnis, quibus apud Abassinos addicuntur rei, deque variis puniendi modis varia ab historicis traduntur, quorum pleraque absunt à vero. Proponam breuiter, quæ scribit nouus auctor. Ait vni tantum delicto mortis supplicium iure decerni; id prodicionem esse. Ad hoc vnum duo alia reduci, homicidium, & adulterium; illud quidem quia qui hominem occidit, regi quoque suo audebit necem inferre; hoc verò quia qui thorum violat alterius eiusque honorem lædit, iniuriam videtur principi suo facere, cuius solius est honores conferre. Reliquis delictis nullum esse iure ipso statutum capitis supplicium, sed pro Iudicam & Imperatoris arbitrato plecti solere, aliquando morte, frequentius exilio. Relegari potissimum reos ad præsidia, quæ partim in finibus sunt Imperij, contra Mahumetanos Borni incolas, acerrimos Æthiopum hostes; partim contra Arabes piratas, in maritimis urbibus freti Erythræi. Eo verò quæque

que reum difficiliori constitui in loco, quo grauius suscepit crimen. Olim in vsu fuisse oculos furibus erui, vt hoc priuati instrumento, vel multi à tali abstererent maleficio. Nunc quamuis enormia suscipiant latrocinia, ad Borni præsidia amandati, seruata vita. Quibus inferenda mors est, eos neque infelici arbore suspendi, neque igni vrendos tradi, neque strangulari, sed viuos leonibus exponi; hoc vnicum esse in tota Abassia mortis supplicium; ideo singulis in ciuitatibus loca designari, in quibus, vt in carceribus, hæc animalia seruantur. Tres ante mortem dies denuntiari damnato sententiam, vt confessione animum expiet, & sacro viatico ad profectiorem se comparet. His elapsis, conduci ad locum supplicij; vestibus ibi denudari; velo oculos operiri; in lacum proijci; atque vno pæne momento temporis à bestiis deuorari. Nihil esse statutum contra parricidium, ignotum prorsus apud Abassinos flagitium; neque ipsis potuisse vquam venire in mentem, esse inter homines, qui auderet vitam illi eripere, à quo eam accepisset. Aliquando euenisse, vt frater fratrem interimeret; dñatum quidem ad leones qui fecerat eadem; verum extra fines Æthiopiæ delatum, ibique obiectum bestiis. Visum enim oportere, vt tam horrendi criminis patritator non viuos tantum, sed etiam mortuus patrio careret solo, & apud alienos eius ossa exularent; ne pessimi exempli vicina fama percelleret pias aures posterorum. Peccatum illud, quod scelerate sua nefandi nomen sibi vendicauit, nulla ratione fuisse antea in Abassia notum; adeoque Abassinorum animos & cogitationes ab eo fuisse auersas, vt nemo crederet, posse ab vilo suscipi; ob eam causam non modò nullamici per leges statutam pœnam, sed neque vllam

lam in iisdem legibus factam de ipso mentionem. Cæterum (quæ mala non inuehit in vitam mortali-
 um natura deprauata) paucis antè annis vulgo co-
 gnitum, quosdam Italos illis in locis eo in scelere fuisse
 deprehensos. Increbuisse mox facinoris rumo-
 rem; adeoque per vniuersum Imperium rei atrocitate
 turbatum esse; vt crimen ad magnum Senatum
 delatum valde ancipites tenuerit consiliarios. Hæsisse
 eos primum, inauditum flagitium considerantes;
 deinde quid opus facto esset, deliberasse: cum tamen
 nullum reperissent, quod satis esse posset tanto malo
 supplicium, Alexandrum III. (is adhuc, vt ait, in vi-
 uis erat) ea de re consuluisse; eiusque mandato com-
 missum negotium Latino Senatui, vt iuxta Europæas
 leges in turpes prædicatores animaduerneret. Cum
 verò grauitatem delicti, atque ex eo ortam in omniū
 animis offensionem penderent Senatores, viderent-
 que posse inde, vt ab pestifera radice, venenosam so-
 bolem pullulare, nefarios nebulones vlticibus flam-
 mis tradendos communi sententia iudicasse. Hoc au-
 tem iudicium ita magnum Senatum, ad quem res de-
 lata fuit, approbasse, vt censuerit extra Imperij fines
 pœnam esse infligendam, ne tam horrendi facinoris
 vlla in Abassia memoria remaneret. Deferendos igitur
 in Mosambicum reos, ibi statuto supplicio ma-
 ctandos Imperatorem tamen cum apud se cogitaret,
 eos homines ad Latinam Ecclesiam pertinere, & in
 ea natos esse prouincia, in qua Pontificis maximi se-
 des est, præcepisse, vt Goam deferrentur; & Latini Se-
 natus sententia cum magni Senatus approbatione
 traderetur proregi, eam vt ipse exequi ministris suis
 mandaret. Ita factum; Proregem enim accepta le-
 ctæque sententia, quam primum medio in foro ingens

tes lignorum strues parari, & reos, in sua quemque inclusos, subiecto igne cremari, atque in cinerem redigi iussisse. Eo ex tempore conditum ab Imperatore nouum statutum, & veteribus additum, vt si quis vquam in tali culpa, quod absit, deprehendatur, absque vlla misericordia detur viuus leonibus dilaniandus. Ait præterea hæreticos, & apostatas morte mulctari. Talem verò in persequenda hæresi seruari ordinem. Siquis, inquit, hoc crimine noscitur infectus, ferreis catenis ligatus, Zambram ducitur. Ibi magnus Senatus est, eiusque iussu ad Priorem eius cœnobij, quod habet ex Alleluia nomen, & Dominicani ordinis est, literæ dantur, ex quibus comprehensum esse hæreticum agnoscat. Tum Prior vnum ex religiosiis, quem nouit ad rem idoneum, auctoritate sua legit, eique negotium committit. Is statim Zambram petit, & ibi rem diligenter examinat; anne hæreticus sit, qui de hæresi fuit postulatus, sententia sua declarat: si affirmat, Senatus decreto ad leones damnatur, iisque viuus subiicitur, nisi resipiscat. Eodem punitur modo, qui à Christi religione ad Mahumeticam turpitudinem deficit. Ait præterea Abassino Imperatori cum Rege Borni, & cum Ægypti præfecto, ac cæteris Arabiæ principibus iam olim conuenisse, vt qui mutandæ religionis causa, vel ad ipsos ex Abassia, vel ad Abassiam transferit ab ipsis, is suo principi reddatur, extremo supplicio perimundus. Eam tamen in hoc pacto interpositam esse conditionem, vt qui à Christo transfugerit ad Mahumetum, ad Abassinos omnino remittatur; qui verò Mahumeti seruitutem cum Christiana libertate commutarit, is quoque reddatur suis, nisi quoddam inueniatur habere sancti Dominici signum; id quoddam est exiguum scapularium,

rium, certo Prioris notatum sigillo. Quare cum primum ex dictis locis Christi fidem suscipere aliquis desiderat, mox sancti Dominici religiosus erudendum tradi, & prædicto notandum signo. Hinc fieri, ut ea, quæ inter Abassinum, & vicinos principes est, de reddendis transfugis conuentio, nihil iis incommodet, qui Christianis ouibus cupiunt aggregari. Scribit item idem auctor, striges deferri ad templum, ibi Dominicanæ familiæ religiosum damnationis sententiam legere ex suggesto. Ea audita easdem striges duci ad peristylum, seu claustrum templi, tamdiuque à sacerdotibus vapulare, donec totum percurrant. Inde ad destinatum duci locum, ubi breuibus inclusa parietibus vitam finiunt. Quæ enim foemina huic se arti semel addixere, vix contingere, ut ab ea deinceps vllò metu absterreantur. Prudenter igitur cautum, ut quibus vita relinquitur, ipso supplicij genere tentandi maleficij eripiator occasio. Periuros, ac blasphemos sacerdotali primùm reprehensione redargui. Si labuntur secundò, seminudos, manûque cereum tenentes festis diebus ad templi valuas palàm exponi. Si peccant tertio, veste indui coloris pallidi, & iumentorum instar, os collumque capistro ligatos duci per urbem; demum in desertam siue Arabici freti, siue australis oceani insulam amandari, ubi fame consumpti, durum infelici vitæ imponant finem. Blasphemis olim fuisse solitum oculos erui, uti indignis, qui cælum aspicerent. Ita visu priuatos per Æthiopiam vagari, victum sibi medicando. Hæc ille omnia, sed more suo multo copiosius. Pleraque ex his esse falsa, hoc præsertim tempore, quo ille maximè ea vera esse contendit, facili negotio intelligitur; cùm iam ex dictis constet; Abassinum Imperatorem in Erythraeo

thrazo frecto nullum habere portum; quem præsidio firmet; vix milites habere quorum se armis tueatur. Tantum enim plerumque habet copiarum, quantum potest raptim parare; cum hostis vrget. Quæ de hæreticis, de eorum censoribus, de ratione eos puniendi, deque aliis huiusmodi dicuntur, commentitia sunt, valdeque à vero absunt. Hæretici enim in Abassia præter ipsos Abassinos nulli sunt: hos verò plurimis, & maximis erroribus pertinacissimè adhærere, postea est demonstrandum. Si quis hos Catholicos dixerit, poterit hæreticos appellare: Societatis religiosos, qui ipsis Abassinis ad Romanam fidem reduendis nauant operam. Præterea satis constat, & postea multo fiet apertius, nullum esse in tota Abassia Dominicanæ familiæ cœnobium; ex quo sequitur eius religiosos non esse ibi hæreticæ ptauitatis censores, quod tantopere, nescio quo consilio, nititur hic auctor legentibus suadere. Vtinam tales ibi religiosi essent, & sanctæ Inquisitionis fungerentur officio; qui nunc in ea gente errores sunt, haud dubiè non essent. Quod de nefando scelere ab Italis hominibus commissio, & ad supremum inprimis Senaturn, ad Latinum deinde, tandemque ad Imperatorem delato, auctor comminiscitur, eandem, quam duplex ille Senatus, habeat à lectoribus fidem. Quæri tamen ab eo potest, quonam animo, quæve ratione ausus sit; illud flagitium Italis hominibus affingere? Debit certe religione prohiberi, quominus id faceret, & genti toto orbe clarissimæ; quam suspiciunt omnes, & venerantur, tantam inureret infamiæ notam. Etchim si in tali turpitudine fuissent Itali re ipsa deprehensi, ratioque historiæ postularet, vt flagitium in medio poneretur, silendum fuisset gentis nomen; cum rectè

constarent omnia, si tantum ab externis quibusdam hominibus patratum scelus diceretur. Iam verò, quàm est ineptum illud? hosce reos Imperatoris iussu fuisse Goam missos, ut Indicus prorex latam contra eos à Latino Senatu sententiam executioni manderet? Ecquod obsecro, habet Preteiannes aut in Goanam urbem Imperium, aut in Lusitanos prætores auctoritatem, ut flagitia in Abassia suscepta Indici prætoris ministerio Goæ plectantur? Haud opus ostendere meram esse fabulam, quæ de transfugis narratur; certius certo est nihil in ea dici, quod veritatem sapiat. Cum auctor de strigibus locutus est, parcere debuit sacerdotum dignitati, & modestiæ; utrique autem valde nocet, dum eos fingit lamiarum verberatores. Proponam hîc, quæ de re iudiciaria in illa Antonij epistola legi. Sic scribit. Demum habet Imperator (Calam Abassini vocant) multiplici circumdata septo, sed humilem, & sine vlla contignatione, ut foris existentium clamores percipiat. Concurrunt undique multi ad ostium domus; atque ut quisque ex diuersa natione est, ita peculiari modo contenta voce ab Imperatore ius postulat. Qui Lusitani generis sunt, clamant, Domine, Domine: Turcæ & Saraceni, Side, Side, quæ vox etiam Arabica lingua dominum sonat: alij Saió, Saió, hoc est, ô Sol, ô Sol. Alij simios, vulpes alij, alias alij animantes clamando imitantur; atque ex ipso clamore quo quisque ex genere aut prouincia est, facile dignoscitur. Vocibus igitur clamantium perceptis & cognitis, iubet Imperator eorum causas committi Vmbaris, ita curiæ iudices vocantur ab Vmbare, hoc est, tripode: duplici enim distributi ordine ad ostium palatij sedent, quidam ad sinistram, alij ad dextram, in tripide quisque sella. Neque

que scribis, neque vllō vtuntur scripturæ genere in toto hoc litium negotio. Oppidorum domini subditorum agnoscunt causas. Hic apud illos mos. Cū quis alium in crimen vocat, vnum toparcha ex familiaribus suis legit, qui diem reo dicat, & pro delicti cōditione necessarium assignet ad defensionem tempus. Mox vadimonium promittit reus. Quodd si idoneum non habet sponsores, vel iureiurando adstringitur, vel iniecta manui catena, quod frequentius fit, cum altero, cui traditur custodiendus, colligatur, ne fugam capessat. Ad præstitutum diem comparent in iudicio Actor & Reus, & pro se agit quisque quantum potest. Disceptatione finita, omnibûsque ex vtraque parte rationibus propositis, quotquot adsunt, ferunt sententiam. Libera cuique ab hoc iudicio ad Vmbares, ab istis ad Azages, qui supremi iudices sūt, ab Azagibus ad Imperatorem appellatio. Qui iudicis sententia damnatur, non solum parti alteri soluit litis expensas, sed etiam iudici pro iudicandi labore stipendium. Sæpe solent aliqui cum summa potestate prouincias lustrare, vt furta, homicidia, & eiusdem generis delicta plectant. Munus hoc constituta auctione venditur; & ex eo fit, vt non magis à latronibus & sicariis vexentur populi, quàm ab iis ipsis, qui ad insequenda crimina in prouincias mittuntur. Quicumque, quamuis priuatus capere homicidam potest. Cū quis alicubi interficitur, statim per circūvicina oppida defertur cædis nuntius, vt homicidam oppidani comprehendant. Ni faciant, certa mulctantur pecuniæ summa. Hæc de re iudiciaria, & nihil amplius Antonius.

*De puerorum institutione & usu literarum
apud Abassinos.*

C A P V T X V I I.

Scribit nouus auctor, Æthiopes in pueritia instituenda summam semper curam adhibuisse; atque ab eo tempore, quo adhuc gentilicas colebant superstitiones (quod nunc, & iam inde à Christi fide suscepta multo ait diligentius seruari) in vnaquaque vrbe duo, instituisse collegia, puerorum vnum, cui inditum à sapientia nomen, alterum puellarum, quod virginittatis habet appellationem. Hoc intra, illud extra vrbis muros esse; omnesque in his incolarum filios, & filias educari, fœminas ab anno decimo vsque ad vigesimum, masculos ab octauo vsque ad decimum sextum. In vtroque doceri Christianæ fidei Doctrinam. Cæteraque ad cuiusque status & vitæ rationem necessaria; masculis quidem tradi literas, cæterasque, ad quas quisque suo pte ingenio propendet, artes, fœminis verò ea omnia, in quibus iuxta patriū vsum solent exerceri. In vnoquoque collegio tria esse domicilia, diuisa inter se; vnum nobilibus, alterum ciuibus, tertium plebeis destinatum; in quolibet pædagogos esse, ac magistros, pro cuiusque cœtus conditione distinctos; ex nobilium tamen ordine quatuor esse viros, & totidem matura ætate fœminas, illos sapientiæ, has virginittatis collegio præsidere. Egredi masculos e collegio posse ad inuiscendos suos, & causa animi laxandi; idque festis communiter diebus, aliquando etiam profestis, cum se occasio offert, ipsis concedi. Difficiliorem esse fœminis egressum. Neminem

minem nec reges quidem, ab ista dandi filios obligatione eximi. Duo potissimum ex tali institutione gigni commoda; vnum, quod assuescant pueri à prima ætate suscipiendis confessionis & Eucharistiæ sacramentis; alterum, & hoc ex priori sequitur, quod castè, & sincerè viuant. Inde fieri, vt in tota Abassia, vbi scorta plurima sunt, nullum indidem, sed ab externis omnia regionibus aduenire. Hæc nouus auctor de puerorum educatione, quæ omnino falsa sunt. Amant quidem Abassini literas, præsertim diuinas, in quas tanta feruntur cupiditate, vt vix vlla sit ex nobilibus fœmina, quæ Pauli epistolas, Dauidicos Psalmos, & similia ignoret. At hæc non in collegiis, sed domi suæ, & in templis addiscunt. Cum his puerorum domibus cōiungit nouus auctor lupanaria meretricum, de quibus aliqua dicit, quæ referre mihi pudor est. Illud risu dignum, quod adiungit, si qua ex his perditis fœminis ad meliorem frugem se recipiat, quæstumque meretricium relinquat, eam mitti Goam vt inibi degat in domo, sicuti vocant, Conuersarum, cuius penes Societatis religiosos cura est; neque enim earum vlli fas esse in Abassia manere, ne pristini status memoria castas fœminas sollicitet ad turpitudinem. Earum quoque filios, si quos habuerint, cæterosque ex illegitimo natos thoro, vbi ad debitam veniunt ætatem, ex Abassia pelli, inque urbem Goam, vel in Ormusiam, vel Denzilanum, vel denique Mosambicum amandari; ibique ab Imperio longè distitos sacerdotum expensis ali. At enim quodnam Abassinis est in Goanam urbem ius, vt eas fœminas ad illam se conferre, & in Conuersarum domum recipere, compellant? A quo item auctor hic accepit, administrationem illius domus, si qua Goæ est, Societatis religiosi

esse commissam? Ignorabat ab instituto Societatis esse alienum, foeminarum collegia moderari? Quis credat non legisse, vel audisse sæpius, Societatis religiosos pluribus summorum Pontificum literis ab omni foeminarum cura & gubernatione esse immunes? Quod de spuris dicit, eamdem habet, quam reliqua, fidem. Quis hoc nescit? Hæc mihi fabula ex illis esse videtur, quas ex suo didicit Abassino, cui mirum est, in rebus talibus tam facile fuisse assensum. Cautior, quidem esse debuit, quàm ut cuncta, quæ ab illo accepit, literarum monumentis, quasi certa, mandaret; nisi forte prudens & sciens falli voluit, quod vix credi potest. Quod ad literarum studia attinet, à medicina incipit novus auctor; atque hæc de medicis scribit. Eos in Æthiopia Philosophos nuncupari, postquam Doctoratus gradum sunt assecuti. Imposito enim studiis sine, examini subiici; si probentur, literas ab examinatore accipere, quibus de examine constet, & approbatione; & cum iis ad cœnobìa Domini canoni ordinis, quæ de Alleluia, & Plurimanos dicuntur, conferre sese, propinquorum amicorumque, cetera constipatos. Ad eos excipiendos in templa exire religiosos, eorumque Priorem nigrum candidatis imponere cum longis manicis cucullum; & de obedientia Romanæ sedi præstanda, deque servandis Florentini Concilij decretis iusiurandum exigere; eo exhibito, auream illis iniicere vestem, ex collo in petus demissam, in qua Imperatoris fulgent insignia. Sic indutos ingenti omnium, quacumque transeunt, gratulatione & lætitia exceptos, in vrbes suas Philosophos, hoc est, Doctores redire. Summo apud omnes esse in honore, multisque affici & ornari tum publicis, tum privatis beneficiis. Possè enim elephanto ve-

hi

hi per urbem, quod præter Imperatorem, antistites, virginésque sacerdotes, de quibus postea dicendum, nulli hominum fas. Possè, sicut civitatum gubernatores, itola uti ex humeris appensa, quod est eximie dignitatis insigne. Ab omni cuiuscumque tributì onere esse exemptos. Non teneri ea lege, quæ ex tribus cuiusque filiis vnum bello addicit; quamvis & ipsi reges ea teneantur Eundem namque legis auctorem, qui fuit Philippus VII. magno Basilio ætate par, statuisse, ut medici, honoris causa, ab illa essent soluti. Eam verò ob rem tanti medicos in Æthiopia fieri, quia præter medicinam nulla alia publicè addiscitur scientia. Theologiam enim, & Chaldaicū idioma, quod sacris inseruit, in cœnobiis ac templis inter solos Ecclesiasticos tradi; Logicam omnino ignorari; mathematicas disciplinas vix nosci; quidquid Philosophiæ ad Medicinam necessarium est, cum ipsa simul addiscendo coniungi. Itaque solam Medicinam in publicis gymnasiis doceri, ad eamque perdiscendam septem tantummodo in toto Imperio generales esse Academias. Haud esse cuique liberū, huic scientiæ operam dare; cum ex qualibet vrbe ex nobilium ordine tres iuvenes à Rectoribus eligantur, sunt qui & propenso sint in literas animo, & iudicio, ingenioque valere noscantur. Hos communibus ali urbium suarum sumptibus, multosque in Academiis annos consumere; nec Medicinam tantum, sed etiam vulnera curandi, & pharmaca conficiendi artes addiscere; rei quoque herbariæ nauare operam, quin multæ sunt in Æthiopia herbæ, medicamentis aptissimæ. Quapropter vnumquemque ex his, qui ad studia mittuntur; & medicum simul, & chirurgum, & medicamentarium, & herbarium euadere. Medicandi

modum cauteriis potissimum constare. Aliquando tamen, sed raro, scindi venam, & sanguinem extrahi. Ad purgationes frequenter usurpari fructum arboris cuiusdam, quæ ad ripas alicuius Nigri fluminis, Iuuy dictæ; prægrandem esse; & longa latæque habere folia; ac pomum magnitudine iuglandi par. Qui purgationem expetit, vno ex his vel altero sumpto, tantisper quiescere, ac post horas duas sudorem emitte-
re, & ter, vel quater aluum exonerare; dein ad negotia expeditum, ac vegetum redire. Si maiori opus sit purgatione, idem medicamentum resumere; posse enim absque ullo sanitatis incommodo toties eodem die repeti, quoties libuerit. Hæc de medicis, & medicamentis nouus auctor, quæ falsa esse compertissimum est. Sunt quidem in Æthiopia, qui medicandi artem profiteantur, & curandis febribus, aliisque morbis expellendis cauteria communiter adhibeant; quod in usu etiam apud Saracenos est. Verum septem generales in Imperij urbibus esse Academias; ex nobilium genere ad illas mitti; qui sint à ciuitatum rectoribus delecti; hos ibi communibus aliis expensis: multosque perdiscendo annos transigere; denique præmissa de præstanda Romanæ sedi obedientia, & Concilij Florentinij decretis seruandis iureiurando, ad Doctoratus gradum euehi, eximisque ornari privilegiis, quorum quædam nec regibus sint concessa; cæteraque eiusdem generis tam constat esse falsa, ut ne ipsi quidem Abassini, quibus solemne est res suas efferre, nihilque respondere, quod aliquam genti existimationem conciliet, vltro oblata admittant, & à vero abesse facile fateantur. Illud etiam potuit hic auctor aduertere, cum totam ferè medicandi artem apud Abassinos cauteriis, & quarundam herbarum usu con-

tineri dixerit, non fuisse opus, suos illos medicos tanto tempore in scholis versari, & in perdiscenda re, quæ potest breuiter & facile addisci, multos annos consumere. Sed ad reliqua. Sic deinde scribit. Sacra Theologia non in publicis docetur Academiis, sed priuatim, tum in cœnobiiis ordinis sancti Dominici, ac sancti Antonij Abbatis, tum in templis clericorum; nec alij, quàm Ecclesiastici in eius studium incumbunt. Æthiopica traditur lingua. Vt verò apud nos sententiarum Magister, aut sanctus Thomas, aut alius quispiam grauis scriptor, ita quatuor illa Concilia, Nicænum, Constantinopolitanum, Ephesinum, & Chalcedonense, quæ veluti quatuor Euangelia habenda esse Patres censuerunt, apud illos explicantur. Sanctæ Thomæ summæ, & quæ Theologica dicitur, & quæ inscribitur contra gentes, cætum iam abhinc annis à Petro Abbate Abassino ex Latino sermone translatae sunt in Æthiopicum. Dominicani, qui in Abassia sunt, vtriusque scientiam addiscunt; quamquam Conciliorum doctrinæ impensius se dedunt. Scriptura diuina Chaldæo traditur idiomate, & quæ communiter nauant operam, qui sunt addicti sacris. Licet autem disputandi ratio in eorum scholis ignota sit, non ideo tamen Abassinis Theologis denegari debet Scholasticorum appellatio, quam veteres Sapientes multis tribuere, qui longè aberant ab Scholasticis disceptationibus. Hæc ille, ex quibus rectè pauca; non esse videlicet apud Abassinos publicas scholas, in quibus Theologica tradantur; nullum esse de Theologicis rebus disputandi vsum; si quid Ecclesiastici addiscunt, id ex diuinis libris & Conciliis desumi. Cætera ferè omnia cum falsis numeranda. Neque enim vlli in Abassia Doctores sunt qui sicut nostri

nostri apud nos Petrum Lombardum, aut sanctum Thomam, aliquémve alium explicant, ita quatuor illa Concilia magistrorum more interpretentur. Ecclesiastici, & nonnulli alij, præsertim nobiles, ut antè dixi, solent aliquid ex Scriptura sacra & quibusdam Conciliis memoriæ commendare, isque habetur peritior, qui memoriter plura tenet. Alij Doctoratus gradus, aliæque Doctorum dignitates nullæ sunt. Pueri nobiles, ut iam dixi, partim domi suæ, partim in cœnobiis prædicto modo nonnihil addiscunt. Aliquibus religiosis exceptis, qui tamen sunt paucissimi, reliqui ferè omnes in maxima rerum sacrarum & naturalium ignoratione versantur. Quoniam verò de studiis literarum hoc loco egimus, non putamus abs re, ex plurimis, quæ idem auctor de Preteïannis bibliotheca scribit, aliqua brevissimè referre. Ait in monte Amara, in cœnobio sanctæ Crucis eam servari, & ab Regina Sabæ accepisse initium; repositos ibi esse libros permultos, quos & tunc Salomon ipsi Reginae ab Hierosolymis in patriam discedenti dono dedit; & singulis deinde annis solitus erat ad eandem mittere. Inter reliquos esse quosdam, quos vetustissimus ille Enochus ab Adamo septimus de cœlo, de elementis, deque aliis Philosophicis rebus composuit. Esse alios, quibus res mathematicas, & plurima ad sacros ritus & cæremonias spectantia Noëmus tradidit. Alios ab Abrahamo editos, cum esset in valle Mambre, ubi philosophiam publicè profitebatur, & eos habebat auditores, quorum opera quatuor illos reges, qui Lothum nepotem ceperant, acie profligavit. Alios à Iobo, ab Esdra, à multis Prophetis, & summis Iudæorum Pontificibus de rebus variis conscriptos. Alios, in quibus plurimæ sunt Apostoli Pauli epistolæ

epistolæ Europæis ignotæ; & plura Euangelia hisce
& similibus inscripta titulis, secundum Hebræos, se-
cundum Nazaræos, Encratitas, Ebionitas, Ægyptios,
secundum Bartholomæum, Andream, Thomam, &
secundum alios: hæc autem opera licet incertæ fidei
sint, & ex eorum numero, quæ Apocrypha dicimus,
summum tamen asserre bibliothecæ ornamentum.
Alios esse libros de rebus variis, partim soluta, partim
ligata oratione à Sibyllis, alios ab ipsa regina, & eius
filio Melilecho compositos. Cabalisticæ Iudæorum
disciplinæ diuersa, tomisque diuisa plusquam quin-
que mille volumina. Tot denique in hac bibliotheca
iustæ magnitudinis libros reperiri, ut numerati vix
queant. Iis autem conseruandis, & amplificandis du-
centos monachos addictos esse gnatos literarum.
Hæc de monstruosa illa bibliotheca dixisse satis. Re-
liqua apud eum videat, qui volet. Duo tamen hîc
adiungenda, quæ addit. Vnum est, Sirleti Cardinalis
rogatu, fuisse à Gregorio XIII. Pontifice maximo in
Æthiopiam missos Antonium Gricum, & Lauren-
tium Cremonensem, ut hanc inspicerent bibliotheca-
m; quos alij eodem fine sint comitati. Iuisse, & vidi-
sse, & librorum tum multitudine, tum pulchritudine,
in summâ raptos fuisse admirationem; tot enim simul
reperisse vna in domo libros, quot numquam antea
in aliis conspexerant Europæ locis; prægrandi omnes
membrana ad æqualitatem compositos, diuerso idio-
mate, & characteribus optimis manuscriptos, graphi-
cæque & artificiosè concinnatos. Alterum est, Abas-
sinos Imperatores iam inde ab Regina Sabæ per æta-
tes consequentes, summa semper diligentia procuras-
se, ut sua illa bibliotheca nouis continenter libris au-
geretur. Habuisse ab Iudæis plurimos, quo tempore
illi

illia Babylonijs, Assyrijs, & Romanis victi, & in servitutem redacti sunt, plurimos ex clarissima Alexandria bibliotheca, quando Imperatores Romani Titus, & Vespasianus urbem Hierosolymitanam bello subactam solo æquarunt; plurimos, cum Saraceni Arabiam, Persidem, Mesopotamiam, Armeniam, Assyriam, Palæstinam, atque Ægyptum armis ceperunt: omnes enim tunc harum regionum Christianos, belli furorem declinantes, cum ingentibus librorum sarcinis in Æthiopiam se recepisse; quod antea fecerant alij veræ fidei sectatores, cum Ariana hæresis per vicina Æthiopiæ loca, perque orbem ferè totum non grassari tantum, verumetiam desauire cœpit; cum item Vandalicus furor turbavit Africam; cum demum Turcarum rex minorem Asiam, Græciam, Constantinopolim, aliâque Europæ loca belli impetu penetravit; nullum enim tunc fuisse hominem catholicum, qui suis cum libris in Æthiopiam, veluti in quâdam salutis & religionis arcem, non confugerit. Tantam denique amplificandæ bibliothecæ in Abassinis Imperatoribus fuisse curam, ut cum Mena, peruagata per Africam fama, accepisset, Carolum V. armis Tunetum occupasse, valdeque insignem & copiosam regis Muleassis bibliothecam, quæ in ea dicebatur urbe esse, cum reliqua præda à militibus fuisse direptam confestim miserit, qui Ægyptijs, Romanis, Venetis, Siculis, aliarumque prouinciaram mercatoribus verbis suis nuntiaret, summo perè se optare cunctos eius bibliothecæ habere libros; darent proinde operam, ut reddito militibus pretio illos recuperarent, & ad se mitterent; omnes se expensas, quæ ipsis emendis, ac mittendis fierent, largiter soluturum. Hac ratione plusquam tria acquisuisse librorum millia,

quibus

quibus rei herbariæ cognitio, Mathematicæ disciplinæ, Astrologia, Medicina, multaque alia scitu dignissima continebantur. Cæterum vnde, & quam ratione illa quinque millia cabalisticæ artis volumina comparata sint, si nosse lector velit, rem à nouo auctore sic accipiat. Cùm reges, inquit, catholici Fernandus, & Isabella propriis commodis Dei causa posthabitis, Hebræos ex Hispania eiecere, ad eò copiosa perfidæ gentis examina in alias terræ plagas inde egressa sunt, vt Europam, Asiam, Africam implerint. Vix enim vlla fuit in orbe regio, quam pestis ista non inuaserit. Magna pars diuersis per Ægyptum, & Libyam itineribus Æthiopiâ adierunt. Cùm eos Abassini de rebus Scripturæ sacræ audissent colloquētes, & à lingua Hispanos, à ratione vitæ esse Christi hostes cōperissent, facile intellexerūt, genere & secta facē esse Hebræā Rem deferunt ad Imperatorem; mittit ille ad cœnobiū de Alleluia, qui patres familiæ Dominicanæ, hæreticæ censores prauitatis, ex tēplo vocet ad se. Vbi veniunt, impensè mandat, vt aduenarum causam diligenter examinēt, quod genus hominū sit, qua lege viuant, quid in Æthiopiam quæsitum venerint. Patres, quod iussu, faciunt. libros primū, quos secum Hebræi asportant, colligunt; ad reliqua dein progrediuntur. Ex libris Latino quidam, nonnulli Italico, alij Hispano, alij Arabico, alij demum Hebraico erant conscripti sermone. Abassini Hebraicos legere, & Arabicos. Adsciti deinde Europæi, qui reliqua idiomata cognoscerent. Compertum igitur eos libros Rabbinicos esse, Thalmudicos, Cabalisticos. Tunc Imperator, quòd Hebræi cōtra Imperij statuta Abassiam intrarint, & amissione librorum, & perpetuo eos exilio mulctauit; adiectis insuper grauissimis pœnis, si

aut

aut confestim ex Æthiopiæ finibus non exirent, aut in illam vniquam reuenterentur. Horum quidam in regnum Borni, in Arabiam alij contulere sese, non sine magno Abassinorum damno, cum nitrati ac sulphurei pulueris vsu, cæteramque ferreos globos iaculandi artem, nondum illis locis notam, eorum hostibus patefecerint. Addit vltimò idem auctor, hos Hebræorum libros in aula quadam fuisse expositos, & ab Antonio Brico ac sociis recognitos; reperta etiam cum iis opera omnia, quæ Raimundus Lullus Cathalanus de arte magica conscripsit. Ex Thalmudicis tandem, & Cabalisticis, (eiusdem rationis plures erant) quosdam Pontificis iussu Romam fuisse delatos, ut si quid inter illorum Hebræorum, & horum, qui nunc Romæ degunt, Cabalam, & Thalmudium esset discriminis, discerni posset. Hæc ille. Sed nullam in morte Amara esse bibliothecam, ex literis habemus, & narratione eorum, qui loca illa diu coluere. Nonnihil librorum est in eo cœnobio, quod Axumum, vel Acaxumum dicitur, & à Regina Candace ferunt ædificatum in vrbe Saba, quæ nunc pæne euersa, & æquata solo nonnulla retinet antiquæ signa pulchritudinis. Quidquid id tamen librorum est, regis bibliothecæ non meretur nomen. Ita referunt, qui rem perpexere, indubitatæ homines fidei, quique, quantum fert veritas, augere magis res Æthiopicas, quàm imminuere desiderant. Quæ auctor idem narrat de Antonio Brico, & Laurentio Cremonensi à Gregorio Pontifice in Abassiam missis, ut Amaranam viderent bibliothecam, deque immensa Imperatorum sollicitudine in ea omni ex parte amplificanda inter fabulas reponatur. Illud enim de Græco Romæ narratum mouit risum audientibus. Scilicet ea Pontificis maximi cura erat,

erat, ut homines in Æthiopiam mitteret, qui Amaranam explorarent bibliothecam (quamvis aliqua tam monstrosa inibi esset) & Cabalisticos atque Thalmudicos iuberet libros deportari, ut eos cum illis componeret, quibus, qui Romæ viuunt Hebræi, vterentur, quos quidem haud scio, an quid Cabala sit, villo modo agnoscunt. De regis Tuneti bibliotheca quod additur, falsum est, & secum pugnans. Nam Carolus V. Tunetum cepit quatuor & viginti annis priusquā Abassinum Imperium Mena teneret: illud enim anno contigit quingentesimo trigesimo quinto supra millesimum; Mena verò, ut ex literis nostrorum notum est, & iam suprâ animaduersum, Claudio fratri successit anno millesimo quingentesimo quinquagesimo nono. Et de his satis ista.

Quo tempore veri Dei religio in Æthiopia cœperit.

C A P V T XVIII.

Qui reginam Sabæ illam, quæ ab austro aut terræ finibus iussu dicitur ad audiendum Salomonem, in Insula Meroe regnasse credunt, ij pro indubitato habent, post eius in patriam regressum, vnus veri Dei cognitionem esse in Æthiopia cœpisse. Reginam videlicet à Salomone edoctam, relicta idolorum superstitione transiisse ad Mosaicam religionem, ea tempestate probatam, illamque suis populis impertiisse. Huic ego haud dubitem assentiri sententiæ. Atque imprimis, ut rem altius retexam, ambiguum esse doctis non potest, duas Sabæ nomine fuisse regiones per or-

H bem

bem cognitas. Vnam in ea Arabia, quæ Felix nominata est, non procul ab Erythræo mari, à qua Sabæa thura celebrata Poëtis, & quod multis placet, tres illi reges, Bethlemitico olim nobiles aduentu, Sabæi nuncupati. Alteram ab illa alia non loco solum, verum etiam Hebraica scribendi ratione separatam, quæ in hac, de qua agimus, Æthiopia fuerit, & à Cambisis siue matre, siue sorore (incertum vtra) Meroe postea appellata est. Non me latet, graues auctores asserere, ex Felice Arabia, non ex Æthiopia fuisse Sabæ reginam. Scio quoque alios esse, qui eam velint & in Arabia Felice, & in hac Æthiopia, & in vicina Ægypto latè patente ditione fuisse dominatam; quibus ego etsi non credo, non tamen repugno. Illud volo mihi dent, quod est à peritioribus, hoc præsertim tempore, magis probatum, hanc reginam in Æthiopica Saba sedem sui habuisse Imperij, indèque ad Solomonem profectam. Quas nouus auctor ad hoc firmandum ex antiquissimis literarum monumentis, hodièque in monte Amara repositis, & ex templis ab ipsa regina per Æthiopiam conditis, atque ex rebus talibus affert coniecturas, veluti inanes, & in quibus ad faciendam fidem vis nulla sit, omnino repudio. Alias scio esse validiores, quibus eruditi mouentur; sed ex nobis hoc loco, quibus aliud est institutum, intactæ prætereundæ. Quædam indicabo obiter haud abs re aliena, quæ de hac regina traduntur. Variis inuenio dictam nominibus. Quidam Nicantam vocant, Nicotrem alij, plures Nicaulam, non pauci Machedam, quod nomen recentiores historici vsurpant libentiùs, eo quod ita vocatam ab Æthiopibus acceperint. Tanta ferunt præditam fuisse sapientia, & rerum futurarum præfensione, vt habita pro Sibylla sit. Nec de-

sunt,

sunt, qui illam credant, quæ est à quibusdam Iudæa dicta, ea nimirum de causa, quòd & in Iudæa fuerit, & fidem acceperit Iudæorum. Nec valde discrepant, qui Sambetam, quasi Sabæam appellant. Eamdem volunt apud Ethnicos fuisse illam, quam quidam Babyloniam, Ægyptiam alij, nonnulli Persicam nominant. Vingtiquatuor aiunt scripsisse libros, & multa in iis, quæ ad Christi mysteria spectant, neque in hac re ulli ex aliis Sibyllis cecisse. Sed hæc incerta. Vincentius Ferrerius, vir doctrina & sanctitate clarissimus, scriptum nobis in quodam sermone reliquit; cùm Regina Sabæ ab Salomonis aula in patriam reuerteretur, torrentem in via reperisse, & in eo pontis loco transuersum lignum; in quo cùm pro humani generis salute figendum Christum diuino instinctu cognosset, ex mula, qua vehebatur, subito descendisse, lignum flexis genibus, & effusis lacrymis pronâ adorasse, nec fuisse passam, vt ullus ex toto comitatu pedibus in illo insisteret. Misisse deinde ad Salomonem nuntium cum literis, in quibus narraret, quid sibi in itinere esset diuinitus patefactum. Salomonem re cognita, tolli inde lignum iussisse, & abscondi sub terra; id verò in eo factum fuisse loco, in quo postea constructa est Probatica illa Piscina, Ioannis Euangelio celebrata. Hæc ille, & alia de eodem ligno ab aliis accepta ad sanctissimæ Christi Crucis commendationem in eo, quem dixi, sermone piè narrat. Nec desunt, qui vera esse coniecturis suadeant. Mihi satis de Regina Sabæ ista tetigisse, quam cum multis veteris legis ritibus ac ceremoniis æterni Numinis cognitionem fidemque à Salomone accepisse, & suis Æthiopibus communicasse, vt valde simile vero est, ita multorum literis constanter traditum. Quanto autem post eius mor-

tem tempore apud eas gentes sincera fides perstitit, id quidem definiti certò non potest. Multos etiam nunc superesse Iudæorum ritus, haud est in dubio, ut postea ostendam. Apud nonneminem reperio Melilechi filium eiusdem Reginae nepotem, nomine Iosue, statim à parentis obitu, relicta vnus Dei religione ad inanium simulacrorum transiisse cultum, & genti suæ, ut idem faceret, propositis pœnis præcepisse. Atque ita factum, ut ab eo tempore Æthiopum populi ad Idola redeunt, & sacra quædam, quæ fuerunt edocti, ex Iudæorum religione retinentes, simul fuerint, & cæremoniis Hebræi, & professione gentiles. Sed in rebus adeò vetustis haud facile est quidquam scribere, quod difficultatibus sit expeditum. Venio ad fidem Christi, quam nemo est qui negat ab ipso statim Apostolicæ prædicationis exordio fuisse in Æthiopiam faustè felicitérque ingressam. Dno secundum Deum eius illuc inferendæ propagandæque commendantur auctores. Præcessit Indica (hoc dicitur fuisse Reginae Candacis Eunuchi nomen) secutus paulo pòst Apostolus Matthæus. Ille ab Hierosolymis, quò adoratum ierat, in Æthiopiam rediens, à Philippo Diacono Christiana instructus disciplina, & sacra lympha tinctus, quam acceperat religionem, cœpit suis impertiri. Hic distributo Apostolis orbe, Æthiopiam sortitò obtinuit, ad quam se conferens, quæ Eunuchi opera seri fides cœperat, subactò maioribus aratris solo, longè latèque per vniuersam gentem, labore quidem magno, sed non impari fructu, disseminauit. Quod Iouius habet Bartholomæum Apostolum, & Philippum Diaconum Christi fidem Æthiopes docuisse, cum probatis historiis parum cohæret. Parum & illud quod tradunt alij, Apostolum

stolum Thomam apud eosdem *Æthiopes* Euangeliū prædicatū. Longius videntur à vero deflectere, qui hanc *Æthiopicam* procurationem Philippo Apostolo asserunt commendatam. Philippus quidem diaconus ea ratione *Æthiopum* magister dici potest, quòd Eunuchum Indicam, qui Christianam ipsis fidem primus indicauit, Christi mysteriis instructum aqua abluerit saluari. Probabile etiam videri potest Apostolos Thomam, Philippum, Bartholomæum, dum ad alias oras pergerent, per *Æthiopiam* transiisse, atque obiter, ut se occasio ferebat, Christum illis gentibus denuntiassent. Eam tamen prouinciā Matthæo peculiariter obtigisse, & nouis Euangelij radiis ab eo fuisse illustratam, ut constanter traditur, ita absque dubio credendum est. Quæ de Eunuchō narrantur, hæc ferè sunt. Domum ab Hierosolymis reuersum, diuina Euangelij mysteria Regina Candaci, cui erat Iuditha nomen, primū exposuisse, eamque adiunxisse Christo. Deinde prædicando *Æthiopiam* cepisse peragrarè; cūque in id opus incumberet, de aduentu Matthæi nuntios accepisse; tunc accepta à regina facultate obuiam Apostolo iisse, suamque cum ipso in prædicationis negotio coniunxisse operam. Tandem, & Matthæi, & Eunuchi, & reginæ industria effectum, ut pulso penitus ab vniuersa *Æthiopia* idolorum cultu, omnes eius regionis gentes Christi imperio subiicerentur. Cæterum non ideo Eunuchum quiesse, sed Matthæo & regina consentientibus atque approbantibus, rubro mari transmissō ad alias orbis partes Christianæ fidei detulisse notitiam, & Arabiam, Persidem, Indiam, innumerōsque Orientis populos perlustrasse. Postremò in insula Taprobana, quam nunc Zeilanum esse petitiōnes do-

cent, illustri martyrio finem vitæ imposuisse. Multa hisce de rebus scribunt aliqui. Ea ego neque simpliciter approbare ausim, neque reprobare: suum cuique de illis censendi iudicium sit. Videat tamen nouus auctor, an quæ de hisce rebus tradidit, cum iis, quæ de Matthæo, & ipsius morte ab Hirtaco rege illata ab Ecclesia recipiuntur, rectè cohæreant. Illud inter plerosque videtur constare, ex gentilium regionibus istam Abassinorum Æthiopiam, vel omnium primâ Christi fidem fuisse amplexam, vel inter primas, & per annos multos integram sinceramque seruasse, permixtis ex ignorantia quibusdam Hebræorum cæremoniis ab reginæ Sabæ tempore ex Iudæa aduectis. Sed iam hîc potissima nobis oritur cum nouo auctore concertatio. Is enim ab illo suo Abassino malè instructus, multis & locis & verbis contendit, numquã Abassinos fuisse vllis hæresum erroribus irretitos, numquam ab Ecclesia Romana, & à Romano Pontifice diuisos; sed Christianam fidem, vt eam à Matthæo, & Indica susceperant, ad hanc vsque diem perfectissimè custodiisse. Quæ assertio, quia apertissimæ veritati, quod iam dixi, & sæpius repetere oportet, aduersa est, non debet à nobis absque debita confutatione præteriri: præsertim cùm eo consilio cætera eius commenta adducamus, vt ex iis, quam hac vna in re habere fidem mereatur, perspicui queat. Verùm antequam ad certamen procedam, lubet in vnum corpus coniicere, quæ circa Abassinorum mores ad Religionem vtrumque spectantes ex variis scriptoribus carptim collegi. De quibus siue ea vera, siue falsa sint, nullam mihi cum vlllo homine volo esse controuersiam. Non enim sic illa scribo, vt in omnibus fidem exigam à legentibus, cùm neque ego prorsus ve-

ra esse mihi persuadeam. Quæ tamen ex literis accepi religiosorum Societatis, qui nunc in Æthiopia versantur, vel superioribus annis inibi vixere, iis certè ut habeatur fides, illi ipsi merentur, qui scripsere, cum & ipsi per se ea potuerint experiri, & ab omni sint alieni suspicione, quippe quibus neque vera narratio parere damnum queat, neque falsa utilitatem; & ad eos scribât, apud quos sciant multos esse, qui Æthiopica illa loca diu coluerint, gentisque mores accuratè annotarint; ut hac ex parte iure vereri debeât, ne quid ab ipsis scriptum deprehendatur, quod aliqua ratione à veritatis norma declinet.

Qualis Abassinorum in sacra propensio.

C A P V T X I X .

Quanta olim fuerit Abassinorum in Religionem atque in res diuinas propensio, argumento sunt multa quæ adhuc apud ipsos visuntur pietatis indicia. Deiparam Virginem præcipua quadam beneuolentia ferunt coluisse; ipsique adhuc in terris viuenti posuisse templum, quod in tota Æthiopia à suscepta Christi fide primum fuerit. Fundasse illud volût in vrbe Acaxumo Reginam Candacem, eo ipso in loco, ubi ab Indica Eunuchò aqua lustrali fuit aspersa. Impositum delubro nomen à S. Maria de Monte Sionis, eo quoddam sacer lapis, qui erat in ara maxima, ex illo monte fuerit in Æthiopiam asportatus. Illud quidem de templi fabrica & loco potest probabile haberi; quod de lapide additur valde mihi dubium, & eo ma-

ximè, quòd sit ab incertæ fidei auctore, sine grauiori testimonio traditum. Scribit etiam nouus auctor omnes festos solemnèsq̃ sanctissimæ Virginis dies, quos Romana celebrat Ecclesia, magna apud Abassinos celebritate agi: sic eos Assumptionem venerari, vt & mensibus singulis, decimo quinto die, eius memoriam solemniter recolant, & quotannis tres ac triginta dies continuos, statò tempore in eiusdem venerationem celebrent: hunc verò morem ex vetustis Imperatoribus quemdam, magnæ matri apprimè dictum instituisse. Purissimæ Conceptionis celebrandæ talem ait fuisse causam. Quo primùm tempore insulam Mazuam à Saracenis habitatam Lusitana classis occupauit, Didacum Lupium Sequeriam, Indicum prætorem, Mahumetis templum, quod inibi erat, Ecclesiastico prius ritu expiatum sanctissimæ Virginis conceptioni dedicasse. Re à vicinis Æthiopibus non satis intellecta, quem Lusitani Conceptionis nomine festum diem agebant, cum ipsos nomine Natiuitatis tandiu celebrasse, donec superioribus annis Alexander Cardinalis Farnesius, Æthiopiarum protector, multa à Pontifice piacularia dona obtinens, eaque Apostolico contenta diplomate, ad Abassinos mittēs, effecit, vt ij quotannis octauum Decembris diem conceptæ Virgini dicarent. Ita nouus auctor. De hoc festo nihil habeo certi, quod dicam. An apud eas gentes celebretur, valde mihi dubium: vero similis non celebrari. Quòd illud à Lusitanis acceperint, omnino falsum, cum à Romanis moribus auersi, Romana sacra oderint magis, quàm prosequantur. Protectorem Æthiopiarum Alexandrum Farnesium fuisse, ea ratione concedi potest, qua is Lusitaniarum Protector fuit. Idem auctor scribit, natiuitatis Christi memo-

riam omnibus mensibus die vigesimo quinto recolit;
idque ab eodem illo, cuius meminimus, Imperatore
fuisse institutum. Credat qui volet, haud magni in-
terest. Gestate Abassinos cruces quocumque eant, à
plutibus traditur; Ecclesiasticos, & nobiles ex ebeno,
reliquos ex viliori materia; priores manu, posteriores
collo appensas. Est, ut aiunt, in Ecclesiasticis, & no-
bilibus talis significatio, ut illi scripturis, hi armis, cum
erit opus, crucis fidem ab hostibus defendant. Alij
tradunt solos Ecclesiasticos cruces portari, quod cre-
do verius. Qui sacris dicati sunt, eos etiam ferunt
ætream phialam benedicta aqua plenam secum ferre
solere, & antequam edant, & bibant, cibum illa, ac
potum leuiter aspergere; eandemque petentibus dis-
pertire. Imaginum sacrarum antiquissimus apud eos
usus, & summa semper veneratio. Depingunt Chri-
stum; Christi que matrem, & beatos spiritus, Patriar-
chas, Prophetas, Apostolos, cæterosque omnes, quos
frui credimus Dei conspectu. Vix templum est, in
quo Georgij martyris non visatur effigies: magno in
ipsum feruntur studio. Non vtuntur anaglyptis, vel
quia cælandi & sculpedi ignorant artem, vel ob alias
causas, quas ignoro. Nouus auctor scribit, ex insigni
horum Æthiopum in Sanctorum imagines venera-
tione ortum, ut Philippus VII. Imperator, qui Arij,
iniquissimi hæresiarchæ ætate vixit, & Ioannes ille
sanctus, cui singularem fuisse ait cum magno Basilio
amicitiam, statuerint, ne quis absque Episcopi sui fa-
cultate vllam domi habere posset vllius sancti effi-
giem; ne fortè, quod plerumque fit, assiduitate eam
videndi de ipsius cultu quidquam remitteret. Ob hæc
causam quosdam esse, quorum opera in domesticis
imaginibus inspicendis vtantur Episcopi. His incum-

bere, semel in anno, stato die, eorum, quibus concessa habendi imagines facultas est. ædes adire; quàm apto, quàm honesto, quàm decente sint in loco diligenter perscrutari. Si quemprehenderint, cui hac in re culpa sit, mulctam illi imponere; & aliquando, quam habet, imaginem auferre. Vt omnibus in usu est crucem gestare, ita nulli vetitum eam domi habere. Crucifixi tamen Christi simulacrum habere domi, nemini prorsus concessum; quodd nefas ducant, rem tam augustam ac sacrosanctam sub peccatorum hominum tectis esse. In templis tantum depingitur, secreto in loco; semperque velo tegitur. Sextis solum anni feriis illa ipsa hora, qua Christus creditur Patri spiritum reddidisse, accedere dicuntur sacerdotes, accensis cereis, & velum remouere; tum populum vniuersum ingenti concursu in templum conuenientem flexis genibus, magnisque clamoribus implorare veniam; & ostensum sibi signum religiosissimè venerari. Illud à pluribus, & verius proditum, quæcumque Christi, Virginisque Deiparæ, & reliquorum cœlitum simulacra Æthiopes fingunt, nigro ea efformare colore: illa contra colore albo, quibus vel pessimos homines, vel ipsos cacodæmones volunt exprimere. Ita Christum, & Apostolos in vltima cœna depingunt nigros, Iudam proditorem album; nigrum Christum patientem, albos Ananiam, Caipham, Pilatum, Herodem, cæteramque turbam carnificum, & Iudæorum. Similiter Michaelem cœlestis principem militiæ nigrum efformant, album cacodæmonem eius pedibus conculcatum. Ieiuniis aded dediti sunt, vt ea in re à præscripto rationis dicantur recedere, cum ne ipsi quidem ægri à communi lege eximantur. Religiosæ quædam familiæ, vt etiam sit apud nos, ex instituti sui

sui ratione semper abstinent à carnibus; quod illis in locis haud leue est, cum longè distent à mari, & pisculentis lacubus ac fluuiis plurimum careant. Solemne est omnibus bis in hebdomada ieiunare, quæ fuit olim in tota Christi Ecclesia receptissima consuetudo. Ieiunant primum die Mercurij, quod tunc de tradendo ad mortem Christo consilium inter se Iudæi inierint. Iterum die Veneris, quod tunc affixus ligno Christus animam efflarit. His autem abstinentiæ diebus vsque ad occidentem solem nihil omnino degustant; id faciunt more magis veteri, vt quidam aiunt, quàm vt Hebræos, aut Mahumetanos imitètur. Cum ieiunant, poma aliqua pani adiiciunt, & coctas sine oleo ac butyro herbas; illo carent; hoc victui tunc adhibere, graue ipsis piaculum. Multis anni temporibus, vt aduentus feriis, sex primis Ianuarij diebus, cum reges Magi Christum recens ortum adoratum ibant, vltimis nouem, qui ferias quadragesimales præeunt, primis quatuordecim Augusti, ante assumptæ Virginis celebritatem, ab esu carniū dicuntur abstinerere, & in meridiem differre prandium. Annis item superioribus in memoriam pænitentiae, quam olim Iona prædicante egerunt Niniuitæ, primos tres à Purificatione dies adeò religiosè strictèque dicuntur ieiunasse, vt ne infantes quidem lactentes, nisi semel tantum in die, admitterentur ad mammam; nunc abolitam ferunt eam consuetudinem, vt plerasque alias à maioribus vsurpatas. Aiunt quoque vltima Quadragesimæ hebdomada viros nobiliores vestibibus se induere ad luctum aptis; easque plerumque nigras esse, vel cæruleas. Omnes item tam viros, quàm fœminas patientis Christi memoriam ita venerari, vt illis diebus, & à mutuis inter se colloquiis, & à publico ac luce,

luce, quantum fieri potest, abstineant cum magna doloris significatione. Quem seruent in mortuis sepeliendis ritum, nihil traditur ab auctoribus constans. Quidam aiunt efferi funus præeunte cruce, in altum sublata; recitari S. Ioannis Euangelium, dum corpus sepulturæ datur; certis postea diebus pro defuncti anima erogari pauperibus eleemosynas, nihil amplius fieri. Similia alij. Nouus auctor scribit, vbi aliquem decessisse cognitum, quatuor illicò flamines ex iis, qui templi sunt addicti ministeriis, cum lustrali aqua, cruce, & thuribulo, sine lumine tamen, defuncti domum petere; præmisso inibi certo precum numero, summa illum celeritate ad templi ostium deportare; tum ceteros accedere sacerdotes, cantúque funebri alias recitare preces, thuréquæ suffitum cadauer deferre ad cœmeterium, & terræ tradere. Neminem in templo sepeliri, nec vllum fieri pro defunctis factum, scribunt multi. Illud prius nouus auctor probat, reprobatur posterius, asseritque sacrificia pro mortuis numquam in templo, sed in cœmeteriis peragi; verum cum Ioanne de Sanctis pugnat Dominicanæ familiæ religioso, qui illis fuit in locis, & de Æthiopicis rebus librum scripsit, typisque mādauit anno sexcentesimo octauo post millesimum; hic rem expertus affirmat, nulla apud Abassinos sacra pro defunctis fieri; idem & ab aliis, quibus credendum, sine dubitatione assertum; nec mirum cum purgatorium esse negent, vt dicendum postea. Hunc tradit nouus auctor Imperatoris sepeliendi modum. Vbi, inquit, animam efflat Imperator, balsamo primùm conditur; omnes deinde quotquot in vrbe Saba sacerdotes sunt, statim conueniunt, & in atratam lecticam ingentis elephanti dorso impositam, cadauer efferunt. Tum ad itin-

ris securitatem mille stipati militibus, qui atro etiam operti sunt amictu, cum magno hominum aliorum comitatu, pergunt ad montem Amaram. Quà transeunt, apparatu magnifico, sed lugubri, in vrbes & oppida recipiuntur. Cùm ad montis radices ventum, omnes ex utroque cœnobio tã monachi, quàm equites illuc descendunt, exceptumque cadauer deferunt ad sepulchrum. In ipsa montis planitie Imperij principes comparent, & funus inde cum cæteris ad cœmeterium ducunt. Plurima ibi sunt sepulcrorum monumenta magnificè extructa, ex quibus vnusquisque Imperator, dum viuit, illud designat, in quo velit post mortem corpus suum condi. In eo igitur illud deponunt, & summa cum dignitate funeris exequias dies triginta continenter prosequuntur. Hæc ille, quæ ficticia esse, iam ex iis constat, quæ de monte Amara, & similibus dixi. Illud quoque incredibile, Sabæ sacerdotibus lege impositum, vt imperatoria cadauera semper efferant, & ad montem Amaram ex loco, vbi obeunt, deportent. Cùm enim non vno tantum in loco omnes Imperatores diem obeant, sed in diuersis, & vnus sæpe ac plurium mensium itinere inter se dissitis, quorum aliqua ab vrbe Saba, quæcumque illa sit, remota esse necesse est, quĩ possunt prædicti sacerdotes eò semper contendere, vbi moritur Imperator, vt eius funus ducant, & ad montem Amaram deferant cadauer?

Quibus

*Quibus ceremoniis dicatur vti Imperator certis
quibusdam anni diebus.*

CAPVT XX.

SCribit nouus auctor, solere Abassinum Impera-
storem aliquot per annum diebus in publicum se
dare cum magna pietatis significatione. Primùm eo
die, qui Inuentæ cruci facer est. Ita rem proponit.
Pridie eius diei, quo Christi Crucis celebratur Inuen-
tio, inclinante ad occasum Sole, apto extra urbem lo-
co tabernaculum excitatur, elegantia pulcherrimum.
Ara in eo temporaria magnificè instructa; in hac Crux
cedrina, illam referens, ex qua vita Dominum pepen-
dit. Die insequenti domo Imperator egreditur ele-
phanto insidens, senatoribúsque & aulicis circumse-
ptus, tabernaculum petit; ad quod perueniens, ex ele-
phanto desilit; ingreditur; ad genua accidit; piè crucem
adorat; vestibus detractis nigra sumit indumenta. Idè
cæteri faciunt, quod Imperator; qui ad aram accedēs,
crucem reuerenter in manus accipit, eamque pedes,
aliis ordine sequentibus, in urbem defert. Ad pala-
tium deueniens, regium intrat sacellum, ibi crucem
reponit; per horæ quadrantem genibus flexis myste-
rium contemplatus, suum se in cubiculum recipit. Sic
& reliqui. Deinde ipso Palmarum die, comitatu ma-
gno templum petit; & a'to sedens solio diuinis inter-
est officiis. Vbi auditur, Passio Domini nostri Iesu
Christi, continuò relinquit thronum, imperatorióque
exutus habitu, illas ipsas vestes induit, quibus, cum
erat in monte Amara, utebatur. Cùm cæteri imitan-
tur

tur; pretiosa sibi detrahunt indumenta, & alia sumunt coloris attri, & religiosè modesta, quæ omnibus illis sanctioris hebdomadæ gestant feriis. Ritus huius Alexander I I I. auctor fuit; à quo etiam institutum, ut per eam hebdomadam à negotiis abstineret Imperator, nec alios haberet in comitatu, quam Lusitani Regis, & Indiçi proregis legatos, mercatorum Italorum Consulem, aliolque ad Latinum orbem spectantes, quos quinto eiusdem hebdomadis die mensa dignatur excipere. Eo die, qui resurgenti Christo dicatus est, iisdem cum legatis, cum Italorum Consule, aliisque Latinis, & cætero aulico comitatu in templū se confert, ut sacro intersit. Vbi canitur, Gloria in excelsis Deo, quas die Palmarum assumpsit vestes, eas tunc deponit, & aliis se lætioribus ac pretiosioribus induit. Ita cæteri faciunt. Peraçto sacrificio, in quo omnes diuino reficiuntur cibo, horam integram agendis habendisque Deo gratias eodem in loco insumunt. Tūc ad palatium pedes redit Imperator; nec amplius eo die foras exit. Die insequente, sacro finito, tres magnificentissimè apparantur mensæ; suum cuique peculiare instrumentum, & suus abacus. Vasa in vno aurea, in altero argentea, in tertio fictilia, fabre tamen & eleganter elaborata. Primæ mensæ cum duodecim sacerdotibus accumbit Preteciannes: secundæ legati cum cæteris Latini orbis nobilibus: tertiæ regum filij cum magni Senatus consiliariis. Mensis post prædium sublatis, suum singuli munus Imperatori offerunt, siue ex crystallò, cui magnum apud Abassinos pretium, siue ex materia simili. Post hæc accepta facultate discedunt regum filij, & significandæ lætitiæ equis per urbem vecti concurrunt inter sese, & pugnae cient simulacra. Huic spectaculo nobiles inter-

sunt

sunt Europæi ab aulicis inuitati. Ad extremum de cæremoniis dicendum, quibus Preteïannes vitur die illo, quo Eucharistiæ mysterium celebratur, Corporis Christi festum vocamus. Vsq̃ue ad Paulum tertium, ait idem auctor, festi huius ne fama quidem in Abassia fuit. Vbi is ad summum Pontificatum est euectus, cum Petro Abbate Abassino colloquens, & multa de Æthiopicis rebus partim ad gubernandi rationem, partim ad religionem spectantia sciscitans, hominem rogauit, num apud suos dies hic sollemnis festusque haberetur. Cùm Petrus negasset, remque iustæ ignorationi tribuisset, Pontifex diploma expedit in Æthiopiam, quo statuit, vt sacratissimæ Triadi festus per totam Abassiam dedicaretur dies, qui esset à Pentecoste septimus (ignota enim apud ipsos hæc etiam consuetudo erat) quinto verò ab hoc, magna cum iucunditate, externoque paratu Eucharistici beneficij in homines collati, recoleretur memoria. Ea namque Dominica die, quæ nunc Trinitati dicata est, Apostolorum per orbis terrarum prouincias diuisionem Abassini celebrabant. Peruenit Paulina in Æthiopiam constitutio, annis duobus ante Imperatoris Dauidis obitum. Hic pro sua eximia in Romanam sedem obseruantia, & vt erat egregiè pius, & sacrorum rituum amans, statim Pontificium mandatum seruari iussit. Petrus Abbas, qui non minus latinitatis, quam scholasticæ Theologiæ erat apprime gnarus, officium hymnósque à sancto Thoma de Eucharistia compositos, ex Latinis fecit Abassinos, qua nunc lingua in Æthiopia decantantur. Per omnes ergo Imperij vrbes & oppida ad varia templa supplicationes sunt & pompæ. Defecit in iis summa cum maiestate, & veneratione Christi corpus, vniuerso clero,

clero, & sancti Antonij monachis, qui vbique sunt, comitantibus. Idem sancti Dominici religiosi præstant illis in locis, quæ cœnobiis de Alleluia, & Plurimos sunt propinqua. Comitari quoque Preteianes pompam solet, & augustissimum mysterium ponere sequi. Dum in templo est, duos manibus portat cereos, accensum dextra, extinctum sinistra. Vbi exit à templo, eos tradit duobus famulis ferendos, cuique suum: cum ad templum reuertitur, rursus cereos capit, & propriis, ut antea, portat manibus. Talis huius cœremonie sensus est. Extingto cereo, aiunt, significari veteres figuras, hoc Sacramentum in antiqua lege adumbrantes, quæ ipso in vltima cœna instituto protinus extinctæ sunt, & quodammodo diffugere, ut ad Solis præsentiam diffugiunt umbræ. Accenso cereo eiusdem mysterij indicant fidem, quam & viuam esse, & splendere necesse sit. Hanc igitur fidem habere sese tali cœremonia Æthiopum Imperatores testantur, idque volunt vniuerso orbi esse notissimū. In hisce Eucharisticis pompis cereæ faces ardent innumeræ, nec magno sumptu, cum ea plaga cere sit feracissima. Qui iisdem pompis comitantur, saltantes plerumque, pedibusque choreas plaudentes cum ingenti tripudio & exultatione procedunt. Præteries mysterium ex alto despicere, inexpressibile scelus est: nemo igitur in fenestra tunc apparet, nemo in solario, nemo in alio sublimi loco. Omnes domo pedem efferunt, ante ianuas proni curuantur, tundunt pugnibus pectora, & sacramentum supplices adorant. Si qua in plateis, per quas pompa ducitur, cœnobia sunt monialium, ne iis quidem fas rem ex alto despectare. Ad templi ianuam congregantur omnes, in duos ibi diuisi ordines, ora & capita velis tectæ, procumbunt hu-

I mi,

mi, & accensas manu tenentes faces, tremendam Christi maiestatem submissè venerantur. Hæc nouus auctor, in quibus nihil ferè commentitium non est. Quæ enim de Lusitani regis, & Goani proregis legatis, de Italogum mercatorum cōsule, de nobilibus Latinis, vt vocat, de magni Senatus consiliariis, de Pauli tertij diplomate, deque similibus narrat, adeò apertè falsa sunt, vt ea refellere operæ non sit. Nemo certè in tota Italia est, qui aut illum Italogum mercatorum consulem, aut illos Italos mercatores sciat in Abassia esse; nemo in tota Lusitania, nemo Goæ, & in tota India, qui ignoret nullum vel Lusitani Regis, vel eius Indici proregis apud Abassinum Imperatorem nunc legatum esse, aut sic vñquam fuisse, vt in eius regia permaneret. Quare quæ de festis, de Preteianis comitatu, de trium mensarum paratu, deque talibus dicuntur, falsa esse certissimum sit, nec opus persequi singula.

Quanta Abassini pietate templa venerentur.

C A P V T XXI.

ANtiqua Abassinorum principum pietas multorum scriptis commendatur. Plurima dicuntur per Æthiopiam æterno Deo erexisse delubra, eaque amplà atque speciosa supellectile, & apto ad procuranda sacra ministrorum apparatu exornasse. Nemo hac de re nouo auctore neque plura, neque sublimiora scribit. Ait quædam fuisse opere mirabili, & ad illa fabricanda adscitos ex peregrinis regionibus architectos; si qui vsipiam erant, quos tunc fama celebra

celebraret. Fidem, inquit, superant quorundam substructiones, quibus iure cedunt septem illa, quæ tanta apud omnes gentes in admiratione fuerunt, orbis miracula. Multa in asperis & abruptis effossa sunt cauitibus, nec singula in multis, sed in singulis singula. Clarissima sunt, quæ à Golgota, à sancto Salvatore, à sancto Emanuele, à sancto Georgio, à Bethalem, à Marcoreo, à Lalibela nomen habent. Primum centum viginti palmos longum est, septuaginta duos latum. Quinque pilis innititur fornix, binæ sunt ad singula latera, in medio vna. Tectum planum est, & pauimento par. Multæ hinc inde in parietibus apparent fenestræ, mira concinnitate & elegancia fabricatæ. In ara maxima ad sinistram partem incisum est sepulchrum illa ipsa forma, quam illud habuit, in quo Christi corpus à Rumenfi Iosepho conditum fuit. Bina eminent ad portam dextram Petri & Ioannis Apostolorum simulacra, in eodem sculpta saxo. Præter communes aras ex utroque templi latere assurgentes, sacella duo sunt eximio perfecta opere, in quadrum efformata. Binis vnum, & quinquagenis quaque versum potrigitur palmis, duplici distinctum ordine columnarum, quæ extremos inter parietes triplicem sustinent fornicem. Alterum duodenos ex qualibet parte habet palmos: qua respicit patentem aerem frequentibus, & factis affabre veluti interpunctum fenestellis: sub ipso fano domus est concamerata, fano eidem magnitudine æqualis. Circum effunditur peristylum, vasto amplum circuitu; eius area pauimento templi aliquanto depressior. Atque hæc quàm multa, quàm varia in hoc immani delubro se ostendunt, sic in vno omnia & eadem sunt incisa saxo, ut ne minimus quidem aliunde adglutinetur lapis, ali-

ve rei alterius materies extrinsecus adiungatur. Ingressum in templum præbet excauata in eadem rupe pergula, alta latæque palmos tredecim. Super hoc verò ædificium, supérque alia generis eiusdem patentes sunt campi arboribus consiti, quos interdum non exigua flumina intersecant. Hæc de templo scribit, quod Golgota dicitur. Pergit in hunc ferè modum alia describere. Sancti Saluatoris, inquit, fanum in alia est effossum rupe, ducentos patens in longitudinem palmos, centum & viginti in latitudinem. Quadruplex columnarum ordo quinque distinguit fornices; qui inter eos medius est, reliquos superat altitudine; alij ex utraque parte æquales. Singuli ordines columnas habent septenas, quadrata figura; quæ quolibet in latere quatuor colligit palmos. Parietes miro sunt structi artificio. Mille visuntur in iis non aliunde adscitæ, sed in eodem cælata saxo rerum species: specula quæ vultus reddunt intuentium; herbæ, arbores, flores, frondiûmque & pomorum implexus, atque contextus; varicæ auicularum aliarûmque animantium effigies pulcherrimè figuratæ; atque inter hæc apto ordine, & paribus dispositæ interual-
lis latè patentes fenestrarum aperturæ. Ara maxima in magnam eleuatur altitudinem. Quatuor pilis culmen imminet, excurrentibus in gyrum pergulis. Prima ianua à parte incipit interiori, magnis extensa arcubus, qui paulatim ad angustias redacti ianuam efficiunt perexiguam, nouem tantummodo altam palmos, latam quatuor cum dimidio. Eiusdem formæ & magnitudinis duæ aliæ ianuæ sunt, quæ duobus adiacent templi lateribus. Extra primam ianuam fornicata cernuntur propylæa, lanceis duabus alta, connecta inter se testudinibus: palmis duodecim à templi parieti

parietibus distant; singula septenis pilis incumbunt, in quibus variæ apparent lunulæ sculptura eleganti. Sub rupe aditus in templum est per ingentem pergulam, cuius altitudo lanceam superat; longitudo passus colligit octoginta, tanta est latitudo, ut decem simul excipiat homines in aciem dispositos. Atque hæc omnia vnico sunt incisa saxo, sicuti & non pauca alia, quæ neque fabricæ magnitudine, neque rerum varietate, neque artis præstantia illis, quæ sunt descripta, cedunt. Hæc nouus auctor, multaque alia his similia. Aliqua esse in Abassia fana in rupibus excauata, digni fide auctores scripsere. Qualia hic auctor describit, haud esse credo; neque enim ignota essent nostris, qui illic sunt; nec si nota essent, in literis siluissent, cum referant minora. Hac de re ex Antonio solum habeo, omnia templa figuræ esse rotundæ, & duplici circumcincta porticu. Tradunt alij, magnum templis honorem haberi apud Abassinos; eos olim quoties aliquod essent ingressuri, Mosem imitantes, calceos sibi detrahare consueisse. Nouus ille auctor ait, Romanorum Pontificum iussu sublatam eam consuetudinem temporibus aliis, præterquam quadragesimali. Sed improbable eius rei curam suscepisse Pontifices, & morem abstulisse, qui non officit Religioni, sed proficit. Verum est, plerosque nudis pedibus intrare templa, neque ad id opus esse, ut exuant calceos, cum iis non utantur. Nemo in templo aut deambulat, aut ridet, aut cum alio colloquitur. Aiunt etiam nefas esse, inibi spueri, oportere proinde, ut sicco omnes stomacho sint, ne à templis arceantur. Canes, & quæuis aliæ animantes, quarum solet esse in urbibus vltus, non templi solum, verumetiam cœmeterij prohibentur ingressu. Quibus hominibus præter tem-

pla transire necesse est, si mulis aut equis vehuntur, antequam ad ipsa accedant, in terram desiliunt, & aliquantulum spatium conficiunt pedibus, donec non modicè ab iis distent, tunc fas equos rursus conscendere, & iter sequi institutum. Nemini licitum in templo sedere. Ad lassitudinis subsidium multa sunt ad ianuam hastilia, furculæve iis persimiles, quibus innixi incedunt, qui aut pedibus capti sunt, aut ipsis sustineri nequeunt ob debilitatem. Hisce adminiculis incumbunt qui vel senectute sunt confecti, vel grauantur morbo. Talis communiter dicitur esse templorum dispositio, ut ara maxima in medio sita à reliquo spatio, quod ad ostium procurrit, diuidat odeum. Inter ostium & aram ab vno ad alterum templi latus bina tenduntur vela. Inter prius & aram illi tantum esse possunt, qui sunt initiati sacris. Inter vtrumque nemo est, nisi minoribus sit insignitus ordinibus. Spatium reliquum, quod inter posterius velum & ianuam interiacet, occupari à laicis potest. Tempia sunt, quæ à solis masculis, alia, quæ à solis adeuntur foeminis. Si aliqua vtrisque sint communia (quod in exiguis pagis, in quibus vnum dūtaxat templum est, aiunt contingere) peculiares assignantur veluti stationes, ita discriminatæ locis, ut intueri se masculi & foeminæ non possint. Alia de templis & eorum veneratione traduntur his paria, quæ missa facio.

De Abassinorum festis, & aliis ad sacra pertinentibus.

C A P V T XXII.

Scribit nouus auctor, apud Abassinos festa esse, tam quæ mobilia, quam quæ immobilia dicuntur.

tut. Peragere eos sicuti nos, quadragesimales ferias, Paschata, sacros Christo & eius Matri dies. Iam inde ab antiquissimis temporibus Apostolos, Euangelistas, Athanasium, Basilium, Antonium Archimandritam, Eunuchum Candacis reginæ, & reginam ipsam, aliósque ex Abassia Cœlites, atque inter eos præcipuo quodam honore Claram Dominicani ordinis alumnam, & magna omniû cum lætitia Theclaymanothum, virum sanctitatis fama celeberrimum, statis diebus colere solitos. Præterea ex mandato Imperatoris cuiusdam, cui semen Iacobi nomen fuit, Michaeli cœlestis Militiæ principi, cæterisque Angelicis mentibus primum cuiusque mensis diem dedicare. Postquam verò cum Latina Ecclesia agere cœperunt, festa multa, quæ prius ignorabant, ab eadem Ecclesia accepisse, eaque nunc solemnî ritu celebrare. Quod hac de re ex Antonio Fernandio habeo, hoc est. Plurimos esse apud Abassinos dies festos, qui non sunt apud nos. Mensibus singulis Christi optimi maximi, eiusque sanctissimæ Matris, Archangeli Michaelis, & religiosi cuiusdam, quem Spiritus sancti opus vocant (is Theclaymanothus videtur esse) festa peragere. Maiori celebritate Ioannis Baptistæ mortem, quàm Natiuitatem, & Crucis Exaltationem, quàm Inuentionem colere. Hæc ille, non plura. Non dissimilia ab aliis traduntur. Quod ergo hisce retro annis vlla Cœlituum festa à Romana Ecclesia accepertint, falsum est, nec facile creditu. Quomodo enim Romanos acciperent mores, qui Romanam Ecclesiam hostiliter oderant? Quis item nouos factorum ritus, nouaque aliunde adscisceret festa, Abuna repugnante, qui ne à gradu cadat, Romanis moribus impensè resistit. Illud etiam hîc & locis aliis obseruatu di-

gnum, nouum hunc auctorem multa sæpe narrare ad religionem attinentia, quæ Abassini Imperatores decreuerint; viderique illa, vt ritè & iure statuta approbare, ac si ipsos Imperatores legitimos sacrorum Antistites agnoscat. Sed fortè dicet, tributam ipsis ad eiusmodi decreta amplam à summis Pontificibus auctoritatem; sic enim solet oppositiones declinare. Ita deinde scribit. Ecclesiastici diuinum officium hoc modo recitant, Matutinum duabus horis ante lucis ortum; Tertiam horis tribus ante meridiem; ipso in meridie Sextam; hora tertia pomeridiana Nonam; prius sub occasum Solis recitabant Vesperas. Completorium, Primam, & Laudes ignorabant; idcirco nullum his designatum tempus. More vetusto Psalmos, & hymnos, & alias canebant preces. Ad Psalmi cuiusque finem, Gloria Patri, & Antiphona, vt modò fit, adiungebatur. Nicæno utebantur Symbolo; utebantur etiam litanis: sed in iis nihil erat aliud, quàm Sanctorum inuocatio, præsertim eorum, qui fuerunt patria Æthiopes. Hæc ad vsque Clementis VII. Pontificatum, antequam Latinæ Ecclesiæ res ipsis notæ. Eo autem ex tempore, aperto mari, & patefacta liberè hinc inde commeandi via, Romanas ceremonias ritusque adsciuere, & sicuti nobis moris est, ita nunc diuina peragunt. Nihil ex scripto recitant, sed memoriter omnia. Cùm Matutinum dicitur, præter consuetas, quæ ante aram, lampades sunt, in quibus aruina pingui, loco olei, fouetur ignis, lumē aliud neque in templo, neque in odeo est. Non alternis, sed omnes simul singulos decantant Psalmorum versus. Matutini lectio ad principalem templi ianuam inconditis profertur clamoribus. Nemo sedens recitat: concessum senibus, vt ligneis innitantur adminiculis, cum

cum sunt defessi. Sacra omnia partim Chaldæo, partim Æthiopico continentur idiomate. Quæcumque proferunt, sic exprimunt, ut oris & corporis motum ad illa accommodent. Itaque pronuntiant flentes, quæ significant fletum; ridentes, quæ risum; saltantes, quæ saltum; contenta voce, quæ clamorem; submissa, quæ silentium: quidquid denique proferunt, ita corporis motu indicant, ut non minus dicentis gestu, quam voce percipiatur. Ea musica instrumenta, quæ vocamus organa, generis vocabulo ad speciem contracto, quorumque frequens nostris in templis usus, usque ad Gregorij XIII. tempus, ne de nomine quidem nouerant. Is Pontifex in Æthiopiam artifices misit, qui ea inibi fabricarent. Duo apud eos erant cymbalorum genera, quædam certo è lapide, è ferro alia confecta; utraque & figura, & sono, & arte nostris dissimilia. Nunc ære utuntur campano, ut apud nos sit, eoque pulsato populum conuocant ad templum. Supplicationibus ac pompis valde sunt dediti. Singulas post horas, quas recitant, supplicantes fanum circumeunt, eo sæpius, quo festus dies maiori colitur celebritate. Contingit, ut in vna eademque pompa tricenos & amplius circa templum conficiant gyros. Hisce autem in pompis quatuor, vel quinque argenteæ, baculorum instar, feruntur cruces, totidem thuribula; hæc manu dextra, illæ sinistra; interque Psalmorum & hymnorum cantus multa miscentur crepacula. Cæterum tanta pietatis & interni affectus significatione diuina officia peraguntur, ut tenere lacrymas nequeant, qui intersunt. Gregorius XIII. Pontifex optimus, ac valde pius collegium sancti Stephani, quod est Vaticano principis Apostolorum templo vicinum, sæpius ibat inuisum, ut Abassinos faciē

tes, ac deprecantes audiret; nec temperare ipse à fletu poterat. Singulis Mercurij ac Veneris diebus Abassini omnes cōfluunt ad templum, vt hora post meridiē tertia, qua spiritum Christus Patri in cruce reddidit, preces inibi frequentes fundant. Dominica Palmarum à nocte media psallentes, atque saltantes diuina inchoant officia, & sacras altarium imagines, quæ per reliquum Quadragesimæ tempus fuerant opertæ, detractis velis populo visendas exponūt, quousque Prima decantetur. Tunc certa precationis forma ramos benedicunt, & suos cuique benedictos reddunt. Denique per circuitum templi pompam ducunt, in qua suum quisque portat ramorum fascem; cūque ad templi ostia venit, iisdem, quibus Romana Ecclesia, vtuntur cætemoniis: quibus absolutis sacerdos vnus litat, & sub Missæ finem Eucharistico cibo præsentis reficit. Ipsa sacrosancta hebdomada bis tantum sacrificium fit, Iouis, & Saturni diebus. Iouis quoque die hora vespertina, magno totius populi concursu, is qui quolibet in templo cæteris dignitate præit, Ecclesiasticis primum, deinde aliis pedes abluit. Qua finita cætemonia, remanent omnes in templo, & nocte integra agunt excubias. Ibidem Ecclesiastici vsque ad diem Sabbati, postquam sacro finis imponitur, perseuerant. Die Veneris ad meridiem pretiosissimis fanū vestitur peristromatis; vbi principalis ianua est, longè ibi maior adhibetur ornatus, quod eam in partem totius populi fiat concursus. Inibi ergo sublimi in loco Christi ab cruce pendentis depicta imponitur effigies, holoserico nigri simul & coccinei coloris velo adoperta. Vnus est, qui passionis historiam semper decantat; quoties verò illam absoluit, detrahitur simulacro velum, omnesque ad genua prouoluti vociferantur,

tur, plorant, ululant, palmis genas, pectora pugnis quatunt, capita feriunt ad parietes, totasque atque integras duas horas lugubri cum fletu, & tristi eiulatu dedunt se mœrori. Hinc ad peristylij fores alij post alios conferunt sese. Vnamquamque ad ianuam ex clericali ordine duo sunt, flagella manu tenentes; simulatque ad eos quisque accedit, cuiuscumque ætatis sit, siue masculus, siue fœmina, mediam denudat corporis partem, caput versus; & tamdiu ab illis quatitur, donec dolore victus, verberantium è manibus elabatur. Quidam vix vno accepto verbere, mox intro abripiunt sese. Alij patientis Christi dolore confixi non prius abscedunt, quàm ingentem effundant sanguinis copiam. Vt hæc peracta, sub ipso peristyllo ad mediam noctem perstant, qui volunt. Ea hora sacrum fit, cui omnes intersunt, sacroque pabulo reficiuntur. Nemo aliis tota hac hebdomada, nisi atris, aut cæruleis vestibus corpus velat. Mirum seruant silentium; nec inter se salutant, dum sibi mutuo occurrunt in via; sed mutorum instar, demissis oculis prætereunt. Nec vendunt, nec emunt, nec pecuniam tangunt. Id faciunt in odium Iudæ proditoris, qui Christum pacis osculo fraudolenter salutatum, argenteis triginta vendidit. Tantæque aduersus illum ira incenduntur, vt nemo ferè sit, qui compositam ex scrutis Iudæ imaginem non raptet peruiam; quod pueris præcipuè ludi magis, quàm odij causa frequentissimum. Nullus enim puer domo egreditur, qui fune alligatum ad cingulum simulacrum Iudæ non ferat. Digna risu, & visu res. Multa puerorum millia conueniunt in templum, & suis cuique recte ad cingulum alligatus trahitur Iudas. Canonici tota Quadragesima amiculis vtuntur Benedictino cucullo similibus, à quibus vittæ
pen

pendent, quæ humeros, ac totam præne faciem velant. Exuti calceis incedunt, quod & reliquis sacerdotibus commune. Sine calceis toto anno sacrificabant; nunc id à Romano Pótifice extra Quadragesimã fieri prohibitum. Ipso resurgentis Christi die à nocte media decantare incipiunt Matutinum. Ante auroram instituunt pompam longè celeberrimam. Ad ortum Solis rem diuinam faciunt, & quotquot interfunt, Eucharistia reficiunt. His peractis domos repetunt, hilares, & læti, totósque atque integros octo dies insequentes choreis, saltibus, ac tripudiis augustissimam celebrant triumphantis Christi resurrectionem. Hæc omnia nouus auctor. In quibusdam exigua quædam est vmbra veritatis; pleraque ab ea quàm lógißimè recedūt. Proponere satis est, vt qualia sint, quiuis nouerit. Non vti Abassinos Romanis cæremoniis, certo est certius; idque abundè patebit ex literis eorum, qui in Abassia sunt. Omitto nunc referre, ne eadem sæpius inculcem. Gregorium XII I. ad Abassinos misisse, qui organa fabricarent, quis credat? In actis quidem Gregorij nihil tale reperitur. Neque is Pontifex ignorabat, à Romana fide dissidere Abassinos, vt prædicatorum loco, ad eos mitteret fabricatores organorum. Illud etiam ineptè fictum, eundem Pontificem, solitum sæpe, dum viueret, ad id, quod vocat Abassinorum collegium, itare, vt iis adesset sacrificantibus. Et quidem neque hoc in diariis Gregorij est. Auctor iste satis se ostendit à Romænæ curiæ moribus alienum, dum credit Pontifices mote vulgi vagari per urbem, & huc atque illuc facile diuertere, vt quemuis de plebe hominem.

Quibus

*Quibus argumentis ostendi videatur numquam
Abassinos à vera Christi fide
decessisse.*

CAPVT XXIII.

VEntum est ad id, quod nobis potissimum in hac de Æthiopicis rebus tractatione propositum est. Quamquam verò totum noui auctoris opus, tribus vel quatuor distinctum libris, aliud ferè non est, nisi quædam, non tam defensio, quàm gloriola Abassinæ religionis prædicatio; eo tamen non contentus, apologetico more, plurima ad eandem rem à coniectura, à similitudine, ab auctoritate, à capitibus aliis peculiarem in locum congerit argumenta; quo in loco mirum est, quàm multa sint ad historiam, ad situs terrarum, ad gentium mores, ad res alias pertinentia non modò malè cohærentia, sed planè falsa, & ab Ecclesiæ catholicæ iudicio dissentanea. Nihil ego tamen neque refellam, neque referam, nisi quod aliquo modo è re nostra erit. Hæc autem sunt noui auctoris, quæ ex diuersis locis collegi argumenta, quibus apud ipsum sincera Abassinorum probatur fides. Inprimis, inquit in iis, quæ ad Christi, tam diuinitatem, quàm humanitatem spectant, nullum Abassini errorem habent. Distinctè credunt, & disertè consentientur sanctissimæ Trinitatis sacrosanctum mysterium; affirmantque Numen illud, quod colimus, cuius potentia mundus conditus est, & in quo solo veram esse diuinitatem, tenemus, personis esse trinum, natura vnum. Quod mysterium, vt Abassini omnes non minus vultu ipso prode-

rent,

rent, quàm mente crederent, Imperator ille Ioannes sanctus instituit, vt baptizatis infantibus candenti ferro tria in fronte inscriberentur pūcta, diuinarum personarum distinctionem testantia. Ex quo apparet, quàm falsò ipsis error adscribatur Sabellij; qui vnā tantūmodo in Deo credidit esse personam; sicut ante ipsum Noetus quidam in Ptolemaide, cum summo illius prouinciæ damno iniquissimè prædicarat. Credunt æqualitatem personarum, non aliter, quàm in Conciliis Nicæno, Constantinopolitano, Ephesino, Chalcedonēsi apud ipsos approbatis, & receptis continetur. Idque ex eo aptè colligitur, quòd Helena Augusta eius vxor Imperatoris, qui Mano de Maria dictus est, insigni fœmina probitate, & theologicis præceptionibus, Chaldæoque & Arabico idiomate apprime instructa, librum vnū scripsit de Christiana lege, & eius præstantia, alterum de sacrosanctæ Triadis mysterio, sicut illud Romana confitetur Ecclesia; quo in libro de perpetua Deiparæ Virginitate multa etiam interseruit. Vnde perspicuum sit, quantum Abassinis inferant iniuriam, qui eos asserunt Ariana vniquam hæresi fuisse infectos. Huc accedit, quòd propter Trinitatis sacramentum in Christi baptismo patefactū, dies Epiphaniæ (qui dies eidem est Baptismati dictus) variis apud ipsos spectaculis, ludis, saltationibus, choreis, tripudiis, ingēti denique lætitiæ significatione celebratur. Credunt etiam, & expressè confitentur tam contra Autotheos generationem Filij, quàm contra Græcos Spiritus sancti à Patre & Filio processionem. Credunt contra Manichæos vnum esse rerum omnium conditorem, qui & immensa sua clementia genus hominum ex primi parentis peccato damnatum à durissima cacodæmonis seruitute, atque ab æ-

terna

terna morte liberarit, & iustis pro rectè factis præmia, iniquis pro sceleribus supplicia statuto tempore decernat. Credunt contra antiquissimos Carpocratem, Cherintum, & Ebionem, contra Ethnicos, contra recentiores Iudæos, contra Mahumetanos veram in Christo esse diuinitatem: contra Apollinarem Eutychem, & similes veram in eodem esse hominis substantiam: contra Nestorium tum in vna Christi persona duas contineri naturas, humanam ac diuinam, non variatas, non permixtas, non confusas, sed prorsus distinctas; tum beatissimam Virginem verè ac propriè esse Dei matrem; & contra Heluidium nullo vmquam tempore illibatum virginitatis florem in ea clanguisse. Credunt Christum multa pro nobis dura & aspera perpessum, affixum fuissè cruci, animam efflasse, die tertia à mortuis resurrexisse, post quadraginta à resurrectione dies ascendisse in cælum, inde post mundi finem in terras venturum, vt mortales omnes vno in loco cōgregatos summa potestate iudicet: animos enim humanos esse immortales, & post extremam orbis huius desolationem vi diuina ad corpora reuersuros, vt quisque eorum omnium, quæ in hac vita egerit, rationem reddat supremo iudici percontanti. Credunt omnia, quæ in illis quatuor generalibus Ecclesiæ Conciliis Nicæno, Constantinopolitano, Ephesino, Chalcedonensi, veluti in quatuor Euangelis credenda proponuntur. Idem tum veteris, tum nouæ Scripturæ libri, quos superioribus annis Tridentinum Cōcilium indubitatæ fidei esse declarauit, semper apud eos firmissimæ fuerunt auctoritatis, quod quæ in eis sunt ab ipso limpidissimo veritatis fonte, qui nullo potest erroris luto turbari, certò crederent emanasse. Quin etiam Imperator Mena per legatos suos

suos à Pio V. Pontifice maximo suppliciter postula-
 uit , vt eiusdem Tridentini Concilij decreta mitti
 ad se iuberet , ne quid forte à Romana Ecclesia esset
 statutum quod Abassini per ignorantiam seruare omit-
 terent;asserens optare se maximè , vt Æthiopica Ec-
 clesia ad Romanæ voluntatem ac nutum totam se ac
 penitus conformaret.Ex quibus apertum est, non eos
 quidem in re vlla Apostolico contenta symbolo , sed
 illos potiùs , qui vllum ipsis hac in parte impingunt
 errorem, valde à vero declinare. Deinde eorum Anti-
 stites, quoad eis per hostes & tempus licuit, Conciliis
 omnibus, quæ Pontificia auctoritate vsquam celebra-
 ta sunt, semper interfuere; Nicæno contra Arium, Cõ-
 stantinopolitano contra Macedonium; Ephesino con-
 tra Nestorium; Chalcedonensi contra Eutychetem; &
 aliis, quæ deinceps successere ; donec Mahumetani,
 gens ab inferis egressa, Arabiam, Palestinam, Iudæam,
 Ægyptum , & alias per Asiam & Africam regiones
 armis occupâtes , sic Abassinorum fines interclusere,
 vt efferre ex Æthiopia pedem vix deinceps potuerint.
 Quid illud, quod non coacti, imò nec vocati, non sine
 maximis periculis ac difficultatibus domo sæpissime
 exeuntes, vel in urbem venire, vel ad alia adiere loca,
 in quibus tunc Romanus erat Antistes, vt & ipsum
 recognoscerent supremum Christiani gregis pasto-
 rem, & fidem suam, cum in Conciliis publicis testa-
 tam, tum in ipsa Romani principis curia, veluti in ge-
 nerali quodam omnium gentium theatro , palàm ex-
 positam vniuerso orbi patefacerent. Nam cum acce-
 pissent à quibusdam gentis suæ hominibus , qui Hie-
 rosolymam religionis causa peregrinatum ierant, ius-
 su Eugenij IV. summi Pontificis in quadam Italiæ
 urbe Concilium cogi , remque Imperatori exposuis-
 sent;

sent; actis ille primùm immortali Deo gratiis, quòd sibi ac suis hanc profitendæ religionis, & Romano Patri obedientiæ offerendæ occasionem ostenderet; mox legatos misit, qui verbis suis vtrumque præstarent, & quam Abassini sequerentur fidem palàm exponerent: quod in Concilio Florentino factum fuisse, nemo dubitat. Sed iam priùs, annos plusquam centum legati alij, vt idem facerent, ad Clementem V. Auenionem venerant; quos ille benignissimè exceptos, plurimisque donis & gratiis exornatos ad suos remisit. Vt verò maritimo itinere patefacta atque adita Æthiopia est, viâque in Europam nauigandi ostensa, mox Dauid Imperator simul cùm Zagazabo ad Emanuele Lusitanum regem misso, Franciscum Aluarum Lusitanum sacerdotem cum muneribus ac literis obedientiam animùmque testantibus ad Clementem VII. delegauit. Denique his proximis temporibus Alexander III. Imperator celeberrimam ad Gregorium XIII. instituit legationem, in qua sacerdotes erant duodecim, totidem ex magni Antonij archimâdritæ militari ordine equites, qui omnium Abassinorum erga Romanam Ecclesiam animos voluntatésque explicarent. Nec illud prætereundum, quod ad rem præsentem videtur attinere; Tum primùm Lusitanos adiisse Æthiopiam, cùm fidem catholicam Lutherus deseruit; tunc etiam Abassinos legatos ad Clementem VII. Bononiam venisse, & coram Carolo V. Imperatore, maximoque clarissimorum hominum conuentu Æthiopici Imperatoris obsequium Pontifici obtulisse, cùm Henricus VIII. Angliæ rex Romanæ sedis scita iussuque aspernatus, à recto Christianæ religionis tramite pertinaci aninto deflexit, miserâque in Anglia

ingens consequentium malorum posuit seminatum. Et verò compertam esse summis Pontificibus egregiam Abassinorum fidem, illud etiam non mediocriter probare videtur, quòd Pontifices ipsi, eorum Imperatores filios carissimos appellant, & Apostolicam eis salutem ac benedictionem impendunt: quam loquendi formam numquam Pontifices Romani usurpant, nisi cum ad catholicos principes Apostolicæ sedis obediens literas dant. Si quando enim contingit, ut ad principem aliquem scribant, qui vel à Christi fide sit alienus, vel aliqua infectus hæresi, cui pertinaciter adhæreat, alio uti solent salutandi modo. Vtrumque facile videre est in literis Pij V. Pontificis maximi, quas de Naupaçtea victoria aduersus Turcas ad sinum Corinthiacum à Christianis obtenta ad Menam Æthiopiæ Imperatorem, ad Xiecum Tahamam regem Persarum, & ad Mutaharem felicis Arabiæ Xerifum per idem tempus scripsit. Duos enim posteriores, quòd Mahumetanis infecti essent sordibus, nec filios carissimos appellauit, nec Apostolica dignatus est benedictione; sed illustres ac potentes vocauit reges, iisque lumen ac spiritum veritatis precatus est. Si quis forte dicat Æthiopiæ Imperatorem, carissimum filium fuisse à Pontifice appellatum, quia Christianus erat, licet sinceram fidem non teneret, facile is refelli poterit; quoniam Romanus Pater Christianos Principes à recta fide deuios nec filiorum titulo, nec Apostolica afficit benedictione; quod perspicuum fit ex literis, quas idem Pontifex dedit ad Basilium, magnum Moscouiæ ducem, peruerso schismate à Romana sede separatū; neutrum enim in illis scriptum reperimus. Huc illud tendit, quod Pius Pontifex in ea, quam ad Menam misit, epistola, eius quoque optabat felicitatem, & Imperij

perij amplificationem, vt in iis regionibus intemerata Christi religio maius indies acciperet incrementum. In cæteris infidelium principum literis nihil erat huiusmodi. Habet præterea ad hanc partem stabilendam non mediocrem vim, quòd nulla hominum natio est, nulla sunt in orbe regna, nisi Christiana sacra sincerè colant, quæ Romæ designatum habeant à Pontifice protectorem, cui eorum negotia curæ sint. Nullus enim Romæ est, qui Mauritanix, qui Arabiæ, qui Persidis, qui regionis alterius à Romanæ sedis obedientia remotæ curam habeat, aut ex proprio suo munere defensionem suscipiat; quòd iis tantum provinciis, qui Christum colunt, & eius in terris Vicarium agnoscunt, audiuntque, Protectores assignantur. At Abassini. & Protectorem semper habuere, & nunc etiam habent. Annis superioribus Paulus I I I. fuit, antequam ad summum Pontificatum fuisset assumptus; illi Alexander Farnesius, huic Odoardus, qui nunc viuic, successus est. Nonnihil etiam momenti habet, quòd Abassini sacerdotes apud nos more suo rem diuinam peragunt. Non enim aliis tantum in locis, sed etiam Romæ, hoc est, in ipsa primaria totius sanctitatis ac religionis sede, sacris sæpissime operantur; & aliquando Leo X. vt memoriæ proditum est, & alij postea Pontifices iis litantibus interfuere. Iam verò qui non videt, apud eos, qui à Romano Pontifice disiuncti sunt, nulla patrari miracula, nullam esse veram sanctitatem, nullam conseruandæ fidei curam, nullos hæreticæ prauitatis iudices, nullam Imperij firmitatem? Primum enim cum ea opera, quæ humanam superant facultatem, & suapte conditione maiora sunt, quàm vt vlla rei creatæ potentia edi queant, à Deo, qui potissimus est eorum opifex, non aliter, quàm ad

confirmandam religionis veritatem efficiantur; planè sequitur non alibi fieri, nisi ubi vera religio est. At enim multa etiam nunc in Æthiopia patrari miracula, pro certo habetur: sanitatem ægri mirabiliter recuperant, visum cæci, auditum surdi, redeunt ad vitam mortui: inficiari igitur nemo potest, verà esse in Abassinis fidem. Præterea absque recta fide, siue qua nemo potest Deo placere, veram animi sanctitatem non esse, ipsamet fides docet: cum autem veræ sanctitatis fundamentum fides sit, necesse est, ut si ista desit, consistere illa non possit. Sed quam multos in Æthiopia esse homines insigni vitæ sanctimonia præstantes, haud potest in dubio poni, nisi forte ab iis, qui res Æthiopicas penitus ignorât. Ut enim omittantur alij, vix ullus huc usque apud eas gentes dicitur fuisse Imperator, qui cum summa Christianæ fidei constantia non coniunxerit excellentium virtutum mirabilia exempla. Tanto verò semper studio veræ doctrinæ integritatē coluere, ut ex Dominicana familia viros aliquot esse voluerint, qui proprio ex munere diligentissimè cauerent, ne quid umquam hæreticæ labis illis in locis Religioni aspergeretur. Ad hæc Religiosorum ordinum apud Abassinos perseverantia, & firmus atque stabilis per tot ætates ac secula illius Imperij status, duo sunt non vulgaria, neque contemnenda veræ atque incorruptæ Religionis indicia: sacræ enim religiosorum familiæ, ubi vera fides non est, non videntur posse diu persistere; cum nihil prius, quàm ista Religionis propugnacula hæresis inuadat. Esse autem innumeram apud Abassinos religiosorum multitudinē, ambigi non potest, cum in duobus tantum sancti Domini cœnobiis sedecim viuant Prædicatorum fratrum millia; quem numerum nec omnes simul, quæ eiusdem

eiusdem ordinis in vniuersa Eutopa domus sunt , videntur cœquare. Hoc autem argumentum paruipendendum non esse , grauium monet scriptorum auctoritas, qui hoc idem assumunt , vt veram esse probent apud Armenios fidem. Quod autem stabilis ac diuturnus regum regnorumque status, Religionis arguat veritatem, ex eo deduci potest , quod hæresim , vbi-cumque pedem ponit , ingens semper strages æquis passibus comitatur ; vixque ad hanc diem vllus siue hæreticus , siue à Romano capite præcisus princeps extitit , qui lugubri & infausto exitu non interierit. Rem nouere , quibus nota veterum monumenta, nec pauci sunt, qui eam exemplis demonstrant. At Æthiopica respublica à primis Ecclesiæ temporibus vsque in præsens , cùm principes semper optimos sortita est, & omni laudis genere præstantes , tum secundis rerum successibus tantum per omnem ætatem floruit , quantum alia in orbe nulla ; nec quidquam aliquando siue à casu , siue ab hostibus perpeffa est , ex quo graue acceperit detrimentum ; & quicumque in ea fuisse Imperatores , ij exacto vitæ curriculo Ecclesiasticis muniti subsidiis feliciter decesserunt. Quis verò inducere in animum queat , potuisse Abassintim Imperium Ethnicorum vndique & Saracenorum circumcinctum armis , ita stabile persistere , vt non modò nulla ex parte imminutum sit, sed etiam amplificatum, nisi ea, quæ Imperia firmat & auget sincera Christi fides, semper in ea retenta, conseruata, amplificata fuisset ? Omnia regna , quæ Romani Patris excussere iugum, quamuis cum seculis victura viderentur, breui periere, & suis iacent condita in ruinis. Exempla memoriam superant , nec experientia requirit fidem.

confirmandam religionis veritatem efficiantur; planè sequitur non alibi fieri, nisi ubi verà religio est. At enim multa etiam nunc in Æthiopia patrari miracula, pro certo habetur: sanitatem ægri mirabiliter recuperant, visum cæci, auditum surdi, redeunt ad vitam mortui: inficiari igitur nemo potest, verà esse in Abassinis fidem. Præterea absque recta fide, siue qua nemo potest Deo placere, veram animi sanctitatem non esse, ipsamet fides docet: cum autem veræ sanctitatis fundamentum fides sit, necesse est, ut si ista desit, consistere illa non possit. Sed quam multos in Æthiopia esse homines insigni vitæ sanctimonia præstantes, haud potest in dubio poni, nisi forte ab iis, qui res Æthiopicas penitus ignorât. Ut enim omittantur alij, vix ullus huc usque apud eas gentes dicitur fuisse Imperator, qui cum summa Christianæ fidei constantia non coniunxerit excellentium virtutum mirabilia exempla. Tanto verò semper studio veræ doctrinæ integritatē coluere, ut ex Dominicana familia viros aliquot esse voluerint, qui proprio ex munere diligentissimè cauerent, ne quid umquam hæreticæ labis illis in locis Religioni aspergeretur. Ad hæc Religiosorum ordinum apud Abassinos perseverantia, & firmus atque stabilis per tot ætates ac secula illius Imperij status, duo sunt non vulgaria, neque contemnenda veræ atque incorruptæ Religionis indicia: sacræ enim religiosorum familiæ, ubi vera fides non est, non videntur posse diu persistere; cum nihil prius, quàm ista Religionis propugnacula hæresis innadat. Esse autem innumeram apud Abassinos religiosorum multitudinē, ambigi non potest, cum in duobus tantum sancti Dominici cœnobiis sedecim viuant Prædicatorum fratrum millia; quem numerum nec omnes simul, quæ
eiusdem

eiusdem ordinis in vniuersa Europa domus sunt, videntur coequare. Hoc autem argumentum paruipendendum non esse, grauius monet scriptorum auctoritas, qui hoc idem assumunt, vt veram esse probent apud Armenios fidem. Quod autem stabilis ac diuturnus regni regnorumque status, Religionis arguat veritatem, ex eo deduci potest, quod hæresim, vbi-cumque pedem ponit, ingens semper strages æquis passibus comitatur; vixque ad hanc diem vllus siue hæreticus, siue à Romano capite præcisus princeps extitit, qui lugubri & infausto exitu non interierit. Rem nouere, quibus nota veterum monumenta, nec pauci sunt, qui eam exemplis demonstrant. At Æthiopica respublica à primis Ecclesiæ temporibus vsque in præsens, cum principes semper optimos sortita est, & omni laudis genere præstantes, tum secundis rerum successibus tantum per omnem ætatem floruit, quantum alia in orbe nulla; nec quidquam aliquando siue à casu, siue ab hostibus perpeffa est, ex quo graue acceperit detrimentum; & quicumque in ea fuere Imperatores, ij exacto vitæ curriculo Ecclesiasticis muniti subsidiis feliciter decesserunt. Quis verò inducere in animum queat, potuisse Abassinum Imperium Ethnicorum vndique & Saracenorum circumcinctum armis, ita stabile persistere, vt non modò nulla ex parte imminutum sit, sed etiam amplificatum, nisi ea, quæ Imperia firmat & auget sincera Christi fides, semper in ea retenta, conseruata, amplificata fuisset? Omnia regna, quæ Romani Patris excussere iugum, quamuis cum seculis victura viderentur, breui periere, & suis iacent condita in ruinis. Exempla memoriam superant, nec experientia requirit fidem.

*Quomodo Abassini ab hæresis suspitione
videantur defendi.*

CAPUT XXIV.

Illud nonnullos grauitè offendit, quòd Abassini non paucas Mosaicæ legis cæremonias cum Christianis sacris videantur commiscere, & tenebras cum luce, cum Christo coniungere Belial. Id verò absque Religionis iniuria fieri non posse, indubitatum est. Hoc igitur loco ostendit nouus auctor, potuisse illos absque vllò Christianæ fidei detrimento res adedò inter se pugnantes vèluti còcordi fœdere copulare. Principio, inquit, ponendum est, multos iam ante annos quidquid Abassini habebant, quod ratione aliqua Iudaismum saperet, totum id summorum Pontificum iussu penitus reliquisse, adeoque in sacrorum procuratione Romanæ nunc Ecclesiæ esse conformes, nulla vt in re ab ea discrepent, iis tantùm exceptis, quæ orientalium sunt Ecclesiarum propria, nec Religionem violant. Circumcisionem priùs cùm Baptismo permiscebant: antiquæ purificationis seruabant legem: Sabbata simul, & Dominicos dies habebant festos: à potcina carne, à sanguine, & suffocato animali abstinebant: ipsis ieiunij diebus ante occasum Solis nihil sumebât cibi. Hæc illa sunt, ob quæ maxime à multis credebantur hæretici quasi mortiferos retinerent Iudæorum ritus diuinis humanisq; decretis iamdiu còdemnatos. Sed non est difficile tanto à crimine innocentes homines liberare. Vna dumtaxat satis esset ad hæc omnia responsio, ignorantiam, quæ iustè defendi potest, vacare culpa, sine culpa verò non posse fidem labefa

labefactari. Ignorantes enim, non autem pertinaces illis Iudæorum ritibus adhæsisse Abassinos inde compertum, quia ubi moniti sunt, quidquid ex Iudaicis hauserant fontibus, quamprimum repulere: Quod verò ab initio talibus se cæremoniis immiscuerint, tū libri quidam, Manda, & Abethilis dicti, quorum doctrinam sequi iussi sunt, tum receptæ in ipso nascentis Ecclesiæ exordio apud Christianos consuetudines ansam præbuere. Ut easdem cæremonias tamdiu retinuerint, causa fuit, quod à Mahumetanis utramque Arabiam, Palestinam, Ægyptum, & alias circum regiones occupantibus circumdati, Christianorum Conciliis, in Europa celebratis, interesse nequierunt. Inde enim factum, ut cum nullos haberet fidei Doctores, à quibus institui possent, in iis, quos semel per ignorantiam hauserant, erroribus eousque perseverarint, donec sub Eugenij I V. Pontificatum viam diuinitus reperere, qua utcumque possent è patriis finibus, veluti è carceribus, ad alias terras egredi. Cum ergo audissent, sicuti proximè narratum est, cogi in Italia Concilium, Imperatoris sui iussu ad illud aliqui se contulerunt, qui quæ decreta, & Romani Patris autoritate essent approbata, referrent ad suos. Hi domo profecti, & Ægyptum clanculum subintrantes, Hierosolymam primum, inde Ioppem, tum Venetias, ultimò Florentiam, ubi summo omnium ordinum concursu Ecclesiastica comitia fiebant, non sine maximis laboribus & periculis peruenere; resque varias ad mores & fidem spectantes edocti remearunt in patriam, in qua nonnullas consuetudines diuturnitate temporis firmiter robotatas, quoniā à Florentinis statutis abhorrebant, statim abiecere. Postea maris Oceani itinere patefacto, cum iam Europam, & in ea Romam faci-

lius adire possent, aliique & alij in has partes idem-
dem transirent, didicere tandem, quibus essent impli-
cati erroribus, eosque radicitus extirparunt. Quamvis
autem Abassini Circumcisionem, & alias, de quibus
dixi, Iudæorum cæremonias simul cum sacris Chri-
stianorum ritibus scientes seruarent, non tamen idcir-
co hæresis essent damnandi; quandoquidem non im-
pio animo, atque ut antiquatam retinerent legem, sed
mète planè pia, & ab omni libera superstitione, atque
ut Christum parentem optimum, nostra causa circū-
cisionis dolorem notamque subeuntem imitarentur,
credi deberent id efficere, quod nulli diuinæ humanæ-
que legi repugnabat. Fieri etiam potuit, ut illa pueros
octauo die circūcidendi consuetudo remanserit apud
Æthiopes ab antiquissimis illis temporibus. cum non-
dum Christum, aut ullam veri Dei legem agnosce-
bant. Multi enim Ethnicorum populi infantes suos
circumcidere erant assueti, ut de Colchis, de Macro-
nibus, de Syris, de Phænicibus in Asia, de Iucatanis,
Totonibus, Mexicanis, Acuzamilensibus in nouo or-
be, de Ægyptiis, & Æthiobus in Africa probati au-
ctores memoriæ prodiderunt. Vero igitur videtur si-
mile, Abassinorum gentem neque à Regina Sabæ, ne-
que à Iudæis, qui illā, ut aliqui volunt, ad suos Æthio-
pes reuertentem ab Hierosolyma sunt comitati, cir-
cumcisionis rationem accepisse; sed multo iam antè,
gentilico illam v̄surpassse ritu, cumque religione Chri-
stiana postea retinuisse. Itavidemus plures etiam nunc
inter Christianos seruari consuetudines, ab Ethnicis
olim vsutpatas; non eo quidem animo, ut aut mutis
Deorum simulacris ullus exhibeatur honos, aut ex
veteri superstitione quidquam fiat, quod absque pia-
culo fieri non possit; sed ut quæ erant vanitati dicata,
in

in rectum vsum conuersa, veritati famularentur. Cō-
 pertum enim est, quæ natura mala non sunt, nec lege
 vetita, posse licitè fieri, si rectus finis adhibeatur. Ob
 purificationis quoque cæremoniam nemo Æthiopes
 iure damnabit. Sanctissimam enim Christi matrem
 imitari, non Iudæorum seruare legem, propositum illis
 erat. Sabbati observatio duplici ex capite à Iudaismi
 suspitione vindicatur. Illud quidem inter festos dies
 Abassini habebant, tum quòd ita faciendum ab illis
 suis libris Manda, & Abethili, per ignorantiam acce-
 perant; tum quòd non idem illis, qui Iudæis, legalis, vt
 dicitur, animus erat. Constat, multa Iudæos fecisse,
 quæ nunc apud Christianos in vfu sunt, & in laude.
 Abstinebant illi à cibis, vt Deum sibi redderent pro-
 pitium; ciliciis domabant corpora, tundeant pugnīs
 pectora, musicis instrumentis diuinas decantabant
 laudes, id genus præstabant alia, quæ tantum abest, vt
 à Christi Ecclesia repudiata sint, nihil vt frequentius
 & laudabilius in illa vsurpetur. Si quis Sabbatum cu-
 stodiat, vt conditi orbis beneficium, quod vniuerso
 hominum generi commune fuit, acceptum referat
 cōditori; neque id faciat, eo quòd Hebræorū olim po-
 pulo eius custodiendi impositum fuerit præceptum, is
 certè non impiè, & prauè, sed piè, & sanctè faciet;
 quippe qui beneficentissimo Numini debitam exhi-
 beat grati animi significationem. Scitum illud est
 ex Leone magno, cæremonias Iudæorum, quæ ad ali-
 quid significandum fuerunt institutæ, nefas esse Chri-
 stianis imitari; virtutum autem exercitia vtrique esse
 populo communia, magis que nobis, quàm Iudæis cō-
 gruere. A porcina carne, à sanguine, à suffocato pro-
 pterea abstinebant, quòd illi ipsi libri Manda, & Abe-
 thilis ita præceperant faciendum. Neque verò nimis

in hoc errasse, credendi sunt; cùm legissent scriptum, primis nascentis Ecclesiæ Christianis Apostolica lege fuisse cautum, ne sanguine, aut suffocata animantis carnibus se contaminarent. Quod tandem ad ieiunium attinet, non ideo occasum Solis ante cibum expectabant, quòd Iudæorum, aut Mahumetanorum superstitionem sequi vellent, quasi ante stellæ ortum nefas ducerent cibum sumere; sed ut id præstarent, quod erat olim Ecclesiasticis legibus statutum, ne videlicet quadragesimalibus feriis ante vesperum, néve temporibus aliis ante horam post meridiem tertiam ederent ij, quibus esset imposita lex ieiunandi. Quam etiam hunc adhuc retinent morem, ut doment corpora, & Christo cruci affixo, ac sitim patienti per ipsâ inediæ tolerantiam aliquo modo similes fiant. Hanc enim ob causam hisce ieiuniorum feriis nō solum semel dumtaxat sumunt in die cibum; sed etiam vsque ad vesperum perstant ieiuni; ac tunc quidem præter panem, aquam, & herbas, aut aliqua poma, nihil aliud degustant. Quòd si qui pisces addant, ij & pauci esse solent, & ab illis piscibus abstinere, in quibus sanguis est; marinis contenti locustis, sepiis, ostreis, polypis, conchiliis, & huiusmodi aliis; quibus in cibis & ad confirmandas vires minus roboris, & ad appetitus illecebram minus saporis inest. Quàm verò certum sit, Abassinos, nullas omnino siue Iudæorum, siue Mahumetanorū ceremonias, eodem cū illis animo exercere solitos, immane illud testatur odiū, quo utrāque semper gentem sunt insecuti. Nam & cū Mahumetanis, quibus omni ferè ex parte circumdantur, perpetua diversis locis gerūt bella, & à Iudæis ita sūt auersi, ut eos, & quicūque ab eis ducunt originem, licet Christianā profiteantur fidem, Æthiopix ingressu interdiciant.

*Auctorum testimoniis probari videtur
Abassinorum fides.*

CAPVT XXV.

SI quid vlla in re scriptorum valent testimonia, illa profectò valere maximè debent, quæ ab iis profertur, quorum nihil interest, quid in alterutram partem dicendo statuatur. Nam qui vel contentionis magis, quàm veritatis cupidi sunt, vel aliquod sibi emolumentum scribendo proposuere; eorum quidem valde suspecta narratio est. Vt autem nihil audacius, quàm excellentium hominum, & rectè de rebus sentientium iudicium contemnere; ita nihil plarè iniquius, quàm ex temeraria imperiti vulgi opinione, quid verum, aut falsum sit, definire. Hinc iam desumere oportet ex mente noui auctoris, quid de Abassinorum fide sentiendum sit. Eorum enim causæ probi inquit ac diligentes patrocinantur scriptores, rudes autem de vulgo homines, & veritatis ignari eidem aduersantur. Verorum standum sit iudicio, nemo ambiget, nisi qui simul ignoret, temeritatis ne, an prudentie potiores partes sint. Qui asserunt, numquàm Abassinos à Romana & catholica fide decessisse, ex omni scriptorum genere ad quinquaginta ferè numerantur. Ex his aliqui Æthiopicum Imperium peragrantes, rem ipsi per se sunt experti. Alij ab illis fuerunt instructi, qui easdem terras obeuntes, gentis mores ac religionem accuratè obseruarunt. Nonnulli cum Abassinis ipsis, hominibus minimè malis, & candidè ac simpliciter agentibus, dum hæc ad loca venirent, collocuti,

locuti, quid gens vniuersa de fidei veritate sentiat, quid sequatur, sine dolo ab iisdem didicerunt. Neque inter auctores istos hæretici desunt; quorum hac in re testimonium, quamquam ipsi omni sunt indigni fide, eo pluris faciendum est, quo magis, quia eorum causæ nocet, ab inuitis profertur. Non erit forsitan à re & loco alienum, aliquorum nomina cursim indicare. Numerari ergo in primis possunt Parra, nobilis Gallus, & Franciscus Aluarus, Lusitanus sacerdos, qui illas Æthiopum regiones perlustrarunt, deque Abassinorum moribus libros edidit. Deinde Theologi, & Iurisperiti nemini ignoti; ex quibus sunt Nicolaus Sanderus, & Ioannes Echius, & Franciscus Feuardentius, & Thomas Stapletonus, & Simon Maiolus, & Ludouicus Paramus Beroxenensis; & quidam alij ingenij laude per Europam clari. Præterea qui vel illustriū hominum vitas, vel aliarum rerum historias literis mandarunt, inter quos sunt Paulus Iouius Nouocomensis, & Hieronymus Osorius Lusitanus, & Ioannes Boemus Aubanus Theutonicus, & Marcus Antonius Coccius Sabellicus, & Iacobus Middenderpius Colonienensis; item qui de Geographia & Chronographia scripsere, vt Raphael Volaterranus, & Liuius Sanutus, & Gilbertus Genebrardus, & Philippus Bergomensis. Item Poetæ, vt Ludouicus Ariostus, & Torquatus Tassus Itali, & Alfonsus Erzilla Hispanus. Item David Chytrius hæreticus homo, & Desiderius Erasmus semihæreticus. Denique plures alij minorum gentium auctores; quorum quidam disertis exprimunt verbis, Abassinos veram profiteri Christi fidem. Alij ab hæresis nota eos ex instituto testimoniis & argumentis vendicant, atque à Romani Pontificis obediētia numquam recessisse contendunt. Nonnulli pleno

ore pronuntiant, eorum Imperatorem esse Christianissimum, & catholicæ Ecclesiæ obedientem filium. Nec parum valere debet, ad hanc rem, de qua agitur, roborandam, quòd Abassini duo in Europa habent collegia, Romæ vnum, Olisiponæ alterum. Illius auctor & institutor fuisse dicitur Eugenius IV. ad annos Christi mille quadringentos triginta quatuor, in quo ex ea gente multi virtute & diuinarum literarum cognitione florent; variarumque studia linguarum, quibus apprimè callent, cum magno Christianæ reipublicæ emolumento & illustrium virorum concursu diligentissimè exercent, vnâque Vaticanæ bibliothecæ clauim habêt, & Arabici, Syriaci, Chaldaici, atque Ægyptij idomatum bibliothecarij sunt. Magis verò his Abassinis collegis credendum, quàm Ioanni Petro Maffei, & Petro Ribadaneræ, & Ioanni Antonio Gabutio, & huiusmodi aliis, qui de re sibi ignota temere scripsere. Sed magna in primis dignus reprehensione Maffei est, quòd falsis ductus rumoribus, non tam vt verè, quàm vt Latinè diceret, curauit; plûsque apud illum Latinæ cuiusdam elegantiae opinio, quàm ratio veritatis videtur valuisse. Ribadanera Maffei vestigiis inconsultò institit; eo tamen videtur efficacius agere, quòd Pontificio innititur diplomati, à Pio V. ad Ouiedum in Æthiopiam dato; quod tamè nullius esse momenti ex eo perspicuum est, quòd & Sebastianus Rex ficta ac malitiosa quorūdam deceptus narratione, illud à Pontifice obtinere conatus est; & Pontifex falsò de re instructus ita concessit, vt sciens & prudens nequaquam concessisset.

Vnde videatur ortum ut Abassini apud nos schismatici habeantur.

CAPVT XXVI.

TAlem huius Abassinorū infamiae causam nouus auctor comminiscitur. Circa annos, inquit, salutis nostrae mille quingentos quinquaginta quinque ingens Lusitanorum multitudo Æthiopiam ingressa est. Plusquam trecenti erant. Fuere ab indigenis eximia quadam amoris significatione excepti, quod Lusitani essent, & Christiani crederentur. Verum cum genere & secta essent Hebræi, paucos post dies perfidiae suae venenum effudere, tanto liberius, quanto se à fidei censoribus putabant illis in locis tutiores. Qui ergo Christiani primùm habiti sunt, remoto simulationis velo, verbis, factis, moribus, ritibus, caeremoniis, superstitionibus quales erant, apparuere. Obstupuit Æthiopia, cum tam horrendam veluti derepente ex Christianis in Hebræos vidit metamorphosim; nec potuit continere sese, quin statim ad prædicatorum patrum Priores, qui hæreticæ prauitatis quæsitores illic sunt, negotium detulerit. Prope erat, ut perfidi Hebræi Censorum iussu comprehenderentur, cum vel aliquo indicio rem odorati, vel quod est verosimilius, à cacodæmone, quocum omnes, qui huius sectæ sunt, occultam habere videntur familiaritatem, tacitè admoniti, periculum sedulò declinarunt, & fuga sibi cōsulentes, in diuersas abiire dispersi regiones. Multi in Bornum, quod regnum propè Abassiam Saraceni tenent alij aliud; non pauci Goam se contulere. Isti postremi ut suam tegerent nequitiam; quidquid iniquū
 & exe

& execrabile est, per summam calumniã Abassinis imponentes, eos eorũq; Imperatorẽ Christianam religionẽ acerrime insectari, Ouiedum Patriarchã innumeris pressum ærumnis acerbo carcere apud eosdem concludi, & eiusdem generis cõmenti sunt sexcenta, tam abhorrentia à vero, quàm ipsorũ ingenio ac moribus cõsentanea. Ceterũ habita iis fides est, præsertim cum iureiurando impiẽ confirmarent, quæ per summam impudentiam innocentibus impingebant. Cum ergo falsa fallaxque fama, quæ celerrimẽ terras & maria transuolat, non per Lusitaniam solũ, verum etiam per Europam vniuersum breui disseminasset, Abassinam gentem, quæ puram tenere fidem credebatur, mille hæresum erroribus esse immersam, atque à Romanæ sedis obedientia longè seiunctam; ad Sebastianum Regem res est delata. Is, vt erat egregiẽ pius, & valde religionis amans, Pium V. Pontificem maximum fecit per literas certiores, ab eoque petiit, in Æthiopiam mitteret diploma, quo statueret, vt Andreas Ouiedus Patriarcha, quo primũ posset tempore, locis illis relictis, ad Sinas, vel Iaponios se conferret; apud quas gentes posset minori cum periculo, & maiori cum fructu Christianæ religioni operam impendere. Hæc diplomatis illius, cuius Ribadanera meminit, expediendi causa Pontifici fuit, quæ vt erat commentitia, non aliud effecit, quàm vt nullum in eodẽ diplomate robur inesset. At enim qui tunc Romæ erant Abassini, cum id, quod de suæ gentis fide non clanculum, sed apertè, ac palàm iactabatur, non sine grauissimo animi dolore percepissent, vnum ex collegis dimisere, qui Menæ Imperatori (is Claudio successerat) nuntiaret, quanta apud Europæos Æthiopica religio infamia laboraret. Imperator tam

acerbo

acerbo nuntio vehementer perculsus , exemplo Goam ad Indicum Prætozem, inde in Lusitaniam ad Sebastianum regem, postremò Romam ad Pium V. & ad Collegium Cardinalium , atque inprimis ad Alexandrum Farnesium Æthiopiz protectorem , legatos ac literas misit , quibus rei totius seriem exponens , calumnias detexit Iudæorum. Iussit etiam ut magni Senatus consiliarij super eadem re ad Pontificem scriberent, suamque illi de nouo testarentur fidem , ac paratas deferrent ad omne obsequium voluntates. Simul etiam à Pontifice petiit, ut quod nuper celebratum audierat, Tridentinum Concilium ad se mitteret; non minus enim se, quàm reliquos catholicos principes , obedientem esse Romanæ Ecclesiæ filium. De Patriarcha Ouiedo nihil esset sollicitus; optimo enim apud se haberi loco, & Latino Senatui esse præfectum; tantique ab omnibus fieri , ut nemo esset, qui non illum ut eximiè sanctum suspiceret , ut parentem amaret , ut magistrum audiret , ut à Deo missum veneraretur. Legatis auditis, literisque perlectis maximè tam Pontifici, quàm purpuratis patribus probata est Abassini Imperatoris causa; extincti rumores falsò in vulgus antea sparsi , & mendax opinio ab omnium animis eradicata. Datæ quoque à Pontifice ad Abassinum literæ honoris & amoris plenæ; cum iis Tridentini decreta Concilij, & canones enuntiationis modò propositi, absque vlla pœnarum, quæ inibi contra hæreticos pertinaces decernuntur , mentione; ne si fortè Abassini nossent , esse homines Romæ vicinos , Romanæ sedis Imperium detrectantes, aliquam inde caperent offensionem. Posthæc Imperator Iudaicæ memor calumniæ, in tale genus hominum grauitèr infensus, legem tulit, quæ hodièque stri-

At seruatur: ea cautum, ne cui Lusitano ingredi deinceps Æthiopiam fas esset, nisi ab Olisiponenlibus, & Goanis fidei quæsitonibus facultatem haberet illuc eundi. Atque hæc vna ac præcipua causa fuit cur per Europæ regiones cum tanto Abassinorum dedecore disseminatum sit, à recta eos fide, quam semper summa cum laude tenuere, atque à Romani Pontificis obedientia & legibus desciuisse. Præter hanc duplex alia malè de Abassinis sentiendi exitit occasio. Vnam locorum ignoratio, alteram falsi vulgi rumores pepere. Audierant quidam in ea Æthiopia, quæ sub Ægypto est, aliquas esse gentes inanum idolorum addictas cultui; alias Mahumetana infectas turpitudine; nonnullas, quæ ita Christum profiterentur, vt & Moisaicæ legis cæremonias, Græcorumque ritus simul obseruarent: has gentes cum ex Abassinorum genere esse crederent, eò adducti sunt, vt scriberent Abassiam multis variarum sectarum erroribus esse contaminatam, & quod erat consequens à veritate Romanæ fidei quamlongissimè abesse. Hæc locorum ignoratio est. Nam si geographicæ inquit spectentur dimensiones, sic aliquando latè capitur Æthiopia, vt omnem illam complectatur Africæ partem, quæ intra tropicos iacet, qua in parte ingentia regna sunt, & permultæ prouinciæ innumeris pæne populis refertæ. Sic aliquando strictè, vt idem prorsus, quod Abassia sit, nec vltra in partem aliam protendatur. Hæc verò ratione constricta, neque Ethnicos habet incolas, neque Mahumetanos, sed tantum Christianæ Romanæque religionis egregios cultores, ab omni hæresis errore remotissimos. Cum igitur probi auctores, quibus fallendi animus non erat, simpliciter scripsere, esse in Abassia gentes, quæ adorent Idola, quæ Mahu-

meto obsequantur, quæ cum Latinis ritibus, & Christianis sacris Græcas & Iudaicas misceant superstitiones inter Abassiam & Æthiopiam latissime acceptam nullum agnoscentes discrimen id Abassiae tribuere, quod est magnæ illius Æthiopie proprium; eosque, quibus ignota est Geographiæ ratio, in errorem sine dolo induxere. Altera deceptionis occasio ex falso vulgi rumore desumpta est. Hæc patet latius, nec Abassinos tantum, sed alios etiam permultos attingit populos, in quibus sunt Armenij, Iacobitæ, Maronitæ, Nestoriani, & similes alij, qui tamen Catholicis legibus sanctè obediunt. Inde autem rude ac mendax vulgus gentes istas albo adscribit hæreticorum, quod eas non videat ad Romanum tribunal Religionis causas deferre; quod quidem, nec nisi difficillimè possunt, nec verò opus est, cum suos habeant in sacris iudices, ac magistros, quorum decreta sententiæque sequantur. At dubitari non debet, quod docti homines scribunt, per Abassiam, Persidem, Mediam, Indiam ad vastissimas vsque Sinarum regiones esse prope infinitos Christianorum populos, qui etsi vulgo inter schismaticos recensentur, Romanam tamen Ecclesiam & colunt ut matrem, & ut fidei magistram reuerentur, & caput esse prædicant omnium Ecclesiarum. Ignota eruditis esse non possunt, quæ de re proposita subiiciam. Tres Assyriorum Patriarchæ annis superioribus Romani Pontificis Imperium agnoscentes debitam ei præstitere obedientiam; Emericus Innocentio III. sub annum millesimum ducentesium; Simon Sulaca Iulio III. ad annos mille & quingentos; Abdisu Pio IV. anno quingentesimo sexagesimo secundo post millesimum. Deinde: Memini Antiochenus Patriarcha anno millesimo quin

quingentesimo septuagesimo quinto, Gregorio XIII. subiecit sese, & inferiorem confessus est. Tale Clementi VII. obsequium detulit Gabriel Patriarcha Alexandrinus anno millesimo quingentesimo nonagesimo quinto. Præterea quadraginta ferè ante annos, multis ad Iulium III. literis missis, supremum illum esse Christianorum principem ac pastorem testati sunt Nestoriani. In Concilio Florentino sub Eugenio IV. Romanæ sedis primatum agnovere Iacobitæ. Idem sæpiissimè fecere Armenij, & Georgiani. Rutheni quoque ac Moscovitæ coram Clemente VII. ad annum millesimum quingentesimum nonagesimum quintum, abiuratis Græcorum erroribus, Romanam fidem sunt amplexi. Infinitum esset per omnes ire nationes, quæ nec vulgo cognitæ, nec pro catholicis habitæ, Romanam tamen, hoc est, veram & immaculatam tenent Christi religionem. Quod igitur populis istis, idem Abassinis contigit. Non alia de causa Schismatici atque hæretici ab imperitis creduntur, nisi quia longo locorum intervallo disiuncti ad hunc orbem nostrum atque ad Romanam urbem rarissimè accedunt. Cur etiam per hæc oras tanta infamia laborarint, causa Græci fuere. Hi enim schismaticos hæreticosque æstimant, & appellant; qui Romanæ sedis iure reguntur. Dum igitur eam ob causam probrosis illis nominibus Abassinos diffamarent, occasionem ignorantibus dedere existimandi ab Romana eos fide dissentire. Hæc Gilberti Genebrardi hæc de re sunt verba. Illo, inquit, artificio Græci sæpius vsi sunt in Christianos orientales, ut quos cernerent in sedem Apostolicam propensos, hæreseos infamia traducerent. Hinc eos suspectos habeo, quotiescumque de Syris, Maronitis, Æthiopi-

bus, Persis, Indis, Georgianis, Ægyptiis scribunt. Nam qui versùs eos peregrinantur, catholicos offendunt, nec nisi quibusdam ritibus & cæremoniis à nobis differentes vident. Sic ille apud nouum auctorem, qui & his argumentis sæpius inculcatis, & pluribus aliis, in quibus roboris nihil est, vehementer contendit, factam rectam in Abassinis tueri Christianæ fidei sinceritatem, & singularem quamdam erga Romanam sedem obedientiam, quam & semper conseruarint, & hoc tempore impensius conseruent. Quæ utinam vera essent. Quod enim à recta Abassinorum fide, si eam colerent, nobis incommodum, ut vel innocentes traducere, quod grauissimum scelus est, vel occultam vellemus esse veritatem, quam multo utilius sit per Europam Asiâque vulgari, quàm inutili pressam silentio in Africæ angulo delitescere? Sed quoniam hæc illorum defensio, ut suprà dixi, Pontificum, Regum religiosarum, familiarum, atque excellentium virorum auctoritatem & existimationem non parum lædit, magni interest, ut quantum distet à vero, dilucidè ostendatur.

Abassinos à recta fide defecisse.

C A P V T X X V I I .

Auctores ij, qui superioribus annis, nondum rebus planè cognitis ab ipsis decepti Abassinis omnia sua venditantibus aliter scripserunt atque res est, digni sunt, quibus ignoscatur: nequæ enim absque vlla coniectura suspicari poterant, imponi sibi, ab iis præsertim, quos ob ingenij tarditatem credere pos-
sent

sent à dolis abesse: sed vasa calliditas nusquam fidentius; quàm in rudi pectore sibi sedem statuit. Nonus auctor videtur iusta carere deceptionis suæ excusatione: posset enim sic nosse omnia, ut nisi consultò affectaret ignorantiam, quo scriberet licentiùs, nulla in parte à recto aberraret. Adèd in tota Æthiopia nihil nunc est, quod nostris hominibus patefactum non sit, & planè compertum. Et verò ne quid de Abassinorum in Romanam sedem obseruantia, & debita Pontifici maximo obedientia auctor iste statueret, grauissima in primis Pontificum, & Regum auctoritate deterreri debuit. Qua enim ratione temeritatis notam effugere potest, qui prudentissimos principes in re tanti momenti quidquam temere credidisse, & in reuocandis ad fidem Abassinis tanta sollicitudine non modò sine causa, sed leuiter etiam atque inconsideratè laborasse, tam liberè definit? Alterum certè necesse est, auctor iste nobis concedat, aut Pontifices, Regesque credendo, & agendo temerarios fuisse, aut nimis esse temerarium, qui vel tacitè hanc illis ignominiae notam audet impingere. Deinde ecqua illi esse potest siue calumniae siue temeritatis iusta excusatio, dum testes tam multos, tamque locupletes, ex quibus plerique insigni sunt prudentia & sanctimonia illustres, palàm apertèque mendacij redarguit? Non vnus quidem fuit, vel alter à quo Romani Pontifices & Lusitani Reges acceperè, Abassinos à recta fide & Apostolica sede esse auersos. Non semel tantùm & iterum, sed quàm saepissime, & temporibus diuersis, & in vario eius imperij statu ea de re facti sunt certiores. Valde quidem mirandum, si veram religionem semper Abassini coluere, tanto hominum ex numero, qui apud eos tamdiu, tamque longo decursu temporum

habitarunt, neminem fuisse repertum, qui rem, ut erat, Romanis Pontificibus & Lusitanis regibus exponeret gentemque innoxiam ab infamia liberaret. At Abassinus ille, à quo nouus auctor instructus est, rerum Christianarum non mediocriter intelligens, atque in Æthiopia natus, & educatus, numquam Abassinos suos à vera fide cecidisse, constanter affirmauit. Bene habet. Magis ergo vni credendum, suspectæ homini fidei, quàm iis, quibus intererat, omni ope niti, ut in re tanta omnia nota perspectaque haberent, ne quid suo nomine sine maturo consilio ageretur. Fuisset quidem longè tutius opinari, hominem vnum sua venditantem deflexisse à vero, quàm tot tamque præclara, prudentiæ & constantiæ lumina, tam singulares, inquam, Pontifices, tamque eximios Reges ad res tantas temere fuisse abreptos, suaque & consilia, & opera præcipitasse. Iam verò quàm est indignum, quæ vitia idem auctor in aliis falsò reprehendit, in ea ipsum sponte incurrere, & credere licere sibi, quæ negat aliis licere? Si enim eos vocat temerarios, atque in dicendo præcipientes, qui res Æthiopum clarissimis firmatas testimoniis, crebrisque eorum, qui eas per se ipsi experti sunt, testatas literis, & ab iis tandem, ad quos pertinent, cum cura acceptas, fideliter referunt: ecquam oportet sibi inurat notam, cum testibus anteferat grauissimis illius fidem, qui & malè cohærentia, atque apertè falsa narrauit, & in mendaciis deprehensus, se mentitum, non difficile confessus est? Eiusmodi certè erant, quæ ab illo narrata sunt, ut nemo tam crasso esset iudicio, qui non ea aut statim ficta indicaret; aut saltem ab iis credendis assensum cohiberet. Alia erat Ribadanetæ, Maffei, Gufmani, Gabutij, quàm eius Abassini auctoritas, ut si is aduersus illos

illos quidquam diceret, vel ea tantum de causa suspectus esset habendus. Nec erat existimandum, tam graues, tamque pios homines, quibus nihil magis, quam veritas cordi, res similes fuisse scripturos, nisi de illis, quantum humana ferunt, essent certissimi. Quare ut nemo sanæ mentis ambigere iure queat à Romana fide Abassinos esse alienos, satis illi esse debet, Pontifices maximos, summosque reges, qui graui negotia non solent absque magna consideratione & consultatione agere, tam multa præstitisse, ut illos ad veterem, quam deseruerant, veritatis viam reuocarent. Quemadmodum enim verè possent leuitatis reprehendi si inanibus permoti rumoribus res tam graues essent aggressi; ita planè, qui illos dicat fuisse deceptos, leues eosdem fuisse iudicet, necesse est. Videat igitur nouus auctor, an tutum fuerit viros tales ac tantos leuitatis coarguere; adeoque eorum imminuere auctoritatem, ut minus ipsis, quam Abassino vni, qui se, quod sæpe dixi, mentitum esse confessus est, credendum putarit. Quod autem alios optimæ fidei scriptores ita respuerit, ut nullam eorum habendam duxerit rationem, etsi est valde indignum, eo tamen æquius ferendum, quod qui summorum Pontificum, & regum contemnit auctoritatem, ab eo reliquos contemni, haud magnum est. Sed quæro, unde acceperit Ioannem Petrum Maffeiū, quæ legerat, quæve audierat, absque vlllo veri falsique discrimine tradidisse, nec tã curasse, ut vera scriberet, quam ut elegantem se Latinæ linguæ scriptorem mundo venditaret; indeque factum, ut qui postea de Abassinis scripsere, ipsum ut antesignanum secuti, in eosdem collapsi sint errores? Si ipse non quidem tantam, quãtam Maffeiū, sed multo minorem adhibuisset in scri-

bendo diligentiam, non eò deuenisset, vt cùm scripserit pluriima, longè quidem sint pauciora, quæ cum veritate consentiunt, quàm quæ ab eodem apertissimè discordant. Maffeijs ne qua in re, quoad fieri posset, ne minimum quidem aberraret, non satis habuit id facere, quod solent diligentissimi scriptores, & qui maxime amant veritatem; sed Italia relicta anno millesimo quingentesimo septuagesimo nono in Lusitaniam se conferens Olisiponem adiit, regiam urbem; in qua & cùm iis qui res illas, quas erat scripturus, vel magna ex parte gesserant, vel interfuerant gerendis, coràm colloqueretur; & quæ ab illis erant temporibus remotiora, ex ipsis erueret monumentis, rerumque gestarum annalibus in regni archiuo referuatis. Id præstitit viuente adhuc Henrico rege, & amplissimam ad id potestatem concedente. At enim Petrus Ribadanera, Ludouicus Gusmanus, Ioannes Antonius Gabutius, & qui deinceps, siue ex Societate, siue extra illam de Abassinis scripsere, præter illa, quæ iam vulgo multorum erant literis, nemine contradicente, celebrata, nihil tradidere, nisi quod à religiosis Societatis, qui ab annis prope sexaginta Æthiopiam incolunt, acceperunt. Ab eo enim tempore, quo Andreas Ouiedus ea in loca cum sociis penetrauit, ad hunc vsque diem, numquam ferè illic ex Societate defuere, qui frequenter de statu rerum & Goanos & Europæos Societatis religiosos, ipsùmque inprimis Præpositum generalem per literas monerent. Anno, vt dixi, millesimo quingentesimo quinquagesimo septimo Abassiam Ouiedus cum sociis ingressus est. Inde vsque ad annum tertium huius sæculi, etsi est valde laboratum, vt illuc alij ex Societate ingrederentur, haud vllus tamen fuit, qui perueniret. Statim enim

enim ab Ouiedi ingressu omnes Erythæi maris portus, qui in Æthiopia sunt, priusque sub Preteiannis erant ditione, ita Turcæ occuparunt, ut quadraginta sex annorum spatio nullus Lusitanus adire eas Abassæ partes tentarit, qui non fuerit à Turcis vel occisus, vel captus. Anno enim superioris seculi sexagesimo Fulgentius Frerius ex Societate Iesu illuc ex India missus, ut quid ageret Ouiedus, quid reliqui socij, agnosceret, & renunciaret, in ipso Arabico sinu à Turcis est captus, vulneratus, & Cairum ductus. Idem triginta post annos Antonio Monserrato, & Petro Paëz eiusdem Societatis sacerdotibus contigit. Cum enim in Æthiopiam se conferrent, ut eos, qui tunc ibi erant eiusdem instituti homines, in illo agro colendo adiuuarent, iisque decedentibus succederent, à Saracenis capti, septem in captiuitate annos durissime traduxere. Felicior Abrahamus de Georgiis Societatis quoque sacerdos, Maronita genere, qui cum anno millesimo quingentesimo nonagesimo quinto in eadem oras eodem proposito contenderet, in Insula Mazua à Mahumetanis incolis cognitus, & comprehensus, & quia renunciare Christo noluit, crudelissime trucidatus, ad cælum abiit maturus. Cum ergo Patres, qui in India erant, hoc Æthiopicum iter tantis viderent præpeditum difficultatibus, considerare sedulo cœpere, quonam modo effici posset, ut aliqui ex sociis in Abassiam introirent. Visum tandem post multa, nihil esse ad hanc rem aptius, quam si Dio, quam ad urbem multæ quotannis ex variis locis negotiandi causa naues appellunt, aliquod haberent domicilium, in quo degerent, ut inde in Æthiopiam breuius & minori cum periculo traicerent. Acriter huic consilio per suos obstitit humanæ salutis hostis;

sed causa cecidit. Cum enim Arias Saldagna vir clarissimus, & præter cæteras animi virtutes singulari excellens pietate, Indiam gubernare esset aggressus, apud se reputans, quanta in hac vna re & ad eundem, & ad veritatem reuocandæ Æthiopiæ esset spes, tanta in eam diligentia incubuit, ut dicta in vrbe ad hos, atque alios similes usus valde commodam Societati domum à fundamentis erexerit. Ex ea nunc in iisdem infidelium nauibus exiguo cum periculo proficiscuntur nostri; & in ipsa tandem exponuntur Æthiopia. Ita variis annis variij profecti, sine damno peruenire. Petrus Pæz anno millesimo sexcentesimo tertio; duobus post annis Antonius Fernandus, & Franciscus Antonius de Angelis; anno tandem millesimo sexcentesimo sexto Ludouicus Azeuêdus, & Laurentius Mangonijs, Romanus cognominatus. Qui omnes, ut iam supra dixi, summo cum labore, sed fructu pari, & conseruandis catholicis, & hæreticis reducendis operam impendunt.

In quibus prius erroribus Abassini fuere, in iisdem adhuc persistere.

C A P V T XXVIII.

A Bassinos non tantum ex Hebræis damnas acceperunt cæremonias; sed etiam ex Græcis aliisque hæreticis praua dogmata & multiplices hausisse errores, atque in iis hoc maxime tempore, quando nonus auctor eorum religionem mirifice commendat pertinaciter hære, demonstrandum in præsentia est. Vtrumque eadem opera & breuiter præstabo,

bo, productis in medium erroribus, & auctoritate eorum, qui ea de re ex Abassia scripserunt, confirmatis. Ex Iudæis Circūcisionem habent, & Purificationem. Colunt sabbata. Non nisi ad vesperum sumunt cibum, cū ieiunant. Abstinēt à carnibus porcina, leporina, & suffocatæ animantis, à sanguine, & à piscibus, qui squamis carent. Plures simul habent uxores, & eas, cū lubet, repudiant. Purgatorium negant. Aiunt Spiritum sanctum à solo Patre procedere. Humanam Christi naturam æqualem asserunt diuinitati. Vnam in eodem Christo voluntatem, & vnam dumtaxat agnoscunt operationem. Repetunt Baptisma. Animas iustorum ab omni labe & pœnæ delicto exolutas nolunt in cœlum recipi ad conspectum Dei, ante Mūdi finem. Non seruant Christi de viatico præceptum. Neque peccatorum numerum, neque species confitentur, neque id putant necessarium. Humanos animos è materia educi volunt, non creari. Multi ex ipsis impudenter iactant, eos, qui Romanam sectantur doctrinam, non hæreticos tantum esse, sed Mahumetanis peiores. Reprobant Chalcedonense Concilium, quod Dioscorum cōdemnarit: solos Ethnicos & Mahumetanos credunt æterno igni addicendos. Hos ex literis eorum, tam qui superioribus annis in Abassia fuere, quàm qui modò sunt, errores collegi. Alios iisdem in eadem gente esse generatim affirmant. Sed iam aliqua in medio testimonia pono. Primum sit Gonzali Roderici Societatis sacerdotis, qui ad explorandam Preteiannis de excipiendo Patriarcha voluntatem, cum Iacobo Dias legato Goa in Abassiam profectus est. Is in quadam epistola, quam postea transcribam, ait, habuisse se cum docto quodam monacho de Christianis rebus sermonem, multosque

tòsque in eo errores deprehendisse. Inter eos Sabbati obseruantiam; abstinentiam à porcina & leporina carne; Spiritus sancti à solo Patre processionem; illud sanctarum animarum à cœlesti regno veluti exilium vsque ad mundi finem; hæresim demum illam, quæ tradit solos infideles æternùm cruciandos. Similia scribit Alfonso de Francia nobilis Lusitanus Æthiopica linguæ cum primis peritus, & in Preteianis aula diu versatus. Similia Emanuel Fernandus, & alij Societatis religiosi, qui sunt Ouiedum in Abassiam comitati; quorum literas loco postea commodiori legendas proponam. Anno sexcentesimo quarto post millesimum, nono Calédas Augusti ita in Indiam ad Goanos socios scripsit Petrus Paëz patria Castellanus, qui cæteris hodie sociis in Æthiopia præest. Abassini, inquit, in ea sunt opinione, vt credant, quatuor nos in diuinis asserere personas, quia duas in Christo naturas, duas confitemur voluntates, in quo illi naturam tantùm vnã, & vnã tantùm dicunt esse voluntatem. Asserunt à solo Patre Spiritum sanctum procedere. Purgatorium negant. Baptismum repetunt quotannis. Circumcisione vtuntur. Custodiunt Sabbata, & plures alias habent Iudæorum cæremonias. Idem Petrus ait, sæpius se cum præcipuis eorum literatis priuatim domi, bis coram Augusta, semel magna cum celebritate coram Imperatore hisce de rebus disputasse; redactos in angustias errata sua fuisse corfessos; dixisse tamen, non audere se Romanæ Ecclesiæ primatùm palàm confiteri. Addit præterea, duos se ad veritatem fidei reuocasse, quorum quilibet tres simul habebat vxores. Cùm id illis absque diuinæ legis iniuria fieri non posse, ostenderet, respondisse, ea se de te suum rogasse Abunam, & ab

eo accepisse, nulla esse prohibitum lege, plures vnum
 vxores habere; ne qua tamen per ignorantiam reli-
 gione tenerentur, liberam se ipsis ad illas habendas
 facere potestatem Ludouicus Azeuedius in quadam
 epistola, quam anno septimo huius seculi, vndecimo
 Calendas Augusti ad socios scripsit, inter alia aliò spe-
 ctantia, hæc de Abassinis adiungit. Plures ducunt v-
 xores. Non confitentur numerum, neque species pec-
 catorum, sed generatim dicunt: Peccaui, peccaui. Non
 roborantur Chrismatis sacramento; neque vicini
 morti sacro inunguntur oleo; neque demum è vitæ
 discessuri vitæ pane stabiliuntur. Antonius Fernan-
 dius ex Dambeæ regno, vrbe Gorgorra, anno sexto
 post millesimum & sexcentesium, vltimo die Iulij
 hunc in modum scribit. Hic vbi sum, aliqui Roma-
 nam fidem recipiunt. Alij agnitæ veritati nolunt ad-
 hære. Imperator hoc ipso anno ad summum Pon-
 tificem literas mittit; in iis petit, vt aliquem sacrorum
 antistitem seu Patriarcham in has oras destinet. Ad
 Catholicum etiam regem scribit, à quo petit, aliquod
 ad se mittat Lusitanorum militum præsidium, vt quod
 in votis habet, reducere Imperium suum ad fidem
 possit; rem à principibus pendere; eos, si aliter con-
 sentire nequeant, vi & armis esse adigendos: sed val-
 de vereor, vt inania Imperatoris vota reddantur; ad-
 modum enim mobili ingenio Abassini sunt, nec mul-
 tum curant, quantum oporteat serpare in promissis
 fidem. Non pauci eorum suos se testantur agnosce-
 re errores; vt eos tamen relinquant id ipsis difficilli-
 mum. Clementissimus Deus claram illis affulgeat lu-
 cem, ne miseri absque fidei cereo claudant in morte
 oculos, & ita moriantur, vt viuunt. De Imperio pæ-
 ne actum est (hos hæresis fructus parit) ex partibus
 vigin

viginti ademptæ iam Imperatori sunt ferè septemdecim. Hæc omnia Antonius. Anno rursus insequente, quarto Calendas Iulij sic idem scripsit. Sumus in Æthiopia sacerdotes ex Societate quinque. Aliqui imperatoris comitatur castris, simul vt catholicos nostros conseruemus, simul vt eorum numerum, fauente Numine, augeamus. Multi ex iis, qui à nobis fide dissident, res nostras, nostramque doctrinam miris effertur laudibus; ne eam recipiant partim deterrentur metu, partim animi duritie & obstinatione reuocantur. Multa habent Iudæorum propria, eaque Iudaico obseruant ritu. Circumcisione vtuntur; diem Sabbati festum agunt; ab iis abstinent carnibus quæ ab Iudæis habebantur immundæ; ab iis item piscibus, quibus squama non est. Aded verò his legalibus cæremoniis adherent, vt cùm euidenter agnoscant diuinam legem esse damnatas, idque etiam fateantur, abduci tamen ab iis nolint. Idem anno eodem, vigesimo die Iulij scripsit, quæ sequuntur. Imperatorem sequens magnæ huius Æthiopiæ continentem perlustro. Plurimis Abassini irretiuntur erroribus, maiorem eorum partem ex veteri hauserunt Iudæorum lege; præterea Baptisma iterant; humanam Christi naturam affirmant esse diuinitati æqualem, & hominum animas, sicuti animantium cæterarum ex parentum semine generari. De his, atque aliis ipsorum erroribus cum potissimis, quos habent, literatis sæpe conflixi; facile reliqua concessere; postrema duo de humana Christi natura, de quæ hominum animis obstinatissimè negarunt. Iterum in illa epistola, quam sapius retuli, de Æthiopicis rebus Romam missa, ita scribit. Huius Abassinæ gentis errores plurimi sunt. Inprimis in Leonem Magnum, sanctissimum Pontificem, quoddam Dio-

scorum,

scorum, quem beatum prædicant, cum Concilio damnarit, multa conferunt maledicta; grauiâque ei circa Christi naturas & operationes imponunt mendacia. Deinde præter conseruationem rerum, & miracula, si qua sunt, nihil aiunt efficere Deum; atque inde colligunt non creati, sed educi è materia formas hominum actione parentum. Multas præterea Moisaicæ sectæ seruant cæremonias: abstinent enim ab esu eorum animalium, quæ olim erant Iudæis prohibita. Purificationis legem & Sabbata custodiunt: circumcidunt masculos, & peculiari ritu etiam scæminas. Item annis singulis ipso Epiphaniæ die Baptismatis renouant lauacrum. Religionis quoque Christianæ desertores, qui ad Mosem aut Mahumetum transfugere, si redeunt, aqua rursus lustrali intingunt. Idem iis faciunt qui vel enorme suscepere facinus, vel matrimonium consummarunt, vel alicui religiosæ familie se addicunt. At contrà aded pertinaci consuetudine certum baptizandis infantibus tempus designatum est, vt ne morientes quidem ante illud expiant Baptismo. Nulla præmissa aut confessione, aut constitutione ad Eucharisticam mensam accedunt etiam illi, qui sceleratissimi esse noscuntur. Non putant esse opus, cum peccata confitentur, neque eorum numerum, neque species patefacere. Dissoluunt pro libito coniugia. Negant Purgatorium, & Spiritus sancti à Filio processionem. Afferunt ante diem Iudicij neque iustorum animas beatitudine cœlesti donari, neque animas impiorum ad Inferos detrudi, & æternis cruciatibus mancipari. Errores isti, & huiusmodi alij cõmunis omnibus sunt. Nō paucos reperio quorundā peculiare: vt enim quisque liberè credit, quod vult, ita nouit quotidie pullulant hereses, atque impunè vagantur.

Quæ argumenta pro tuenda Abassina gentis religione proposita sunt, nullam vim habere.

C A P V T X X I X .

EX iis, quæ ad Abassinorum defensionem à nouo auctore adducta sunt, quædam extra rem esse, nō pauca inania, & commentitia, satis, vt opinor, cuique cōstabit Ea tamen, ne quid, quod è re erit, prætermisum videatur, percurrā breuiter. Tale primū eius erat argumētū. Quæ ad vtramque Christi naturā pertinet, quæque Apostolico continentur Symbolo, ea Abassinos rite credere, & disertè confiteri. At certū est, nihil hoc argumentum efficere, cum sit ostensum, & grauissimis probatum testimoniis, ipsos de origine Spiritus sancti, quem nolunt à filio procedere, de humana Christi natura, quam diuinitati exæquant, de eiusdem Christi operationibus, quas esse plures negāt, de supplicio Christianorum malè vitam finientium, de animarum nostrarum productione, quam parentibus attribuunt, deque huiusmodi aliis longè aliter, quàm Romana & Catholica fides docet, sentire, & credere. Secundum erat; Nicæno, Constantinopolitano, Ephesino, Chalcedonensi Conciliis, vti quatuor Euangelis, semper Abassinos honorem habuisse; nec vmq̃ aliquid reieciisse eorum, quæ in iis fuere statuta. Seruare præterea Tridentina decreta, quæ à Pio V. Pontifice maximo per legatos suos petiit, & obtinuit Mena Imperator. Tribus primis Cōciliis aliquem Abassinos honorem deferre, facile admitto: Chalcedonense, aded

execrantur, ut nihil magis aut peius. Patebit etiam
postea ex literis Gonzali Roderici ad Goanos socios
ex Æthiopia missis. Quod de Tridentino additur à
Mena petito, & obtento ponendum est inter nugas.
Nec eius nomen apud Abasilinos notum, Et verò qui
poterat Mena, cum Romanam Ecclesiam, ut iam o-
stensum, & magis postea cum de Ouiedo ageretur, ostē-
dendum est, valde auersaretur, Tridentinas ab ea le-
ges petere, aut ultio oblitas recipere? Interfuisse A-
bassinos Cōciliis Romani Pontificis auctoritate con-
gregatis, aliud sinceræ eorum fidei argumentum fuit,
à nouo auctore propositum. Quid valeat, facile est vi-
dere. De Græcis ita licebit argumentari: Conciliis in-
terfuere Romana auctoritate celebratis; ergo schisma-
tici non sunt. Quis non videat non esse aptam conse-
cutionem? Demus Æthiopes interfuisse primum il-
lis generalibus Ecclesiæ Conciliis quæ numerata sunt.
At quo pacto in Chalcedonense fuerunt affecti? Quo
illud hodie loco habent, cum & errasse sentiant, &
multa decreuisse veræ fidei contraria, ac Leonem
magnum, quem sanctissimum Romana prædicat Ec-
clesia, inter nequissimos homines reponant? Ad Cle-
mentem V. Auenionem in Gallia, ad Florentinum
Concilium sub Eugenio IV. celebratum, ad Cle-
mentem VII. Bononiā in Italia, ex Æthiopia Abas-
sinos venisse, certum est. Nihil inde aliud habetur, nisi
quosdam eorum Imperatores cognitis erroribus, qui-
bus ea gens erat implicata, missis legatis curasse, ut
aliqua ipsi veritatis lux ab Romana sede afflueret. Id
neque ex communi omnium consensu, neque ab iis-
dem Imperatoribus constanter tentatum esse, euentus
docuit. His quoque proximis temporibus Imperato-
res fuisse, qui de Abassia ad veram fidem reducenda

ad summos Pontifices misere literas , quas ego ipse Romæ vidi. Non asserebant catholicos esse Abassinos , debitamque Romanæ sedi præstare obedientiã: imò à supremo eos capite esse diuisos , & varias cum re Christiana miscere superstitiones ; atque inde fieri, vt immensus iactati miseriarum fluctibus in exitium ruerent. Idem octo, aut nouem ante annos præstitit Sacinos, verè religionis amans Imperator, vnam ad summum Pontificem aliteram ad Catholicum Regem hac ipsa de re scribens epistolam ; qui legatos etiam ad eosdem principes misisset, quod & tunc valde optabat , & iam antè facere decreuerat, nisi iter mille esset impeditum difficultatibus. Legatio autem illa hominum vigintiquatuor, quæ ab Alexandro III. Imperatore ad Gregorium XIII. missa dicitur, tam fuit vera, quàm is ipse, qui eam misisse fingitur Alexander III. quem numquam fuisse demonstratum est. Illo quoque vsus est nouus auctor argumento, quòd Romani Pontifices nec carissimos filios solent appellare, nisi eos principes , qui Romanæ obediunt Ecclesiæ ; nec nisi iisdem vel Apostolicam impertiunt benedictionem, vel Imperij precantur felicitatem. Constat autem Pium V. in iis literis , quas ad Meniam Æthiopicum Imperatorem dedit , post naualem illam de Turca victoriam à Christiana classe repottatam, non aliter ipsum, quàm vnum ex catholicis regibus tractasse, cum & carissimum filium nunduparit , & Apostolicam ei impertierit benedictione, & Imperij felicitatem atque incrementum precatus sit. Id porro argumentum quantum valeat inde perspicui potest, quòd Paulus V. Pontifex maximus, qui Abassinos hæreticos esse, & à Romano capite præciosos certò scit, nec vllò modo ea de re dubitat, per hos dies

dies ad eorum rescribens Imperatorem, sic eum salutat, ut catholicos reges solet. Id verò optima ratione fieri, haud dubium est. Neque enim Abassini tanta pertinacia, quanta Europæi hæretici, à Romana dissident Ecclesia; & hosce Imperatores, atque vniuersum eorum Imperium ad sanam doctrinam reuocandi magna spes est; ut propterea blandis titulis, amorémque significantibus alliciendi potius ad fidei concordiam sint, quàm ab ea asperis verbis auertendi. Quòd Pontifex felicitatem, & Imperij amplificationem Abassino precatur, ut intemerata Christi religio illis in regionibus augeatur, non significat Abassinos catholicos esse, sed optat, ut sint, quo sacra Christi religio purè ac sincerè ab ipsis culta magnum indies accipiat incrementum. Aliud est noui auctoris argumentum; Abassiam habere peculiarem Romæ protectorem, quem nulla habet orbis terrarum regio, quæ Romanum Pontificem non fatetur Christi Vicarium, & summum inter Christianos sacrorum Antistitem. Detecta à nobis suprà est huius argumenti falsitas. Nul- lum enim Abassiam peculiarem Romæ habet protectorem, si quem tamen haberet, haud inferri inde aptè posset, Abassinam gentem esse catholicam, & Romanæ Ecclesiæ obedientem. Nam & Græci, & Angli protectores habent peculiare, ex quo non sequitur Græciam & Angliam cum Romana sede consentire. Illud etiam hic auctor assert, Abassinos sacerdotes, apud nos, atque in ipsa primaria religionis sede, hoc est, Romæ, non consentientibus tantùm, & approbâ- tibus, verum etiam præsentibus summis Pontificibus, more suo rem diuinam facere, inde optimè sequi, eorum gentem esse catholicam, & à Romanâ sede nequaquam disiunctam. Probare eadem ratione posset,

veram esse in Græcia fidem, cum Græci sacerdotes, qui Romæ sunt, Græco ritu sacrificent. Non ideo cum hæreticis Abassini numerantur, quod diuersos à nobis habeant ritus, diuersasque cæremonias, quæ nihil ob sunt Religioni; sed quod à fide aberrent, neque Romani Patris agnoscant imperium. Si qui erunt, qui re tentis Ecclesiæ suæ ritibus errores deponant, & summo Pontifici submissè obtemperent, ij, si ritè sint ini tiati, cur à sacris remoueantur, causa nulla erit. Quod ait, summos Pontifices Abassinis litantibus sæpe inter fuisse, dictum hominis est, vt notauī, pontificias consuetudines ignorantis, & à Romana vrbe longè remoti. Alia deinde à miraculis, à gentis sanctitate, à curâ tuendæ fidei, à sacris familiis, à religiosorum ho minum numero, ab Imperij firmitate accumulat idem auctor argumenta. Ait multa in Abassia patrari mira cula; id vbi vera religio non est, haud posse fieri. Sed quæro ab eo, quænam ista miracula sint, quorūve probentur testimoniis? à quibus item, & cuius rei cau sâ fiant, aut facta sint? Numquam profectò ostendet, si qua in Abassia edita sunt miracula, fuisse ea patrata vel ab aliquo Abassinæ religionis professore, vel ad ipsam Abassinorum religionem testandam, ab eo tē pore, quo cum Alexandrino Patriarcha Romanam obedientiam deseruere. Quæ in Abassinis monachis, qui præ cæteris sancti apud ipsos habentur, vitæ san ctimonia sit, certis postea testimoniis ostendam. Vt enim vera apud Abassinos fides non est, ita neque ve ram esse sanctitatem, certissimum. Si qui ex iis rectè viuunt, illi sunt, qui ad Catholica castra transiere. In reliquis, vt aliqua sit vmbra sanctitatis, vera sanctitas non est. Neque verò quidquam efficit, quod eorum nonnulli etiam nunc ieiuniis, vigiliis, aliisque corpo ris

ris castigationibus affligunt sese, ac macerant: hæc enim externa signa, vt Epiphanius notauit, & Euangelium innuit, in Pharisæis quoque apparebant olim, & in Indicis hodie obseruantur Ioghibus; neque in his tamen nunc est, neque in illis fuit tunc vera animi sanctitas, & quæ Deo gratum hominem efficit, Iustitia. Pharisæi quidem, quod ipsis Christus exprobrauit, inanem vulgi captabant gloriam; Ioghes verò & magna ex parte idem sibi proponunt, & ab iniquissimo animorum deluduntur hoste, prauas superstitiones hisce fallaciis commendante. Quod additur, vix vllum apud Abassinam gentem hucusque fuisse Imperatorem, qui ardore fidei non fuerit insignis, & exitia non præbuerit virtutum exempla, apertissimè falsum est. Et certè qui ita sentit, haud satis percipit, quantam, quod sæpe dixi, Apostolicæ sedi, quantam Lusitanis regibus, quantam Lusitano regno, quantam Ouiedo Patriarchæ, quantam mille aliis hominibus singulari fide, prudentia, virtute præstâtibus iniuriam faciat. Longè aliud enim horum iudicium fuit, & testificatio. Nullos esse in Abassia fidei quæsitores paulo pòst apertum fiet. Ex eo autem quòd aliquæ inibi sint religiosorum familiæ, quàm bene colligatur, veram quoque fidem esse, & Romani Pontificis obedientiam, ex Græcia discat nouus auctor, & paulisper consideret, an rectè inferri queat, catholicam fidem Græcos sectari, quoniam apud ipsos multi sunt, qui religiosam sectantur disciplinam? Vltimi argumenti, quod ab Imperij firmitate, tranquillitate, pace, felicitque vniuscuiusque Imperatoris decessu deducebatur, ex iis capiatur responsio, quæ suprâ de successione Imperatorum à me dicta sunt. Addi & ista possunt ex literis Antonij Fernandij anno sexcentesi-

mo nono post millesimum ad socios datis. In hoc, inquit, Æthiopico Imperio non aliter viuitur, quàm sub armis, & cuiusque ferè hominis vita posita in bello est; nec magis quietam, quàm reliqui, Imperator degit. Is enim annis singulis vix hyeme exacta, mox per se ac præfectos suos partim aduersus coniuratos ac rebelles, partim aduersus vicinos hostes renouat bella. Omissis præteritis tumultibus, dici vix potest quâtopere hisce duobus proximis annis omnia turbata sint. Vbi hic, qui nunc est, Imperator Imperij habenas suscepit, tres statim vel quatuor ex primoribus, regio nomine vsurpato, contra ipsum insurrexere, sed prælio victi, & profligati sunt. Hoc ipso anno, qui eius Imperij secundus est, totidem alij idem ausi facinus, in campum prodierunt. Nec à multis vsque seculis res in Æthiopia quietiores fuere. Cogimur & nos iisdem fluctuare bellorum æstibus, atque in varias partes perpetuò diuertere. Fugimus enim aliquando ad montes; in abditas interdum terræ specus abdimur; nonnumquam inaccessas ingredimur sylvas, & loca inuia penetramus, ne belli turbine abrepti ad scopulos allidamur. Infinita prope sunt, quæ in his regionibus patimur, mala; possumus non immeritò easdem illas, quas olim Apostolus Paulus, Litanias decantare. Et viderentur ista quidem perpeßu facilia, cæque æquis ferremus animis, si aliquem possemus fructum colligere, quem ex nostris laboribus offerremus Deo. Hoc eodem anno cùm Imperator hinc esset profectus, vt cum vno duce suo, qui rebellâti cuidam principi bellum inferebat, copias coniungeret, repentè ad castra delatum est, prope esse Galas, Castrum gentem immanissimam, quam vulgo ferunt ab dæmoniis genitam. Centum pæne anni sunt, cùm hi ab agris syluisque

uisque egressi (pastoritiam enim agebant vitam) ex-
 cussu Æthiopum, quibus suberant, iugo eam armis
 acquisuere potentiam, ut modò non solùm terrori
 omnibus sint, verumetiam partem Æthiopiæ ferè
 duodecimam occupent. Fama est, à Patriarcha Ber-
 mudio hæc Galatrum strages fuisse prædictas, dum
 sapius inter sacrificandum ex improviso diceret, vi-
 dere se miseram Æthiopiam, ob ingentia gētis ipsius
 peccata à nigris canibus crudeliter dilaniari. His ergo
 venientibus cum exercitu obuiam prædiit Impera-
 tor, sed fusus ab ipsis fugatusque est; nec multum ab-
 fuit, quin totum Imperium penitus rueret. Hominem
 conueniebant, ut aliquod, si possem, afflicto animo
 afferrem leuamentum; sed ipse collectis raptim no-
 uis militibus in victores derepente irruit, iisque pro-
 fligatis perditâ recuperauit. Aliquot post hanc victo-
 riam dies ipsum adij, sūmque ab ipso honorificè &
 beneuolè exceptus. Erga rem Romanam egregiè se
 affectum præbet. Deus illum cœlesti perfundat luce.
 Hæc omnia Antonius. Huius generis ex aliorum Pa-
 trum literis afferre possem multa, quæ consultò præ-
 tereo.

*Neque Abassinorum errores aptè excusari, neque
 eorum fidem auctorum testimoniis
 rectè probari.*

CAPVT XXX.

EOs tantum errores conatus est nouus auctor ex-
 culare, quos Abassini è turbidis Hebræorum fon-
 tibus

tibus hausere. Negauit reliquos, quoniam quo pacto excusari possent, non inuenit; ac proinde asseruit, ritè ipsos ac rectè credere, & confiteri omnia quæ tum explicatè, tum inuolutè Apostolico docentur in Symbolo. Ego ostendi, quod iterum repeto, eos de augustissimo diuinæ Triadis mysteriò, de Christo, de sacramentis, de sempiternæ felicitatis præmio, de æternis malorum hominum suppliciis, de purgatorio, de natura animi humani, deque aliis de decreis pessimè sentire: cum asserant, non produci à Filio Spiritum sanctum; vnam tantum in Christo esse naturam, eamque diuinitati æqualem, vnam tantum operationem; nosque vocent hæreticos, quasi duas in eo asseramus personas, quia duas confitemur naturas, duas agnoscimus operationes; cum ab hac vita in alteram transcuntēs cœlesti pabulo non roborentur; cum neque peccatorum numerum, neque species explicent confessori; cum plures quisque ducat vxores, easque prohibito repudiet; cum post hanc vitam nullam esse dicant animarum purgationem; cum negent malos Christianos apud interos æternum puniendos; cum beatitudinis ingressu ad extremi vsque iudicij diem animas arceant hominum sanctorum, quæ prorsus mundæ sunt, nec vllius pœnæ debito obnoxia; cum putent animas nostras posse natura sua corrumpi dū eas, sicut animalium cæterorum, parentum opera educi dicant è materia. His Abassinos hoc tempore erroribus inuolui, quantum satis est, palàm feci. Quod ad Iudicium attinet superstitiones, nouus auctor ait, Abassinos à Romano Pontifice monitos, ne illas vsurparent, illicò abieciisse, nec iterasse amplius; quod falsum esse probatum est, nec repeto probationes. Adhuc enim in iisdem perseuerant, cum non solum sæ-

pe audierint ab Apostolo dictum, *Ecce ego Paulus dico vobis, quoniam si circumcidamini, Christus vobis nihil proderit; sed rectè sciant Mosaicas cæremonias fuisse à Christo abrogatas. Itaque licèt aliquando, siue ex ignorantia, siue quo alio fine legalia ista sic obseruarint, vt habere aliquam facti sui excusationem possent; multis tamen abhinc annis optimè norunt, Romanæ Ecclesiæ esse contrarias, & diuino Christi præcepto prohiberi. Quàm rectè idem auctor affirmet Christianum hominem, vt Christum imitetur, qui circūcisionis dolorem ac notam nostra causa subiit, posse nunc absque scelere circūcisione vti; posse item fœminas, quæ peperere, ob honorem Virginis Deiparæ vti purificatione; posse quoque à Christi cultoribus ob conditi orbis beneficium licitè seruari Sabbatum, quo die ab eiusdem orbis conditione dicitur Deus requieuisse; posse denique alias Mosaicæ legis vsurpari cæremonias, dummodo animus absit, vt dicitur, legalis, discutiant alij; ego hîc scholasticas disputationes non edissero. Scire tamen ab eo velim, quodnam hoc imitationis genus sit, vt quis alieno vulnere & dolore similem se patienti Christo præbeat? Si Abassini Christum multa propter nos mala passum cupiant imitari, à feriendis filiis manus abstineant; illa præstent (prope enim infinita sunt) quæ nullum religioni incommodum, nullam veris Christianis parere queant offensionem: illa demum abii-ciant, quæ à Indaicis vel Mahumetanis fontibus videntur deriuata. Nec opus est de his plura dicere. Nihil etiam efficiunt testimonia scriptorū, qui pro Abassinorum defensione adducti sunt. Quidam enim ex iis solūm asserūt. Abassinos esse Christianos, quod nos inficias non imus: siquidem sacra vnda perfusi*

M 5 sunt.

sunt, & Christi religionem profitentur. Quamquam ea ratione vel semiudæi possunt dici, vel semichristiani, quod Mosaicis ritus cum Christianis sacris ita misceant, ut dubitari iure queat, magis ne antiquam Moysi, an nouam Christi sequantur legem. Auctores alij, quod initio dixi, ab iisdem Abassinis decepti sunt. Alij cum scirent eorum aliquos Clementi V. Avenione, Eugenio IV. in Florentino Concilio, Clementi VII. Bononiæ obsequium & obedientiam præstitisse, nec aliud per ea tempora de ipsis audierint, facile existimare potuerunt perseverasse in proposito, & quam tunc per eos legatos professi sunt Romanam fidem, deinceps retinuisse. Hac verò tempestate, rebus planè perspectis, aliter sentire necesse est. Idem quod scriptores illi de Abassinis possent quoque post Florentinum Concilium de Græcis existimare, nisi loci propinquitas, & frequens eius gentis ad hæc loca concursus palàm fecisset, fregisse eos fidem in dicto Concilio Romanæ Ecclesiæ datam, & ad mores pristinos rediisse. Alij demum auctores, quæ de Abassinis reperere ab antiquioribus scripta, nullo veritatis facti examine, in suos ea libros transtulere, in quibus ob hanc causam in omni rerum genere errores magni sunt, quos quivis hoc tempore in hisce gētiū historiis mediocriter versatus, facile deprehendet. Qui tamen disertè pronuntiarint, numquam Abassinos rectam fidem, & Romanæ sedis Imperium reliquisse, paucissimi sunt, nec multum referret, si plures essent, cum notissimum sit, fuisse deceptos. Illud etiam debet observari, quosdam Abassinorum Imperatores optimè potuisse verè Christianos & catholicos appellari, quod & nouerint, confessique sint Romanæ Ecclesiæ principatum, & valde labora-

rint,

rint, ut Iudaicis superstitionibus, cæterisque erroribus ex imperio depulsis ad sinceram Christi fidem populos suos reducerent. Talis ille fuit, qui ad Clementem V. & is, qui ad Florentinum Concilium diuersis temporibus legatos misere. Talis David Claudij pater annis superioribus. Talis his proximis Sacinos, qui de recipienda Romana fide cum suis sæpe consultauit, literasque eadem de re ad summum Pontificem misit, ac de legato mittendo sollicitè cogitabat. Quàm verò absurdum sit, ex his inferre, Abassinos in Ecclesiæ Romanæ fide & obedientia viuere, nemo non videt. Nam ex iis Constantinopolitanis Patriarchis, qui nobis tempore fuere proximi, de rebus fidei, & Romana sede aliqui putantur rectè sensisse, non proinde quisquam Græcos esse catholicos, & Romano Pontifici obedientes, nisi perperam colliget. Præterea qui nunc est Babylonicus Patriarcha Romanum agnoscit principatum; nec ita pridem legatum misit in Urbem, nomine Adamum, sancti Pachomij per illas regiones Abbatem generalem, qui de Babyloniis Romanæ sedis subiiciendis ageret cum Pontifice. Egit diu, nunc de rebus fidei aptè instructus remittitur ad suos: adiunguntque ipsi à Pontifice sunt Ioannes Antonius Maricetus, & Petrus Metoscita Societatis Iesu presbyteri, prudentes viri, & docti, ut in Babylonica Ecclesia reducenda omnes animi & corporis vires intendant. Speramus fore, ut ex sententia expeditio succedat. Quis verò hinc scitè arguat, Babylonicam gentem esse catholicam? Damus ergo aliquos Abassinorum Imperatores, agnita fidei veritate, conatos esse gentem suam Romanæ Ecclesiæ subdere: dicimus non nisi inscitè inde colligi, Abassinos nobiscum in fide consentire, numquàmque ab eadem desciuisse. Constanter

stanter etiam negamus, villo firmo alicuius scriptoris testimonio eorum religionē probari. Quod de Abassinorum collegiis, Romano, & Olisponensi nouus auctor adiungit, satis ostendit, quàm sint inania cætera, quæ dicit, & indigna fide. Nihil enim Abassini Romæ habent, quod vel collegium sit, vel eo nomine censeri queat; nisi more loquamur Iurisperitorum, dum aiunt sufficere tres, vt collegium faciant. Exigua illis, & ignota in Vaticano colle ædícula est. Ibi hoc tempore tres quatuorve degunt, atque ita sunt, ac si non essent. Cùm Iouius viuebat, per occasionem legationis ad Clementem VII. ex Abassia missæ, plures eò conuenere; & animus forte Pontificibus erat, aliquot ex ea gente Romæ alere, fidèique doctrina instituere, vt ad suos postea reuersi, esse possent Religioni vtilis; quemadmodum propriis in collegiis Scoti, Angli, Græci, aliique aluntur. At multis iam abhinc annis sic abolita est in Vrbe Abassinorum memoria, vt paucos reperias, qui sciant, an vlli Romæ Abassini sint. Ego homines multos in ea natos & educatos de Abassinorum collegio dedita opera rogaui, rem ab se nouam quæri confessi sunt. Ecce celeberrimum illud Abassinorum in Vrbe collegium, quod à sancto Stephano Indorum habere nomē dicitur. Tale illud aliud est, quod esse fingitur Olisipone, vbi Æthiopes isti ne ædiculam quidem propriam habent Romanæ similem. Iam verò quod nouus auctor ait, habere Abassinos Vaticanæ bibliothecæ clauim vnā, esseque, vt vocat, Linguarum Chaldaicæ, Arabicæ, Syriacæ, Ægyptiæ bibliothecarios, multosque ad eorum collegium Cardinales, aliósque illustres viros ite solitos, varias vt linguas ab iis discant, & quædam talia, quæ scribit, aded non modò falsa, verumetiam

ridicu

ridicula sunt, ut nihil magis. Illustrissimus Cardinalis Bellarminus, qui solus ex iis, quos auctor nominat, superstes est, hac de re quaesitus, nullam se umquam ab istis Æthiopibus linguam didicisse, nec discere voluisse affirmavit. Idem absque dubio affirmassent alij, si viverent & essent rogati. Nec scio, quænam ista sit linguarum peritia, quæ tanta ab hoc auctore in Abassinis esse dicitur: ne ipsi quidem eam se habere sciunt.

Commentitias esse causas, ex quibus orta fingitur deserta Religionis in Abassinis infamia.

CAPUT XXXI.

UT ab hæresis nota Abassini liberarentur, nihil afferri poterat vel absurdius, vel ineptius, quàm quòd hunc in finem novus auctor excogitavit, aut ab alio fictum credidit, & approbavit. Quæ assumuntur, ut faciant fidem, & si reipsa falsa sint, probabilia tamen, aut probabilibus proxima videri debent: quod enim simile vero non est, ad probandum aptum esse non potest. Ait in primis anno Christi millesimo quingentesimo quinquagesimo homines plusquam trecentos ex Lusitania in Abassiam profectos, eosque ibi pro Lusitanis & Christianis habitos peramanter fuisse ab Æthiopibus exceptos. At cum non tantum origine, sed etiam secta Hebræi essent, facile animos suos pravis infectos opinionibus aperuisse. Delatum id ad Patres prædicatores hæreticæ censores pravitatis, eorum iussu statim missos, qui perfidos comprehenderent, & in vincula conicerent. Cumque abesset parum, quin id

id fieret, eos recognita, (incertum cuius monitu) mox ex Abassia clanculum discessisse, & in alias regiones commigrasse, Bonam eorum partem appulisse Goam, ibique de Abassinorum erroribus, deque Patriarchæ Ouiedi laboribus tam falsò, quàm perfidè plurima narrasse; quæ vulgo credita non per Indiam tantùm, sed etiam per Europam latè sparsa, summâ innocentibus infamiam peperere. Inde factum, vt Lusitanus Rex de auocando Ouiedo cum Pontifice egerit, & Pontifex regis rogatu in Æthiopiam diploma miserit, quo eundem Ouiedum ad Sinas, vel Iaponios destinavit. Hanc igitur fuisse causam, cur Abassini apud Indos, & Europæos inter hæreticos ac schismaticos haberi cœperint, cum neque à fide, neque à Romana obedientia ymquam defecerint. En causa præcipua, multa continens, de quibus singulatim, sed breuiter, dicendum. Quæritur ergo ab hoc auctore primùm, quo erant de genere trecenti illi Hebræi, quos è Lusitania in Abassiam profectos scribit? Eorum ne de numero, qui Moisaicam legem publicè profitentur, cuiusmodi sunt, qui Romæ, qui Florentiæ, qui in aliis Christianorum locis viuere permittuntur; an ex iis, qui cum animò Iudæi sint, Christum foris simulant, cuiusmodi in Hispania non pauci. Priori quidem de genere esse non poterant, cum in Lusitania nulli sint, vt nemini ignotum. Dicet, ex posteriori fuisse. Iam ergo rursum quæritur, palàmne & apertè, scientibusque & consentientibus magistratibus, an transfugarum more clanculum & occultè è Lusitania fuerint egressi. Vtrumque creditu difficile. Primùm quia prorsus est improbabile, Christianos & catholicos magistratus passos fuisse, vt qui Religioni Christianæ Baptismi iure erant adstricti, aliò tenderent, vbi cum
sum

summa eiusdem Religionis iniuria liberè viuerent? Alterum, quia non apparet, quo nam modo tanta hominum multitudo posset clanculum è regno fugere, cum vix vnus hoc de genere inde fugiat, qui non statim capiatur. Quo enim è portu tam occultè soluere poterant, marisque & arcium fallere custodias? Cur deinde in Abassiam, vt inter Æthiopes, atque in ardentissimis regionibus habitarent, non aliò potiùs abiere, vbi mitiore cœli solique temperie, & politioris gētis vterentur consuetudine, quò possent etiam breuiori maris traiectu faciliùs ac tutiùs peruenire? Præterea si cognita ab Æthiopibus eorum perfidia est, ac tantopere curatum, vt caperentur, qui fieri potuit vt ne vno quidem capto tam facile omnes euaderent? Si fugientes ab Lusitania recesserant, cur pars eorum maxima Goam se contulit; vbi nulla ratione occultari poterant, eratque certum, extrema passuros? Quis nõ videat, quàm malè ista cohæreant? Sicut igitur est incredibile, tantam ac talem hominum multitudinem siue scientibus siue insciis magistratibus excedere regno potuisse; ita omnino est verum, numquam excessisse. Tandem cùm nulla Dominicanorum patrum cœnobìa in Abassia sint, vt paulo pòst dicam, nulli hæreticæ prauitatis censores, ecquinam illi fuere, apud quos obstupefacta Æthiopia Hebræorum perfidiam incusauit? Sed paulo apertiùs propositam fabulam euoluamus. Ait nouus auctor, suos illos Hebræos anno Christi millesimo quingentesimo quinquagesimo quinto Abassiam adiisse, atque intra paucos dies cognitos arripuisse fugam; qui Goam petiere, inter cætera falsò sparsisse, Oniedum pessimè in Æthiopia tractari, millèque laboribus atque ærumnis miserè consumi; quæ causa fuerit, vt Sebastianus Rex de illo

inde

inde auocando, & ad Sinas vel Iaponios mittendo cū Pontifice egerit. En patefacta fabula. Quo anno ficti illi Hebræi Abassiam dicūtur ingressi, & ab ea subito egressi, nondum ibi Andreas erat, cū duobus post annis illuc ex India peruenerit. Qua igitur ratione poterant illi transfugæ Goanis dicere, malè Andream ab Æthiopibus tractari, quem scirent apud Æthiopes non esse, & utrū aliquando esset futurus, prorsus ignorarent? Ab eo autem tempore, quo Abassiam cū sociis ingressus est Ouiedus, vsque ad hanc diem nullam eò Lusitanorum adiisse multitudinem, comperitissimum est. Anno quidem millesimo quingentesimo quadagesimo primo Lusitani quadringenti Christophoro Gama præfecto ex Goana urbe ab Indico prætore fuerant in Æthiopiam missi, ut Imperatori Claudio contra Zeilæ regem secta Mahumetanum militanti suppetias ferrent. Ex illis plerique variis in præliis occubuerunt pugnando; pauci in Indiam redierunt, reliqui ductis in Abassia vxoribus vitam ibi vsque ad obitum traduxere. Relicti ab iis posteri sunt, paternarum rerum, & catholicæ fidei hæredes, quos defuncto Claudio, successor Imperij. Adamas crudeliter est persecutus, non quòd Hebræi essent, sed quòd à Romana disciplina à parentibus accepta nollent deficere. Quæ deinde nouus auctor adiungit, de Collegio sancti Stephani, ex quo ab reliquis collegis vnū, ait, delectum, qui in Abassiam nuntiatum iret Imperatori, ortam apud Europæos suæ gentis infamiam; & de ipso Imperatore Mena grauitè apud summum Pontificem de illata sibi ac suis iniuria per literas querente, & Tridentinum Concilium flagitante; quæ item de magni Senatus consiliariis ad Pontificem, & Cardinales, eadem de re scribentibus; de ingressu in

Abassiam Lusitanis prohibito, nisi Olisiponensium Goanorumque sacrae fidei quaesitorum deferant testimonia, & huiusmodi alia, quae cum illo de Hebraeis commento miscet, non habeo necesse seriò refellere; satis constat, fabulas esse, multòque postea constabit apertiùs. Interim scitum volo, Menam illum, qui, ut antea dictum, Adamas dictus est, fuisse acerrimum Romanae Ecclesiae hostem, nullumque cum Apostolica sede habuisse, aut habere voluisse commercium: quatuor item antè annis cessisse è vita, quàm pontificium diploma, quo ad loca alia Ouiedus destinabatur, fuisset in Abassia receptum. Obiit enim anno millesimo quingentesimo sexagesimo tertio; diploma verò quatuor post annis ad Aethiopiam peruenit. Denique rectè monent sapientes, qui multa facile & sine consilio dicit, polleere memoria debere, ne loquatur pugnantia. Afferuerat auctor iste, Alexandrum III. quem vult fuisse in Imperio Menae successorem, Ouiedi suasu Latinum instituisse Senatum; at Mena, ut idem auctor ait, ad Pontificem de Ouiedo scribens, non solum negat malè in Abassia Ouiedum tractari, sed affirmat optimo apud se haberi loco, cum Latino Senatui praefectus sit. Itaque iam Latinus ille Senatus erat, eique praerat Ouiedus, antequam esset institutus. Hæc sunt auctoris huius miracula, efficit ut sint, quæ non sunt, & facta iam sint, quæ nondum sunt inchoata. Atque hæc de prima ac potissima causa, ex qua circa res fidei orta fingitur in Abassinos infamia. De altera, quam peperisse dicitur locorum ignoratio, nihil est, quod dicam. Haud dubitari potest, quin scriptores ij, qui Aethiopes schismaticos esse dicunt, non alios Aethiopum populos, quàm Abassinos designent. Quæ de geographicis dimen-

sionibus, de quæ variis Æthiopiæ acceptionibus nouus
 auctor tradit, iure potuisset omittere, cum in isto ma-
 thematico puluere parum videatur exercitatus. De
 tertia causa, quæ dicitur in falso vulgi rumore consi-
 stere, non nihil dicendum est. Ait nouus auctor conti-
 gisse Abassinis, quod Armeniis, Iacobitis, Maronitis,
 Nestorianis, & gentibus aliis Christi fidem profiten-
 tibus, quæ quoddam ab Vrbe longè absint, nec suas ad
 eam causas deferant, vulgi opinione à Romana Ec-
 clesia creduntur diuisæ, cum re ipsa non sint. Deinde
 varios earumdem gentium Patriarchas diuersis tem-
 poribus Pontifici Romano, vt superiori, suum detu-
 lisse obsequium. Præterea, eosdem, quos recensui, po-
 pulos legatis, literis, modisque aliis Romanæ sedis au-
 thoritatem sæpe fuisse confessos. Ruthenos demum,
 & Moscouitas non ita pridem, abiuratis coram Cle-
 mente VIII. Græcorum erroribus, ad sinceram ma-
 iorum suorum fidem rediisse. Quod de Patriarchis qui-
 busdam asserit, libenter admitto. Verum quoque est
 Clementis VIII. tempore aliquot ex Ruthenis &
 Moscouitis Romam venisse, vt de illis populis ad re-
 ctam fidem reducendis cum Pontifice agerent. Imò
 de eadem re eiusdem Pontificis iussu coacta. in Litua-
 nia est Brestensis synodus, in qua quid actum sit, apud
 Thomã à Iesu copiosè leges. Hoc certum, adhuc Ru-
 thenos & Moscouitas à Romana Ecclesia dissidere;
 atque inde volo colligatur, quod dixeram suprâ, non
 propterea credendum esse, Abassinos Romanam sus-
 cepisse religionem, quoddam aliqui eorum Imperatores
 eam profelsi sint, suosque ad eam pertrahere curaue-
 rint. Etsi enim aliqui ex his Christianis, qui à nouo
 auctore catholici, & Apostolico imperio obedientes
 prædicantur, priuatim tales sint, gentem tamen vni-
 uersam

uersam à Romana sede esse communiter alienam, non est in dubiis ponendum. Armeniorum pars magna recta fide caret. Iacobitæ, Nestoriani, Georgiani, eiusdem generis alij vniuersim schismatici sunt, & variis inuoluti erroribus, quamquam inter istos aliqui reperiantur, qui veritatem agnoscant, & priuatim teneant. Ex quo tam absurdè infertur, gentem vniuersam colere Romanam fidem, quàm si ex eo, quòd inter Anglos & Græcos non pauci sunt egregiè catholici, inferre quis vellet, Angliam & Græciam sub Romani Pontificis obedientia veram Christi religionem sectari. Quod tandem de Græcis Genebrardus scribit, solere ipsos hæresis notam catholicis per calumniam inurere, verum ne, an falsum sit, non curo. Abassinos esse hæreticos, & à Romano capite præcisos, etsi nihil ea de re Græci dicant, certissimum est. Sed iam ad reliqua.

Sintne ulli in Abassia sacrorum Antistites.

C A P V T XXXII.

TRadiderunt aliqui, centum viginti septem in Abassia esse Archiepiscopos; unicuique eorum viginti subiici Episcopos, Suffraganeos appellât. Hoc falsum est, verissimum est, & statim constabit. Nouus ille auctor affirmat, Preteiannem data sibi ab Eugenio I V. & à sequentibus Pontificibus facultate, creare posse Patriarchas, Archiepiscopos, & Episcopos, quos sui supremi Senatus consiliarios constituat. Hos & patriarchalibus & pontificiis ornari titulis, vt præter nudos titulos nihil aliud in consecratione accipe-

re: neque enim aut ullus diœcesis appellationem, aut ullam habere curam animarum. Solitos primùm fuisse quibusdam indui vestimentis malè compositis, & ad pontificiam dignitatem parum aptis; sed Gregorium XIII. constitutione sanxisse, ut habitu vterentur, quali Romæ & in Latina Ecclesia uti Episcopi consueſcunt; Ioannem Balthasarem Abassinum diploma Gregorianum in Abassiam portasse. Hæc ille, quæ ficta esse, perspicuum est. Vbi vñquam auditum, ullum Patriarcham aut Episcopum esse, qui nullius loci Patriarcha, aut Episcopus sit? Quos titulares vocant, non quòd loco, sed quòd administratione careant, tales dicuntur, ut nemini ignotum. At Patriarchæ isti & Episcopi quemadmodum ficti sunt, ita nullius loci pastores sunt. Ait deinde idem auctor in vniuerso Imperio duodecim esse Archiepiscopos, septuaginta duos Episcopos, atque hunc vtrorumque numerum ab ipso Christianæ Religionis exordio firmum hucusque & constantem perstitisse, neque Abassinos vñquam passos, ut vel plures essent, vel pauciores, semper ut Apostolorum ac discipulorum Christi memoria eo numero retento apud ipsos vigeret. In quolibet cathedrali, ut vocant, Ecclesia duodecim tantum esse canonicos, Abassino idiomate Debeteras appellatos; eum esse ab Episcopo secundum, quem lingua sua nominant Nobretem, quasi dicas Decanum. Hos habere statuta, & more viuere regularium, simul cum Episcopo, vel Archiepiscopo in eodem communi triclinio & communi mensa cibum sumere. Ætatis prærogatiua ab dignitate euehi. Cùm enim aliquis ex canonicis diem obit, in eius locum suffici sacerdotē, qui in ea vrbe, penes quam tunc eligendi ius est, cæteris antiquitate præit: canonicorum enim electionem

ad vires dicecesis vicissim pertinere, ac modò vnam, modò aliã decedenti canonico subrogare solitam quẽ tũc habet sacerdotem cæteris anteriorem. Episcoporũ electiones ita fieri Archiepiscopo mortuo ex iis Episcopis, qui illi subdebantur, antiquiorem succedere: mortuo Episcopo ex eius canonicis eum similiter substitui, qui reliquos superat antiquitate: qui autem inter Archiepiscopos tempore est prior, eum Clementis VII. & Pauli III. auctoritate esse in Æthiopia nuntium Apostolicum, & summi Pontificis gerere vices. Ad hunc spectare Episcoporum & canonicorum electiones habere ratas; patentẽsque electis dare confirmationis literas. Hos antistites semel tantũ annis senis diceceses suas lustrare. Archiepiscopos ex metropolitanis vrbibus, quas incolunt, numquam egredi, cũ nullas alibi habeant oues: singulos verò Episcopos varias peragrarẽ ciuitates, cũ singuli multis sint præfecti. Talem ait hac in re seruari modum. Cũ ad dicecesim lustrandam Episcopus proficiscitur, prætor ipsius familiares ac domesticos, à collegio Canonicoꝝ duo Canonici, ab vrbe metropoli viginti nobiles, à militari Abbate sancti Antonij, qui ea est in vrbe, ex qua discedit Episcopus, viginti equites ad comitatum ipsi assignantur. Hac stipatus hominum cæterua in viam se dat. Vbi propinquat loco, quem it inuisum, quotquot ibi Ecclesiastici, & patritij ordinis sunt cum famulis & ingenti alia hominum multitudine obuiam exeunt venienti. Episcopus cũ suis cæterisque, quos in comitatu habet, erectis ante vrbem recipitur tentoriis, quanto opus est tempore, vt quẽ recognoscat. Interim ipsi & comitibus quæ ad victum pertinent, abundantissimẽ suppeditantur. Ecclesiastici vrbis illius, ad quam deuẽtum, expensis suis

Episcopo & canonicis comitantibus, atque horum & illius familiaribus ministrant necessaria. Urbis eiusdem nobiles idem præstant nobilibus Episcopi sociis. Cœnobium denique S. Antonij, quod eadem in vrbe est, ordinis sui equites cum Episcopo venientes suis alunt sumptibus. Ingreditur quidem Episcopus in urbem, dum & templa inuisit, & inquit in incolas: cum tamen aut sumendus cibus, aut quiescendum est, ad papilionem reuerti. Archiepiscopos ait bis annis singulis, primò ad ferias Pentecostes, iterum sexto Idus Octobris provincialium Episcoporum ac parochorum conuocare Concilia, vt quæ videbuntur ad rectam Ecclesiæ administrationem conducere, in comune constituent. Hæc omnia & huiusmodi plura nouus auctor, quæ ficta haud dubiè sunt, & inania. Vnum habent Abassini, qui aliquo modo sacris præest; Abuna dicitur, idest, Pater; nomine alio Macus appellatur. Penes Alexandrinum Patriarcham eius electio & creatio est. Monachis & clericis confert ordines; vix præstat aliud, in quo vllam in ipsos videatur habere potestatem. Præter societatis religiosos in Æthiopia degentes, qui hoc sæpius scripsere, testis est Ioannes à Sanctis Dominicani professor instituti, què suprà laudauì. Is in octauo capite libri quarti operis sui ista scribit. Qui Sacrorum est in his locis præses, ab Alexandrino mittitur Patriarcha. Præter hunc nemo alius munera exercet Pontificalia. Abuna ab incolis vocatur; monachis & clericis confert ordines. Cùm defungitur vita, ab eodem Patriarcha deposcitur alius, qui defuncto succedat. Hæc ille. Testes etiam rei eiusdem sunt Abassini, qui Romæ, qui Olisipone, quique alibi apud nos reperiuntur, veritatis amatores. Omnes firmissimè asseuerant non esse in Abassia, qui

diœceses

diocesenes lustrat, qui in aliorum mores Ecclesiastica potestate inquirat, aut eorum peccata puniat, qui quo quisque modo viuat, quidquam ad se pertinere arbitretur. Falsum quoque est, & ab ipsis Æthiopicis reprobatur, quod nouus auctor ait; Abunam Hierosolymis eligi à religiosis Abassinis ibi cōmorantibus; electionem deinde ad Alexandrinum Patriarcham mitti, vt eam prius examinatam auctoritate sua confirmet. Integra enim, vt dixi, penes Patriarcham electio est: is quem vult, mittit; nec is, quem mittit, vmquam reiiicitur. Falsum item, quod asserit, Abunam, idem quodammodo esse, ac visitatorem; officio enim & significationi Abunæ ea interpretatio repugnat, quod Abassini, atque externi, qui linguam callent, aperte testantur.

Sintne vlla apud Abassinos religionum familia.

C A P V T XXXIII.

VT in templis ædificandis, ita in religiosis familiis erigendis, atque instituendis Abassinorum principum celebratur pietas. Multa dicuntur sacris hominum cœtibus fundasse cœnobja, iisque copiosos ex suis facultatibus assignasse redditus, quibus laudè & liberaliter, quantum ordinis ferret condicio, alerentur. Aijunt cœnobja ferè omnia, vel in altissimis rupibus, vel in profundissimis esse cōstructa vallibus, ipsoque situ iudicare, quantum à secularium hominum consortio remoti esse religiosi debeant, quorum munus sit, & cœlestia, xpi soli propinquiora respicere, & æternas Inferorum miseras assidua contēplatione per-

scrutari; vt hinc suppliciis deterriti, illinc allecti præmiis rectum semper teneant virtutis iter. Nouus auctor scribit in Anconæ prouinciâ vnum esse cœnobium, vbi separatis in locis, ac prorsus discretis monachi simul & moniales degant; quod ait, consuetum olim fuisse tota in Græcia, in qua sancti Basilij monasteria vna ex parte viros, ex altera continebant scēminas; hodiēque in sanctę Brigittę cœnobiis idem obseruari. Hanc verò Anconitanam vtriusque sexus domum Æthiopica lingua nomen habere Iconoamecalēm, hoc est, Deus prouidet. Totam simul ædem cum templo, quod est per amplum, & in modum crucis cōformatum, eūque cæteris, quæ ad fabricam pertinent, in sola vna esse excisam rupe, supra quam ingenti aquarum copia decurrit amnis. Hoc commune virorum & scēminarum cœnobium, si quod est, suspicor haud esse ab eo diuersum, de quo ex literis Gōzali Roderici altero libro dicam. In eo vt Gonzalus scribit, licet in parte vna monachi, in altera essent moniales, locis distinctis; non erat tamen tanta inter ipsos diuisio, quin ex tali vicinitate noua soboles pulularet. Quænam hæc sit Anconitana prouincia, atque hoc monasterium, si ab illo est diuersum, mihi ignotum est: auctor enim iste, quemadmodum alia, sic & prouincias & regna pro suo fingit arbitrato. Sed primum ab eo quæramus, vbi legerit, per totam olim Græciam in iisdem sancti Basilij monasteriis viros simul & scēminas fuisse, eo modo quo nunc ait esse in illo suo Anconitano cœnobio? Risere quidam Græci veterum & recentiorum Græcæ morum peritissimi, cū hac de re essent rogati. Monialium quidem monasteria, quæ sub monachorum administratione sunt, aliquos habere eiusdem professionis viros,

separa

separatis domiciliis, qui sint à confessionibus, qui mini lrent sacra, qui res monasteriorum curent; id non fuit olim sancti Basilij monasteriis peculiare; sed & olim, & nunc in omnibus Christianorum prouinciis frequentissimum. Nec aptè inde inferas, monasteria in Hispania esse, separatis quamquam domiciliis, viris & fœminis communia. Quæramus deinde, vbi nam gentium sint illa, quæ memorat, sanctæ Brigittæ cœnobiaz? Quæsitæ à nobis per totam Europam diligenter, nusquam tamen reperta; non in Italia, non in Gallia, non in Hispania, non in Germania, non in Polonia, eiusque prouinciis, non in Britania, non etiam, vbi maximè possent esse, in Suetia, in Gothia, in Dania, non in alia orbis parte. Et verò quamuis aliquando absque incommodo id fieri potuerit, quod auctor iste non solum defendere, sed etiam laudare videtur; non dubium, quin hoc tempore in Ecclesia neque vsitatum sit, neque probatum. Quid Antonius hac de re scripserit, paulo post referam. Plerosque religiosorum cœtus sub magni Antonij nomine in Abassia viuere haud est ambiguum. Dubitatum scio, an ordines alij sint. Apud aliquos legi, canonicos esse, quorum sub cura & administratione sunt templa maxima: eos certis sub statutis viuere, vt apud nos, qui Regulares Canonici nuncupantur. Nihil ausim de his asserere, quia nihil mihi certum. An canonici huiusmodi aliquando in Abassia fuerint, dubitari potest; modò non esse, magis credo, quia nulla de his in literis nostrorum mentio. Scribit idem auctor, multos illic esse religiosorum ordines modo viuendi & professione diuersos. Esse Anachoretas, quorum institutor quidam extiterit Æthiops, vir sanctus, Moses nomine, ex nequissimo nebulone in sanctissimum virum commu-

tatus: alios, qui Paulum primum Eremitam; alios, qui Hilarionem; alios, qui Macarium; alios, qui Onuphrium sui instituti sequantur ducem. Ex vnoquoque anachoretarum genere in desertis illis Æthiopiæ saltibus innumeros esse greges, partim per agros sub aperto vagantes cælo, partim abditos specus & latebras sub terra habitantes, partim sylvestribus tuguriis à temporum iniuriis corpora tuentes, partim denique cœnobitarum more in communi quadam vitæ societate, nullis tamen obstrictos votorum laqueis, degentes. Nullum hisce eremitis peculiare esse indumenti genus; liberum cuique, quibus velit, uti vestibus. Plerosque pellibus aut coriis, paucos gossipinis tegi amiculis crocei coloris. Nonnullos inter eos esse sacerdotij exornatos dignitate, qui sacra cæteris ministrant. Reperiri aliquos sub Augustini vexillo militantes, sed hos, & paucos esse, & egenos, & Eremitarum more deserta loca incolere. Eorum apud Abassinos originem idem auctor ita ferè narrat. Superioribus inquit, annis ex Thebaide, Ægypti regione, quæ est Æthiopiæ contermina, magna hominum vis exiit, vitam ab omni humano consortio separatam sub Augustini nomine ducentium. Hi multarum hæresum corrupti erant erroribus, quippe qui dicerent, neque Spiritum sanctum procedere à Filio; neque vllum esse in mundo purgatorij locum; neque vllam crucem præter illam ipsam, cui affixus Christus fuit, esse adorandam; neque defunctorum animas ab omni peccati labe puras nullique obnoxias pœnæ ante extremi iudicii diem videre Deum; neque Romanam Ecclesiam reliquarum esse Ecclesiarum matrem, & magistram; multaque alia impiè crederent à vera religione dissidentia, eaque Abassinis inculcarent. Cùm

id ad Imperatorem Claudium esset delatum, confestim in carceres, & vincula nefarios proditores iniici iussit, & à fidei censoribus eorum hæreses examinari; quos pertinaces reperit, partim leonibus exponi, partim viuos in terram defodi imperauit: qui contrà faciles veritati præbuerunt aures, statuit, vt certum reciperentur in locum, ibique catholicis præceptionibus instruerentur. Interim nuntium Romam misit; qui à Tadæo Perusino Eremitarum sancti Augustini per id tempus moderatori generali, Augustiniani ordinis constitutiones peteret, vt ipsas anachoretæ illi ad fidem conuersi profiteri & seruare possent. Missum statim ab Generali omne Augustinianum ius, & in Æthiopicum idioma ex Latino tractatum. Tum Claudius Imperator decreuit, vt qui ex illis dare Augustino nomen vellent, & eius legibus viuere, coram iisdem illis fidei iudicibus religionis vota nuncuparent, simulque Romano Pontifici, tamquam communi Christianorum pastori, & vniuersalis Ecclesiæ capiti, iureiurando obedientiam promitterent: qui religiosam profiteri vitam nolent, tota quamprimum Æthiopia abscederent. Hæc nouus auctor, copiosius, vt solet; sed ficta omnia, & illud magis, quod de sancti Augustini eremitis scriptum proximè. Huiusmodi enim religiosi in Abassia nulli sunt, nulli etiam fidei iudices ad quos religionis causæ deferantur. Claudius præterea hæresum fuit non oppugnator, sed propugnator, & Romanæ Ecclesiæ insignis hostis, vt sæpe dictum, & sæpius dicendum. Qui sub Antonij Abbatidis nomine religiosam in Æthiopia vitam degant, etiam nunc multos esse; & ante hæresis ingressum varia eorum per totam Abassiam fuisse cœnobîa, omnibus pietatis & virtutum operibus florentia, pro com-

perito

perto traditur. Huius ibi ordinis instituendi talem novus auctor rationem proponit. Mortuo, inquit, Antonio Archimandrita, anno Christi quinquagesimo septimo supra trecentessimum, cum Magni Constantini filius Constantius orbis haberet Imperium, multi Antonij discipuli, inter quos Macarius, Hilarion, & alij erant, religionis & sanctimonie fama notissimi, ex Thebaide in Æthiopiam se conferentes, abditas speluncas, & loca deserta cœpere separatim incolere; tandiùque eum vitæ modum tenuere, donec Basilius Cæsareæ Episcopus, diuino actus instinctu, dispersos ac dissipatos per sylvas & solitudines homines in societatem vitæ conuocauit, & domiciliis legumque communione coniunxit. Tum primum multa in Æthiopia erecta cœnobita sunt, quæ sub eiusdem Antonij nomine viuendi formam & instituta à magno Basilio acceperunt. Addit idem auctor, per id tempus Ioannem Abassie Imperatorem, vulgo Sanctum nominatum, aduersus Arianam hæresim, quæ tunc auctis mirum in modum viribus Æthiopiam inuadebat, induxisse in animum militarem Equitum ordinem instituere, & suum hac de re cum Basilio consilium communicasse; eo autem approbato peculiare condidisse leges, & nigram vestem, cum cærulei coloris Cruce in modum, T, Græca litera, efformata, equitibus assignasse. Hoc insigne discipulis suis dedisse Antonium, ut tamquam Israelis primogeniti, hac salutis nota à reliquis discriminarentur. Addit præterea, eundem Imperatorem stabili decreto firmasse, ut quicumque tres haberet filios, ni medicus esset, ut iam dictum supra, vnum ex iis huic adscriberet militiæ, id decretum aded strictè seruari, ut ne Reges quidem ab eo absoluantur. In vnaquaque vrbe vnâ esse horum equitum

tum domum, in qua separatis distinctisque locis duorum sint genera; quosdam militaribus incumbere exercitationibus, & ad bellicos usus, quoties est opus, paratos esse; alios donatos rude, quos diu multumque in militia exercitos plenior annis ætas grauat, habitu vivere, & ritu monachorum, sacerdotio initiatos; nec posse hoc de numero plures esse, quàm viginti; quorum, qui natus est grandior, cæteris emeritis præest, spiritualis Abbas nominatur. Alterius generis equites nullo certo arctari numero; ad quingentos, ad mille, ad duo millia, & ulterius procedere. Istos militari subiici Abbati, ab seipsis inter se suffragiis creato. Tunc autem in equitum ordinem cooptari, & in eorum collegium recipi, cum primum decimum sextum, decimumve octauum attingunt ætatis annum. Moxque ubi recepti sunt, ad bellum mitti, & nouem integros annos dare militiæ, sub nomine tyrocinij; ea diuisos ratione, ut primos tres ad Erythræum mare transigant, & maritimam Æthiopiarum oram defendant ab Arabicis prædonibus. Tres alios in insula Meroë, ut esse præstare queant, si quid Turca ab Ægypto molitur. Tres ultimos in locis Borno finitimis, ne eius regni tyrannus, genere Saracenus, opibusque & copiis potens, qui perpetuas cum Abassino gerit inimicitias, quidquam mali ab ea parte valeat inferre. Hæc & mille alia, quæ à nouo auctore de his commentitiis equitibus scribuntur, eo magis absunt à vero, quo sunt speciosius composita. Militarem enim ordinem in Abassia nullum esse, & ipsi fatentur Abassini, quibus, ut dixi, haud leue est quidquam fateri, quod sibi putent minus honorificum; & idem ipse huius falsi ordinis fabricator apertissimè falsus est, fabulam esse, quod ea de re tradidit in libello à me antea memorato.

to. Cætera quoque partim falsa, partim suspecta; sed nihil opus, ea singulatim refellere. Qualis nunc Æthiopum monachorum viuendi ratio sit, ad finem sequentis capitis ex Antonio referam.

*An præter religiosum Magni Antonij ordinem
aliquis alius in Abassia sit.*

C A P V T X X X I V .

NOuus auctor, & quidam alius eo anterior literarum monumentis tradiderunt, multa esse Dominicanæ ordinis per totam Abassiam cœnobîa. Illa duo maximè celebrant, quæ de Plurimanis & Alleluia vocant. In primo nouem religiosorum millia, in secundo millia septem aiunt viuere. Addunt Monialium eiusdem instituti tertium, Bedenagli dictum, quod quinque complectitur millia fœminarum. Huius religiosæ familiæ in Abassia fundandæ causam nouus auctor proponit. Ait ab his Europæ locis ex prædicatorum ordine sæpius aliquos in Æthiopiam iisse, ibique diuinum verbum disseminasse; anno tamen salutis millesimo trecentesimo decimo sexto, & à condita sancti Dominici religione centesimo, sub finem Aprilis, cum post obitum Clementis V. vacaret Romana sedes, & Berengarius de Longorra esset generalis magister ordinis Prædicatorij, profectos Roma religiosos octo, quorum vnus Pantaleo dicebatur, reliquorum ignorantur nomina: & in eorum comitatu vnâ ex iis, quæ de tertio dicuntur esse Pœnitentiæ ordine, probatam ætate, virtute, & religione fœminam. Hos primum Hierosolymam accessisse, ibi aliquot

quot consumptis diebus cùm essent dubij, quò vltè-
 rius se ferrent, piis precationibus consuluisse Numen;
 & eam ab ipso iniectam omnibus mentem vt ad Æ-
 thiopes tenderent, idque magna fecisse animorum
 concordia. Dein Æthiopiam ingressos, gentis linguã
 breuissimè didicisse, & palàm ac publicè de rebus di-
 uinis cœpisse disserere; ad amorem pietatis omne ge-
 nus hominum exhortari, doctrinæ suæ veritatem si-
 gnis stabilire. Continud commotos rei fama Æthio-
 pes oppidis & domibus relictis, ad nouos homines
 de facie noscendos, audiendosque vndique confluxis-
 se. Ipsum quoque Imperatorem, cùm id, quod erat,
 agnosset, pro tam singulari beneficio actis Deo gra-
 tiis, nuntium ad eos misisse de aduentu gratulatum,
 & potestatem fecisse, non liberè tantum ac sine im-
 pedimento, vbicumque vellent, prædicandi, sed mo-
 nasteria quoque ædésque per vniuersos Imperij ter-
 ras erigendi, in quibus & censorum fidei exercerent
 munus, & omnibus iis vterentur facultatibus, quibus
 in Latina Ecclesia solerent vti. Hac illos principis be-
 neuolentia vehementer lætos, & animatos perrexille
 vltèrius, subiectas Æquatori plagas, & Cafatis lacum,
 hoc est, ipsos Nili fontes, tanta olim à natura occul-
 tatos industria, tantæque plurimorum regum ac dy-
 nastarum quæritos diligentia, tandem penetrasse.
 Multa in regnis Goyamæ, Cafatis, & Sabæ cœnobìa
 ædificasse, & immensam hominum multitudinem
 sancti Dominici signis adiunxisse. Nec illam interim
 mulierem, quæ pios comitabatur prædicatores, desi-
 dia aut otio languisse; verum pro parte sua laborasse
 strenuè, & clarissimam imprimis sub eadem sancti
 Dominici viuendi forma extruxisse sœminis ædem,
 tunc de Bedenagli, à sanctæ Claræ nomine postea
 nuncu

nuncupatam, quinque, vt dictum est, & plura complectentem millia monialium. Mulieres deinde plurimas vitæ exemplo & sanctimonia notas, quibus ardens erat ad perfectionem tendendi desiderium, ad tertium Pœnitentiæ ordinem adiciuisse. Ex fabricatis tunc cœnobiis quædam non mediocri hucusque habitantium frequentia integra perseverare, alia partim infidelium armis esse destructa, partim ob aëris inclementiam, & causas similes ab ipsis religiosis ultro deserta. Illos egregios prædicatores, Pantaleone excepto, qui solus erat notus ex nomine, ab ipsis Æthiopibus Argai, Grima, Luanos, Sama, Aleph, Agaloo, Assen fuisse appellatos. Argai apud Abassinos ait senem significare; Grima concionatorem terribilem; Luanos de Deo placidè loquentem; Sama eum, apud quem deponitur seruanda pecunia; Aleph, qui panem ministrat; Agaloo cui victus & vestitus aliis suppeditandi cura incumbit; Assen superiorem, vel dominum. Impositum quoque fœminæ nomen Imata, quod siue Dei mulierem, siue Dei seruam designat. Addit, in peristylis celeberrimi illius cœnobij de Plurimanis totam ferè hanc prædicatorum patrum historiam multis cum miraculis, quæ patrarunt, per ipsos parietes etiam nunc depictam conspici. Hæc nouus ille auctor. Quæ de cœnobiorum fabrica, ædificiorum magnitudine, forma, dispositione, deque vniuersa gubernandi ratione adiungit, hand lubet referre. Ex his autem, quæ retuli, multa vt à veritate, sic ab humana fide sunt aliena, & tenebris magis, quàm luce digna. Optandum quidem esset, vt in aliqua Christiani orbis parte, nedum in asperrimis illis Æthiopix dumetis, tam celebres, ac tam copiosæ modò reperirentur religiosæ vitæ veræque pietatis scholæ.

At nullos in Abassia esse siue virorum, siue fœminarum cœtus, qui sancti Dominici legibus regantur, omnino certum est. Credatur illi ipsi Abassino, cuius fidem nouus auctor in cœlum effert, quique has forsitan fabulas, ab alio primùm fictas, auctoritate sua firmavit. Is nobis asseruit, dubitare se, an vllum vquam in Abassia viderit Dominicanæ familiæ religiosum; cœnobium quidem eius ordinis esse nullum. Idem Abassini ij, qui Romam veniunt, cum quibus sumus collocuti, idem qui Olisiponem appellant, absque hæsitatione affirmant. Multis id quoque nostrorum literis sæpe inculcatum; cùm enim scribant, illos, qui in Abassia sunt, religiosos, paucis exceptis, quibus Romanæ veritatis lux fulsit, plurimis inuolui erroribus, & Catholicæ fidei præ cæteris obsistere, atque omnium pessimè viuere; statim monent, eos neque Dominicani ordinis esse, neque Franciscani. Tales verò illi monachi sunt, qui in illis de Plurimanis siue Bilibanis (sic etiam appellant) & de Alleluia cœnobiis habitant (quod non solum ex Francisco Aluaro antiquiore teste, sed etiam ex Gonzalo Roderico, qui anno millesimo quingentesimo quinquagesimo quinto in Abassia fuit, atque ex iis, qui modò ibidem degunt, agnoscimus) vt indicare facile sit, indignissimos esse, qui tam sanctæ piæque familiæ credantur alumni. Et quidem illud eiusdem rei magno esse argumento debet, quod Societatis religiosi, qui annis iam propè sexaginta Æthiopicas incolunt regiones, nihil vspiam reperere, vnde colligere possent, aut nominata cœnobia, aut alia, quæ apud Abassinos sunt, Dominicanis legibus gubernari, vel ad Dominicanam familiam quidquam pertinere; quod & ipsa quoque indicat ædificiorum vetustas, cùm sint omnia multo antiquiora,

quiora, quàm vt cum sancti Dominici ordine incorporint. Est quidem in Regno Tigri monasterium, Abbaguarima appellatum; in eo sepultum esse vtrum sanctitate insignem cum aliis octo sociis illuc Roma profectum, fama fert. Haud est improbabile, hunc, & socios ex sancti Dominici ordine fuisse; quamquam id apud Abassinos non dicitur. Certè qui illud nunc habent monasterium, institutis viuunt à Dominicanis longè diuersis. Quare cum nulla in Abassia Dominicanæ militiæ castra sint, perspicuè colligitur eius ordinis religiosos, neque fidei censorum officio ibi fungi; neque Imperatoribus esse à confessionibus, neque alia habere, quæ nouus auctor tam sollicitè actam sæpe, quasi magni intersit, ipsis attribuit. Haberi pro certo volumus, quicumque apud Abassinos sunt, qui religiosam profiteantur vitam, eos Magni Antonij, Macarij, Basilij, non aliorum Patrum ætate posteriorum, leges & instituta profiteri. De Religiosis Societatis ex Eutopa aut India profectis nihil attinet hoc loco dicere. De Abassinis dumtaxat, deque propriis eorum cœnobiis sermo nobis in præsentia est. Si quis tamen aliquid obiter de nostris scire velit, quinque esse sciat, qui hoc tempore illis degunt in locis. Hi sunt Petrus Paëz Castellanus, cæteris præpositus; Franciscus Antonius de Angelis, & Laurentius Romanus, Itali; Antonius Fernandius, & Ludouicus Azeuedius, Lusitani. Duo tenent loca. Partim in regno Tigri sunt; ibi pagum incolunt, cui Fremona nomen; partim Imperatoris castra sequuntur, & oppidum communiter habitant, quod vocât Gorgoram. Alia de his nunc dicere, ad rem præsentem nihil. Dicam, quæ suprâ pollicitus sum de Abassinis monachis ex Antonio Fernandio me dicturum. Monachorum,

inquit,

inquit, cœnobia patentia sunt, & nullis prorsus obsepta claustris. Suam quisque ad habitandum spelūcam magis, quàm ædem habet; quæ sibi opus, quærît per se, nulla donandi vel accipiendi prohibitus lege. Multis locis simul cum monialibus monachi habitant. A quibus iam vitorum cœnobiis arcentur sœminæ, sed prope domos habent, ad quas monachi pro libito vētitant, Mundi loca vocant ipsi. Multi secum ancillas habent, quibus cum conjugatorum more viuunt. Sunt etiam inter ipsos, qui palàm ac publicè vxores ducāt; tanta in miseris hominibus mentis caligo est. Ne ipsū quidem obedientiæ nomen inter eos notum. Vadunt quò volunt siue interdiu, siue noctu; nullum illis discrimen temporis. Per oppida vagantur, nundinas frequentant, & institorum more negotia exercent. Indumenta ipsis ad libitum. Qui vitam profitentur asperiores deris præcincti zonis corpora tegunt corio, & prolixam demittunt ad humeros comam. Non pauci solo victitant legumine, & summam in ieiunio putant esse sanctitatem. Quæ tamen frequenter in ipsis deprehenduntur scelera satis demonstrant, hæc eos facere non amore virtutis, sed inanis gloriæ cupiditate. Hæc vna non paucos eorum in solitudinem abripit, vt sanctimoniæ fama noti, & in pretio habitii vocentur in aulam, vbi ad summum deueniunt nequitiae fastigium. Omnes cucullum portant, nec alio indicio religiosi esse noscuntur, ac si tota religiosæ vitæ ratio in solo cucullo posita sit. Eadem, quæ in monachis, in monialibus est viuendi licentia. Hic est modus, quo se vtrique religiosæ adscribunt disciplinæ. Ad cœnobia accedunt; ibi primùm baptizantur; deinde certæ supra ipsos recitantur preces; postremò imponitur illis cucullus. His peractis Religiosi euadunt;

neque apud Abassinos valet, quod apud nos prouerbio teritur, Monachum non cucullus, sed viuendi ratio facit.

Quæ sacramenta, qualisque eorum usus apud Abassinos sit.

C A P V T X X X V .

INter argumenta, quibus nouus auctor suadere nititur, numquam Abassinos à vera fide, & Romani Pontificis obedientia recessisse, illud vnum est, quod Religionis Christianæ sacramenta non secus atque Romana Ecclesia, purè sincerèque vsurpent, sempèrque vsurparint. A Baptismate rem inchoat, cætera deinde mysteria singulatim percurrrens, quid in vnoquoque nobiscum commune, quid peculiare habeât, ac proprium, multo pluribus, quàm ego referam verbis, lingua sua exponit. Quod igitur attinet ad cœleste lauacrum, ait credere Abassinos, quemlibet hominem, quo primùm puncto temporis, efformato intra maternam aluum corpusculo animus à Deo infunditur, originali, vt Theologi loquuntur, cōmaculâri labe; hanc verò aquæ deleri Baptismo, qui more apud ipsos peruetusto, die ab ortu quadragesimo masculis, octogesimo fœminis ministratur, nisi quid interueniât, quod anteire cogat præscriptos dies. Hoc vltimum falsum esse, iam suprâ ex Antonij literis constitit; ex iis dixi, ne mortis quidem periculo interueniēte anteverti designatum Baptismi tempus, morique illotos infantes, quibus ante illud accidit mors. Ait deinde nouus auctor illum adhuc vigere morem, si qua de
causa

causa ante constitutum diem sacra vnda tingatur infans, non porrigi ipsi à matre mammam, donec præfixus ille dierum numerus adueniat; matrem enim nondum purificatione expurgatam, non reputari dignam, quæ loto iam puello, & ab omni purgato peccati macula lac suum sugendum dedat. Nam quæ masculum peperit, ante diem quadragesimum; quæ verò fœminam, ante octogesimum censerì immundam. Olim baptizatis infantibus, Græcorum more dari solitam Eucharistiam, nunc ab hoc ritu cessatum, summorum Pontificum iussu. Quotannis ipso sacro Epiphaniæ die in memoriam ac reuerentiam baptizati Christi corpora in lacubus, aut fluminibus solere abluere, mystis præsentibus, & preces quasdam recitâribus. Inde ait occasionem aliquos accepisse falsò existimandi, solere Abassinos Baptisma iterare. Hæc ille. Sed iam suprâ ostensum est, Abassinos Baptisma modis pluribus repetere, & hunc cum aliis tenere errorem. Apud antiquiores historicos reperio, ex veterum Imperatorum instituto esse apud hanc gentem positum in more, baptizati pueruli in fronte quædam inurere stigmata; id verò adeò strictè obseruari, vt si quis absque huiusmodi signo deprehendatur, in pœnam violatæ consuetudinis libertatem amittat, fiatque Imperatoris mancipium. Quid ea indicarit frontis nota apud eius auctores in ambiguo est. Tria potissimum dicuntur. Quidam affirmant, Æthiopes istos, eo signo, quod igne fit, credere, illud se Baptisma suscipere, quod à Christo conferendum eius Præcursor videtur significasse, cum apud Mathæum dixit, *Ille vos baptizabit in Spiritu sancto, & igne*. Alij, voluisse primos illos Æthiopizæ Imperatores, qui fidem Christi sequebâtur, vt aliquod externum signum in Christianis esset, quo

ij à reliquis infidelibus , inter quos viuebant , primo statim intuitu discernenterentur Alij denique, decreuisse Imperatorem Ioannem,dictum Sanctum, vt baptizatis infantibus tria statim in fronte puncta ignito ferro imprimerentur, quo miserrimis illis Arianorum temporibus augustissime Trinitatis fidem literati ipsorum vultus palàm ac publicè confiterentur. Quænam ex istis illius signi vera causa fuerit , nequeo certò definire. Primam vel secundam magis probo ; suspecti auctoris tertia est. Qui illam,quam diximus parientium purificationem ex Hebraicis negant desumptam caeremoniis, valde pij sunt ; sed veritatem pietas non respuit, nec tollit errores excusatio. Ostendi, Abassinorum gentem à Romana fide defecisse , & multos hodieque seruare ritus Iudæorum, multasque eorum caeremonias cum Christianis sacris miscere , nec paucis Græcorum erroribus implicari. Non me latet Zagazabum illum, de quo sæpius memini, multos Abassinorum suorum excusasse errores ; eumque negare rem ipsam, utpote nostris notissimam, non posset legalem animum negasse. Sed iam monui ab illo Damianum Goëz. & alios per idem tempus historicos fuisse deceptos , multaque ex eius narratione mandasse literis, quæ falsa fuisse , deprehensum postea est. Scio etiam Teclam Mariam , Abassinum monachum , de quordicam infra , in recensendis suorum erroribus sic à Zagazabo discrepasse, adeoque in hac re malè inter se conuenire Abassinos , qui apud nos sunt , vt Thomas à Iesu in thesauro suo de Abassinis agens , eorumque ex variis auctoribus ritus referens, meritò dicat difficile esse hisce de rebus certum aliquid definire. Idem ego iure possem dicere , nisi quæ hîc propono, ex ipsis Patrum nostrorum, qui in Abassia degunt,

omnia

omniaque perspecta habent, agnouissem literis. Sed pergo ad alia. Scribit idem nouus auctor esse nunc apud Abassinos Confirmationis, & Extremæ vnctionis mysteria. An olim fuerint, statuere nequeo. His temporibus non esse, sine dubitatione assero; & fidem habeo Ludouico Azeuedio Societatis Iesu sacerdoti, viro prudenti, ac pio, qui ex Æthiopia, quam vineam, vt suprâ dixi, cum aliis sollicitè colit, anno 1607. vndecimo Calendas Augusti ad Europæos Patres scribens disertè ait, ignota Abassinis esse prædicta sacramenta. Quod ad Confessionem attinet, haud dubium, quin aliquis eius vsus apud Abassinos sit. Nouus auctor ait, solere ipsos species, & numerum, & circumstantias peccatorumque aggrauantes dicuntur, perfectè atque integrè confiteri, sicut apud catholicos ex Romanæ Ecclesiæ præscripto fit. Præterea eos, qui animi sui rationem habent, diebus singulis, qui verò negligentius se gerunt, bis singulis hebdomadis ad hoc sacramentum accedere: neminem inter ipsos reperiri, qualiscumque is sit, qui non statim, si fortè alicuius lethalis sceleris venenum hauserit, ad hoc salutare medicamentum confugiat. Pœnitentē ait, antequam peccata prodat, hos ex Psalmo sexagesimo octauo dicere versiculos, *Saluum me fac Deus, quoniam intraverunt aquæ usque ad animam meam. Infixus sum in limbo profundis, & non est substantia. Veni in altitudinem maris, & tempestas demersit me. Laboravi clamans, rauca factæ sunt fauces meæ. Defecerunt oculi mei, dum spero in Deum meum.* His finitis illam ipsam ferè recitare confitendi formam, qua Romana vtitur Ecclesia. Item annis superioribus solitum confitentem stare, & stanti sacerdoti ad aurem peccata dicere: nunc sacerdotem more iudicis sedere; confi-

tetem ad illius pedes flexis inniti genibus. Haud fuisse cuiquam licitum vel apud illum confiteri, qui eius confessionem aliquando excepiisset; vel quem semel habuit confessorem, pro suo arbitratu relinquere, & apud alium fateri: nunc tamen remissas esse istiusmodi consuetudines. Sic ille. Verum aliter rem habere iam dictum supra, & ex iisdem constat Azeuedij literis, in quibus scriptum est, Abassinos neque species, neque numerum peccatorum in confessione exprimere, sed tantum generatim dicere, *Habessen, Habessen*, hoc est, peccaui, peccaui. Atque etiam hoc modò ratò admodum confiteri, cum & sæpius ad communionem, & frequentissimè ad mortem, nulla præmissa confessione miseri homines accedant. Idem patres alij, qui iamdiu in Abassia sunt, epistolis suis testantur. Circa diuinissimum Eucharistiæ mysterium non pauca legi à variis tradita. Aiunt bis tantum in hebdomada, Sabbato nimirum, & Dominico die sacrificium apud Abassinos fieri; in vnoquoque templo vnum dumtaxat; omnes verò tam qui sacris sunt initiati, quàm qui non sunt, suis dispositos locis, semperque stantes interesse; & cantantes sub vtrâque specie Eucharistiam sumere. Nouus auctor scribit cum solemniter fit, varias præmitti cæremonias, & ob eam causam multum temporis consumi; cum sit priuatim, breuiter absolui. Res creditu facilis. Addit ieiunij diebus, hora post meridiem tertia fieri sacrificium; reliquo tempore ante meridiem. Qui apud nos Abassini sunt, & in his & in similibus parum sunt constantes. propterea eorum auctoritate haud libenter vtor. Dicam paulo post, quid de hisce rebus scripserit Antonius. Adiicit tandem nouus auctor, etsi vestes sacrificantis erant olim à nostris longè diuersæ, nunc illis

illis esse per similes, eodémque apparatu, atque iisdem propè cæremoniis, intermixto etiam musicorum instrumentorum concentu, sacra celebrari. Ego inprimis dubito, num apud Abassinos verum fiat Missæ sacrificium, dubitationis causam paulo pòst subiiciā. Deinde ex Azeuedio suprà laudato, atque ex aliorum Patrum literis compertum habeo, etiam nunc apud ipsos longè aliter, quàm apud nos, rem diuinam peragi; alia esse sacrificantis vestimenta, dissimiles ritus, diuersas cæremonias. Ioannes de Sanctis Dominicanus ita scribit, Sacrum pallium (planetam dicimus) quo Abassini sacerdotes sacra faciunt, oblongæ subuculæ est per simile: stola foramen habet in medio, quo immissa capiti partim à pectore, partim à tergo pendet. Neque amictu, neque manipulo, neque cingulo vtuntur. Operta cucullis sunt capita monachorum, dum sacrificant. Sacerdotes in ara conficiunt sacramentum; non ostendunt hostiam populo, qui interest, cùm eam in sublime tollunt. Nullus potest sacro interesse, qui eo finito non sumat Eucharistiam. Ita Ioannes de sanctis rem per se expertus. Constat etiam diuinum de viatico præceptum nec illic obseruari, nec agnosci, quod Azeuedius & Patres alij non semel scripsere. Sed quæ de sacris & ieiuniis scripsit Antonius, ista sunt. Illi, inquit, solùm ingrediuntur templum, qui facienti ministrant; cæteri, neque ipsum sacerdotem vident. Calix & patena ex ære sunt, ex gossipio corporalia & purificatoria, parum omnia tanto mysterio consentanea. Si quam calix rimam agit, ne diffuat infusus liquor, cera obstruitur. Quinque minimum ministri adesse solent litanti; hi plerumque ob inopiam seminudi sunt, & characteres legere communiter nesciūt;

respondent memoriter, nec responsa intelligunt. Fermentato in sacris pane utuntur eodem confecto die. Ex uvis passis aqua infusa succum exprimunt, quod loco vini est. Peritiores parum miscent aquæ; alij communiter tantum, ut expressus liquor à natura vini recedat. Sub utraque specie omnes Eucharistiam sumunt. Ex calice, cui similis capaci pateræ figura est, cochleari hauritur sanguis, & communicantibus porrigitur. In festis solemnioribus parum plaudunt manibus Davidico moniti versu, *Omnes gentes plaudite manibus*, partim sistris & tympanis concrepant, more bacchantium; adeoque his tinnitibus delectantur, nulla ut ipsis videatur esse musica suauior. De ieiuniis sic Antonius. In Sanctorum peruigiliis nullum Ecclesiastica lege impositum ieiunium est. Quadragesimalibus feriis, omnibusque Mercurij & Veneris diebus toto anno ieiunant; præterquam eo tempore, quod inter Resurrectionis Dominicæ Pascha & Pentecosten interiectum est: tunc enim & carne vesci, & sæpius in die comedere, lex nulla prohibet. In Quadragesima, donec occidat Sol, nihil prorsus degustant. Paulo ante occasum rem diuinam faciunt sacerdotes, non prius quia credunt ipso Eucharistico cibo ac potu ieiunium frangi. Diebus Mercurij tunc putant licitum edere, cum Sol occidens, quinque efficit umbratum pedes; diebus Veneris, cum efficit septem. Hæc eorum sunt eulogia. Non pauci ubi semel sumpserit cibum, quamuis sæpius eodem die edant, satisfactum credunt ieiunij legi. Aded superstitiosè sua hæc ieiunia obseruât, ut nec decrepitos senes, nec iter pedibus per summos æstus conficiêtes, nec morti proximos sine summo scelere quidquam edere aut bibere posse credant, calicem scilicet excolâtes; & camelum glutientes.

Qualia apud Abassinos Ordinis, & Matrimonij sacramenta.

CAPVT XXXVI.

DE sacramēto ordinis multa scribit nouus auctor, quorum aliqua summam proponam. Afferit esse apud Abassinos omnium ordinum, quos maiores, quosque minores dicimus, perfectam distinctionem, à sancto Matthæo expressè traditam; nec deesse primam tonsuram. Diu ab ipsis creditum, solum Abunam habuisse potestatem ordinis conferendi; atque hoc vnum proprium illius fuisse munus, quod nemo alius posset usurpare. Bis in anno solitos conferre; primum quidem omnes simul, sacerdotio excepto; ipsum deinde per se sacerdotium. Nullam à prioribus suscipiendis exceptam fuisse ætatem. Non eos dumtaxat, qui ratione uti, & ingredi per se possent, verum etiam ipsos infantes, omnium ignaros rerum, vlnis virorum delatos initiari consueisse. Quatuor minores patuisse omnibus, quocumque essent vitio deformati, lippis, strabis, cæcis, balbis, blæsis, mutis, surdis, flaccis, mancis, mutilis, claudis, & id genus reliquis. Hunc autem, inquit, in modum solebant conferri. Tende batur patiente in campo tabernaculum, templi instar. Intus Abuna sedens ex pontificali libro legebat paululum: qui erant initiandi, apto inter se ordine dispositi ad illum accedentes, capita ipsi submittebant suis capillorum portionem cuique incidebat. Hac peracta cæremonia, recedebant omnes, & Abuna libro resumpto paululum iterum legebat. Illi interim eodem reuertentes ordine, quasdam manibus tangebant clau-

ues;

ues;indéque ad templi ostia conferentes sese , ea & referabant,& claudebant.Mox linteis quibusdam capita operientes redibant ad Abunam,& fictile tangebant vasculum ; cùmque paulisper procedebant , ad eundem reuertebantur ; qui manus capiti cuiusque prius imponens , rem diuinam peragebat ; atque ad extremum Eucharistico pane omnes cibabat ; quem cùm puelli demittere in stomachum aliter non possent, frequentibus aquæ haustibus deglutiebant. Ad hos ordines suscipiendos ex vniuersa Æthiopia plusquam decem millia confluebant.Cùm ministrandum erat sacerdotium, simile figebatur in campo tentoriũ. Conueniebant illuc initiandi , qui ad sex aut septem millia erant. Inter eos Abuna sedens , graui primùm sermone mysterij commendabat dignitatem; terribili deinde anathemate, qui aliquo essent publico scelere maculati, à sacris arcebat. Posthæc ad ostium templi progrediens,parata inibi sedebat sella;tres ante ipsum pariter sedentes, tres alij stantes , rerum sacrarum libros manu tenebant. Qui erant sacerdotio inaugu-randi,tribus distincti ordinibus , longo agmine sedebant humi ; déque rebus ad eum gradum necessariis singulatim rogabantur.Qui probè essent instructi, sigillo quodam signati medium in campum recedebãt; qui secus,repellebantur. Tunc Abuna tabernaculum ingrediebatur. Qui probati signatique fuerant , vna ingressi porta alij post alios ordine procedentes , ad ipsum in sella sedentem accedebant ; quibus vbi certa cum precatione imponebat manus,porta alia rursus exhibant.Posthæc certo ex libro legebat quædam,quibus lectis,cruce,quàm manu tenebat,salutare signum efficiens , bene omnibus precabatur. Tum Præbyter vnus ad ostium tabernaculi pergens,Euangelium inibi

bi & epistolam decantabat; Abuna verò mira celeritate rem diuinam peragebat; tandèmq; cœlesti cibo inauguratos recreabat. Ita nouus auctor. Addit, sublatum nunc quidquid hac in re minus rectè fiebat, nec iam ad hoc sacramentum cæcos, claudos, & similes admitti, tandèmq; omnia ad Ecclesiæ Romanæ vsum ritumque aptè esse composita; quæque sunt hisce de rebus apud nos pontificia auctoritate constituta, hac tempestate in Abassia perfectissimè seruari. Scribit deinde vnaquaque in ciuitate quatuor esse parochias, suum cuique templum, cum vicinis ædibus ad cœnobij formam constructis; in qualibet parochia sub iisdem ædibus, sed distinctis domiciliis, tredecim viuere sacerdotes cælibem vitam agentes, qui numquam fuerint matrimonio ligati; ex his vnum auctoritate & imperio reliquis duodecim præesse. Duo enim sacerdotum esse genera, vnum eorum, qui ab omni semper coniugio abstinent, de quibus proximè dictum, & statim dicendum; alterum eorum, qui matrimonium contrahunt. Illos virgines, hos coniugatos appellari. Vt quis ad priorum, quorum summa est auctoritas, numerum adiungatur, multa requiri, Primum vt nobilitate generis commendetur. Deinde vt quinquagesimum confecerit ætatis annum. Tum vt egregium dederit virtutis specimen. Demum vt ab omni mentis perturbatione, motuque animi effrænato sit prorsus liber. Ad hæc quo eius probetur virtus, opus esse, vt in cœnobio, famulantis more, tres annos transigat; quo peracto tempore si videatur sacerdotum albo adscribendus, bono propinquorum amicorumque stipatus cœtu sacerdotum, ac parochianorum, à quibus est approbatus deferēs suffragia, coram Episcopo sistit, ei que literas tradit, quas defert probitatis suæ,

&

& rerum aliarum testes. Vbi constat, legitimè probatum; sacris initiatur ordinibus (à spiritali enim urbis suę Abbate minores priùs acceperat) die Mercurij ad subdiaconatum, ad diaconatum die Veneris, ad presbyteratum Sabbato prouehitur. Prouectus confestim eòdem cum comitatu reuertitur ad suos, cum quibus vnum lætè & hilarè mensem agit. Eo pertransito confert se ad parochiam; cuius sacerdotes de eius aduentu certiores, iisdem, quibus litare solent, amicti vestibus, obuiam exeunt venienti; eum, que ducunt ad Parochiæ præfectum. Sella is sublimi sedens socium excipit, & librum Euāgeliorum porrigit apertum, vt antequam sacrum illum in ordinem cooptetur ea præster, quæ veteri ritu præstari solent. Ille ad genna accidens, libro imponit manum, & obediturum se Romanæ Ecclesiæ, atque antiquæ illius Antiochenæ sedis instituta seruaturum iureiurando promittit. Mox detracto pallio, vestes induit sacrificantis, quibus indutas solemni cum pompa ducitur ad sacrarium. Ibi reliqui sacerdotes ordine sedent. Ipse autem ante positam crucem curuans poplites, intimo ex corde ter illa repetit ex Psalmo verba, *Peccani Domine, miserere mei; sana animam meam, quia peccavi tibi.* Quibus pronuntiatis surgunt omnes, tenduntque psallentes ad altare; ad quod nouus sacerdos subdiacono, diacono, & alio assistente sacerdote comitatus accedens, rem diuinam peragit. Vbi absoluit, paratæ sellæ insidet. Tum sacerdotes primùm, cæterùm dein vulgus manus ei deosculatum accedunt. Posthæc sacris vestibus exuitur, album dumtaxat retinens ex lino amictum (pontificium id ornamentum est) quo vt sacerdotes virgines vti possent, Gregorij XIII. Pontificis maximi beneficio est concessum. Hæc de

virginibus sacerdotibus nouus auctor, & plura alia,
 quæ non memoro. De secundo genere sic ait. Coniu-
 gati sacerdotes initium habuere à Ioanne illo, cui Sã-
 cto fuit cognomen. Hic Imperator cùm virginum sa-
 cerdotum auctoritatem, quam scite nimia aliorum
 familiaritate imminui, conseruatam percuperet; quo
 illi profano consortio sublato, honorem suum possent
 illæsum tueri; concepit animo genus aliud sacerdotum
 notæ inferiores, qui & matrimonium contraherent, &
 virginum sacerdotum essent veluti famuli; & in rebus
 ad secularia pertinentibus operam suis parochiis na-
 uarent. Rem ad quoddam detulit Concilium, quod
 per id tēpus Antiochiæ celebrabatur. Probata à Patri-
 bus est, quibus placuit talis vt ordo institueretur. Hæ
 tamen adhibite conditiones. Primò vt admitti nō pos-
 sit ad hunc gradum, nisi qui vnam dumtaxat, eamque
 non viduam vxorem habeat. Secundò vt antequam
 sacris initietur, coniugio copuletur, & coniugalis ca-
 stitatis (vt appellant) votum emittat. Tertiò vt defun-
 cta vxore ad secundum matrimoniū transire nequeat.
 Institutus ergo nouus sacerdotum ordo, & vnicuique
 Imperij ciuitati duo & triginta assignati, sedecim ex
 ciuibus, totidem ex plebe. Octoni dati singulis paro-
 chiis, ciues quatuor, totidem plebei. Priores intra do-
 mesticos parietes necessaria curant: posterioribus ea
 commendantur, quæ ad victum, & cultum, quæque
 foris agenda. Vtrique ad vxores exeunt, quas priuatis
 habent in ædibus, cùm sunt ab aliis negotiis liberi.
 Sacrum facturi sex vel septem ante dies à maritali cō-
 sortio quoddam ad sacellum recipiunt se; ibi multis
 precationibus ac meditationibus exercent animum.
 Si quis ex his adulterium commisisse ab Episcopo de-
 prehenditur, grauissimas luit pœnas. Ordinis enim
 vsu,

usu, ac munere, & Ecclesiasticis beneficiis, ac cæteris priuilegiis spoliatur; habitu exuitur clericali; nequit manu gestare crucem, ut Abassinis sacerdotibus mos est: templi ingressu prohibetur: seculari subiicitur potestati: denique ad laicorum ordinem ita redigitur, ut spes nulla sit ad pristinum statum, à quo adulterij culpa cecidit, amplius redeundi. Hæc de coniugatis sacerdotibus auctor ille. Addit insuper Gregorium XIII. missis in Æthiopiam apostolicis literis statuisset, ut sacerdotes virgines abraha, aut detonsa orbiculatim superiori capitis parte, quadrato vterentur pileo, demissa ad talos tunica, albo desuper indusio, oblongo pallio, habitu denique eodem, atque eodem vestitus genere, quo Romani uti sacerdotes consueuerunt. Cauisse quoque, ne coniugati aut vestitu incederent virginibus simili, aut umquam ad ullam siue Episcopi, siue canonici dignitatem assumi possent; sed eundem simplicis sacerdotij gradum perpetuò retinerent. Quanta in his sint à vero dissita, nemo non videt. Quod ait Episcopos nunc conferre ordines, & in iis conferendis Romanas cæremonias seruari, falsum esse ex dictis constat. Cum præter Abunam Episcopi apud Abassinos nulli sint; neque ipsi veteres Alexandrinæ Ecclesiæ ritus cum Romanis umquam commutarint. Adeò verò hac in parte à Romano usu, ritùque abhorrent, ut Ouiedus Patriarcha quamdiu in Æthiopia vixit, valde semper, & magna de causa dubitarit, essentne Abassini sacerdotes ritè ac legitime initiati, quòd eæ sacrandi formæ, quibus Abuna utitur, adeò essent incertæ, ut corrupte viderentur. Ob hanc causam in iis, quæ sunt ordinum propria, & verum in ministro exigunt characterem, numquam inducere in animum potuit, ut eorum vteretur opera, ne

fortè

fortè irrita fierent sacramenta. Vnde etiam factum, vt cum Teclamaría, cuius suprà mentionem feci(erat hic ex ordine sancti Antonij monachus & apud suos sacerdos) ad tractanda quædam Christianæ religionis negotia anno Christi millesimo quingentesimo nonagesimo tertio, ex Æthiopia Romam venisset, in domestico sacello illustrissimi Cardinalis sanctæ Seuerinæ, ab Episcopo Sydoniæ more Romano, omnibus iterum ordinibus fuerit initiatus, eo quòd summus Pontifex, cui Patriarchæ dubitatio exposita fuerat, re priùs cum Cardinalibus & viris doctissimis consultata, ita faciendum iudicauit. Testes sunt præter alios, duo ex Societate Iesu integerrimæ viri fidei, qui nunc Lusitaniam incolunt, tunc Romæ degebant, Ioannes Aluarus, & Sebastianus Rodericus. Prior Generali præposito pro Lusitanicis prouinciis assistebat. Posterior eidem Generali pro iisdem prouinciis erat à secretis. Thomas à Iesu, quem suprà laudaui, rem eandem illo, quo dixi, loco, legendam exhibet. Commenditia quoque est illa de Virginibus, & coniugatis sacerdotibus distinctio, vt constat ex literis nostrorum, qui in Abassia sunt. Præterea, qui apud nos Abassini viuunt, discrimen tale non agnoscunt. Quid hac de re scripserit Antonius Fernandius, paulo pòst referam. Quare tota illa, ac tam appositè ficta coniugatorum, ac Virginum sacerdotum per parochias distributio, & quæ ex his pendent, inania planè sunt, sicut & reliqua nuper à me commemorata. Matrimonium restat. Non referam modum, quo nouus ille auctor scribit, hoc sacramentum apud Abassinos celebrari; vt enim parum est modestus, ita probabile à veritate abhorre. De reliquis sic ait. Incusant aliqui Æthiopes, quòd plures simul ducant vxores. Res est & falsitatis

& calumniæ plena. Nulla enim gens seuerius punit adulteria; neque ipsis regibus parcitur. Si princeps in pellicatu esse cognoscatur, actutum graui ab Ecclesia ligatur anathemate; nec prius soluitur, quàm verè respiscat. Vnum ab antiquis temporibus ignorantia magis, quàm pertinacia habuerunt errorem. Is talis fuit, vt alteruter coniugum repudiato eo, quem haberet, liberè, si luberet, ad alterum transiret. Solis id coniugatis sacerdotibus vetitum. Adeò error inualuerat, vt matrimonia passim dissoluerentur; quòd ne facile fieret in contrahendis connubiis pœna illi apponebatur, qui primus coniugem repudiaret. Creditur error à Græcis & Armeniis habuisse originem, & contagione quadam, vt fit, ad ipsos deflexisse. Non ideo tamen cum hæreticis numerandi, cùm defecerit pertinacia, sine qua hæresis non est. Ipsi se errasse, ingenuè fatentur; nec eos tantùm peruersæ consuetudinis pœnitet, sed etiam pudet; & cum primum à Romana Ecclesia moniti sunt, dicto citius eam deseruere; nec iam vlla ferè, ne minima quidem, extat rei memoria. Hæc nouus auctor. Locis aliis scribit, quod iam tetigi, morem esse apud Abassinos peruetustum, vt regum filij ab Imperatore, nobiles à suis regibus, ciues à nobilibus, plebei à ciuibus potestatem obtineant matrimonij contrahendi; aliter vetitum ipsis contrahere. Cæterùm ex his, quæ retuli, nihil ferè non falsum est. Constat pro suo quemque arbitrio, absque vlla siue Imperatoris, siue alterius cuiusquam facultate coniugia iungere; & singulos etiam nunc quot lubet, vxores ducere, easque vel leuibus de causis repudiare. Testes sunt Societatis religiosi in iis, quas ad nos misere, literis, vt sæpe à me traditum est. Verùm quæ de sacerdotibus scribit Antonius, ista sunt. Qui sacris
sunt

sunt initiati ordinibus, vxores habent. Siquis primam amittit, suspensionis poena vetatur accipere secundam, propter bigamiam. Cæterum quoniam summa est in omnibus vitæ licentia, neque vlllo supplicij deterrentur metu, alia se in loca conferunt, ibique ordinum officia non secus exercent, quàm si nulla essent lege prohibiti. Ex eadem oritur viuendi libertate, vt multi Laici sacerdotium simulantes in locis, vbi cogniti non sunt, sacrorum ordinum fungantur ministris. Monachos à clericis, cucullus, hos à cætero populo distinguit crux, quam quisque ex ligno vel metallica materia manu portat. Qui volunt sacris initiari, multos ante per dies ad Abunæ domum se cōferunt, vbi stantes ad ostium voce contenta & lugubri identidem clamant, *Domine miserere nostri*. Vbi id sæpius fecerunt, admittuntur ad ordines, quibus susceptis vnâ singuli salis petram reddunt conferenti: ea laboris pretium est, & in his locis pecunia. Hæc Antonius, ex quibus apertissimè constat, abesse à vero quæ nouus auctor scripsit. Sed de his hætenus. Nunc ad Patriarchas.

Libri primi finis.



D E

IOANNE NONIO BAR-
RETO PATRIARCHA

LIBER SECVNDVS.

*Vbi & quibus parentibus natus Ioannes, quomo-
do à pueritia institutus.*

CAPVT. I.

DIXI, quæ de Abassinorum rebus
dicere in præsentia habui. Duos nunc
eorum Patriarchas, Ioannem & An-
dreadam, duo clarissima orbis decora,
vna, ut aiunt, manu ex abditis obli-
uionis recessibus foras promam, &
veluti è tenebris erutos ponam in propatulo. Quos
enim idem vitæ institutum, eadem dignitatis ratio,
summa morum similitudo, singularis quædam in iu-
cundissima non exigui temporis consuetudine ani-
morum voluntatûque consensio, plurimæque aliæ
studiorum simul & officiorum necessitudines arctè
in terris deuinxere; quosque insuper gloriosa facino-
ra, & merita, quantum mortali coniectare fas est, apud
Deum

Deum pæne paria, pèrque eòsdem rerum turbines
& varietates quæsitæ inferuerunt cœlo; eos historia
distingere, atque vno quasi ex corpore discerpere,
piaculum duco. Iungam igitur vtrumque; & de illo
dicam prius, qui & auctoritate muneris, & felici ad
superos abitione antecessit. Hic est Ioannes Nonius
Barretus, patria Lusitanus, domo Portuensis. Est au-
tem Portus vrbs apprimè nobilis, ad veteris Lusita-
niæ terminos, Septentrionem versùs, sensim accliuè ac
peramcœno constituta loco. Durio imminet, quàm hic
amnis non modico auctus numero fluminum mino-
rum, ingentem aquarum copiam à Pelendonibus per
Arenacos & Vacceos, pèrque alios complures Hispa-
niæ populos, longo terrarum tractu collectam, paten-
te non procul ostio in Oceanum infert. Dulci fruitur
cœli solique temperie: institoribus & populo frequēs;
cuiumque elegantia & comitate inter Lusitaniæ pri-
mas. Ea quoque ratione non incelebris, quòd nascenti
regno nomen fecerit. Ab hac vrbe Portugaliæ
dici, indubitatum est. Constat etiam, sic eandem ali-
quando vocatam; siue quòd iactatos olim tempestate
Gallos, aut deductas eorum in Lusitaniam colonias
tuto portu exceperit; siue ob quædam talia sparsa in
vulgus, quæ fictis magis speciosa fabulis, quàm verè
traduntur: siue quia, sicut periti narrant, & propius
vero est, ad communem portus appellationem vicini
pagi, qui Cale dictus, vocabulum sibi addidit, causa
discriminis; primùmque portus Cale, immutatis dein
paululum literis Portugaliæ euasit. Hoc tamen ipsa
nomen surgenti quondam regno, cuius tunc erat ca-
put, fertur libens reliquisse, sola Portus nuncupatione
contenta. In hac igitur vrbe (nonnihil momenti ha-
bet, quo quis loco primam accipiat lucis usuram) na-

talís dies & incunabula Ioannis fuere. Parentes habuit locupletes, & familiæ nobilitate per Lusitaniam claros. Primam pueritiæ ætatem quo pacto domigerit, non accepi. Honestissimis vt opinor imbutum moribus facile mihi suadent parentum inprimis pietas hisce adhuc temporibus grata recordatione apud Portuenses commendata; ipsius deinde Nonij adolescentia inter inquietos ac turbidos Salmanticensis Academiæ tumultus tam pura à labe, tam grauitè piéque instituta, vt cum summa omnium, quibus erat notus, beneuolentia & admiratione sanctus vulgo prædicaretur. Illud tandem me valde mouet, quòd cum octo essent germani fratres, quatuor mares, totidem foeminae, vno excepto, cui conseruandæ familiæ relicta cura, cæteri, quòd parètum industria, vt promptum est credere, egregiè essent educati, & ad pietatem exculsi, Deo vocanti dociles aures præbuere, eiúsque afflatu incertis caducæ vitæ rebus remittentes nuntium, religiosis cœtibus se aggregarunt. Tales esse fructus solent, quos à bene cùlta pueritià colligit posterior ætas; nec nisi ratò sit, vt insignes ad virtutem accessus derépte contingant. Ipsos tres mares vna complexa est Societas Iesui; iisque, vt splendissimis ornata gemmis, natiuitatis suæ primordia mirificè decorauit.

*Melchior Nonius Barretus in Societatem à Deo
premittitur, vt Ioanni fratri viam
aperiat.*

C A P V T II.

PRior ad Societatem venit Melchior Nonius Barretus, anno à partu Virginis 1543. vt locum Ioanni

ni pararet. Coluerat Melchior ab incunte ætate in Conimbricensi Academia studia literarum; nec minori fructu, quàm labore eò iam peruenerat, vt præter externa Doctoratus ornamenta, nihil ipsi in eo genere superesset. Cum verò supremus hic literarum gradus tum propter diuturnas grauésque molestias, quas ferre illos oportet, qui in ea Academia ad ipsum aspirât; siquidem multos primùm annos impendunt studio, & repetito sæpius scientiæ periculo durè asperèque probantur; tum quia necessum est non modicum fieri sumptum, quem non cuiusque facultas ferre potest; tum propter alias causas partim communes omnibus, partim cuique peculiare, nec facile, nec à multis obtineatur, ideoque magno apud Lusitanos in pretio & existimatione sit: Melchior diuino iam actus impulsu, & ad sublimiora intendens animum, cœpit hosce apud se honores despicere, ac subinde statuit Doctoratus laurea supersedere. Ergo in collegum Societatis, cuius ad institutum per insignia sociorum exempla, pèrque intimas animi motiones à Deo vocabatur, confert sese, & cum Simone Roderico vno ex primis Ignatii Loiolæ sociis, penes quem prouinciæ administratio tunc erat, negotium seriò pertractat. Tantum Simon virum non libenter modò & hilarè excipit; sed facillè ostendit, velle se quamprimum voti ipsam compotem efficere. Rogat tamen, vt ante ingressum vel inuitus patiat, ad illud efferri se spre- tum iam, & prius fastiditum, quàm obtentum Doctoratus fastigium, cui erat proximus: id enim è Societatis re esse. Paret dicto Melchior; atque vt Conimbricæ sit, tanta celebritate, tantòque apparatu, quanto nullibi exhiberi solet in re simili maior, non iam sua, sed Societatis causa in illum conspicuum Docto-

rum ordinem cooptatur. His peractis eodem ipso die, grauissimo septus Academicorum comitatu redit ad collegium. Dúmque ibi paululum subsistit, ecce tibi simul vt leues deprimantur fumi, siqui ex collato honore in hominis caput ascenderant; simul vt eius constantia & suscepti consilij firmitas tentetur, ex obedientiæ præscripto decernitur, vt exutus pallio, vilique ac detricto amictus indumento, mediam per urbem, sublatum humeris veruecem dono ferat Marco Romæo, Theologico professori, literis & fama valde commédato, cuius, opinor, patrocínio, in ipso Doctoratus actu, vt fieri mos est, fuerat vsus. Tam duro Melchior imperio nihil absteritus, promptè obtemperat. Animal dorso imponit; eo oneratus baiuli in morem domo egreditur; spectante ac stupente populo pergit ad Romæi, ipsique importatum munus offert. Marcus ad hanc nouæ rei formam attonito similis, demittere præ verecundia oculos; irrisum se potius, quàm munere affectum credere; ne verbum quidem mutire; tantum apud se, quænam ista sit inusitati spectaculi species, cogitabundus quærere. Tum Melchior turbatæ menti & rei nouitate confusæ hisce verbis pacem, lucémque restituit. Qui nobilioribus, inquit, in Academiis mos est, clarissime Doctor, vt Theologici Doctoratus laurea decorandi amarulentis primùm vexentur scommatis, & veris quasi conuitiis proscindantur, vt quanto magis alieno à fastu & ambitione animo, tanto ad eum honorem digniùs accedant; eundem ista, cui me modò addixi, Societas vsurpat, vt ad alium euehat gradum dignitatis longè sublimiorem; ad eosque præparet honores, qui vbi vera ac solida animi submissio, sui que contemptio non est, esse ipsi non possunt. Optimè nosti,

vir sapientissime, quàm sit ab istis vestris gymnasiis schola Christi dissimilis, quas in ea disci literas, quos ambiri gradus oporteat. Nec te etiam latet, quod in maiorum scriptis sæpe legisti, illud ante omnia constitutum esse debere religioso homini, ut cum se semel Deo dediderit, nihil sibi prorsus retineat sui; sed ab eorum nutu totus pendeat, quos diuinæ sibi elegerit nuntios & interpretes voluntatis. Hæc est illa (ita morum magistri vocant) Abnegatio sui, quam religiosæ vitæ, quamdiu vita superest, ducem simul & comitem esse, necesse est. Ab hac igitur istum cursum, quem nunc auctore Numine, decurrere incipio, mea tæ Societas inchoare iubet. Quare siquid actum secus, ac placitum tibi, ignoscas, vir prudentissime, & boni consulas. Non enim tua hîc tentata est auctoritas, sed animi mei explorata constantia, & studium excitatum. Mirum quantam ex hoc vno facinore Marcus de Melchiore opinionem concepit; quâ- tamque iam tunc in spem venit, fore ut ex eius laboribus & rebus gestis, vbicumque terrarum viueret, ingens postea incrementum atque eximios fructus Res Christiana esset perceptura. Nec euentus fefellit. Primum enim in Lusitania, deinde in India, in Iaponia, in aliis orbis regionibus per summas rerum difficultates, & innumera vitæ pericula, longè maiorem, quàm ut breuiter dici queat, Christi Reipublicæ operam nauauit. Sed hæc de Melchiore, Ioannis gratia, satis mihi sit, breuiter attigisse: cætera, quæ gessit, scriptores alij copiosius persequuntur.

Alfonſus Barretus fratrum motus exemplo Societatem amplectitur, & egregiis facinoribus tyrocinium illuſtrat.

C A P V T III.

ALter fuit Ioannis frater Alfonſus Barretus, cæteris natu minor, cuius, & in Ioannis gratiam, oportet breuiter meminiffe; eo quod eius excitatus exemplo eandem ſit amplexus viuendi rationem. Quintumdecimum is agebat ætatis annum, & viduæ matris, cui erat in deliciis, ſolitudinem atque orbitatem domi ſolabatur. Cùm fratrum Ioannis & Melchioris, quos ambos iam Societas habebat, sæpe ipſi in mætrem veniret, eorùmque percuperet veſtigia inſequi; cogitare cœpit apud ſe, quâ fieri poſſet, vt quos ipſi natura fratres dederat, eoſdem ſibi redderet viuendi ratione ſocios, doctrina magiſtros, religione parentes. Certò ſciebat, haud vñquam futurum, vt mater, cæteroquin pia & diuina reuerens mulier, quantuſcùmque eſſet fatigata precibus, facultatem ſibi concederet ad fratres eundi, vt idem, quod illi, ſequeretur inſtitutum. Nouerat enim tenerrimi illius affectus, quo, veluti vnicus vitæ oculus, ab ea diligebatur, vim eſſe intractabilem & ſecti uel ſciam. Nec ſperabat, ea negotij conſciã, quàmquam omnino inuita ac repugnante, ſatisfacere votis ſuis ſe poſſe. Ratus ergo opportunum eſſe in fuga remedium, fugere demùm ſtatuit. Nulli mortalium animum ſuum aperit. Parat ipſe per ſe clanculum, quæ ad iter neceſſaria. Rebus tandem compoſitis domo & vrbe exiens, quan

quanta potest celeritate Conimbricam contendit. Eò ubi peruentum, collegium adit Societatis; aduentus causam & desiderium suum moderatori exponit. Haud opus fuit, tam compertam, tantòque testatam facinore cogniti adolescentis voluntatem diutius explorare. Mora nulla, Societate donatur, & albo tyronum adscribitur. Vix est, ut bene accensa diuini amoris flamma, in recessu pectoris delitens, inibi contineri queat, quin foras erumpat, & occasione captata insigne aliquid atque excelsum moliatur. Paucos admodum egerat Alfonsus cum sodalibus dies, cum illa eorum conspicatus opera, quæ quisque submittendo sese ac despiciendo (ut tunc feruentia erant nouæ familiæ initia) admiratione fortè magis, quàm æmulatione digna patrabat. Simili & ipse spiritus ardore corripitur, miraque animi simplicitate rem aggreditur memorandam. Consuetas deponit vestes; assumit lugubres, & aptas dolori; detrahit de pedibus calceos; ad Conimbricense forum eo habitu procedit. Inibi primum, ut alicuius atrocissimi reum criminis, ad marmoream pilam, publicum supplicij instrumentum, alligari se facit; summo dein ardore animi, nec impari vultus ac totius corporis commotione, & voce, quantum vires ac latera patiuntur, contenta hunc in modum precatur. Domine Iesu Christe, veri & æterni Dei vere & æterne fili, qui ob infanda humani generis flagitia in atrio Præsidis Pilati corpus tuum sanctissimum columnæ alligari passus est, huius, obsecro, populi benignus miserere, ab eoque auerte supplicia, quæ pro innumeris sceleribus, quibus se polluit, tuamque læsit maiestatem, iustissimè meretur. Intuere miseros, Pater clementissime, non ut punias, sed ut parcas. Hæc eadem iterum & sæpius eadem contentione repetita ingeu

ingentem vndique consciuerе turbam, ad horribile spectaculum trepidè confluentem. Varia hîc, vt solet, de Alfonso vulgi iudicia. Iactitare quidam, exisse illum de mente & furere: alij suspicari puerum minimè malum ab aliquo deceptum, & turbandi populi illuc impulsum: plerique spiritu sublimiori correptum credere, vt quanto simplicius, tanto fructuosius ex publico loco in publica vrbis scelera detonaret: in alias alij sententias & dicta diuisi. Nullus tamen erat ex tanta turba, qui non suspiceret præclaram adolescentis indolem liberali oris probitate expressam, quique persusos ingenuo pudore, animique neque maligni, neque fallacis indices oculos non miraretur. Cæterum ille hoc submissionis & pietatis officio probè perfunctus, foro relicto domum repetit. Non multo post mittitur Olisiponē, vt vastissima in vrbe, in qua nec facile agnosci, nec obseruari facile possit, quamdam pæne immensam abiiciendi sese, & alios iuuandi, quam breui contraxerat, sitim, veluti in patentissimo flumine restinguat. Præter alia, quæ illic edidit admiranda, duo reperio, quæ nō debeo præterire. Ex varijs Lusitanix partibus, illis præsertim extremis, quibus Galleciæ regno contermina est, frequenter exeunt copiosi infimæ sortis hominum greges; quos rei familiaris apud suos tenuitas patriis eiicit sedibus, suaque industria victum quærere, & aliquod pecuniæ subsidium, quod domum referant, apud alienos parare cogit. Paucis hoc ex numero per alia loca dissipatis, longè pars maxima Olisiponem confluit, urbem populo & negotiis plenissimam. Varia in his ætatis conditio, viri, iuuenes, adolescentes, pueri. Idem omnibus onera portandi munus. Qui natu grandes, & pollentes viribus, grauiora baiulant; quibus

quibus nondum firma per ætatem membra , leuioribus succumbunt. Maximæ plerumque his in communi victu & vestitu sordes ; summa in moribus cultûque barbaries ; nulla tunc virtutis , nulla salutis cura , sed rerum cœlestium, eorûmque , quæ ad vitam futuram pertinent, ignorantia tanta , quanta potest maxima cogitari. Instituuntur hodie, vt res ferunt , accurate , summo quidem catechistarum labore ob tarditatem gentis, sed non modico emolumento. Vbi Alfonso Olisiponem veniens istum tam incultum tantûsque obrutum vitiis sentibus conspexit agrum, ed statim adiecit animum , vt quidquid factum opus esset, id Deo duce & adiutore faceret, quo illum accipere excolendum. Ab Deo immortali inchoat, à quo quæ non ducuntur rerum primordia, fausta esse nequeunt. Fusus in preces anxie orat, vt si eam sibi mentem dedit , quam habet miseræ illius gentis iuuandæ, si tantum sibi consilij auctor est, rei gerendæ quoque modum aperiat, & postulata sua ne repellantur , Præpositi sui flectat volutatem. Se quidem neque agere quidquam, nec tentare velle, nisi quod ipsi credat esse gratissimum. Ab hac precatione ingens illic & sine nube ac nebula adolescentis animo affulsit lux ; ostensumque monstrante Deo , qualem sequi deberet in negotio modum. Agnoscit igitur , si non dubios cupiat laboris sui fructus colligere, opus sibi esse, toto corporis habitu, atque ipso externo viuendi genere sic ad eos gerulos sese efformare , vt ex suo grege vnum esse haud dubie credant. Quare vestibus aliis depositis , necessum esse tunicam sibi induere , qualem ipsi induunt, sordidam, breuem, vix ad genua pertinentem, ex crassissima lana incitè textam , & malè consutam ; rusticum pileum , aut rudem petasum vsûque tritum imponere

ponere capiti; duros pedibus circūdare perones; adi-
ciendam quoque humeris sportulam , quam ferè ex
hoc ordine, qui natu minores sunt, gestare semper so-
lent. Non satis quoque semel quotidie , aut bis in die
ad eos itare; oportere cum illis esse, inter illos viuere,
in mensa , in colloquiis, in labore, in quiete, in rebus
cæteris se illis sodalem præbere. Hæc sua ad superio-
rem defert Alfonsus cogitata; summisque insuper cō-
tendit precibus, vti illo, quo dictum est, modo aliquot
sibi dies apud eam hominum faciem agere permit-
tat. Mirum dictu, quod homini annoso , diuque in re-
ligione & virtutum palæstra exercito difficile cōmit-
ti posset ; id recentissimo tyroni , vixque altero die ab
ephebis egresso tā facile cōceditur, vt qui in hoc facto
præpotentē Numinis manum non videat, cæcus sanè
sit. Flexit haud dubie supremus ille Rector, cui parent
omnia , moderatoris animū, vt noui militis annueret
postulatis, quo potissimum dux illæ eximie eius ani-
mi gemmæ, Despicientia sui, & aduersus omne genus
hominum Caritas tam singulari exemplo proderen-
tur. Alia tamen ex parte aded se illustrem fecerat Al-
fonsi virtus , tantisque erat domi ac foris in operibus
perspecta, suo vt quodammodo iure vendicaret, vt in
hoc genere nihil tam arduum , ac tam difficile habe-
retur, quod ipsi nequiret tutissimè commendari. Im-
petrata igitur eundi facultate, auolat Alfonsus à Præ-
positi sui conspectu lætus & alacer, illaque sibi infimæ
vilitatis & inopie parat indumēta, quibus paulo pōst
speciosior, quàm si pictis acu, & intertextis auro vesti-
bus esset ornatus, Præposito iterum se sistit , & ab illo
etiam atque etiam discedens petit, suis vt precibus &
cœleste sibi lumen , quo diuinam agnoscat volunta-
tem, & vires , quibus ab ea cognita nihilum discedat,

& faustos suscepto negotio exitus obtineat. Se quidem ad eam prouinciam proficisci libentius ac lætius, quàm soleant proreges, cum ad Indicam ex Lusitania proficiscuntur. Vade Alfonse, quò vocaris, cælo duce & auspice, inquit Præpositus. Ad tuos illos, quos tantopere diligis, confer te gerulos. Numen, quod vocat, semper tibi, ne dubita, præsens erit, ac propitium. Eosdem ego tibi, Christi inprimis, meis deinde verbis maximopere commendo. Discant ex te, alium esse viduum, quem diligentius quærere, alia lucra, quæ debeant facere auidius. Te docente ac præcunte ingrediantur viam salutis; oderint vicia; sectentur virtutes. Eslo omnibus solatio & exemplo. Vbi opus erit, ex doctrina Pauli, argue, obsecra, increpa; inflamma ad iustitiam, ad castitatem, ad omne genus pietatis. Caue nequid preternittas, quod ad eorum cultum videatur conferre. Ne tamen simus ignari eorum, quæ per te Deus agat, quòque sis loco, quæve habeas; simul etiã ut isti tuæ procurationi, cum videbitur, statuamus finem; curabis ad nos identidem ventitare, & rerum facere certiores. His dictis discedit Alfonfus, & ad publicum vrbis forum, vbi greges illi communiter vagantur, extemplo se confert. Curat primùm eorum sectibus & colloquiis miscere, vnumque præbere ipsorum de numero. Deinde publicè omnium, & priuatim singulorum inire familiaritatem, & amicitiam captare. Tum quæ sita opportunitate inferere de rebus salutaribus sermones; Christianam catechesim exponere; vitiorum fœditatem ostendere; virtutum vires & pretium extollere; frequentem sacramentorum vsum commendare; præpotentis Dei aduersùs impios iram, aduersùs probos benignitatem efferre. Ad hæc insignia heroum facta, miseròsque diuinas leges præuarican

ricantium exitus recensere: siquid bene ab vlllo fieret, collaudare; sicut secus reprehendere. His artibus tantam sibi apud illos auctoritatem breui conciliauit, eorum voluntates quocumque vellet, nullo negotio perduceret. Vim excellentem barbara quoque ingenia sentiunt. Facile suis se factis apud rudes illos stipites Alfonsi sanctimonia probauit, animosque agrestes inuasit, ac tenuit. Suum ergo cuncti mirantur socium, suspiciunt, amant, siue doceat, siue reprehendat, auscultant libenter: reputant portento simile in tali vitæ conditione ac tam parua ætate tantam esse morum probitatem, talem scientiam diuinorum. Querunt denique inter se, quis & cuias sit, atque ad illas sordes vnde delapsus. Ille interim rebus aptè compositis, euocante præposito domum remeat. Atque hoc vnū est ex duobus, quæ non duxi prætereunda. En alterum, quod sequitur. Dum gerulum Alfonsus agit inter gerulos, sæpiusque ad eundem vrbis vicum onera forte importat, agnoscit sacerdotem inibi esse vita solutum & moribus, scædæque turpitudinis infamia laborantem. Huic mederi cupiens, postquam reuersus domum est, rem defert ad præpositum, suamque illi iuuandi hominis voluntatem & consilium aperit. Ait peroptare se aliquot dies in illius sacerdotis esse famulatu, ut domesticæ testis nequitiae, fidentiùs eū monere queat, & à turpi consuetudine, iuuantem Deo, amouere. Facta facultate, eodem habitu domo egreditur; hominem conuenit; ei se famulum offert. Is adolescentuli specie & simplicitate captus oblatum seruitium confestim admittit, eo libentiùs, quòd nihil sibi ab illo per ætatem timendum putat. Vbi Alfonsus tum ministrandi diligentia, tum animi modestia & comitate suo se heretorum fecit, cœpit illum paulatim officij admone-

re: dein monita irridentem asperius obiurgare: tum de infelici ac periculoso impiorum statu ardentius disserere: postremò vltima illa, in quibus ad auertendos à scelere animos vis magna est, Mortem, Iudicium, Æternos cruciatus in memoriam identidem reuocare. Hæc miser sacerdos partim risu illudere, partim per contemptum despicere, partim per iracundiam declinare; verba insuper addere probrosa & contumeliarum plena. Abi, inquit, in malam crucem, furcifer, hominum nequissime. Tu mihi monitorem agis? Vnde ista tibi concionandi potestas? Quin ego tibi os istud audax & arrogans pugnīs contundo? Vade, tui similes quære, quibus viam monstres. Cohortationes mihi tuæ nulli omnino rei. Urget Alfonso nihilo secius, nihil remittit; iacula potiùs contorquet acutiora. Moneo, inquit, prædico, denuntio, & immortales cœlites, hominūque mortales testor, recta te in interitum ferri sempiternum. Contine gressum, miser Christiane, miserrime sacerdos. Veniat tibi tantisper in mentem tui, & aliquam animo concipe cogitationem recipiendi te ad frugem meliorem. His ille auditis tanto repētē corripitur furore, vt vix à cæde manus abstineat. Fidelem seruum domo eiicit, omnia sæua minitans, si audeat vñquam coram se cōparere. Recedit ab eo re infecta subtristis adolescēs, ad singulos gradus eamdē, quam priùs, tundens incudem, donec est ad publicam egressus viam. Dum suos repetit, ad consortem flagitij feminam ex itinere diuertit, vt nihil relinquat intentatum. Non hic eamdē, quam in misero sacerdote, reperit mentis duriā. Præbet aures mulier, & fidem habet adhortanti; mōxque ex recordatione sceleris in lacrymas effusa veniam à Deo submissē precatur. Exinde vitæ prioris acta diligenter discuti-

ens, quæcumque flagitia ad id vsque tempus se suscepisse reperit, ad confessionem defert salutari sacramento abluenda; quibus demum elutis pulcherrimus cœlestis gratiæ nitor renouato animo restituitur. Hic huius facti exitus. Fuit in Alfonso pars vitæ posterior priori par. Tres in ipso obseruatæ potissimum virtutes, quæ reliquis antistarēt, excellens animi modestia, singularis in Deum & homines caritas, ad omne sanctimonix opus alacritas eximia. Postquam & Olisipone docuit literas humaniores, & rectorem egit Eboræ, & alia Societatis munia tum in his, tum in aliis locis magna cum laude & fructu exercuit, in ipso tandem Olisiponensi collegio, in quo pæne cœperat Societatis iure viuere, corporis ergastulo liberatus ad superos concessit.

Ioannes imposito studiis sine religiosa vitæ desiderio pulsatur.

C A P V T IV.

PRimos ætatis annos, vt à nobis tactum suprà partim domi inter suos, partim in studio minorum literarum cum æqualibus egit Ioannes. Grandior effectus à Gaspare Nonio Barreto, fratre natu maiore, cui relictam diximus conseruandæ familiæ curam, Freirensis Abbas eligitur. Abbatia sub nomine Deiparæ Virginis, Freirensis à loco dictæ, in ea est Interamnensi regione, quæ Minio Darióque fluuiis concluditur. Patronatus, vt vocant, ius ad Gasparem pertinebat. Non multo pòst Ioannes, quia nondum maioribus studiis imposuerat finem, ad ea insequenda

Salman

Salmanticam petiit. Qualem ibi vitam vixerit, non habeo necesse longo verborum ambitu describere: inde cuique satis erit notum, quod inter duo multo maxima malorum incitamenta, iuuentutis, inquam, ardorem, & opum abundantiam, atque in tanta, quāta in hisce Academiis esse solet, vitæ morūque licentia, sic ille Scholasticum egit, & Ecclesiasticum, vt sicuti iam antè memini, non alio, quàm Abatis sancti nomine & agnosceretur vulgo, & appellaretur. Frequentissimis in locis, in quibus vitia ex æquo virtutésque versantur, latere solent mediocria. Quæ verò in hominum oculos animósque incurrunt, quæque vel amorem sui, vel odium excitant in multitudine, ea porro summa esse necesse est. Hinc promptum conicere, quid iure de Ioāne censendum, cū in tanta ac tam varia vndique confluentium iuuenum frequentia tam præclarum & illustre sanctitatis nomen sibi pararit, ipsūque vulgus, non satis æquum virtutum ac meritorum arbitrum, excellenti tamen rectè factorum specie deuinctum in maximam sui existimationem pertraxerit. Finitis studiis literarum ad suam se Ecclesiam recepit, vt commissum sibi gregem ipse per se exemplo, doctrina, sacrorum administratione pasceret. Id autem ita præstitit, vt per totum illum tractum, qui erat Abbatix vicinus, sancti Abbatis nomen ac famam, sicuti Salmantiæ euenerat, breui compararit. Sic erat propenso in res diuinas animo, vt iis perscrutandis non solum sex quotidie totas atque integras horas priuatim impenderet; sed reliquo etiam diei tempore assiduam earum memoriam agendis negotiis intermiseret; ne vñquam ab Dei præsentia, quantum homini fas, mente exularet. Immaculatam Virginem Mariam ex intimo sensu diligebat;

& absque dubio creditur eius ope singularia sæpe à Deo accepisse dona, multaque nouisse ad animi salutem cumprimis conducentia. Ardentissimo item Euāgelicæ allequendæ perfectionis agitabatur æstu. Atque illa potissimum cogitatio eius animum dies noctesque versabat, num fortè gratum Deo faceret, si patria, propinquis, rebúsque cæteris relictis, notas atque ignotas regiones peragrandò, vt olim Apostoli, dispersis per orbem gentibus Christi nomen lucémque inferret. Non posse quidem Rectori maximo perfectè subdi se, quamdiu terrenas opes possideret, suóque viueret arbitrio, id quodammodo persuasum habebat. Dubitabat deinde, an satis sibi esset, turbas hominum declinare, illæsum ab omni turpitudinis labe corpus animúmque seruare, & in rerum cœlestiũ contemplationem enixè incumbere; nisi illud etiam adderet, vt Christi causa suam alteri voluntatem regendam committeret, & ab eius nutu ira penderet totus, vt ne minima quidem in re sui esset iuris, vt vile prorsus mancipium, aut quolibet etiam vilissimo mancipio conditione inferior. Altera tamen ex parte, cùm in animum induceret, pacatam illam dulcémque mentis tranquillitatem, quæ ex assidua Dei contemplatione existit, eamdémque rursus fouet ac tuetur, vix cum ipsa obediēdi ratione, aut ne vix quidem posse cohærere, siquidem qui alieno subest imperio, eum sua sæpe emolumenta postponere, & suauem animi pacem obedientiæ causa inturbare, necesse est; vir egregius, qui & ob. insignem in Deum caritatem obedientiæ vinculis adstringi cuperet, & ab illa iucundissima animi quiete nullo pacto vellet dimoueri, ancipiti contentione distractus vehementer fluctuabat.

*Melchior ut Ioannem ad Societatem pertrahat,
illum conuenit, irrito successu.*

CAPUT V.

PER id tempus Melchior Nonius, qui, ut dictum est, prius Societati nomen dederat, sua sorte non modò contentus, sed etiam latus, Abbatem Ioannem in ea sibi sociare ardentè cupiebat. Multis ab illò distabat passuum millibus, nec aliter, quàm per literas agere cum ipso poterat. At cum rectè sciret, frigidæ esse epistolarum voces, nec aptas satis ad mouendum; adire ipse per se hominem, & coràm alloqui decreuit. Suum ergo cum Rectore communicat votum & consilium; utroque approbato sic inter eos conuenit, ut Melchior ad S. Iacobi Compostellani peregrinationem suscipiat, atque ex itinere ad Abbatem diuertens rem cum ipso commodè & maturè pertraheret. Ita fit. Conimbricæ proficiscitur; intra paucos dies Interamensem ingressus prouinciam, fratris domum adit, & ab eo peramanter atque officiosè excipitur. Post pauca deinde ad salutandi rationem attentia, afferre se negotium ait, quod cupiat statim & pluribus proponere, nisi ipsi molestus sit. Imò, inquit Ioannes, audiam te libèrissimè; nec tu mihi fastidium, sed voluptatem dicendo paries. Agè rem tuam dic, quàm multis uoles. Tum sic exorsus Melchior. Quid agis, inquit, mi Ioannes? Quo progressu ad animi perfectionem tendis? Scio te pietatis studio teneri; nec segniter in ea incumbere, quæ ab animo sunt, ut quod optimum factu sit, non sequaris tantum, sed etiam allequaris. Agè tamen, nullasne tibi hoc tuum pa-

stotale munus exhibet molestias? Nihilne impedit virtutis cursum? Creditu mihi. difficile. Quietos enim animos & pacis amantes nulla res acerbius agitat. Non ignoras, multos esse miserè beatos, quibus suaue est hisce curis absumi; & vereor, ut tu ipse vnus sis de numero; libensque attollas pondus planè ponderosum. Nolim te ista captum esse felicitate. Nò equidem aut munus damno, aut vitæ genus. Absit. Rectum vtrumque est, cum rectè sit; & fieri Christianæ Reipublicæ est pernecessarium. Sed aliud est, quod esse cuique potest, & ad vitæ tranquillitatem aptius, & ad salutem animi securius. Quid per ambages dictum eo, quod volo apertè intelligatur? Planè dico. Tu mihi natura germanus frater es; vitæ quoque instituto ut sis, ardentè cupio. Longè optabilior ista propinquitas, & quæ nos tanto constringet arctius, quanto est diuinior. Nisi ego te mihi hoc etiam vinculo copulare & impensè optem, & studiosè curem; vel miser fanè sim, qui quod possideo bonum non agnoscam, neque æstimem; vel in amicitiam infideliter peccem; qui non dem operam, ut amicus habeat, quod illi reor bonum. At ego & animum tuum; mi frater, tantum diligo, quantum maximè possum (ipsis enim mihi oculis multo est carior) & vitæ meæ rationem tanto habeo in pretio, ut ex caducis rebus nihil æstimem pretiosius. Quid igitur velim aliud, nisi ut mutes genus viuendi, & commutes in melius, mecumque, quem sequor, sequaris tramitem ad æternitatem tutiorem, forsitan & breuiorem? Neque enim, nisi valde fallor, terrent te illa religiosæ arcis prima & firmissima propugnacula, Paupertas, Castitas, Obedientia, quæ ipsa iis, qui sapiunt, ad hoc genus vitæ illicita solent esse magis, quàm tetricula. Et vero illa
bonæ

bonę mentis soror, caputque virtutum omnium (sicut Sapientes vocant) voluntaria Paupertas quantum abest, ut ab huius vię ingressu absterre te debeat? Quid obsecro? Credis ne eum, qui Christi causa suis se bonis spoliatur, ea vel amittere, vel imminuere? Imò conseruat, auget, amplificat. Pauca commutat multis, parua magnis, terrena cœlestibus, perituris æterna; nec iacturam facit diuitiarum, sed cupiditatem. Felix damnum ac fructuosum, quo tanto quis euadit locupletior, quanto se magis habendi exuit voluntate. In mentis enim inopia, non in tenuitate rei possessę vera paupertas est, ut ex Magno Gregorio didicisti. Et is censeretur diues debet, non qui multa possidet, sed qui nec indiget, nec appetit possidere. Atenim illa altera libidinum dominatrix, expulsiueque vitiorum, & ut cum maioribus nostris loquar, sœcunda virtutum parens, pudoris vinculum, morum ornamentum, pacis conciliatrix, quę vitam agit in terris cœlestem, æmula mentium beatarum, quã te allicit ad sese? Non quidem, ut nunc primùm ipsam amplectaris, cui prius dedisti manus, & cum sacris simul solemnibus sacramentis te addixisti. Sed optat reponi in loco tutiori, quę nunc in publico est, exposita prædonibus latere thesaurus debet, ne periclitetur. Inter epulas difficile est esurire, vel ad ignem frigere. Maior esse inter turbas tumultus solet, & frequentior ac sœuior exoritur in alto mari tempestas. Eò igitur transfer castimonię tuę thesaurum, ubi melius delitescens, certius custoditur. Iam verò quid ego tibi verbis multis illam inculcem, quę Augustino & Gregorio testibus, omnium est mater, custosque virtutum? Obedientiam dico, cuius ea vis est, ut nihil in Religione sit vel ad aggrediendos animi hostes fortius, vel ad expugnan-

des potentius. An ne putas quidquam esse homini
posse obedientia vtilius, quæ ita certa dux vitæ est,
nulla vt in re sinat errare, quem dirigit bona fide se-
quentem? Quid tandem illa alia Religiosi status emo-
lumenta? Multorum inter se vnicè amantium sincerus
amor; idémque & concors dissimilium voluntatum,
atque in omni re consentiens, vt ita dicam, consensus;
cùm ad mala fugienda, tum ad consecretanda bona &
à rectoribus remedia, & à sapientibus consilia, & ad
omni sociorum cœtu precû subsidia; vera animi pax
& tranquillitas; tumultus ac molestiæ, curarúmque
inutilium recessus & solitudo; frequentissima piorum
operum cum magno gaudio & fructu exercitatio.
Quorsum percurro singula, quæ experiendò magis,
quàm dicendo cognoscuntur? Agè, mi frater, da ope-
ram, vt ea ipse quamprimum experiare. Animosè ab-
rumpe, si qua te ligant, vincula; & me ad meos re-
deuntem bis frater & socius comitare. Hæc vbi di-
cta, siluit Melchior, & Abbatem intuitus responsum
silentio postulabat. Tunc sic exorsus Ioannes. Quan-
ta me voluptate tua oratione perfuderis, tu ipse, Mel-
chior, meo in ore atque in auribus agnoscere potui-
sti. Benignum enim, attentum, facilem expertus es
auditorum. Quæ autem de religiosæ vitæ ratione co-
ràm disputasti, ea ego ita sublimia atque excellentia
esse apud me reputo, vt ieiunè à te, & frigide (dabis
mihi hanc veniam) disputata esse existimem. Cùm-
que multa exprompseris, quæ ipsa per se magna &
auditu dignissima sunt; omisisti tamen plurima, forsi-
tan nihilo minora, quæ ego audissem abs te pari at-
tentione & voluptate. Itaque de religioso statu vt
mirificè sentias; tamen vt præ me sentias sublimiùs,
numquam tibi dabo. Nec puto quidquam in eo esse,
quod

quod delicato etiam homini nimis formidandum sit. Quidquid enim difficultatis habet, id quidem, si minus natura, auxilio certè diuino, quod cuique semper præstò adest, non difficile superatur. Sed aliud me tenet, & planè reuocat ab hac viuendi ratione, quæ magna ex parte in obedientiæ vi, hoc est, in sollicito quodam ac pleno curarum ministerio posita est. Vt verò hanc vestram Societatem ingenio meo minus aptam putem, illa efficit negotiosa quidem ac permolesta, quam sibi tamquam propriam assumit, iuuandi alios procuratio. Nam & qui obedientiæ legibus subiacent, sic ad omnia, quæ erunt præcepta, debent esse prompti atque expediti, ut vix ab opere discernatur imperium; & qui in aliorum salute procuranda exercent sese, eos oportet oblitos sui in alienam excubare vtilitatem, multùmque laboris atque industriæ adhibere, ne quid prætermittant, quod sui muneris esse iudicarint. At quantum vtrumque quietis animis & contemplationis otio delinitis perperissum est? Quantum etiam mihi ac meis moribus dissentaneum? Quàm enim possim ego sine maxima animi mei molestia iucundissimam quietem abrumpere, meque iis, quos ex diuinis rebus meditandis percipio, honestissimæ voluptatis fructibus priuare? Hoc me tenet, Melchior, hoc sic stringit, ut aliud vitæ genus non modò optare mihi, sed neque etiam animo meo consentaneum possim cogitare. Næ tu, Ioannes, interpellat Melchior, duplici, ut video, in errore es; dum & illum viuendi modum, qui in sola rerum diuinarum contemplatione versatur, cum obedientiæ legibus pugnare credis; & eundem ipsum sic effers, ut nihil ei in hoc genere non tantùm superius, sed ne par quidem aut æquale esse apertè significes. Quid si

ego facile ostendò, vtrumque à vero abesse, & te fac-
teri cogo errorem tuum? Non agam multis, neque
enim opus. Numquid inficiari mihi poteris, multos
olim fuisse, & esse modò tum in vrbibus, tum in de-
sertis locis religiosorum hominum cœtus obedientie
vinculis adstrictos, quibus ea vna cura sit, vt viuant
sibi, & ab omni alio soluti negotio res diuinas & hu-
manas perscrutentur? Religiosum nullum sine obe-
dientia viuere certum tibi. Quis verò ignorat, pluri-
mos esse, quibus id potissimum est, vt in penuariam
illam Magni regis cellam tripartitò diuisam introdu-
ctis, in prima externam hanc mundanæ machinæ fa-
ciem, ornatum ordinem, pulchritudinem, varietatem
inspiciant; conuersi ad sese in altera, nihil relinquant
sui, quod animo & cogitatione non penetrent, & o-
mnino cognitum atque exploratum habeant; in ter-
tia demum, quæ diuina sunt, & longè à sensibus re-
mota meditentur? Hæc illa vita est, quam probas, &
beatissimam prædicas, eo in religioso homine secu-
rior, quo magis abest à lapsu, fulgentissima obedien-
tiæ face illustrata. Potestne ulli virtuti virtus illa ad-
uersari, quæ cæteras animo inserit, & custodit inser-
tas? Sed quid do lucem rei perspicuæ? Accede ad par-
tem alteram, quam tibi quoque breuiter expedio. Si
tu mihi, mi Abbas, cum sola actione contemplatio-
nem componis, lis nulla inter nos. Huic posteriori
dandas esse primas, sanctorum Patrum nullus non as-
serit, & Doctorum Doctor nos Christus docet, Ma-
riæ partem præferens sollicitudini Marthæ. Quis ali-
ter dicat aut sentiat? Non ego quidem, neque ullus,
qui sana sit mente. Memineris tamen, neminem sibi
soli, aut suis tantùm commodis natum esse. Hanc o-
mnibus præscriptam esse à natura legem, vt quoad

fas & facultas erit, alienas etiam curent, & tueantur
 utilitates. Quid enim si vel calceos sibi dumtaxat su-
 tor, aut sartor vestes conficeret; vel sibi soli terram
 proscinderet, & sementem faceret; & fruges fructus-
 que colligeret agricola; nec ullus hominum esset, qui
 quidquam aliis, sed tantum sibi labore suo præstaret?
 Vllane esset inter homines societas, quæ sine mutuis
 officiis non conseruatur, nec constat? Cæterum cum
 ista sine Actione esse non possint, quis non videt, quā
 sit naturæ legibus conueniens illa vitæ ratio, qua res
 quisque suas sic amat, ut non negligat alienas? Quod
 si in iis quoque bonis, quæ mortali vita terminantur,
 homines iuuare quidpiam excellens ac prope diui-
 num est; in eam curam incumbere, quæ ad animum
 refertur, & æterna respicit, quàm erit excellentius ac
 diuinius? Sentis, ut opinor, Ioannes, quamquam opti-
 mum est id genus vitæ, quod in contemplandis dini-
 nis est positum; hoc etiam aliud, quod actionibus cō-
 tinetur, & per se præstans esse, & cum ratione, cum-
 que ipsa hominis natura maximè congruere. Quid
 verò hinc efficitur, nisi ut necesse sit, fateare, eam vi-
 uendi rationem, quæ est ex vtraque mixta, lōgo inter-
 uallo illi esse præferendam, quæ vel in sola actione,
 vel in sola contemplatione consistit? Hanc & summus
 rectè viuendi Magister Christus; hanc, quæ fuit totius
 probitatis norma, Christi mater; hanc illi, quos idem
 Christus Religionis mysteria per se docuit, & ad do-
 cendas gentes per orbem misit, Apostoli tenuere.
 Hanc & nostra Societas, omnium, quæ Iesum sequun-
 tur ducem, Societatum minima, diuino beneficio cō-
 plectitur. Prima cuiusque nostrum cura à nobis est;
 tum aliorum utilitati quā monitis, quā doctrina,
 quā sacrorum procuratione, quā modis aliis nos
 addic;

addicimus. Idque inprimis ex instituti nostri præscripto conari diligenter debemus, ab Deo eiusque præsentia ne umquam animo recedamus; cum planè compertum sit, nisi ad Christi pedes Maria sedeat, vitæ verba aure corde percipiens, posse quidem Martham satagere, nihil tamen ad suam aliorumque salutem vtiliter agere. Itaque imitandæ nobis sunt alites illæ, quæ vel hyeme vel æstate appetente, dum ex locis quibusdam se transferunt ad alia, mariæque immensa tranando defatigantur, vt vires tantisper reficiant, ex alto ad vndas descendunt; alæque vna, vt nauigio, subter corpus substrata, alteram erigunt in sublime, veli instar; atque ita pelago feruntur, ventis impulsæ. Haud aliter à Deo, rebusque cœlestibus mentem abstrahere, ne tum quidem nobis concessum, cum ad actiones, tamquam ad tumultuosi maris vndas descendimus: altera enim animi parte hisce inferioribus curis occupata, erigi altera debet, vt concepta è cœlo diuini fauoris aura, remis, vt ita loquar, velique simul institutum cursum feliciter dirigamus. Ex quo clarè perspicis, contemplandi munus istud, quod te tantopere ac tanto iure delectat, quam non omitamus prorsus, vt forsitan opinabare, sed neque etiam inter agendum intermittamus. Hæc & alia in eadem sententiâ Melchior. Verumtamen Abbas, vt est propositi tenax obfirmata consuetudine opinio, ratur præter eam, quam fruebatur, animi quietem, nihil contingere sibi posse ingenio suo congruens, si alium iniret viuendi modum, motus quidem aliquantulum fratris oratione est, sed non permotus.

*Ioannes litantem Fabrum per quietem videt, & à
Deipara monitus Conimbricam petit.*

CAPVT VI.

RE infecta Conimbricam Melchior à peregrinatione rediit. Cùmque eadem pertrahendi ad se fratrem cogitatione nihilominus pungeretur, virgere propositū suum alia ratione cœpit. Post dies aliquot, opportunitate oblata, literas ad Ioannem dat. Hæc rei summa: Petere se ab eo, pro ea, quæ inter ipsos est, amoris coniunctione, & iterum atque iterum precari; vt curis aliis paulisper depositis, Conimbricense Collegium inuisat, quo aliquanto temporis interuallo sociorum fruatur cōsuetudine, vtilisq; cum iis habeat de rebus animi sermones; ac Petrum Fabrum, cuius aduentus propediem expectatur, videat, & agnoscat, virum insigni vitæ sanctimonia clarissimum, rerūque diuinarum apprimè intelligentem, cum quo possit omnes vitæ ac propositi sui rationes summo cum fructu communicare. His literis lectis excitatq; rursus in ægro animo curæ; nec mediocriter concussus pectus, eoque inclinatum, vt ancipitem illam de commutanda viuendi ratione animi sui pugnam maiori solitudine & contentione repeteret. Iterum igitur hinc & illinc agitari anxius homo; multa in vtramque partem secum voluere; Fabri illius, de quo in epistola legerat, conspectum & colloquium ardentè exoptare. Dum sic æstuat, & assidua obsecratione intelligere conatur, quid facere debeat acceptius Deo, sibi que ad salutem vtilius; nocte quadam sacerdotem videt solemni ritu litantem, cui ipse Diaconus assistit. Vbi eò

ventum, cùm pax de more datur; Ioannes, cuius id in illo adumbrato sacrificio munus est, ad dextram facientis accedit, & inde, vt fit, illud, quo dari pax solet, porrigit instrumentum. Sacerdos renuens accipere, modica capitis inclinatione porrigenti innuit, vt ad læuam vertat se, & inde porrigat. Negat Ioannes ex ea aræ parte id officitum præstari; pergit porrigere ab dextra. Iubet iterum sacerdos, vt ad sinistram se vertat, & inde porrigat. Miratur Abbas, nec intelligit, quonam modo iubeatur à præscripto Ecclesiæ ritu præter morem recedere. Dum hæret dubius, magnoque pressus stupore, somno soluitur: statùmque illustrante montem Deo in ducit in animum, videri illis visis significatum, non à sola contemplatione, sed ab actione simul petendam sibi esse eam pacem, qua frui desiderat; forèque & gratum Deo, & ad salutem animi sibi vtile, si partem vtramque, dexteram nimirum contemplationis, & actionis sinistram simul complectatur. Vt ergo hac de re fiat certior, ad æternum Numen supplex recurrit, à quo profusis lacrymis, quantum potest, demissè precatur, suam vt sibi hac in re aperiat voluntatem. Id verò vt obtinere faciliùs queat, Deiparam Virginem, cuius imprimis nitatur ope, certo sacrificiorum numero statuto, sibi conciliandam putat. Altero igitur à Calendis Nouembris die, dum sacrum facit, suùmque sanctissimæ Virgini negotium exponit, & eius se curæ ac patrocinio committit, enixè petens, vt quæ ad rem tantam rectè perspiciendam, & aptè tractandam necessaria è cœlo lux est, eâ sibi clementissima Mater à Filio impetret. Ecce ipsa mundi Regina, specie pulcherrima, atque immortalì circumfusa splendore, qualis & quanta videri cœlitibus solet, & litatì seruo se spectandâ præbet, eiusque

animum incredibili iucunditate perfundit. Aderat cū beatissima Dei matre Petrus Faber, ille ipse, cui paulo antè sacrificanti idem Ioannes per quietem ministrarat; quem statim, vt vidit, ex facie agnouit. Tum Virgo seruum suum benignè intuens, Animos, inquit, sume Ioannes, & iam angorem istum, qui te nimis angit. procul pelle. Conimbricam actutum confer te: Societatis collegium adi; hunc Fabrum, quem præsentem cernis, inibi expecta: eius consilia, cohortationes, præcepta, doctrinam sequere. Nec plura, è conspectu Ioannis cum suo se Fabro Deipara eripuit. Ille tanta Virginis gratia maiorem in modum erectus, omnia difficultatū vincula, nodosque dissoluens, postero statim die, peregrinantis habitu assumpto iter suscipit; quo paucis diebus confecto, collegium ingreditur Conimbricense.

*Ioannem Faber prius instructum ac probatum
in Societatem cooptat.*

C A P V T VII.

Nondum Conimbricæ erat Faber, cū eò Ioannes peruenit: sed plures adhuc dies suum remotus aduentum videndi ac fruendi sui desiderium expectantibus angebat. Ioanni inprimis, cui cū antea non aliter, quàm in somnis, & in illo cum Deipara viso fuisset conspectus, ad eò expressam sui in eius oculis animoque imaginem reliquit, vt cum primum Ioannes ipse collegium tetigit, Melchiori fratri hominis figurā, magnitudinem, orisque ac totius corporis lineamenta probè descripserit. Quadraginta tandem post dies

dies Conimbricense collegium ingressus Faber est, quem ut Abbas vidit, illicò agnouit, & ad Melchiorrem versus. Hic, inquit, Faber ille est, cui litanti per quietem ministraui, quique mihi facienti cum suprema Matre conspectus. Haud multum moratus, secreto hominem conuenit, & cum summa animi dum submissione tum alacritate ad eius pedes accidens, totum se illi ac penitus patefacit. Quid deinde de commutando vitæ statu cogitet, & qua in obscuritate rerum atque ambiguitate sit, sincerè declarat. Illum Faber singulari quadam beneuolentiæ significatione habitum, bono animo esse iubet, & ad obtemperandum vocanti Deo hac oratione adhortatur. Nolim, vir egregie, sic ista contemplationis tuæ dulcedine rapi te finas, nihil ut opineris, præstare te posse aliud, quod sit vel Deo gratius, vel tibi ad animi quietem congruentius. Rem introspecte, deprehendes forsitan callidissimi hostis latere dolos. In hac enim quietis opinione tibi parat insidias; eaque veluti firmissimâ compede tenere te vult; uti dum in magna rerum abundantia, omni obedientiæ solutus fræno, libertimè viuis, tuoque arbitrio tibi res accommodas, in liberio-rem deinde viuendi licentiam, quod sæpe fit, paulatim delabaris; atque illam ipsam, quæ nunc tantopere te delectat, contemplationis quietem, à nullo coercitus, tandè deferas, vitæ laxioris blanditiis delinitus. Quin etiam illud te oportet considerare, in eo viuendi modo, quem hætenus tenuisti, haud posse tibi deinceps illam esse animi tranquillitatem, quæ hucusque forte fuit; cum iam constet, aliò te ab æterno Numine vocari, & latissimum quemdam de ipso, deque multis mortalibus benemerendi tibi campum aperiri. Illud tene vitæ genus, quod Christus, quod eius Apostoli

tenuere: nec tibi tantum, sed aliis etiam tuam sedulus impertire industriam. Generosæ mentis est iuuare, & prodesse. Abiice, quem times, de amittenda animi pace timorem. Quod pro Deo bellum suscipitur, pax & tranquillitas est: & eo mens pacatius agit intus, quo Christi causa foris agit turbulentiùs. His Fabri dictis valde commotus Abbas, ad eius igitur prouoluitur pedes, seque ut ad socios adscribat, & rectam doceat perfectè viuendi rationem, sollicitè contendit. Ad hæc rursus Faber, beneperitus istiusmodi rerum artifex, non ut hominis retardet propositum, sed ut firmet constantiùs. Ne temere, inquit, videre, Ioannes, & mentis magis leuitate, quàm consilio ferri, maturè perpende, quo impulsu moueare, totumque te ac vires tuas accuratiùs examina. Hic autem aptus esse poterit istius tuæ mentis periclitandæ modus. Nocte media è lecto surgito, coram Deo te supplicem sistito, eius per preces exploraturus voluntatem. Tum toto ex animo te ipsi totum deuoueto, eiusque implorato auxilium; eoque roboratus malum dæmonem in certamen prouocato, atque ea cum illo agito conditione, ut si quas habet aduersus hunc vitæ modum, quem vis inire, difficultates; si quas postea tentationum machinas ad deiiciendum te est admoturus; si quos dolos, si quas fallacias, si quas insidias & fraudes ad capiendum te est structurus; totum id, quantumcumque malorum ipsi in promptu erit, illicò expromat, & ad concepti propositi oppugnationem adhibeat. Ab hac dein pugna, ubi lux prima noctem abiget, sacrum adiuto altare, oblato ibi immaculato sacrificio, Numen tibi redde propitium, ipsumque demissè & enixè ora & obsecra, ut quod in hac causa sibi erit gratissimum, id ut perspicias, cœleste tibi lumē, ut perficias, firmas

vires robúrque suppeditet. Rem Ioannes, vt à Fabro tradita, diligenter exequitur. Ad noctem mediam excusso somno procumbit in genua; cum primum aliquantulum agit, & vires ad pugnam opémque implorat; his deinde verbis animose cacodæmonem lacessit. Huc ades; hostis hominum sæuissime, omnium architecte & machinator malorum. Audi quod decerno, quódque animo meo firmissimè fixum est. Ab hoc puncto temporis rebus caducis remitto nūtiū. Quidquid aut honorificum ad pompam, aut ambiciosum ad superbiam, aut spectabile ad elegantiam, aut iucundum ad voluptatem, siue vmquam habui, siue nunc habeo, siue habere aliquando possem, aspurnor, respuo, repudio: méque & mea æterno Deo æternū consacro: ac sub vexillo crucis per labores & dolores, per egestatem rerum, per probra & opprobria, pérque cætera omnia perpassu aspera, auditu horribilia, Christum Iesum dñcem in eius Societate mihi sequendum eligo. Tibi, immanissima & cruentissima bestia, iis que omnibus, qui à te sunt, perpetuū indico bellum. Huc igitur ades, tenta, inuade, vrge. Tuis hñc artibus vttere; solitas molite insidias; quidquid sapias, quidquid vales ad propositi mei oppugnationem profer. Non te fugio; non trepido; expecto impavidus; vltro prouoco ad certamen. Arma, quibus me defendam, téque aggrediar, non mihi alia, quàm vnicū clementissimi & inuictissimi Imperatoris mei Christi Iesū auxilium. His in fœdissimum hostem iactatis, pergit Ioannes agere cum Deo, & apud ipsum rationes expendere vitæ sibi deinceps incundæ. Cūque meditationi insisteret, tam fœda repentè tentationum procella in hominem irruit, vt facile appareret, superbissimum cacodæmonem, veluti iniuria

iniuria irritatum, omnes vires neruósque industriæ suæ voluisse ad vltionem intendere. Conuolant vndique cruenta diuersi generis tela in cor precantis magno impetu contorta. Mille cateruatim, hinc bonorum, inde malorum inter se dissidentes atque ex aduerso pugnautes erumpunt cogitationes. Ex parte vna illa inprimis se offert, qua tantopere delectatur, mentis quies, rerum cōtemplatione quæ sita: eæ deinde, quas possidet, quibúsque sine vllius offensione ad iuuandos pauperes atque ad alia pietatis officia vitur, facultates; tum quædam non dubia honores opésque licitè augendi spes; & complura generis eiusdem, quæ ipso Societatis ingressu evanescere necesse sit. Ex parte altera innumeræ propemodum obiiiciuntur noui status difficultates, quas non vno aut altero tantum anno, sed toto vitæ tempore, quamlongum illud erit, velit nolit, subire debeat. Isthæc omnia aded viuissimis animatisque figurata imaginibus sollicito animo obuersantur, vt iam se vndique sexcentis circumseptum miseriis, sine nomine, sine libertate, sine vlla sp̃e fortunæ melioris, vilem, obiectum, omnium ioco & ludibrio expositum sibi videre videatur. Inter hæc altè quoque se in animum insinuat quædam importunè sagax futurorum prouidentia, molesto timore de perseverantia sollicita, quæ grande secum conuehens curarum agmen, nobile pectus, plusquam credi potest, acerbè exagitat. Producta prope ad auroram pugna, in qua pugnanda cū malus dæmon exhaustis iam viribus nihil proficeret, non minima dedecoris aspersus nota, militum Christi, laborioso quidem fatigatum prælio, liberum tamen victorémque relinquens, turpiter campo cessit. Ioannes ergo victo fugatoque potentissimo hoste, cū iam dies albesceret, ex Fabri

præscripto ad aram contulit se facturus sacrum. Quo in sacro cùm Christi corpus manibus teneret, noua rursus spiritus luce perfusus, adèdè firmiter apud se statuit, Societatis Iesu signa sequi, vt vasserrimi hostis confusa deterritâque impudentia firmati pectoris constantiam neque apertè, neque ex insidiis adoriri amplius vñquam ausa sit. Quamobrem his peractis anno à partu Virginis millesimo quingentesimo quadragelimo quinto, sociorum albo adscribitur, piisque spiritualium rerum cõmentationibus confestim exercetur. Tum verò Paupertatis quoque, Castitatis, & Obedientiæ votis coram Fabro sponte nuncupatis, extrema culinæ officia tam demissè, promptè, hilarèque amplexus est, vt Faber idem doctus morum & religiosæ disciplinæ censor absolutè affirmaret, nunquam se virtutem vidissè sub proprio arbitrio in seculo natam & adultam, quæ sub alieno imperio ad nouitia Religionis opera tam facile flecteretur.

*E¹ Lusitania in Africam mittitur Ioannes, &
Septæ rem Christianam egregiè
promouet.*

C A P V T V I I I.

AD excolendum se se religiosis virtutibus, atque ad alios tum domesticos, tum externos exemplo & opere inuandos intentus erat Ioannis animus; cùm nec opinanti materies oblata est fructus vberioris. Præerat Septæ, celebri Mauritanix vrbì, pro Marchione villæ regalis Alfonsus Norogna eius germanus frater, vir valde pius. Is cùm sciret Christianos à Sarace

Saracenis bello captos, inque vicinis Maurorum oppidis degentes, grauissimis animi & corporis miseriis afflicti; caritate motus, binas in Lusitaniam literas dedit, ad Regem vnas, ad Simonē Rodericum Societatis in eo regno moderatorem alteras. In vtrisque de infelici captiuorum statu permulta. Hæc potissimum ad regem: Miseros illos homines non tantum miris modis à Mahumetanis, efferata gente, vexari, & acerbissima quæque pati; sed omni quoque fidei doctrina esse destitutos; atque ob eam causam viuere exleges; adeoque impiæ gentis cōsuetudine à Christianis moribus ad nefaria scelera desciscere, vt præter vnum nomen, vix aliud habeant, quo ad Christi gregem pertinere cognoscantur. Maximè ad ipsius Regis clementiam & pietatem spectare, aliquos vt eò mittat è Societate religiosos, quorum opera & industria nutantes firmentur, sustineantur labentes, erigantur lapsi, & quæ ad vitam ac libertatem erunt necessaria, omnibus suppeditentur. Ad Simonem paria, & eadem ipse per se Regi suggerat, eumque ad ferendam miseris opem pro sua virili permoneat. Illud insuper, precari se vehementer, vt Regi aliquot è Societate homines ad hoc opus efflagitanti, ne qua excusatione durus obstitat: nihil enim magis esse è re Christiana, aut in quo cum maiori Dei honore & Societatis existimatione desudare queat Patrum industria. Rex & Alfonsi literis, & Simonis denuntiatione factus de re certior, laudata inprimis Præfecti pietate ac sollicitudine, nõ volens tantum, sed etiam libens in eandem venit sententiã. Moxque à Simone petit, vt aliquos è Societate destinet ad missionem idoneos, suis deinde ministris præcipit, vt quæ ad rem totam aptissimè peragendam opus esse censebuntur, abundè suppeditent, caneant.

que, ne vlla in re, aut Patrum commodis, aut captiuorum necessitatibus ipsorum siue caritas, siue liberalitas desideretur. Simon, quod erat in se, accepto Regis decreto, ex omni sociorum multitudine, qui se virisque suas ad eam rem certatim & studiosè offerebant, sacerdotes duos elegit, Ioannem Nonium Barretum, quo de agimus, & Ludouicum Gonzaluium de Camera, virum multis nominibus in Lusitania atque in tota Societate notissimum, qui paucis antè mensibus in Conimbricensi collegio Rectoris munere fuerat perfunctus. Tertium addidit ad domestica ministeria, Ignatium Vogadum, non ita pridem ad Societatis admissum tyrocinium; sed qui eam breui dederat cuiusdam maturæ ac perfectæ virtutis significationem, vt dignus esset, qui tali loco haberetur. Paratis rebus terrestri itinere è Lusitania profecti, non ita multo pòst Beticâ peruenere. Conscensa ibi naui, Septam perducti sunt. Quamdiu in ea vrbe fuerunt, ad aliorum utilitatem totos se accommodarunt. Quid verò & quantum concionando, conferendo sacramenta, cætera pietatis officia exercendo egerint, non potest paucis, nec facile explicari. Inde aliquid colligetur, quòd gens illa, militari magis insolentiæ, quàm morum disciplinæ assueta, vsûque armorum & Mahumetanorum cruore efferrata, ita per id tempus bonorum operum exercitationibus mansuefacta est, & ad omnem probitatem inducta, vt miratus Præfectus, gaudióque exiliens, literis ad Simonem datis, gratias inprimis multas ipsi egerit, quòd tales eò viros miserit, quorum labore & exemplo res Christiana mirandum in modum prouecta sit; omni deinde assenuratione affirmauerit, tantam in eadem vrbe factam esse animorum mutationem, vt qui antea vel ipsos Mahumetanos, acerrimos

acerrimos totius honestatis aduersarios morum improbitate superabant, commutata viuendi ratione, parum iam viderentur esse religiosi dissimiles; veréque dici posse, profana militum castra in claustra trāsisse religiosa. Addit iisdem in literis Norogna, misisse se ad Acenum (id Mauri cuiusdam gubernatoris erat nomen) qui facultatem ab eo Patribus obtineret, ut possent Tituanum, Saracenorum oppidum, libere tutoque comineare. Atenim non tam timere se impedimenta cacodæmonis, quam ardentia ipsorum Patrū desideria. Tanta enim, inquit, mortis pro Christo oppetendæ inflammantur cupiditate, ut si Tituanū adeant, dubitari non possit, quin dum igneo quodam spiritus impetu in Mahumeticam superstitionem inuehantur, perfidæ gentis odium, manúsque in se conuertant, & capite luant loquendi libertatem. Id ut ipsis dulce ac decorum sit, captiuis certè, quorum causa in hæc loca venire, maximo erit detrimento. Quântum valeo & mihi fas, obsecro & obtestor, optime Simon, ut captiuorum salutem & commoda benignis oculis respiciens, Patribus istis tuis per literas præscribas, ne quo spiritus æstu ita sese abripi sinant, ut terrore deposito, diuina Christi mysteria per compita & vicos publicè palàmque prædicent, & ad ea amplectenda pertrahere conentur hoc hominum genus adamante durius: sed miseris Christianis animo scitius, quam corpore vexatis ferant opem, & impendant operam, eos in ergastulis inuisant, colloquiis recteent, consiliis instruant, confessione expient, Eucharistico pabulo reficiant, in fide fulciant, in malis solentur, ad grauiora præparent, multisque aliis leuationum modis, quos non ignorant, eorum corpora animósque pertractent. Satis quidem magnam, in his-

ce rebus esse benemerendi segetem ; vnde commendabili laborum toletantia, & longa, vt ita dicam, mortis perpeffione ipsos martyrij fructus absque dubio percipient; quamuis mors illa breuior, quàm sic adamant, ipsorum votis desideretur. Quinetiam ne Mauris hisce, quorum vasrum & ad suspiciones procliuè ingenium est, vlla vel quidquam à nobis metuendi, vel alicuius mali machinandi præbeatur occasio, iudico oportere, ita Patres in eam urbem ingrediantur, vt non continenter inibi persistant; sed per speciem gerendi redemptionis negotium eant sapius ac redeant; donec tandem omni sublata cuiuscumque mali suspicione, & contracta etiam, si fieri poterit, cum magistratibus amicitia, liberè possint non Christianorum tantum res gerere, sed ipsos quoque Saracenos ad amplectendam fidem prudenter cautèque allectare. Erit quoque hunc in finem, vt opinor, vtilissimum, si Patribus iisdem curam captiuos redimendi publicè Rex demandet; cum in ipso Redemptionis nomine & Maurorum terros liberè ingrediendi, & in iis pro libito diutius commorandi ius quoddam inesse videatur, quod non solum ab animis barbarorum remouere possit causas malè suspicandi, verumetiam iisdem illis, quibus talis cura commissæ, securitatem præstet ad diuina commodiùs peragenda. Pro huiusmodi autem consilio, quod autumo rei Christianæ esse maximè salutare, hoc mihi à te præmij loco solui volo, vt pollicear, dum præfecti officio in Africa fungar, nõ auocaturum te in Lusitaniam ipsos patres, quorum discessu quàm grauià in his locis dāna passura sit Christi Respublica, ignorare nemo potest. Hæc ad Simonem Alfonsus. Interim obtenta ab Aceno adeundi Tituanum facultate, Præfecti iussu quæsitæ viri tres
secta

secta & genere Saraceni , probatæ tamen apud Lusitanos utcumque fidei, qui duces viæ & custodes Patribus essent. Horum in comitatu cum pluribus aliis, qui negotiandi causa in idem oppidum ibant , pridie Idus Septembres septa discessere. Quamvis autem brevissimum iter sit, non leue tamen vitæ periculum subiere , cum egressi è sylvis latrones magno impetu irruerent, cumque & cædem haud dubie facerent, nisi viatorum multitudine fuissent deterriti.

Ioannes cum sociis Tituanum ingressus captiuorum commoda impensè curat.

C A P V T IX.

Tituanum , sicuti dixi oppidum est in Mauritania, cuius nulla, ut opinor, apud veteres Geographos memoria. Superioribus annis, post captam forte à Lusitanis Septam, crediderim , à Mauris conditum, vel certè confluentibus hincinde colonis ex paruo & ignobili pago ad oppidi magnitudinem excreuisse. Ad radices Atlantis iacet, loco maritimo & piraticæ vsui peropportuno. Leucas tantum quinque versùs Euronotum Septa distat, difficili tamen & infesto excursoribus itinere. Huc Patres, eo latronum periculo perfuncti, incolumes peruenere. Saraceni , quibus nihil pecunia carius est, cum eos scirent redimendorum captiuorum causâ illuc aduenisse falsis externæ benevolentiz signis verum atque intimum in Christianos odium occultantes , aduentum gratulantur , eodemque hospitio , quo recipi Christiani mercatores solent , simulata benignitate recipiunt. Pueri tamen,

nondum per ætatem apti fingendi artifices , parentum animos factis suis periclitari. Nā vt rabiosi catuli, nostros, tamquam notos generis & superstitionis suæ hostes, furiosè adlarrare , insequi , admordere , inque ipsos lethalem illam, quam cum lacte nutricis sugūt, aduersus Christianos malevolentiam, ore, verbis, motu corporis, pugnis etiam expromere; libique videbatur beatus, qui illos poterat iniuriosa manu contingere. Insequente die, vt captiuos inuiserent, iisque aduentus sui causas indicarent , in varias oppidi partes discurrere. Reperti sunt , qui statim vellent peccatorum sarcinam deponere. Fuit in iis honestus sacerdos, gente Gallus, Mauri Sutoris mancipium, qui grauissimo fractus morbo vltimum agebat spiritum. Dum Camera , Gallicæ peritus linguæ , eius confessionem excipit , Barretus diligenter curat , vt vitæ pane reficiatur prius , quàm exeat è vita. Parat , quæ ad tanti mysterij venerationem cultumque eo loco necessaria. Inprimis quotquot in oppido sūt liberi Christiani, iis per nuntios induit, vt quamprimum veniant ad se. Ex ipsis deinde seligit , qui diuinis Psalmis decantandis visi aptiores. Tum faces multas & cereos accendit. Pompa demum , quantam tempus locusque ferunt, solemniter comparata , augustissimum sacramentum ad ægrum defert. Nullus fuit Mahumetanorum, quem ad hoc spectaculum non disrumperet inuidia , & insana quædam rabies non laceraret. Nullus etiam Christianorum, qui lacrymas præ gaudio non funderet , summâsque præpotenti Deo non ageret gratias, quòd in locis à vera religione alienissimis , atque inter medias frementium barbarorum caternas sub ea specie vellet de perfidia triumphare. Expiato confessione, & refecto Eucharistia Galli sacerdotis animo, cetera

tera deinceps, quæ vel ad temporalem, vel ad æternam salutem conferre poterant, insigni à Patribus caritate tãdiu exhibita, donec extremus hominem habitus cum vita defecit. Tum verò non minori diligentia procuratum, præter loci morem, sepulture officium. Effertur funere corpus, Lusitanorum humeris impositum, pèrque medium oppidum cum cantu & æris campani sonitu (quod multis ante sæculis illic non visum) summo Christianorum solatio, ne dispari Saracenorum stupore, ad destinatum locum deducitur, iussisque rete persolutis, communi parèti seruandum commendatur. Quàm misera verò, quàmque ærũnosa sub immanissima illa Maurorum seruitute captiuorum conditio sit, in hoc vno, de quo dixi, Gallo sacerdote aliqua ex parte videri potest. Rem Ludouicus dũ moribundo homini sorbitiunculam pararet, attentè obseruauit. Iacebat humi ferreis adstrictus & oneratus catenis: magnam sanguinis copiam continuò euomebat; tanto cibi potúsque fastidio premebatur, sex ut iam integros dies nihil omnino degustasset. In sũma itaque vitæ desperatione animam exhalabat, cum Maurus Sutor morientis dominus, & quatuor alij vel quinque Saraceni mercatores ad ægrotum ingressi, ut eum emerent, & cariùs postea venderent, contemplati iacentis vultum, considerare morbum, experiri vires, cogere ut surgeret, & subsisteret in pedes, deque ipsa venditione agere inter se. Acuebat Maurorum auaritiã caritas nostrorum. Cùm enim eos viderent, eximìa quadam sollicitudine ægri salutem procurare, suspicati virum esse aliquo illustrem nomine, cui viri tales tanta diligentia subseruirent, lucri cupiditate pelleret, spem magis victuri hominis, quàm viuum hominem volebant emere. Neque peior hu-

potue

ius,quàm reliquorū sors. Quo quisque creditur minori pretio redimendus, eo tractatur vilius ac sæuius. Estque illud istis ælluis ferè solemne , vt cum æger vi morbi ed perducitur, vt ne mouere quidem se possit; tum verò omni destitutum auxilio in ergastulo, vel loco simile relinquant fortunæ arbitrio expositum: quod faciunt maximè , cum iam ægroti vita omnino est desperata; hanc enim non pluris æstimant , quàm quantum ex ea lucri se percepturos sperant ; nec aliter , quàm propriis commodis caritatem metiuntur. Aded sordidissima ista auaritiæ mancipia obstrictos habent animos habendi cupiditate. Tanta per oppidū multitudo huc illuc errabat , vix vt eos caperent plateæ. Onusti omnes ferreis vinculis, pallidi, macilenti, deformes , fame prope enecti , cum die integro nihil ederent aliud, nisi tres breuissimos ex zerzena panes. Id semen est terrei coloris , insuaue , parūmque idoneum ad nutriendum obiurgationes, maledicta, probra, verbera, plagæ , & quæ eiusdem generis sunt , ea obsonij loco erāt. A luce prima vsque ad tenebras, sine vllō quietis interuallo , suis quisque operibus duriter exercebatur. In oppido multi frumentarias molas versare manibus, vectare onera, hortos colere, modisque aliis defatigari. Plurimi diurno tempore agris addicti; partim armentorum greges& pecora pascere, partim pro temporum varietate terram aratro proscindere, sementem facere, occare, sarrire, metete segetes , fruges colligere , & cætera rei rusticæ munia præstare. Hinc ergo durissimis exerciti laboribus , illinc inedia confecti, hominum potius simulachra, aut effossā cadauera, quàm veri homines videbantur.

Ioannes & socij circa captiuos iuuandos sacerdotis Contreria exemplum imitantur. Oppressus morbo Camera Septam repetit.

CAPVT X.

ERat illis in locis Hispanus sacerdos, loco natus honesto, virtutis fama admodum clarus. Eius eximia in captiuos caritas suo nos iure obstringit, vt ipsius hîc priuatim meminerimus. Contreriam appellabant: id cognomen erat, nomen non proditur. Quinque hic primùm annos obsidis loco Tituani cōtinenter fuerat, quòd pro captiuis creditò redemptis, vltro fidem suam barbaris præstaret. Ipso deinde redemptionis negotio sponte suscepto, sæpius cundo ac redeundo, in eodem caritatis officio plures alios insumpsit annos. Hæc vna erat per ea loca vox, Contreriam virum esse insigni quadam præditum sanctitate. Talem Christiani, talem Saraceni, talem Hebræi prædicabant. Tanta quippe excellentis cuiusdam virtutis vis est, vt nusquam latere possit, & ab iis etiam, qui teterrima scelerum obruti caligine honestatis lucem videre nequeunt, eius splendor & pulchritudo conspiciatur. Multa de hoc homine laude & prædicatione dignissima efferuntur: ex quibus illud, quod appetente nocte, quando à diurnis negotiis quies erat, solitus esset ad ergastula conferre se; rectè viuendi præcepta captiuis tradere; salutis curam commendare; ad patientiam ipsos atque ad omne probitatis studium adhortari; certo precum numero ac forma simul cum iis Numen sibi propitium reddere; denique quidquid somni ad laborum curarumque leuationem capiendum

dum erat, loco incommodo & aspero inter eosdem capere; inibique ad exortum Solis perseverare, ardentius desiderabat, ut aliqui ex Societate illuc mitterentur, atque id ipsum, ut praefectus Norogna non optaret tantum, sed etiam peteret, & quoad posset, impetrare niteretur, magna ex parte suasionibus suis creditur effecisse. Cum primum igitur Patres Tituanum ingressi sunt, tanti viri fama, qua nihil tunc ibi celebrius, mirabiliter excitati, eius prorsus vestigiis insistere decrevere. Vnde factum, ut quod habebant inter mercatores hospitium, vltro desererent, & in ergastulis, nocturno saltem tempore, cum captivis esse mallent, quo possent facilius illa Contreræ opera imitari; rudes nimirum instituere, solari mæstos, desperatis & oppressis opem ferre, iratos coercere, diffidentes conciliare, omnes in officio continere, atque ad amorem Dei & spem salutis languentes excitare. Vnâ cum illis pias in cælum mittebant preces, quibus potissimum à Christo Opt. Max. suppliciter efflagitabant, ut non solum ab æterna animi, verum etiam à temporaria corporis servitute in utramque ipsos libertatem assereret; ne fortè immaniissimæ dæmonum subiecti tyrannidi, aut acerbissimo barbarorum pressi dominatu, suaviissimum divinæ obedientiæ iugum ferre vlllo modo recusarent. Ad hanc rem supremæ matris auxilium multis ac magnis precibus implorabatur, ut quam, miseri omnes & quavis oppressi difficultate peculiari quodam iure adiutricem habent & patronam, eam ipsi maximè, qui omni humana ope carerent, & in miserrimo vitæ statu essent constituti, propitiam præ cæteris, secundamque experirentur. Acerbissimè tamenangebantur Patres, nec continere lacrymas poterant, cum viderent ingentem

Christia

Christianorum multitudinem subterraneis inclusam ac veluti sepultam cauernis, mœrentem, squalidam, fordidam, ad eò arctè angustèque compressam. Vix vllus erat, qui posset aut fessū corpus vlla ex parte volvere in aliam, aut contracta brachia, pedesve aliquantulum exporrigere; verùm sic omnes ob angustiam loci inter se permixti, perturbati, confusi cogebantur esse, vt aliorum pedes vllò sine discrimine aliorum vultibus adhærescerent. Iamverò grandes illæ ac pōderosæ ex ferro catenæ, quibus colla pedesque miserī homines ligabantur, quouis motu corporis talem per opacos obscuri carceris meatus edebant strepitum; nihil vt cuiquam esse posset magis horribile, magisque formidabile. Hanc autem expressam ac plene viuatū inferorum imaginem, tamque luctuosam miserimæ gentis conditionem non sine graui sensu doloris intuens Barretus, ipsa prima nocte, qua illuc cum sociis ingressus est, productis in medium ex Psalmō octogesimo septimo. verbis illis, *Posuerunt me in lacu inferiori, in tenebris & umbra mortis*, concionem habuit ad vinctos admodum salutarem; in qua de miserima eorum sorte, qui sua ob scelera perpetuis addicti sunt cruciatibus, primū disseruit; ipsos deinde ad rectè viuendum, ne ad eadem detruderentur Inferorum supplicia, seriò adhortatus est. Facto sine dicendi, certa pecuniæ summa per singulos distributa. Habita peculiaris infirmorum ratio; his enim ea quoque præstita, quæ visa idonea vel morbo leuando, vel sanitati recuperandæ, quæ verò cuique erant necessaria, tanta diligentia, tantæque animi voluptate Patres ministrabant, vt se in illis pauperissimis Christi seruis Christum ipsum omnium Dominum agnoscere & venerari apertissimè ostenderent. Non
potue

potuere autem continere sese, quin fidei veritatem quibusdam Mahumetanis priuatim aperirent. Illos tamen præcipuè sunt adorti, qui à Christo defecerāt; iisque & Mahumetanæ superstitionis fœditatem, & desertæ religionis pulchritudinem, & statutas desertoribus pœnas, & summam Dei in resipiscentes benignitatem ita probauere, vt tres statim deposito mentis errore susceptum scelus deplorarent; parati Christi fidem, omni vitæ periculo posthabito, vbique gentium apertè palàmque confiteri; & occasione oblata ad Christianorum terras primo quoque tempore remigrare. Horum ex numero adolescens erat patria Lusitanus, ex nobilibus parentibus Olisipone ortus; quem Camera ad veritatis viam reducere pro sua utilitatis conatus, Dei tandem misericordia multam post operam reduxit. Dum hisce operosis negotiationibus Patrum animi destinantur, nec præterire quidquam sinunt, quod è captiuorum utilitate, aut re Christiana esse intelligant, ex assiduus laboribus acuta febre Camera corripitur: & cum nulla essent Tituani medicamenta, nulli medici, visum Barreto, vt ex templo Septam deferretur. Acenus gubernator, siue quia in eo discessu aliquid insidiarum latere putabat; siue quod timeret, ne sua sibi commoda minuerentur, incertum quo animo, non modicè tamen obsistit, ne sociis relictis ægrotus proficisceretur. Tandem partim prece & ratione victus; partim quia sibi utilius credidit, paucos ex Patribus, qui captiuorum vitam & salutem, hoc est, Aceni ipsius, & reliquorum barbarorum lucra, sua industria tuerentur, quàm nullos omnino habere, discedere Cameram passus est. Ille Septæ ex Præfecti imperio impensè medicis commendatus, diligentibus eorum opera breuiter sanitatem recuperat. Vbi verò

per eam licitum intermissa repetere negotia , cū ipso primū Præfecto agit de Christianæ religionis desertoribus, quorum ex variis nationibus ingens Tituani numerus est. Ab eodem deinde impetrat, vt iis , qui ad eam redire velint, publica fides detur , & liber in urbem Septam commeatus. Post hæc aduocata concione inter varia salutis monita de captiuorum miseriis paululum differit, ad easque ex parte subleuandas audientes adhortatur. Denique ipse per se, concione demissa, urbis vicos lustrat , & stipem cogit ostiatim. Cū libenter omnes, pro sua quisque facultate, aliquid erogassent , ea pecuniæ summa collecta est , vt miserorum inopiæ non mediocre allatum sit adiumentum. Cogitabat Camera Tituanum ad socios reditum, cū inde literas accipit, quibus ei Barretus præcipiebat, vt quo primū tempore posset, Lusitaniam repeteret , & miserrimam captiuorum sortem Ioanni Regi coram exponeret , deque adhibendo remedio cum eodem sollicitè ageret.

*Profecto Camera, Ioannes Tituani remanens in
iisdem persistit caritatis operibus.*

C A P V T XI.

POST Ludouici Gonzaluij de Camera ex Africa discessum , quinque adhuc annos Tituani subsistit Barretus. Toto eo tempore ad ea procuranda , quæ captiuis siue ad salutem animi, siue ad vtilitatem corporis aliquomodo conducerent , tanto studio incubuit , vt eorum commodis nihil haberet potius aut prius. Frequenter ipsos suauissimo Eucharistiæ cibo

S reficie

reficiebat; frequentius poenitentiae sacramento expiabat. Erant in his multi, qui ab annis circiter viginti inexplicabilibus scelerum irretiti nodis, ponderèque oppressi grauissimo, neque extricare se possent, neque planè consistere. Atque hi, quo maiorem cum viris longinquitate temporis amicitiam contraxerant; eo ab iis auelli poterant difficilius; tantòque erant rerum coelestium rudiores, quanto diutius sub atroci & cœdæmonis famulatu constituti. Nec de Deo cogitabant umquam, nec aliud, quàm quod terram scaperet, sapiebant. Eos igitur summo, cum labore, erudiebat, atque ad vitæ antea actæ odium, & renouandæ mentis desiderium, quantum poterat, incitabat. Multis Barreti opera restituta corporis libertas, cuius insana cupiditas, degeneres nonnumquam animos ad nefaria impellit, longèque grauiori, quàm subiecta corpora sunt, subiicit seruitutis iugo. Eiusdem industria in multis conseruata & stabilita fides, quæ rerum inopia & egestate veluti bellicis machinis sapillime tentatur, sæpe nutat, non rarò etiam miseranda labitur ruina. Multi, quibus nulla ferè exeuendæ seruitute spes erat, vt spe libertatis melioris Christi fidem firmiter retinerent, atque in aduersis patientiam, & constantem tum in vniuersa vita, tum in singulis actionibus æquabilitatem seruarent, inque ipsis, vt ita dicam, scelerum officinis sine scelere viuere conarentur, eius consiliis & monitis persuasi. Medici, & chirurgi, ac cæterorum, qui ad ægrotorum curam deputari solent, vnus ipse partes agebat. Si qui parum firmis erant viribus, nec sine vitæ aut sanitatis damno incumbere operibus poterant, ne quid à rigidis dominis paterentur, eorum ipse pensa peragebat. Sæpe sub noctem cum socio Ignatiò collectas in ergastulo sordes

deportabat aliò, ubi captiuis noxiæ esse non possent. Dum in illo oppido fuit, ad omnia captiuorum com-
moda ita ferunt animum adiecisse, vt nullam perfe-
ctissimæ caritatis officium vlla ex parte præterierit,
verè vt dici queat, multo magis ipsum, quàm eosdem
captiuos durissimæ seruituti fuisse addictum. Cæte-
rùm licet Barretus vitam degeret adeò difficilem, tot-
que ac tantis animi & corporis exercitatum curis, ex-
terris à patria, distractus à suis, inter immanes Chri-
stianæ fidei & Lusitani nominis hostes, apud quos
omnia ipsi erant sæua, nihil iucundum, nihil mite, ni-
hil quod assiduos eius labores & molestias modo ali-
quo lenire posset; à Deo tamen illum & causa Chri-
sti, & captiuorum caritas hilarem lætúmque in eo
loco tenebant, vt reliquam ibi ætatem exigere non
solum ardenter cuperet, verumetiam vt obtineret,
studiosissimè diligentissimèque curares. Sæpe enim
hoc à Deo priuatim precatus, sæpe per literas à suis
superioribus petiit. Cùm autem aliquando perce-
pisset, Mahumetanos sectæ suæ timentes, de ipso ex
illis locis eiiciendo aliquoties inter se deliberasse, idne
fieret, quærendum sibi putauit ab Lusitania remediũ.
Ad Simonem Rodericum super ea re scribit. Hoc
inter reliqua vt possit consentientibus Mauris Titua-
m-æm morari, maximè sibi illud consiliũ probari,
quod initio sui in Africam aduentus Præfectus No-
rogna eidem Simoni per literas dederat. Oportere
videlicet, ipsum Barretum in redemptionis negotio
scribere vel administrum, vel famulum assignari; sic
enim fore, vt auarissimi homines, qui sacra omnia ac
profana, omnesque religiones vni pecuniæ postpo-
nunt, suis allekti commodis, ipsum inibi perseuerare,
& cum captiuis liberè agere paterentur. Summis igi-

tur precibus ab eo contendere, vt diligenter operam det, ne miseris captiuis hoc saltem vitæ subsidium auferatur. Multos enim quotidie ex magnis continuisque laboribus, alios ex inedia, alios ex ergastuli sordibus & pædore, causisque huiusmodi in graves morbos incidere, nec paucos ex iis diem obire. Cogitet proinde, quid sit futurum, si prorsus deferantur; nec tale solatium aut leuamentum habeant. Dubitari non posse, quin multo plures ægritudine corripiantur, acerbius afflicentur, in vitæ discrimen frequentius adducantur, morbi tandem potestate fracti extremum spiritum effundant. Consideret rursus, quā periculosum sit, gentem dissolutè ac licenter viuentem, nec ullis coereitam Christianarum legum repagulis, quæ plerumque captiuorum genus est, absque poenitentiae & cœlestis panis remedio à vita decedere. Non ita pridem contigisse, vt Gaditanus homo à Mauris captus, & in urbem Fetium ductus, octo ibi & viginti annos fuerit, quin toto eo tempore Christianum sacerdotem repererit, cum maximè optaret, apud quem peccatorum maculas confessione abstergeret. Hunc tandem, quæ Dei clementia est, sub vitæ finem, morbo valde inualecente, ductum fuisse Tituanum, ibi poenitentiae sacramento purgatum, sacro cibo refectum, suauissimis colloquiis recreatum, infinitis Deo actis & habitis gratiis, quòd hunc in locum tali tempore esset perductus, diem vitæ egisse supremum, ex hoc euentu rectè colligi, quantum rei Christianæ interfit, inter Europæos captiuos, veræ fidei alumnos, esse aliquem, qui difficillimis saltem temporibus possit ipsis Christiana sacra ritè ministrare. Ita in ea ad Simonem epistola Barretus, qui quantopere mortem pro Christo apud illos barbaros subire cuperet, quantæque

tâque animi voluptate inter captiuos degeret, cum multa alia, tum verba illa declarant epistolæ alterius, quam Tituano ad Conimbricenses socios in hanc formam scripsit. Quid retribuam Domino, fratres dilectissimi, pro omnibus, quæ retribuit mihi? Cum ego is sim, quem nemo vestrum non nouit omni indignum beneficio, nescio unde factum, ut primus ex Societate in hæc loca venerim, ubi possim inter immanissimam gentem & Christo maximè infestam atque inimicam, de Christi fide, deque Christianis moribus pro concione agere, Christianorum confessiones audire, vero Deo incruentam hostiam immolare, sacra nostra, nostræque religionis cæremonias Christiano ritu liberè exercere. Utinam idem ipse clementissimus rerum moderator, qui immerenti mihi ac planè indigno tam insignem gratiam contulit, illud quoque benignè adiiciat, ut eius causa, vinctulis, verberibus, atque omni supplicio excruciatum inteream, quo ipsius conspectu citius frui, & à mortali vita, quæ tam multis mortalibus immeritò carissima est, transferri possim ad immortalem. Hæc ibi. Summo illum studio omnes prosequabantur, eiusque sanctimoniam adedò suspiciebant, ut quoties in publicum prodibat, quod erat frequentissimum, ad ipsum cæteruatim confluerent, manumque alij deosculandam peterent, & inuito ac repugnanti arreperent; vestem alij venerationis ergò contingerent; ad eius se pedes alij proiicerent, multaque huiusmodi facerent, quibus & conceptam de homine opinionem, & eximiam erga ipsius benevolentiam testarentur. Sex quæ Tituani erant ergastula, quotidie inuisebat; erat ipsi præcipua aduersus infirmos cura. De his quætebat diligenter, num Pridiani haberent melius? Num de nouo

aliqui decumberent? Num his aut illis ad vtramque salutem quidquam foret necessarium, aut commodum? Si quid sciebat esse, quo iuuare quemquam posset, tanta id caritate & diligentia præstabat, vt amorem sui atque admirationem in nostris, stuporem in Saracenis excitaret. Acenus ipse, cæteroqui non æquus sanctitatis æstimator, Barreti bonitate & beneficentia victus, quoties illum vel ad ergastula euntem, vel ex iis redeuntem, vel quidquam aliud agentem alibi offendebat, faciem illi valde beneuolam atque hilarem commonstrabat. Eius quoque filius natu maior ita eundem Barretum ob eandem causam admirabatur, vt semper ipse singularia quædam honoris & reuerentiæ signa exhiberet; cùm etiam solitus esset dicere, talia opera, qualia Barretus patrabat, nec in vno quidem ex Mahumetanis suis, quantacumque is caritate & religione esset conspicuus, reperiri. Par labori & pietati fructus erat. Auctoritate sua omnem ex ergastulis ludum pepulit, quem plerumque rixæ, dissidia, & mala huiusmodi, apud tenues præsertim homines, & parum sui potentes, comitantur. Abstulit peruersam iurandi consuetudinem, qua religioni & bonis moribus nihil est infestius. Si qui iurassent, & statim arguebant inter se, & postea apud Ioannem alij alios criminabantur. In maiori ergastulo fuit de iureiurando sancta quædam inter captiuos statuta & vltro suscepta lex, paulo post ad ergastula minora facili rumore delata, & pia æmulatione retenta. Ea erat huiusmodi, vt si quis deprehenderetur, qui rei alicuius siue affirmationem, siue negationem sacra attestatone, quamquam verè, firmaret, is statim in genua prouolutus, salutationem primùm angelicam recitaret; tergo deinde nudato tet ab socio virgis quatere

teretur, vt qui toties ab immitibus dominis nefariè verberabantur, ob causam, quæ iustissima esset, ter tantum flagello pulsari non æquo solùm, verum etiam lubenti animo paterentur. Erat inter captiuos quidam ingenio aspero & ore petulante, atque ad maledicendum procliui; ob eamque rationem inuisus cæteris & exosus. Re cognita sensim Barretus in eius se familiaritatem insinuaui, & paucos post dies, sic ipsi eiúsque naturam edomuit, vt mutatus homo, animo priùs diligenti atque humili peccatorum confessione purgato, coram captiuis omnibus poplites flexerit, omniumque mortalium se pessimum confessus, ac supplicibus verbis veniam precatus, obnixè contenderit, vt eorum singuli, iustæ vindictæ loco, certum sibi plagarum numerum manu propria infligerent. Tantus virtutis ardor, tantumque rectè viuendi studium, reliquos etiam inuaserat, vt iam religiosi magis, quam captiui viderentur. Ad confessiones & Eucharistiæ sacramenta frequentissimè omnes accedebant. Non pauci quarto quoque die celesti mensæ accumbentes viniis epulis pascebantur. Dicerentur soliti, durissimos status sui labores, qui vel inpicissimos animos frangere possent, dum modo sibi patet Ioannes non decesset, nihili se omnino facturos. Hinc ortum, vt cum aliquando, vera an falsa fama, percepissent, decretum ab Arceno gubernatore, vt Ioannes Tiruano excederet, & Septam remigraret, ad vnam omnes prohi in terram reciderint, susque lacrymis, & intimis precibus supremum Numen obtestati fuerint, nequid tale fieri sineret, nève vllò modo pateretur, vt qui Barreti caritate & industria edeuenerant, vt sua iam crimina agnoscerent, eaque salutari fletu diluere inciperent, in ipso vel-

uti acquirendæ salutis articulo ab duce suo defererentur.

Suam quoque infidelibus operam Ioannes impendit.

C A P V T XII.

Qui erāt à Christo alieni, desertores fidei, Mahumetani, Hebræi, tria pessima hominum genera, tanti viri exemplo, sãmque præclaris excitati facinoribus, mentis oculos altiùs attollere, & cogitare secum, fierine posset, vt cum tali vitæ probitate doctrinæ error cohæreret; certum enim esse, morum præstantia commendari doctrinam; nec posse inanē ac superstitiosam esse eius religionem, in quo veræ virtutes sic splenderent. Multi ergo ad eum Mahumetani ventitabāt, vt de vera cum ipso fide, de vero Deo, deque tota colendi Numinis ratione seriùs agerent. Nonnulli turpissima Mahumeti superstitione relicta, Christianam veritatem sunt complexi. Idem & quibusdam accidit fidei desertoribus, qui nisi vesana quadam libertatis cupidine & viuendi licentiâ obcæcari se sinerent, numquam inducere in animum possent, vt flagitiosissimam sectam, atque ex omnium scelerum colluione conflataam sectarentur. Ad Hebræorum Synagogas itabat. Multa ibi de Christo ex diuinis monumentis doctē neruoséque diserebat. Nec erat difficile ostendere, ipsum & verum esse Deum, verumque hominem, & iam olim, vt à peccati ferultute assereret homines, pauperem in terras, humilémque venisse; neq̃ venturum amplius, nisi pera-

Et mundi periodo, quando ingenti gloria & maiestate sublimis cunctos mortales ad iudicium vocabit. Aliquando quamdam ingressus Synagogam, ludimagistrum reperit grandi septum puerorum caterua, quos ille aperto sacro volumine Hebraicos characteres noscere & legere docebat. Tum forte accepta quzdam ex diuinis verbis oracula versabant ore, & insulso strepitu resonabant. Accedit propius Ioannes, cantum interturbat, cum ipso magistro, si is velit, de religione disputaturus. Antequam verbum proferat, tanta derepente confluit Hebræorum multitudo, ut repleta domus plures capere nō possit. Ut quisque ingreditur procumbet pronus, atque inter precandum tam fœda superstitione huc illuc caput agitatur, ut insanire videatur. Subridens Ioannes rogat, cur ea ratione precentur, turpe sibi videri, tali gestu cum Deo agere. Ad hæc ex ipsis vnus, nequire se villo modo tenere quietæ capita, quin illis moribus agitentur; rem ignorantibus videri ridiculam, esse tamen maximè diuinam; illo enim eodem spiritu timoris Dei, qui maiores olim suos mirabiliter inuasit, cum lex Moysei in altissimo Arabiæ montis cacumine cœlitus data est, corripit etiam sese, quoties ad supplicationes accedūt, eoque impellente ita capita ciert, ut liberum ipsis nō sit vel tantis perquiescere. Respondere forsitan verius posset, traductam in se patris sui Caini veterem plagam. Ut enim illi à sœuissima innocentis Abelis cede, in pœnam suscepti sceleris horribilem toto corpore tremorem, atque etiam, si aliis assentimur, teteritum quoque fœtorem diuinitus contraxit: ita credi potest, relictas ipsis veluti ex hæreditate turpes illas caputum agitationes, illūque fœdum, quem vbi-cumque terrarum sunt, ferè semper exhalant ex cor-

poribus piutorem; ut dum perfidè Christum negant, participes esse intelligantur immanissimi parricidij, quo se eorum parentes nefariè contaminarunt, cum vitæ auctori per summum scelus vitam eripuerit. Inter eos, qui ad spectaculum concurrerant, vnus erat magno natu, Mosaici iuris apud ipsos peritissimus, qui & gradus auctoritate, & sapientiæ opinione antebat cæteris. Hanc Ioannes ut vidit, & legis Doctorem esse cognouit, relicto ludimagistro, ad certamen prouocat. Et mox Hispanica lingua, quam Mauritani isti Hebræi negociandi causa addiscunt, & apprimè callent, ex sacris literis plurima protulit testimonia, quibus constant omnia, quæ ipsi de Christo impie negant, nos piè & firmiter confitemur. Cæterum dantur surdis verba, mentesque cæca errorum nocte offusæ tanto obscurantur magis, quanto veritatis splendor magnificentius nitet. Et Doctor idem, & cæteri, qui adsumt, audacter negant, quæ sunt luce clariora; atque ut aspides surdæ obturant aures, nec voces audiunt venefici incantantis sapienter. Non modò igitur Barreti argumentis nihil mouentur, sed impudenter asserunt, in magna illum diuinarum rerum ignorance versari. Neque aliam assertionis suæ præter obstinationem & peruicaciam, proferunt rationem. Tum Barretus vehementissimo quodam incensus animi ardore, vocem contendit; & intrepide asseuerat esse se paratissimum pro fide Christi, quam profiteretur, milies, si toties posset, mortem apperere ex ipsis autem ne vnum quidè esse, qui velit audere pro lege sua aut vitam amittere, aut vllò se periculo exponere. Quando verò apud ipsos rationes illæ nihil valeant si quis sit, qui hoc vno modo concurre secum velit, ut pro tuenda lege, quam profiteretur an-

extremum se obiciat capitis discrimen, ecce se in medio esse ad omnia paratum, nihil formidare, nihil timere, in vno præpotentis rerum omnium Domini Iesu Christi auxilio tantummodo suffultum. Terrorem voces istæ pertinacissimis animis incussere, mentis tenebræ auctæ magis, quam diminutæ. Post hæc Ioannes remissa voce minus iterum agere, & veritatis aditum aperire. Faxit, inquit, Deus immortalis, ut quod ego mihi vehementer opto, id vobis diuino beneficio contingat. Sæpius huc, ut scitis, venio: nulla mihi alia viuendi causa, nisi vestrorum salus animorum quam tanti facio, nihil ut ardentius cupiam. Nolite, obsecro, committere, ut conatus isti mei, atque hi labores amore vestro suscepti, irriti sint & inanes. Iterum vos atque iterum hortor & precor, ut paululum consideretis, quo sitis in statu, quæve ista sit viuendi ratio, quam tenetis. Erit profectò, cum vos eius, sed incassum, vehementer pœniteat. Eris, nec longa mōta, cum animi vestri corporibus egressi suam videant cæcitatem, & istius incredibilis obstinationis meritas pœnas æternis cruciatibus persoluant. Quid non perpenditis, quàm dare, quàm asperere, quàm ignominiosè à Mauris, à Turcis, à quacumque alia, quæ in toto orbe est, natione tractamini. Eratis olim Deo in amore & deliciis: vos ille gentem suam, electum populum, & sanctum appellabat. Quot iam annos, quot secula, quot ætates inter externas gentes degitis sine rege, sine regno, sine republica, semper vagi, semper exules, omnibus despectui, & ludibrio? Atenim quæ potest huius tantæ calamitatis causa esse, post inauditum illud, atque omni sæculorum memoria detestabile flagitium, quod à maioribus vestris aduersum Dei filium commissum est, nisi vestra hæc pertinacia,

naia, qua mentis oculos euangelico splendore tam felicitè occluditis? Nonnihil hæc oratio audientium animos commouit; sed ex tam multis vnum dumtaxat flexit. Is fuit ille idem Mosaicæ legis Doctor, cum quo à Barreto instituta disputatio. Non ausus ille vitium se palàm fateri: sed abeuntem patrem à tergo insequitur, & in eandem se cum illo domum infert. Ibi remotis arbitris affirmat, attulisse sibi veritatis lumen; nec dubitare iam, quin verissima sint, quæ de Christo ab ipso dicta; esse videlicet prolem diuinam, duas in vna persona complecti naturas; venisse iam ad nos olim habitu humili & abiecto; venturum postea, cum mundo finis erit, summa sublimem gloria, & incredibili maiestate, benignum & mitem bonis, terribilem & metuendum malis, rectum inter vtroque iudicaturum iudicium. Hæc sibi & id genus cætera tam ex ipsius Barreti oratione, quam ex diuinis testimoniis, quæ ab eodem adducta, probè nota esse, ac tum quidem statim fuisse, cum audiuit dissertentem vano tamen compulsus metu, quod animo approbat, negasse ore: velle omnino ad Christi partes transire, idque haud dubiè mox facturum; cum duos liberos, quos habet, Septam tunc traduxerit, Christianis etiam mysteriis imbuendos. De vxore minus se esse sollicitum; nisi ipsa quoque velit agnoscere & venerari Christum, facile dimissurum. Post hunc alius quidam fuit Hebræus, qui clanculum ad patrem veniens, eumque de religione audiens tractantem errores detestatus est suos. Huic etiam Ioannis opera statim quasi via, qua sine periculo vitæ, & libertatis detrimento, Septam Tituano migraret, Christiano lauacro expiandus. Cæteris quoque, etsi animis erant valde à Christo auersis, propter comitatem, modestiam, vitæ san-

&imo

Simonium ita erat carus, vt ipsius causa efficerent multa, & conuersos ad fidem Mahumetanos, ne quid in itinere damni acciperent, Septam vsque conitarentur.

Ioannes in Lusitaniam rediens, Aethiopia Patriarcha designatur.

CAPVT XIII.

ANnos complures Tituani Barretus fuerat, ita caritatis famulatui mancipatus, vt quamdiu vita maneret, nisi vel eadem caritas cogeret, vel obedientia auocaret, numquam inde esset egressurus; sic enim animo destinarat. Egredi tamen caritas coëgit, & in Lusitaniã reduxit, vt miserrimam captiuorum conditionem, multo magis animis, quàm corporibus perniciosam, per se ipse expressè atque ex fide Ioanni Regi declararet. Etenim permulti, quòd essent pauperrimi, neque aliunde sperarent se pecuniam habituros, qua redimi possent, in summo semper tam religionis, quàm pudicitiae amittendæ discrimine versabantur. Et erat exemplum recens Christianæ puellæ, quæ à spurcissimo domino ad turpe facinus vehemèter incitata, cum acriter & animosè resisteret, multis ab eo affecta contumeliis, & vsque ad effusionem sanguinis verberata est. Actumque de femina esset, nisi turpissimæ beluæ crudelitatem lucri cupiditas cohibuisset; vltæ enim pepercit, ne redemptionis pretium amitteret. Puella hæc, vt erat saucia, patris se in cōspectum dedit, fusisque lacrymis, quantum potuit, precata est, vt pudicitiae suæ, quam habebat libertate & vita ipsa carior-

em,

rem, consultum vellet. Vix iam vllas sibi esse ad ob-
stendum vires cum procacis hominis infania & turpi-
tudo ipsa repulsa magis indies magisque irritarentur.
Hoc spectaculo grauiter vulneratus Ioannes non pu-
tauit amplius sibi differendam profectiorem, ne mi-
seræ genti remedium diutius differretur. Confestim
igitur in Lusitaniam proficiscitur; & Ignatium Voga-
dam socium Tutuan relinquit, simul ne interim de-
bit, qui iuuare captiuos ipsius loco possit; simul vt reditus
sui, & pecuniæ, quæ pro quibusdam redemptis debe-
tur, ex fide in reditu soluendæ obles sit. Nonnullos e-
nim, quorum castitas & religio tū propter ætatē, tū
propter oris. speciem certissimo erant in periculo, in
ipso discessu creditò redemit, & in tuto constituit. Vbi
Olisiponem peruenit, cum superiore suo cuncta pri-
mum maturè contulit; de eius deinde sententia & cō-
silio, Regem adiit, vt ipsi proponeret, quid afferret no-
ui ex Mauritania, qualisque illic Lusitanorū esset sta-
tus, præterea vt de afflictæ captiuorum fortuna, certius
que animorum periculis eundem faceret certiorē.
Eū Rex honorificè acceptum narrare ex ordine cul-
cta iubet, & attente narrantem audit; nec mediocri ca-
pitar voluptate, dum in ipso narrantis ore & oratione
eximiam prædētiā, integritatem, modestiam, &
per multā aliā sinceri cuiusdam & solidi animi orna-
menta decoraque obseruat. Cū Nonius narrationis
sue finē fecit, secū a Rege petiit; iuberet pro sua cle-
mentia propositis à se rebus illicō prouideri, vt redire
ad captiuos suos quamocūq; possit. Vtū hoc tā
laudibile iuuandi miseros studium cum summa viri
probitatē coniunctum, quod erat per se à Rege
Nonio obseruatum, & aliorum prædicatione cogi-
tum, eundem Regem impulit, vt ad patres alias re-
motiores,

motiores, multoque maiore oppressas laborum mole hominem destinaret. Æthiopicum illi Patriarchatum conferre statuit, eo quod Petrus Faber, qui ad id munus fuerat electus, è viuis excesserat. Rem Ioannes ab Rege non obicula significatione cognoscens, quamquam non ignorabat, nihil se omnino ex ea dignitate posse percipere siue honoris, siue utilitatis, quæ duo in hisce gradibus cupide plerumque & ambitiosè quaruntur, ipso tamen dignitatis nomine ita deterritus est, ut statim ad eam declinandam omnibus se viribus compararet. Ad beatum igitur Ignatium ea de re epistolam scribit, qua in epistola totus in eo est, ut quidquid alicuius honoris speciem vel nomen haberet, haberè se potest, à se omnino remoueat. Intelli-go, inquit, in hac esse Regem mente, ut ad Æthiopicum me Patriarchatum velit deligere. Non sum nescius, Pater optime, quales istiusmodi dignitates habere debeant annuos redditus, quidve splendoris afferre queant his, in quos cõferuntur. Quis enim ignoret, quidquid laborum, & miseriarum fingi potest, totum id Æthiopico isti Patriarchæ, quicumque ille erit, singulis ferè momentis esse exorbendum. eosque ipsi apud illas Abassinorum gentes exhibendos honores, qui cū summis sæpe & pæne quotidianis iniuriis capulati sint? Ceterum quia me omni dignitate indignissimum esse certè scio, sic ipsum dignitatis nomen perhorresco, ut cogar, quantum possum, etiam atque etiam à te cõtendere, hoc ut mihi munus deferre nullo modo patiari. In Æthiopiam proficisci nihil prorsus recuso: quin potius illuc ex obedientia mitti & valde cupio, & obnixè peto; meque ipsius Patriarchæ socium ac famulum libentissimè offero: horreo tamen, formido, & tota animi contentione deprecor ipsum

ipsum gradum dignitatis , quo velim scias nihil mihi posse grauius & molestius cōtingere. His literis Ignatius mirificè est delectatus. Peripexit in iis Ioannis animum, & eximiam quamdam in eo cum singulari demissione alacritatem. Nec dubitabat, quin ad id munus, quo se indignissimum assererat, esset aptissimus. Eo verò magis in hanc mentem ibat, vt hominis electionem non modò non inpediret, verumetiam iudicio suo approbaret, & industria promoueret, quòd insignibus ostentis, Deiparæ Virginis opera, & insolito quodam atque admirabili modo ad Societatem, & ad maxima quæque vocatum recordabatur. Interim Barretus, tum quia credebat, quo à conspectu regis longiùs distaret, eo fore se à Patriarchatu remotiorem, tum quia captiuos reuifere & aliquod eis subsidium ferre peroptabat; de suo in Africam reditu cum Rege ipso, atque eius ministris sollicitè agebat. Cùmque propediem confectis rebus se profecturum speraret, literas accipit ab vrbe, quibus ei ab Ignatio imponitur, vt relicto quouis alio negotio, ad Æthiopiã se protinus expeditionem comparet; demandatum enim ipsi à Pontifice maximo Patriarchatus munus, quod æquum est moderatè ferat, & pro sua sapientia administret. Cùm verò dubitare non possit, quin à Deo sit, quod tanto Pontificis regisque consensu factum est, par sanè esse, vt ipsi quoque, qui nihil aliud velit, nisi quòd intelligat Deo esse acceptum, potius hoc esse gratum debeat, quàm graue. Missa cum his Ignatij literis duo Apostolica diplomata. Vno Pontifex Ioannem Nonium Barretum Æthiopiæ Patriarcham creabat; altero ne collatam sibi dignitatem recusaret, sua auctoritate adigebat. Hunc tamen honorem non minus ægrè Barretus tulit, quàm solent

homines

homines grauissima quoque onera vulgo ferre. Adeò pios animos, quos humilitas Christi sibi deuinxit, nihil est, quod acerbius pungat, quàm isti ipsi, in quibus aliquid amplitudinis & splendoris videtur esse, gradus dignitatum. Qui solemnî ritu quatuor votis in Societate se obstringunt (quatuor votorum professionem vocamus) priuato in loco vota alia statim inuincunt, ex quibus illud vnum, vt si Põtificis maximi iussu (neque enim aliter fas est) ad aliquem extra Societatem euecti fuerint honorem, in iis rebus gerendis, quæ magni esse momenti videbuntur, generalem consulant Societatis Præpositum, vel alium ab eo constitutum, cuius sequantur sententiam, nisi aliud quidpiam, quàm quod consultus senserit, magis è re esse iudicabunt. Cùm Patriarchatum Barretus iniit, nondum erat vlla in Societate eius voti obligatio; non secus tamèn, quàm si se illo obstrinxisset, & quia de se, deq; suo iudicio, quod paucorum est, humiliter sentiebat, & quia eo iam agebatur spiritu, qui Societatis proprius ac germanus est, mox ad Ignatium scripsit, vt quia propter locorum distantiam consulere eum non poterat, aliquem sibi in India suo loco designaret, quo cum tractaret maioris momenti negotia; cuiusque auctoritatem & consilium sequeretur. Has Patriarchæ litteras, in quibus tam expressa raræ cuiusdam animi submissionis & excellentis obedientiæ signa comparebant, magna cum approbatione legit Ignatius ipse per se non semel; nec legisse contentus, statuit vt iterum & sæpius coram aliis legerentur, fideique & auctoritate publica firmatæ in Societatis tabulario, ad exemplum posterorum, & memoriam Nonij sempiternam seruantur.

Quamobrem missi in Aethiopiam Patriarcha.

C A P V T XIV.

ITa res habet. Vbi per Europam increbuit, in illa Aethiopia, quæ ad orientem Africæ plagam sub Ægypto est, perque imensos tractus terrarum latè funditur, plurimos esse Christiani nominis populos, Turcis, Saracenis, Ethnicis vndique circūdatos, variisque & grauibus errorum tenebris inuolutos, statim Pontifices maximi (quod pastoris summi officium & ratio postulabat) ad eos inuandos mentem adiecerunt. Cùm ergo maturè considerassent, quidnam præstare posset, quòd in tanta locorum distantia, atque in tam periculosa circumfuserum gentium vicinia, inque tam inueterata prauarum opinionum consuetudine illis populis conduceret, nihil iudicauere commodius, quàm si viros illuc mitterent exemplo vitæ & scientia præstantes, qui sinceram ipsis ferrent doctrinam fidei, viamque mōstrarent, qua redire possent ad lucem veritatis, & sub Romanæ sedis obedientiam, quam iam diu deseruerant, iterum redigi. Pro certo enim habebant, quod superiori libro ostensum est, illam Alexandrinæ Ecclesiæ partem suo cum capite iam inde à Magni leonis Pontificis maximi & egregij Imperatoris Martiniani tempore, rectam vitæ semitam reliquisse. Enimuero circa annū Christi nati quadringentesimum, cùm celebratum est Chalcedonense Concilium, quo in Concilio impium Abbatem Eutychem Nestorij errorum æmulum sexcenti & triginta Episcopi, Abbates plurimi, & innumeri alij excellentes viri sententiis suis condemnarunt; Dioscorus, qui
tunc

tunc erat Alexandrinæ sedis Patriarcha; cùm peruersa Eutychetis dogmata aduersùs eximium virum Flavianum Constantinopolis Episcopum acriter tueretur; nec vllò modo tanti Concilij auctoritate quiesceret, in rabiem versus à Romano se capite seiunxit, ac luciferi instar, eas, quas regebat, prouincias secum in interitum traxit. Hoc Abassinorum Schismatis exordium fuit. In eo ipsi Romani nominis immemores tamdiu perstiterunt, donec Lusitanorum opera factum est, vt Romanam esse in orbe Ecclesiam, cunctarum caput Ecclesiarum audirent. Nam, vt remotiora omittam, postquam Lusitani ad Erythræum mare ex India profecti Abassinorum terras penetrarunt; & inter eorum Imperatorem, qui tunc David erat, atque Emanuele Lusitanicæ regem, missis vtrimque legatis, constituta amicitia est, & inita cõmercia; cœperunt illi populi Romanæ Ecclesiæ consuetudines ac ritus, quantumque inter vtrosque interesset, paulatim agnoscere. Quamuis enim nomen Christianum semper tenuerint, & Christianã inter Turcos, Saracenos, atque Ethnicos profiterentur religionem: quia tamen à Romana vrbe quamlongissime distabant, & Alexandrino obediebant Patriarchæ, plurimis erant, vt dictum est, impliciti erroribus, quos partim olim, nondum satis cognita puræ fidei doctrina, cum Baptismo conjunxerant, partim ab ipso hauserant impuro religionis suæ fonte, Alexandriæ, inquam, Antistite, à vera Christi Ecclesia miserè præciso. Quod vbi ex Lusitanis intellexit David Imperatòr, vt erat animo ad veritatis cognitionem propenso, hortante præsertim Emanuele Rege, atque etiam deprecante, non difficile adductus est, vt ad Clementē VII. qui tunc in Christiana Republica sacris præerat, legatos mitteret, ac

per eos suam illi, uti summo animarum pastori, obsequentem in omnibus offerret voluntatem; ab eoque peteret, ut viros probitate & diuinarum rerum cognitione præditos mitteret ad se, à quibus ipse & cæteri populi, quibus imperabat, de iis, quæ ad fidei rationem & salutem pertinerent, instruerentur. Ad Emanuele quoque, atque illo vita functo, ad Ioannem tertium eius filium, Lusitani Regni heredem, literas misit, quibus precabatur, cum Pontifice ageret, ne suam in tantiponderis negotio repelleret petitionem. Ioannes Rex, qui non minus paterni regni, quam pietatis hæres extiterat, ut Davidis votis à Pontifice satis fieret, diligenter curauit. Interim David humanis rebus cedens, Claudio filio Imperium reliquit. Hic statim super eadem re scripsit ad Ioannem, in paterna insistens petitione. Ioannes igitur, & quia optabat Abassino Imperatori gerere morem, & quia res ipsa per se erat eiusmodi, ut à Catholico principe respui non deberet; per legatum suum, quem Romæ habebat, de Æthiopice gentis remedio cum Pontifice seriò egit. Re diligenter & maturè considerata, inter Pontificem tandem & Regem conuentum, ut in illas oras viri aliquot deligerentur, qui auctoritate & imperio in iis, quæ ad religionem spectant, eos gubernarent. Placuit ut ex his vnus Æthiopice Patriarcha crearetur, duo deinde ipsi adiungerentur. Dignitate Episcopi, qui actionum, voluntatum, laborum, rerumque aliarum, essent socij. & in eodem Patriarchatus munere, vnus post alium decedenti succederent. Patriarcha fuit Ioannes Nonius Barretus; Episcopus vnus Andreas Ouiedus, alter Melchior Carnerius, de quibus postea. Fuerat iam antea à Romano Pontifice cum patriarchali dignitate in Abassiam missus Ioannes Bermudius Hispanus Sacerdos;

qui cū in Italicis trier mibus à Turcis prædonibus fuisset captus, p̄ciq̄ue varios rerum euentus delatus in Æthiopiam, aliquando ibi constitisset, & cuncta diligentius obseruasset, quòd videretur gentis mores & religionem probe callere, iudicatus est ad id muneris aptus. Sed hunc Claudius Imperator tamdiu palàm honorauit, quamdiu cum Adelis rege Mahumetanæ sectæ insigni propugnatore bellum gessit. Metuēs enim, ne Lusitanos, quos in exercitu habebat, pulso aut male tractato Latino Patriarcha, irritaret, atque ex amicis & sociis sibi hostes crearet, ficto animo honorem homini extrinsecus defererebat. Vbi tamen extinctus rex Adelis est, illicò animum patefecit suum; ac præter alia, quæ contra Deum & homines suscepit facinora, vno excepto Alexandrino Patriarcha, nullum alium neque sui neque suorum agnoscere voluit pastorem. Hinc factum, vt ingens paulatim populi odium in Bermudium concitaretur. Nec verbis parcebatur, nec rebus. Furti etiam fuit infamatus; & catatum vulgo, vas aureum, quod in templo erat, clanculum furtèpulsisse. Cùm miser homo hunc in modum tractaretur, coactus est in Europam redire. Indiam ergo ex Æthiopia, ex India Lusitaniam venit. Eum nos pueri Olisipone vidimus, vbi confecto vitæ curriculo finem quoque laboribus imposuit. Sub hæc tempora Petrus quidā Abassinus, ex Magni Antonij ordine monachus, de quo non semel suprà memini, cum aliis eiusdem professionis hominibus, Romam ex Æthiopia ingressus est. Erat hic ingenio acri & industrio, atque ad captandam principum beneuolentiā natura compositus. Latinam & Italicam linguam, variosque Romanæ Ecclesiæ ritus citò didicit; multaque de Æthiopicis rebus non iniucundè narrans, in mul-

torum se amicitias sensim insinuauit. Cùm ergo ad ipsum quoque Pontificem, qui tunc erat Paulus III. Clementis successor, sibi aperuisset aditum, atque eius gratiam iniisset, cœpit cum illo de alio Patriarcha in Æthiopiam mittendo sollicitè agere. Nam quòd Bermudius parum Abassinis fuerit acceptus, & malè etià tractatus, non debere impedimento esse, quominus ad eos alius mittatur; haud leues enim extitisse causas, cur in populi odium & malevolentiam incurrerit; neque eas Pontifici esse ignotas. Non dubitandum, quin ad partes cuiuscūque alterius Patriarchæ à Romano Patre missi, vbi is in Æthiopia pedem posuerit, omnes se ordines facile transferant, Alexandrino & eius Abuna penitus desertis; curandum tantummodo, vt qui illuc fuerit missus, ea habeat ornamenta animi, quæ tã excellens dignitas iure suo exigere videtur. Multa alia non semel in eandem sententiam dicens, in eandem tandem Pontificem traxit. Is cum Lusitano Rege rem per literas communicans deligendæ personæ ad id muneris idoneæ eidem regi potestatem demandauit; hoc enim ipsi meritò deberi, cuius auspiciis per immensa & periculosa maria patefactus esset, ex hoc orbe ad Abassinos accessus. Ioannes Rex approbato, vt decebat, de mittendo Patriarcha Pontificis consilio, non putauit sibi diu quærendum, quem deligeret. Cùm enim ipse per se insignia Petri Fabri in omni rerum genere decora, summo digna loco, satis fuisset expertus, quamquam ille nec tunc præsens, neque Lusitanus erat, cæteris antetulit; & ad legatum suum Romam scripsit, verbis suis à Pontifice peteret, vt ratam haberet Fabri electionem, & ipsum, ne repugnaret, pro imperio cogeret. De Pontificis voluntate nihil erat dubitandum. Visum tamen
aliter

aliter Regi saculorum immortalī, qui virum optimū pro Christi Republica tot tantisque exercitum ac fatigatum laboribus ad sempiternam vocauit tranquillitatem. At non quieuit Abassinus Monachus; cœpit ardentius rem eandem vrgere; & sollicitare Pontificem, precarique obnixè, ne illas Æthiopiæ oues, annos iam plus centum mille à Romanæ Ecclesiæ caulis miserè aberrantes, omnino desereret. Verū nequid tunc fieret, Italiæ motus obstitere. Intermissa proinde & ad quietiora tempora dilata res, anno millesimo quingentesimo quinquagesimo quarto optatum exitum accepit.

Quæ de Patriarchæ Ioannis & sociorum missione à nouo auctore scripta sunt.

C A P V T X V.

V T de veritate constet, opus iudicamus, proponere hoc loco, quæ de Patriarchæ Nonij, & sociorum in Æthiopiam missione nouus ille auctor, non sine graui eiusdem Patriarchæ & aliorum iniuria commentus est. Scribit ergo, Ioannem III. Lusitanæ regem ob eam, quæ inter ipsum & Claudium Æthiopiæ Imperatorem erat, amicitiam valde optasse, vt aliquot Episcopi cum vno Patriarcha Româ in Abassiam mitterentur. Hac de re cœpisse agere cum Iulio III. sed ob eius mortem, quæ anno contigit millesimo quingentesimo quinquagesimo quinto, & propter obitum Marcelli, qui proximè Iulio successit, & in Pontificatu dies tantum viginti duos vixit, ad Paulum IV. Marcelli successorem delatum esse ne-

gotium , qui iudicauit tantum Regem , iusta præfer-
 tim petentem, non esse repellendum. Consentiente er-
 go Ignatio Loiola Societatis Iesu fundatore, & eiusdē
 Societatis generali Præposito , patres tredecim fuisse
 ad hanc expeditionem electos. Ex iis Ioanni Nonio
 Barreto collatum esse Patriarchatus munus : datos il-
 li episcopali dignitate adiutores ac successores duos,
 Melchiorem Carnerium Lusitanum, Andream Ouie-
 dum Castellanum; illum Nicæ Bythinæ vrbis, hunc
 Hieropoli titulo insignitum. Hos simul cum Patriar-
 cha & reliquis sociis Roma profectos , Lusitaniam
 peruenisse: liberaliter ibi à Rege, ac peramanter habi-
 tos , breuīque rebus omnibus necessariis abundē in-
 structos, simul cum Fernando Sôfia, quem Rex lega-
 tum ad Abassinum decreuerat, Olisipone soluissē; tan-
 démque post immensos longissimæ nauigationis la-
 bores ad Archicum appulso, Æthiopiam intrasse; &
 quamquam aduerso tempore (Bello enim ardebant
 omnia) benignè tamen ab Imperatore Claudio fuisse
 exceptos. Verùm paulo post variis de causis malè ipsi
 cum Patriarcha & sociis conuenissē. Primùm enim
 ægrè tulisse Imperatorem , Lusitanum Regem , ipso
 incio & inconsulto, cum Pontifice egisse , vt Patriar-
 cham ad se & Episcopos mitteret; ac si vel Christum
 prorsus ignoraret , vel à Romana sede esset diuisus:
 cùm & propriū Romæ haberet Abassinorum colle-
 gium , ac quod istiusmodi negotia spectare videren-
 tur ; & tamquam obsequentissimus filius Romanam
 Ecclesiam coleret , sēpérque coluissē; nec Apostoli-
 co indigeret Nuncio, cùm antiquior Abassiæ Archie-
 piscopus iam inde ab Eugenio I V. hoc Nuntij mune-
 re vteretur , plurimis summorum Pontificum diplo-
 matis deinceps confirmato. Patriarcham tamen & so-
 cios

cios ostendisse palam, quas habebant ab Apostolica sede facultates, iisque honorem debitum fuisse ab omnibus exhibitum. At non multo post rem accidisse, quæ omnes per vniuersam Æthiopiam ordines vehementer conturbarit. Duo enim, ut superiori libro retuli, esse apud Abassinos sacerdotum genera; quosdam virgines dici, quod castitatis se voto constringant, ut in Ecclesia Latina fit; alios coniugatos appellari, quod vxores ducant, quibus cum, instar aliorum, qui à sacris sunt absoluti, maritalem vitam degant. Igitur Patriarchæ decreto statutum, ne deinceps sacris initiarentur, qui matrimonij vinculo essent ligati, aut in posterum ligari vellent, vna ut vbique esset Christianæ Reipublicæ forma, & Latinæ Ecclesiæ exemplum cæteri fideles cætus sequerentur. Nihil potuisse eo decreto ad commouendam Æthiopiam perniciosius contingere. Vniuersum mox imperium in duas sectum factiones; partim rem approbasse, partim acriter arguisse. Dum illa aduersis agitentur iudiciis, valdeque vulgo turbatum esset; aliam ecce ortâ maioris tumultus causam: statuisse quippe Noniū, ut ex annuis fructibus decimæ Ecclesiasticis soluerentur. Nouum enim uero & insolens visum omnibus statutum; nec modò Æthiopicis moribus contrarium, sed intolerabile ac noxium. Secularium ordinem eo audito sic in furorem raptum, ut facto agmine ad Imperatorem vndique ingentes hominum cæteruæ conuolarint, clamores terrificos in cælum sustulerint, & contra nouas leges furiatis mentibus exarserint. Vnam fuisse omnium vocem, Tolle tolle, ne patere, Imperator, vetustissimas nobis auferri consuetudines, & noua ac difficillima imponi onera. Tum Claudium externis satis oppressum bellis, ne in-

ternis quoque opprimeretur dissensionibus, vocasse ad se Patres, eisque mandasse, ut eas rem Christianam in suo imperio perdendi magis, quam promouendi artes protinus relinquerent. Coniugatos quidem sacerdotes nihil religioni incommodare; nec solum Græcis olim ab Ecclesia Romana, sed ipsis quoque Æthiopibus à Nicæno & Ephesino Conciliis fuisse permisso; nullam igitur esse causam, cur quæ quæta essent, & Christianis legibus consentanea, perturbare niterentur. Fructuum verò decimas Ecclesiæ deberi, non ire se inficias; magnam tamen consuetudinis & præscriptionis esse vim: quod enim ab ullo omnino homine decimæ in Æthiopia exigantur, rem esse admodum inusitatam atque inauditam, ut nihil proferri queat Abassinorum auribus insensius. Solere Imperatores cum nouæ eriguntur Ecclesiæ, ex suis eas bonis ita locupletare, ut habeant Ecclesiastici non solum unde vitam sustineant, sed etiam lautissime viuant. Nam si decimæ quæ toto ex imperio colligi possunt, cum iis conferantur redditibus, quos Imperatores Ecclesiis liberaliter donarunt, multis illas partibus fore superandas. Cum ergo iis, quibus sacra curæ, nihil prorsus desit, quo minus decenter & largè viuant, opus non esse de exigendis decimis verbum mutire. Ad hæc accessisse alia, quæ ad Imperatorem delata, impatientem eius animum sic in Patres irritarint, ut incomposita in eos verba & irarum plena venenato ore euomuerit. Ex his autem dissidiis ortum rumorem, totoque sparsum imperio, reliquorum quoque animos in eosdem patres concitasse. Denique post multa ultro citroque agitata, eò ventum, ut quas Patriarcha haberet à summo Pontifice facultates noscere vellet Imperator, & proferri Pontificias literas, ac
diplo

diplomata iuberet; simulque contenderet, nullum Nonio ius esse ad mutandas consuetudines, quas ipsa-
met Apostolica sedes multis sanctionibus confirma-
set. Nunrium item Apostolicum habere se à Clemē-
te VII. concessum, & à cæteris deinde Pontifici-
bus stabilitum, quid alio opus esse? Eamdem fuisse an-
tiquioris Archiepiscopi querelam; graniter enim
questum, quod à sua dignitate immeritò deturbaretur.
Eamdem Antistitem reliquorum, quibus videretur
indignissimum, iniussu Romani Pontificis rem
tam arduam tentari. Cùm tam in suis regionibus ani-
morum perturbationem cerneret Imperator, de Lu-
sitano Rege, quodd falsam, de Æthiopicis rebus sum-
mo Pontifici, & Ignatio Loiolæ opinionem iniecerit,
cœpisse queri; simulque statuisset, ne Patres iis vteren-
tur facultatibus, quas habere se dicebant, donec re-
bus omnibus Apostolicæ sedi rectè ac ritè expositis,
quid esset agendum, ab eadem sede decerneretur. Eos
igitur sua spoliatos potestate in remotum ab vrbe lo-
cum secessisse; ibique ædiculam, qua reciperentur,
construxisse; terram demum cœpisse colere, legumina
serere, suoque ex labore victum quæritare. Delatum
deinde hoc ad Imperatorem, qui talem viuendi mo-
dum in suam vergere infamiam prudenter aduertēs,
equites miserit Prætorianos, vt omnes ad vnum Pa-
tres ad se reducerent. Id verò. cùm fieret, tantum ad
eum locum, vbi erant, factum esse hominum concur-
sum, vt Patres sibi persuaserint, adesse felicem pro
Christo moriendi horam. Vbi in conspectum vene-
re, fuisse ab Imperatore non mediocriter increpitos,
quod inscio se & inuito abierint, eamque elegerint
viuendi rationem: fidenter peterent quæcumque es-
sent ad victum cultumque necessaria, nihil ipsis, dum
in

in Abassia morarentur, defuturum. Denique inter has rerum vicissitudines Patriarcham Ioannem, magno hominem natu, cum viribus esset pæne consumptis, agere de discessu cum reliquis cœpisse, necque difficile in suam eos pertraxisse sententiam, & quia insoliti cœli solique tædebat, & quia Lusitani erant, quod hominum genus rebus suis plus iusto deditum, vix a patria diuelli potest, & alienas terras ægrè admodum incolit, quod nihil esse in mundo credat, quod Lusitano solo conferri queat. Goam igitur omnes nauigasse, vno excepto Andrea Ouiedo, qui se aliò iturum negarit, cum ad illam esset prouinciam ex obedientia delatus, quam nec mortuus quidem vellet deserere. Homo quippe, ut nouus auctor ait, Castellanus erat, firmus & constans, quique vel vnius tuendæ aut propagandæ veritatis causa nullos omnino labores, nulla mortis pericula formidaret. Hunc enim sapienter & mature considerasse, non esse prudentis magistratus velle confestim subditorum mores corrigere, atque inueteratas longo annorum interuallo consuetudines vno die extirpare. Reliquis ergo ex Æthiopia discedentibus, solum Andream mansisse; lentoque passu in re tanta, ut par erat, procedentem, Patriarchatus officio, quod à Ioannis discessu statim accepit, ita functum, ut in summo omnium fuerit tum amore, tum honore; tanta insuper apud Imperatorem gratia & auctoritate valuisse, ut ad expedienda Europæ negotia, regius quidam Senatus, qui inter Abassinos Latinus dicitur, eius consilio sit institutus. Demum post vitam plurimis virtutum operibus sanctissimè actam, ab hominibus demigrasse, mirumque omnibus suis desiderium reliquisse. Eius funus eadem pompa & celebritate, atque insdem, qui Imperatoribus exhiberi solent,

solent, elatum fuisse honoribus. Sepultum corpus in templo sancti Spiritus in monte Amara, presente Imperatore, & cum cætera Imperij nobilitate exequiarum iusta persolvente. Hæc omnia nouus auctor, & eiusdem generis plura tam promptè, quàm falsò, incertum quo animo, mandauit literis. At in tota hac narratione nihil pæne esse, quod veritatem sapiat, sine dubio constat. Non est mihi animus, vt iam dixi, omnia, quæ falsa esse scio, scripto refellere; sed ea tantum, quæ nostro obsunt instituto: & quoniam nemini ferè ignota res est, id faciam molli, vt dicitur, brachio, & quam breuissime.

Quantum à vero absit superior narratio.

C A P V T XVI.

AB initio missionis, de qua proximè dictum est, initium sumam. Ait nouus auctor, negotium de creando Patriarcha & Episcopis cum Iulio tertio à Lusitano Rege agi cœptam; ob Iulij tamen & successoris Marcelli obitum ad Paulum, quartum delatum, & ab eo tandem absolutum. Hoc imprimis falsum est, cum constet eligendi & creandi potestatem ab ipso Iulio fuisse concessam, & ab eodem diplomata in Lusitaniam missa: licet Patres ipsi, sedente iam Paulo quarto, & rata diplomata habente, fuerint inaugurati. Ait deinde Patriarcham & Episcopos patriarchalibus ac pontificiis sacris Romæ fuisse initiatos. Sed hoc etiam commentitium est. Nonius enim & Ouiedus initiati sunt Olisipone, Carnerius Goræ, quo vno ante vtrumque anno cum sociis aliis fuerat ex Lusitania

tania profectus. Ita in Societatis annalibus traditur, & aperta scientibus res est. Ait præterea, hos tres Antistites cum reliquis sociis acceptam à Paulo IV. Pontifice, & à B. Ignatio pace ac salute, Roma in Lusitaniam profectos, Olisiponem peruenisse; nauemque ibi ingressos, simul in Æthiopiam nauigasse. His in verbis, etsi pauca sunt, multa continentur falsa. Ioannes enim neque tunc Romæ erat, cum Patriarcha creatus est, neque, ut credo, fuerat umquam. Reliqui socij, Ouiedo excepto, an Romam viderint, ambiguum mihi, plerosque ex iis non vidisse, certum. At Ouiedum, quamquam ab Neapoli euocatus Roma transierit, non ibi tamen, sed Olisipone consecratum, ut iam dixi, dubitari nequit. Cum ergo patres isti Romæ non fuerint, inde in Æthiopiam fuisse profectos, apertè falsum est. Sed neque ex Lusitania simul, neque, quod est consequens, in eadem naui, neque anno eodem, neque in Æthiopiam rectà, sed in Indiam nauigarunt; neque eò omnes peruenere incolumes, sed eorum tres facto naufragio in itinere periere. Constat enim anno millesimo quingentesimo quinquagesimo quinto soluisse Olisipone Antoniū Quadrium, Melchiorẽ Carnerium, nõdum Episcopum, & nonnullos alios, qui Patriarcham in eadem vrbe ad grauiã negotia relictum in annum insequentem Goæ præstolarentur. Illi quoque, qui tunc profecti sunt, in varias naues, ut fit, impositi, Monsambicum salui tenuere. Sed post dies aliquot in iisdem nauibus inde simul egressi, cum secundo vento in Indiam contenderent, natis vna, cui à Conceptione nomen, dum leucis circiter quingentis ab Indica ora distans cursum conficeret, per noctis tenebras in breuia impacta, vado hæsit, & paulatim dissoluta est. In exiguam

primum insulam, quæ prope comparuit, se vectores
nautæque recepere. Dein pars maior partim scapha,
partim cymba ex naufragij reliquiis raptim confecta,
itineris ignara per immensam maris vastitatē & summa
pericula, regēte Numine, in Indiam nauigauit. Cæteri,
quod Nullū tunc haberent nauigiū, quo vehi possent,
in Insula remansere; cum iis è Societate tres, Andreas
Gonzaluius Metinnensis, Pascalius cognomine & pa-
tria Cathalanus, Alfonso Lupius Nauarrus, quibus
cum ad demigrandum liberaliter offerretur in cym-
ba locus, ne turbam in insula manentem desererent,
seipsos deseruere. Transactis nouem à naufragio mē-
sibus, cum nulla ex parte ostenderetur vitæ remedium,
iunctis inerter atque interligatis oblongis quibusdam
tabulis, quemdam veluti lintrem confecerunt, quo
cum triginta aliis consensu, post duos nauigationis
menses insulam aliam rebus omnibus priori inferior-
em reppererunt. In hac ipsi cum paucis aliis inedia &
labore consumptis, cum ad meliora tentanda non
suppeterent vires, remanere coacti sunt, & breui, vt
creditur, interiere. Insequente anno, qui fuit humanæ
salutis quingentesimus quinquagesimus sextus supra
millesimum, Patriarcha Nonius, Episcopus Ouiedus,
& alij ex Societate cum Fernando Sofia in Æthiopiā
legato, tertio Calendas Apriles Olisipone soluerunt.
Sofia inter nauigandum extinctus est, Patriarcha
cum sociis Goam appulit incolumis, neque inde vm-
quam, vt paulo post constabit, in Æthiopiam traiecit.
Ficta igitur sunt, quæ de eiusdem Patriarchæ in Ar-
chicam aduentu, de ingressu in Æthiopiam, de ipsius
cum Claudio colloquiis & dissensionibus, de nouo
clericorum cœlibatu instituendo, de exigendis deci-
mis, de Apololicarum literarum facultatūque o-
sten

stensione, de discessu ex Æthiopia, de reditu in Indiam,
 deque sexcentis aliis, cum summa & Patriarchæ iniu-
 ria, & proborum hominum offensione, & legentium
 pernicie fuere narrata. Vbi nam est, quod auctor il-
 le ausus est indicare, malè Patriarchæ, culpa sua, cum
 Imperatore Claudio conuenisse? Mercenarij more o-
 peram suam mercede locasse? sordidè & auarè deci-
 mas statim exigisse? suis fuisse deditum commodis? rei
 difficultate, & laboris metu deterritum oues pro-
 prias reliquisse, & cum aliis Societatis religiosi, qui
 eum fuerant comitati, in Indiam confestim remeasse?
 Ista quidem, vt in re indignissima mansuetè agam, a-
 pud nullum scriptorem auctor iste legere potuit; cum
 certissimum sit, Ioannem Patriarcham per eam, quam
 dicam occasionem ad extremum vsque vitæ finem
 Goræ perstitisse. Atenim quanta innocentissimo viro
 sit iniuria, cum adedè temere iis notatur vitis, à qui-
 bus, quantopere in tota vita abhorruerit, præclarissi-
 mis testimoniis prædicant Lusitania, Mauritania, In-
 dia, quibus ille in locis ita vixit, nemo vt ipsum agno-
 uerit, qui sanctissimum esse, & ab omni sceleris labe
 alienissimum non fateretur. Cæterum quàm iniquè in
 sanctissimum virum hac in parte peccatum sit, demo-
 strabunt sequentia, quæ grauissimorum hominum li-
 teris ac vocibus, ita sunt stabilita, vt qui fidem neget,
 temerarius planè atque impudens sit. Ad hæc, quæ
 de Episcopis, Archiepiscopis, & plurimis aliis eiusdè
 generis ab eodem auctore, multis in locis magnificè
 describuntur, inania esse, ex dictis constat. Nam præ-
 ter vnum Abunam, de quo sæpe memini, in toto A-
 bassinorum Imperio alius non est, qui Episcopali vel
 auctoritate polleat, vel dignitate excellat. Quæ de
 Apostolico nuntio dicta, non falsa modò, sed præne-

quoque pugnātia sunt. Apud quem infidelem principem Romani Pontificis nuntius est? Si quis tamen in Æthiopia sit, ibique Apostolicam habeat auctoritatem, quid opus est hominem cogere, ut in grauioribus negotiis vel Goanum Antistitem, vel Lusitanum nuntium per literas consulat? Iam verò quis æquè ferat tanta cum indignitate & contemptu tractari Ioānem III. Lusitanorum regem, virum prudentiæ, sanctitatis, & omnium virtutum laude suo sæculo tantum, ut neque inter æquales, neque multis retro sæculis ullus extiterit, quem ipsi vel nostra, vel patrum ætas iure anteponat? Quod dictum est de gente Lusitana plus iusto patriam amante, ipsique adeò addita, ut neque alibi possit commorari, neque ullam orbis partem præ illa æstimet, tam est verum, quàm sunt reliqua, in quibus ne minima quidem apparet umbra veritatis. Nam si de religiosis Societatis agitur, quis non videt, quantum verba illa absint à vero? Neque enim illi, qui maiorum suorum imperio suis ab urbibus, & ab iis, in quibus educati sunt, collegiis, aut domibus, atque à suorum conspectu & consuetudine abducti, ad Indos, ad Sinas, ad Iaponios, ad Molucos, ad Brasílios, ad Guinzos, ad varias Æthiopum regiones, aliósque per orbem populos ex Lusitania proficiscuntur, nisi grauißima vrgeant negotia, reuertí vmquam in patrias solent; sed in iis ipsis locis, quibus eos obedientia semel addixit, ad vitæ finem constantissimè perseuerant. Hoc enim animo numquam amplius ad natale solum reuertendi conscendunt nauim, è portu soluunt, in altum feruntur, ventorum se arbitrio committunt. Laus tamen ista, omnium Societatis religiosorum est propria. Quicumque enim ex ea, siue Lusitani, siue Bætici, siue Castellani, siue Itali,

Galli, Germani, Angli, Belgæ, Hiberni, cæterique Europæi ad portandam infidelibus Euangelij lucem in Africam, in Asiam, in orbem nouum destinantur, nisi eadem, quæ misit obedientia, reuocet, ibi, quod missi sunt, finire solent vitam. Peculiare namque ipsis est, cæteræ patria, & ibi viuere, & vitam absoluerè, vbi erit Deo acceptius. Atque vt à honneminè dictum accepimus: ibi patria est, vbi bene est; sic istud proprium est huius familiæ insigne: ibi bene est, vbi eterno placeat Numini. Et quidem, vt omittam alios, ex toto eorum numero, qui à condita Societate ad hunc vsque diem in Æthiopiam intrarunt, præter Gonzalum Rodericum, qui rediturus ierat, vt de Imperatoris Claudij proposito Indicum Proregem moneret, nullus est ad nos reuersus; sed omnes, quinque exceptis, qui adhuc supersunt, summa cum laude & gentis fructu extremum ibi diem obièrè. De Lusitana gente quid hac in parte atinet dicere? Quæ nam alia est in orbe natio, quæ magis lustret alienas terras? quæ magis toto mundo sit diuisa, quæ minus videatur patriam amare, & in pretio habere; cum tamen secus facere non iniuria posset? Quas oras terrarum non adit? quis tam distinctus, tamque remotus in orbe locus, quem non penetret? quæ tam sterilis & inculta regio, quam non habitet? quis tam abstrusus aut reconditus in vlla prouincia angulus, vbi non figat sedem, & domicilium? Quid notius, quàm tota Africa, & Asia plurimas esse Lusitanorum colonias? Sub Æquetore sunt, sub ardente plaga, per totam maritimam Guinææ oram ab Hesperio cornu siue Arsinario promontorio; caput viride recentiores vocant, ad Congi vsque & Angolæ regna locis multis diffunduntur; in Mosambico degunt, in Sofala, in Mandomotapa, in ora Melindis, in

Monbaza, apud Æthiopas Eoos, plurésque alias gentes lingua, moribus, rebus ferè omnibus dissimiles. In orientali Indiâ nulla parè regio est, in qua non sint & Lusitani plurimi, & permultæ eorùm coloniz. In ora Peguana, in Sione, in Malacha, siue aurea Chersonesso, in insulis Moluchis, in Cambaia, apud Sinas, apud Iaponios, apud populos vniuersos. Videat nunc auctor iste, quàm verè & rectè scripserit; Lusitanam gentem vix à patria diuelli posse, vix in alienis oris commorari, quæque his similia sunt, quæ nemo rerum sciens audire queat sine risu, vt inania, nèque sine indignatione, vt temeraria, vt iniuria, vt pernitiosa? Nec minus auctor iste in Ouiedum peccauit. Fuit ille quidem, vt postea videbitur, plurimis & maximis cumulatus virtutibus, quod neque hostes negare aut occultare potuerunt. Sed quòd inuito Patriarcha Nonio, eòque discedente in Æthiopia manserit; quòd statim ab eius discessu Patriarchæ sibi munus noménque arrogarit; quòd Latini cuiusdam Senatus instituendi consiliùm Imperatori dederit; quòd eidem Senatui ab eodem Imperatore fuerit præfectus; quòd denique multa alia præstiterit, quæ præstitisse scribit, ita abest à veritate, vt nihil ab ea possit fingi remotius. Etenim nèque Ouiedus cum Barreto in Æthiopia vmquam fuit, vt dictum est; nèque si fuisset eo inuito inibi remansisset. Quòd à Barreti discessu Patriarchæ sibi munus, noménque usurparit; licentius scriptum est, quàm vt moderatè ferri queat. An adeò erat nescius, vt ignoraret, quid sibi liceret? An adeò iniquus, vt alienam inuaderet possessionem? Quid, si ipso vinète in Æthiopiâ Nonius, vnde fingitur discessisse, mutato consilio reuertèretur? Elsèntne eiusdem Ecclesiæ duo simul superstites & Catholici Pa-

patriarchæ? Duo eandem uxorem simul haberent viri? An opus esset, ut eorum alter inuitus etiam & nolens, Patriarchatu se abdicaret? Itaque Ouiedus neque munere neque nomine Patriarcha fuit, nisi postquam è viuis abiit Ioannes, quod anno contigit salutis nostræ millesimo quingentesimo sexagesimo sexto. Vbi mortuus sit, vbi sepultus, dicam suo loco. Quæ de Latino senatu, deque aliis eodem spectantibus idem auctor finxit, aut ab alio ficta accepit, & quod non debuit, literis mandauit, iam supra redarguit, & eiusmodi sunt, ut ne rudissimum quidem, atque omnis ignarum historiæ fallere possint. Ad Ioannem redeo, cuius eximia in patriarchatu demissio multo ipsum, quàm eadem dignitas, fecit illustriorem.

Quomodo Ioannes se gesserit, postquam Patriarcha creatus est.

C. A. P. V T X V I I.

Olispone in Templo sanctissimæ Trinitatis, quod domui sancti Rochi, vbi Societatis professi habitant, propinquum est, Patriarchali ordine Barretus, Episcopali Ouiedus summa omnium ordinum celebritate eodem tempore initiati sunt. Professa enim Societatis domus nondum sanum habebat tanto concursui accommodatum. Ioannes Rex, quod ad Patriarchatum elegisset virum talem, quem suspicerent omnes, ac mirarentur, summisque honoribus dignissimum iudicaret, adeo erat lætus, ut de suo Patriarcha ipse sibi præ cæteris gratularetur. Quo verò illum sapius habere præsentem posset, & facienti

cienti assistere, voluit ut in regio Saccello solemni ritu frequenter litaret. Præter alia verò, quibus optimus rex est, singularem in Deum religionem, & insignem aduersùs Societatem, ipsùmque Patriarcham beneuolentiam mirificè testatus est, munera addidit varia & pretiosa. Ad vsus sacros vestes dedit holosericas, damascenas, conchyliatas, opere vermiculato compositas, acu pictas, auro intertextas. Dedit cruces, calices, pyxides, & alia vasa ex auro & argento facta fabre, & magnificè, ac pretiosè cælata. Multam aliam præterea supellectilem optimam & pulcherrimam, qualè vel ipsa Europa, cui ferè magna omnia præsusu viluerunt, non sine commendatione perspiceret. Volebat quippe Rex inclytus & religionis amantissimus, ut Abassinæ illæ gentes, ad quas Ioannes erat Patriarcha destinatus, vel ex ipso sacrorum apparatu agnoscerent, quantum Deo immortalis, cæterisque cœlitibus colendis Romana Ecclesia inter ceteras emineat; ut etiam inde in cupiditatem venirent cum suo vero capite, hoc est, Romano Pontifice se coniungendi. Atenim quod ad rem præsentem attinet, scio à magnis viris animaduersum, immensum illud Numen, quod regit & tuetur omnia, vniuersum genus hominum, atque ipsos inprimis veræ fidei cultores, quos semper in terris fuisse, nemo ignorat, sua admirabili prouidentia ita solitum gubernare, ut per varias sæculorum ætates, temporibus diuersis, huic inferiori mundo alios atque alios dederit, sicque usque ad finem daturus, quorum partim exemplo, partim labore & industria vetus disciplina & collapsi mores restitui queant, quosque, cæteri mortales, velut expressa quædam virtutum exemplaria, suo quemque gradu & ordine, sibi proponant imitandos. Talem si

fuisse dixit Ioannem Patriarcham, haud erit, credo, qui dicenti obstitat; si quis enim paululum consideret, qua ille ratione in sua illa patriarchatus dignitate se gesserit; necesse est, fateatur, idcirco fuisse à Deo ad hoc munus electum, ut esset, qui primos illos, quos suo in exordio Christiana Respublica Episcopos habuit, vita & moribus referret; & in quo splenderent omnia, quæ in quolibet Antistite pontificiam auctoritatem decorant maximè, & eximiè commendant. Summa in eo eminebat submissio, nec minor sui, rerumque suarum despicientia. Christi Opt. Max. Pontificum principis vestigia insequens, aded non ferebat ullam sibi à quoquam exhiberi seruitutem, ut qui frequentius religiosis seruiret; esset nemo. Ipsis accumbentibus necessaria ministrabat. Continuus erat coqui adiutor. Lances, pyxides, ollas, & cætera coquinaria vasa, deposito episcopali anulo, cum cura & voluptate abluebat. Hæc ille & alia generis eiusdem tanta præstabat alacritate, ut ad similia exemplo suo facile reliquos pertraheret. Quis enim Ioannem Patriarcham videns aut torpori sederet, aut sectaretur grandia, aut non sponte curreret ad vilia? Qui auctoritate vel honore, aut quod minus est, natu inter alios antistant, intelligere debent, illorum mores totamque vitæ rationem habere se, ut ita dicam, in manu; cum in utramque partem firma iis viuendi sint. Neque illud ignorent, quod est satis exploratum, ut saluari ipsorum exemplo valde prouehitur; publica res; ita pernicioso maiorem in modum eandem pessumdant. Cum igitur omnes, qui in aliqua viuunt hominum Societate, curare diligenter debeant, nihil ut agant, quod aliorum æmulatione dignu non sit: iis certè, quos vel dignitas, vel ætas, vel quidpiã aliud, in quo excellunt, conspi

conspiciendos proponit, summopere elaborandum est, ita se in rebus gerant, ut auctoritatem suam probent reliquis, atque ad id, quod erit factu optimum, eos impellant. Hæc una Ioanni mens ad Patriarchatum euecto. Plurima exercuit opera virtutum, quæ iure posset prætermittere; nec omisit aliquid, quod ad aliorum imitationem laudabiliter trahi posset. Pœnitentiæ ergo sacramentum tam assidue ministrabat, ut ne iis quidem cederet, qui munus idem ex obedientia sibi impositum, accuratissimè fungebantur. Ibat sæpe ad externos ægrotos, eorum exceptum, confessiones, si quando aliquis ad ipsos ex Societate confessorius accersebatur. Nec verò curabat, nobiles esset, an ignobile, diuites an pauperes, domini an serui; æquè ipsum caritas rapiebat ad omnes, cuiuscumque status essent & conditionis, siue domi suæ decumberent, siue in vinculis tenerentur. Res in hoc genere contigit, non indigna relatu. Vocatus aliquando est ex Societate aliquis; ut ægrum hominem confitentem audiret. Negotium Patriarcha suscepit. Vocantem ponè sequens, cum forte præter palatiū principis Ludonici, Ioannis regis fratris, simul cum socio pertransiret, visus ab eo ex fenestra & cognitus est. Princeps id quod erat, suspicatus, tantamque hominis submissionem & facilitatem admirans, unum vocat ex famulis; iubet ut Patriarcham sequatur, & obseruet diligenter, quam se in domum inferat, & quid ibi agat. Gradum famulus accelerat, & Patriarcham insequens tandem assequitur, tandiūq; à tergo comitatur, donec ad locum ventum, ubi cubiculum erat humile pæne subterraneū, atque inibi iacens Æthiopicum mancipium, graui morbo correptum. Ingreditur Patriarcha, ægrum reperit, blandè alloquitur, solatur, & ad patientiam exci-

tat, aurēſque præbere incipit conſitenti. Quibus obſeruatīs ad principem ſuum homo regreditur celerigreſſu: ex ordine rem totam illi narrat. Ferunt principem ipſum, vt erat vir verè magnus, & æquiſſimus virtutū æſtimator, ire per ſe ad Patriarcham voluiſſe, vt cum ea, quæ tanto viro atque eius meritis & dignitate debebatur, magnificentia domum illum reduceret; abſtinuiſſe tamen certas ob cauſas, & ob eam maximè, quòd veritus ſit, nedum honorare Patriarcham cuperet, moleſtia afficeret, magiſque modēſtiæ ipſius eſſet oppugnator, quā dignitatis deſenſor. Mulam ergo (carpentorum enim tunc uſus & id genus vehiculorum in Luſitania nondum erat) conſeſtim iubet præparari, eamque cum nobili equitum & peditum comitatu ad illum duci, vt qua decet ſtatus ſui exiſtimatione domum reuertatur. Properant, qui miſſi ad excipiendum & comitandum Patriarcham. Reperiunt adhuc audienda conſeſſione præpeditum. Expectant, donec abſoluat. Ludouici verbis cum reliquo apparatu mulam ipſi offerunt ad regreſſum. Ingenuo ille pudore ſuffuſus ſereniſſimo principi gratias primum agit: tum ad eos, qui adſunt, ſibi mula & tali comitatu opus non eſſe; pedibus cum ſocio reuerſurum. Neque putare ſe, vllā fieri patriarchatui iniuriā, ſi id Patriarcha faciat, quod Princeps Patriarcharum ſummus, quod eius etiam Apoſtoli, magni & ipſi orbis terrarum principes ac Patriarchæ, dum apud nos viuerēt, fecere: eos dum imitatur, nihil ſe efficere vile, aut dignitati ſuæ repugnans. His dictis aulici dimiſſi; ipſe domum, vt ad ægrotum ierat, cum Socio reuertitur. Et verò tanta cum grauitate hæc ſubmiſſionis opera faciebat, vt ex abiectis huiuſcemodi miniſteriis Pontificia apud eum dignitas non modò nullam

pateretur

pa teretur auctoritatis iacturam, sed ingens potius acciperet incrementū. Molestè ferebat, vlli se in mensa, in cubiculo, in re alia anteponi; nec accipiebat quidquam ad vsum, quod non esset omnibus commune. Pedes exibat domo, cū exire opus, sine famulo sine vllis patentibus pontificiæ dignitatis indiciis, religioso tantū socio, vt quintis alius comitatus. Nec apparatu maiori Conimbricam petiit, vt Conimbricenses socios inuiseret, & coram salutaret, vltimāque cum iis haberet colloquia, atque extremum vale diceret in Indiam profecturus. Sed & paucis illis diebus, quibus est Conimbricæ commoratus, non obscura aut pressa leuiter, sed illustria, solida, altēque fixa reliquit vestigia eximie sanctitatis. Ibi etiam de more sæpius ad coquum ibat, suam illi operam præstiturus. Vasa escaria, ollas, athena, lebetes, & cætera huiusmodi libens tergebat; nec omittebat quidquam rerum earum, quæ in eo ministerio sordidiores putantur. In triclinio cibaria accubētibus apponebat, iis præsertim, qui erant in tyrocinio; ex quibus cū videret quemdam humi sedentem, supràque genua mantile explicantem, vt ibi cibum sumeret, idem mantile suis ipse acceptum manibus extendit super humum, comiter & amicè monens, maioris id esse submisionis indicium, quæ vt parua & nullius esse momenti videantur, non solēt tamen à magnis viris contemni; quibus certum est, nihil tā esse exiguum, ex quo & se & alios iuvādi captare nequeant occasionem; cū & in rebus minimis, nisi spernantur, magnarum sit commodā virtutū. Itaq; cū Patriarcha plurima Conimbricæ valdeq; insignia dedisset probitatis ac submisionis documenta, omnēque ad perfectionis studiū inflammasset, appetente Indicæ navigationis tempore Olisiponem reuersus est.

Legatione missa exploratur quo animo sit Abassinus Imperator ad recipiendum Patriarcham, & socios.

C A P V T X V I I I .

Priusquam in Æthiopiam Antistites cum sociis proficiscerentur, visum Ioanni Regi constanti Abassini tentare, ipsumque per legatos ad Patriarcham & socios excipiendos reddere promptiorem. Mandavit igitur Petro Mascaregne Indico Proregi, ut Goa legatum mitteret in Æthiopiam, cuius opera Prete-iannis exploraret animum, eumque ad Patriarchæ & sociorum aduentum præpararet. Sciebat facile mutari Æthiopa ingenia, nec in eodem diu proposito persistere. Ad hoc negotium deligitur à Prorege Iacobus Diaz, vir nobilis; datur illi ex Societate comes Gonzalus Rodericus, probus, prudens, doctusque Sacerdos. Huic adiungitur Fulgentius Frerius, rerum multarum peritus homo, & experiens. Septimo Idus Februarias, anno millesimo quingentesimo quinquagesimo quinto duabus biremibus à Goano portu solunt, & aliquot post dies appellant ad Archicum, qui portus ad Abassini ditionem tunc temporis pertinebat. Terrestri inde itinere Imperatorem petunt, atque in cōspectum & colloquium admissi, Regis Lusitani epistola perlecta, quæ habent in mandatis, coram exponunt. Mutatam reperiunt Claudij voluntatem, longèque ab ea diversam, quam & David habuit eius pater, & ipse initio aditi Imperij habere se per literas Ioanni Regi significauerat. Hic ille Claudius est,

est, ad quem antea Zeilano oppressum bello Stephanus Goma, Indicus prætor cum fratre Christophoro duce quadringentos miserat Lusitanos bellatores, quorum ope regem Zeilæ, qui frequentî Saraceno-
rum atque Turcarum fultus præsidio, annis iam qua-
tuordecim infesta in Abassiam arma inferens ma-
gnam ubique edebat stragem, fuso fugatôque exerci-
tu interemit, & quas amiserat terras, pulsîs ho-
stibus recuperavit. Hic ille est, quem obedientem
fuisse Romanæ Ecclesiæ filium falsò nouus auctor
prædicat, & quòd cum Saracenis dimicans ceciderit,
auctoritate sua in Martyrum numero ferè reponit.
Quæ enim auctor iste de recta Claudij fide, de rebus
ab eo præclare gestis, deque ipsius gloriosa, vt vocat,
morte scribit, apertè falsæ sunt; quemadmodum &
quod addit Ioannem Balthasarem Abassinum, cum
Veronam Italiæ urbem fuisset ingressus, & cognouis-
set in collegio Societatis Iesu, quod ibi erat, habitare
Masseium, illum cum duobus aliis nobilibus veris ad-
iisse, & productis in medium multis, fidèque publica
approbatis testimoniis, adeò apertè ostendisse, falsa
esse, quæ de Imperatore Claudio scripserat, vt ipse
Masseius veritate compulsus, coram collegij Patri-
bus, qui omnes præsentés aderant, eundem Balthasa-
rem beneuolentiæ & amoris ergò arctè sit comple-
xus, & quòd tanto se errore liberarit, gratias egerit
quammaximas, promittens se in alia operis sui edi-
tione omnia, vt in approbatis illis scriptis legerat,
perspicuè traditurum. Hæc enim & superiora, quàm
sint inania Gonzali Roderici patefacient literæ, quas
anno insequente millesimo quingentesimo quinquæ-
gesimo sexto, Idibus Septembris, ex Æthiopia in In-
diam reuersus ad Patres Societatis Goana ex vrbe in
Lusi

Lusitaniam misit. Autographum Olisipone in archi-
 uo Societatis asservatur; ex eo, & ex epistolis aliis gra-
 uum virorum, qui de eadem re ex Æthiopia & India
 in Europam scripserunt, atque ex gestarum rerum
 monumentis accepit Maffei, quæ memoriæ com-
 mendauit. Quæ ex Gonzali literis ad rem præsen-
 tem spectant, quamquam multa sunt, libet producere
 in medium latinè reddita; non enim aliunde certius,
 quàm ex ipsis cognosci res potest. Postquam igitur
 Gonzalus initio literarum recenset, quos mari terræ-
 que inter eundem ipse & socij perpassi sint labores,
 de quibus non habeo necesse dicere, ita scribit. Deci-
 mosexto Calendas Iunias ad Æthiopæ regem perue-
 nimus. Is in castris erat, plurimis vndeque cir-
 cumdatus papilionibus. De nostro factus certior ad-
 uentu, præparari iussit hospitium, quo reciperemur.
 Altero statim die illum adiimus. Intra tentorium no-
 bili stratum tapete & serico peristromate eleganter
 exornatum, thoro sedebat cortina aperto. Eo Iacobus
 accedens, quas portabat, regias literas sedenti porre-
 xit. Iussit ut coram omnibus Lusitanis, qui in castris
 erant, altâ voce legerentur. Ita factum. In iis præter
 alia scribebat Rex Ioannes, anno insequente missu-
 rum se ad illum ex domesticis suis vnum, & aliquot
 insuper viros religiosos, qui multis animi & naturæ
 dotibus essent præditi, vitæque & doctrina maximè
 excellerent. Vt ista Claudius audiuit, subito corre-
 ptus mentis stupore frontem contraxit; & concepti
 animo fastidij certa ore atque oculis præbens signa,
 nihil respondit, quod ad rem faceret. Hoc modo ab
 eo dimissi, ad assignatum rediimus hospitium. Biduo
 vel triduo post ad inuisendam auiam suam, quæ de-
 cem prope dierum itinere distabat, profectus est. Nos
 patente

patente in campo relictis, ne hominem quidem vnum habuimus, qui Imperatoris nomine quidquam egentibus offerret. Non fuimus tamen à Deo deserti; eius benignitate & providentia factum, ut Lusitani generis homo curam nostri susciperet. Ille nos ad locum duxit, cuius erat dominus, tres circiter leucas distans, domique suæ exceptos, ac suorum curæ commendatos cum reliquisset, Imperatorem insecutus est. Mensem ferè vnum hoc in loco traduximus. Quo tempore de Abassinorum erroribus, & Romanæ fidei veritate libellum composui, quem redeunti Claudio offerrem. Is enim, ut à Lusitano quodam valde ipsi accepto cognoui, apertè dicebat, neque indigere se doctrina nostra, neque in animo habere Romanæ Ecclesiæ obedire. Vulgo etiam iactabatur, optimates quosdam palàm affirmare, facilius se iugo Saracenorum supposituros colla, quàm mores proprios cum nostris commutatuos, Qua etiam ex parte in ea magis firmabar sententia, ut quæ vellem, à nobis Imperator agnosceret, ea scripto potius, quàm ore traderem. Sic enim fore, ut ex eius responsione elicerem quid in animo haberet, & consilium detegerem tanto nobis tempore dolosè opertum. Cum primum igitur ad hæc loca rediit, ad castra nos contulimus. Ibi à Lusitanis militibus fuimus excepti. Imperator enim memoriam nostri penitus deposuerat, nec quo essemus loco, aut quid ageremus, scire amplius curavit. Quoniam verò libellum composueram idioma Lusitano, vertique in Chaldaicum oportebat, ab ipso per literas petij, ut assignari mihi iuberet monachos duos ex iis, qui peritiores viderentur, ut possent aliqua fidei Christianæ dogmata in Chaldaicum sermonem aptè verrere; vel le enim me scripto ostendere quàm immeritò Abas-

fini cum hæreticis numerent Romanæ doctrinæ sectatores, & peiores esse asserant Mahumetanis; hoc enim ipsos palàm dicere & prædicare. Quoniam verò sciebam, esse apud eos librum; quem Francorum vocant adulterium, ab Alexandrinis schismaticis cõpositum; in quo & Chalcedonense reprobatur Conciliũ, & multa nobis mendacia affinguntur; ab Imperatore etiã petij, vt iuberet illius mihi copiam fieri. Librũ negauit; monachos concessit; qui tamen cùm vertere opusculum cõpissent, siue quòd ita haberent in mandatis, siue quòd aliquid timerent, siue qua alia occulta causa, cõceptũ opus continuare omnino recusabāt. Neceffe fuit vt Lusitanorũ militũ præfectus semel & iterum ea de re cum Pieteianne ageret; cuius tandem iussu effectum; vt à monachis opus absolueretur, versione iuuante Lusitano quodam, honesto viro, & Chaldaicæ linguæ non mediocriter gnato. Cũ rursũ opera indigerem alicuius, qui rectis characteribus traducta transcriberet; is ab eodem Imperatore & petitis, & concessus. Vix tamen operi manum admouerat, cùm in itam versus Imperator, misit statim, qui scribam repeteret, suisque mihi nuntiaret verbis, haud opus esse morari, vel compositum libellum siue rectè, siue secus esset scriptus, ipsi extemplo mittere, vel talibus negotiis supersederem. Ne igitur res amplius differretur, nève Imperator vllam postea peccati sui exctisationem posset obtendere, necessariũ duxi, libellum, sicut erat malè exaratus, & lituris infectus, illi ostẽdere, certum ad id assignans diem, qui fuit Augusti vigesimus. Vbi dies hic aduenit, cum Lusitanorũ præfecto & septem aliis octòve Lusitanis hominem conuenio. Salute dicta, breui quodam sermone aduentus mei causam incipio exponere. Vetat ille vlt

terius progredi, & aliò sermonem transferens, ictus omnes, quibus se impeti sentit, callidè declinat. Tum ego omittens cætera, libellum offero, quem legere incipiens tantum paulatim concepit furorem, ut inclusum animo virus continere nequeat, & foras euomat. Facultatem, inquit, à me petisti, ut libellum conficeres, in quo fidei declarares veritatem; & monachos etiam, qui Chaldaicam in linguam illum transferrēt, Vtrumque à me concessum. Ecce aliud actum à te. Neque enim fidei explicas veritatem, sed errores illis impingis, qui longè absunt ab erroribus. Oportuit etiam scire te, quantum hoc, quod aggredieris munus, à conditione tua, qui simplex sacerdos es, sit alienum. Nescis ista Episcoporum esse propria, nec nisi ad magnos pertinere Antistites? Quid ausus es in alienam messem immittere falcem? Falsus sum hominem me esse exigui momenti; nihil tamen fecisse, quod à mea esset conditione alienum; cum ea scripserim, quæ in libro Evangeliorum, & sacris Conciliis apertè continentur; quæque sunt Christiano homini omnino credenda. Multos, inquit, mihi ac meis errores obiciis, quibus nullo modo implicamur. Quid de tua, inquam, fide sentiendum sit, Imperator, non decerno. Tuos certè Abassinos à vera religione aberrare, dubiū mihi non est. Nihil enim illis falsò impono. Si placeat rē experiri, monachos tuos, & quos toto imperio habes literatissimos, iubeas huc cōuenire; eos ego erroribus iis, quos in opusculo notavi, irritos esse, ita patlām apertèque ostendam, nemo ut audeat ire inficias. Ille ad hæc, disputationum se odisse tricas, & propriū esse Ethnicorum superstitiones suas committere questionibus; Christi cultoribus, præsertim veteribus, id prorsus cautum. Annos iam transisse plusquam mille

le, ex quo illam profitebantur fidem; si quid in ea inerat à vero abhorrens, quam ob causam tot per annos nemo fuerit, qui tales ipsis exprobraret errores, & id faceret, quod ego modò auderem facere? Ad hoc ego, Deum prauis hominum operibus irritatum, sæpe eos sinere hæc in mala ruere. Ageret propterea & haberet eidem Deo immensas gratias, quòd tali tempore, ipso nimirum vivente, & imperante, in Æthiopiam mitteret, qui sinceræ fidei monstraret viam. Tunc ille, In quatuor, inquit, Christi Ecclesia dissecta sedes est. Nos vni ex his sumus ab initio suboliti, ab ea nunc separari fas & intra vetant. Assentior, inquam, patriarchales, ut vocant, sedes quatuor ab initio fuisse: Romana tamen diuino statuto cæteris est præposita, uti omnium caput, mater & magistra. Cum defecerint aliæ, quicumque illis contra Romanam obediunt, perduelles sunt, & à suo capite miserabiliter diuisi. Meum consule opusculum, in eo difficultatum omnium, quas mihi proponebas, solutiones reperiēs. Caucas tamen diligenter, ne propheticum illud, *noluit intelligere, ut bene ageret*, iure tibi aptetur. Denique verbis multis ultro citroque prolatis, Lusitanorum præfecto interprete, ad extremum addidi, me eo consilio libellum illum composuisse, ut scirem, vellētne erroribus depositis Romanæ sedi parere; & religiosos illos ac doctos viros recipere, quos ad ipsum mittebat Rex Lusitanus: si enim eos apud se habere, & audire nollent, haud ullam esse causam, cur adire Æthiopiam deberent, qui nihil in ea aliud quærerent, præter Abassinorum salutem. Respondit suis se in regnis viros habere religiosos ac literatos, non indigere proinde ut aliunde alij ad se mitterentur; nec sibi umquam fuisse in animo, se aut gentem suam Romano subiicere Pōtifici.

tifici. Quod enim Gaspar Magilanius apud Lusitanum Regem nomine suo fecerat, Arabici cuiusdam Monachi, qui literas suas conuertit, errore fuisse factum; non enim mentem intellexisse suam. Tandem præter Alexandrinum Patriarchâ, cui semper fideliter obedierit, nolle se ullum prorsus alium agnoscere in sacris superiorem. Quapropter cum obstinatissimum hominis animum moliri posse diffidere, accepta venia, discessi. Ille abeunte me, Lusitanorum intuens præfectum, qui cum ipso remanebat, summis laudibus meam doctrinam extulit, asserens valde mirari se, quomodo possem tam iuuenis tanta pollere scientia. Agnoui postea libellum meum integrum perlegisset semperq; illud habere in manibus, & sæpe patri, sæpe fratribus, aliisque imperij principibus ostendere. Illud etiam mihi renunciatum, Abunam; cum recte sciret, quid ipso libello contineretur, eius lectionem graui anathemate prohibuisse. Ob eam causam altero ab interdicto die missus ad eum est à Preteianne nuntius, qui legendi facultatem suo nomine postularet. Cum Abuna negasset, versus in rabiem Imperator multa in hominem probra & contumelias iactauit. multa contulit maledicta, vocauit hæreticum & Mahumetanum, qui cum nequissimi pseudopropheta Alcoranum legeret, tam sanctum libellum, & à tali compositum auctore, legi vetaret. Addidit insuper hoc, quandoquidem in eas venerat Abassiarum terras, ut Abunæ Doctorisque munere fungeretur, quamprimum ad ea responderet, quæ simplex sacerdos, & nulla præditus dignitate opponebat. Negauit Abuna, ullam se suscepturum aduersum me disputationem; cum non ad disputandum, sed ad conferendos ordines in Abassiam venisset. Interim cum tota in aula de re

nulla magis quam de hac homines vulgo loquerentur, atque ex aulicis quidam nobis, aduersæ parti fauerent alij, iudicauit Imperator consultatione opus esse. Nonnullos ergo monachos accersit, qui putabantur literis & sanctitate præstare, iisque præcepit, vt libellum meum purè & correctè transcriberent. Valde timui, ne omitterent aliqua, quæ sciebam ab Imperatore, neque rectis legi oculis, neque æquis auribus auscultari. Hoc de genere erant illa, quæ de Leone Romano Pontifice, de Dioscoro Alexandrino Patriarcha inserueram. Dioscorum enim virum sanctum, Leonem pessimum fuisse, in animo & in ore Abassinis est; & hunc quidem tanto aduersantur odio, vt nec ipsius nomen absque horrore percipiât. Chalcodonense quoque reprobant Concilium, & in fide errasse dicunt, atque iniuste Dioscorum condemnasse. Ab huius ergo Concilij tempore, cuius omnes sanctiones decretaque reiiciunt, à Romana Ecclesia sunt diuisi. Sequuntur etiam Sergij Pauli & Pyrrhi hæresim à sexta Synodo Constantinopolitana improbatam, & permultos alios errores. Vbi tempus aduenit, cum mihi Imperator, vt promiserat, responsurus erat, contuli me in aulam, misique ad illum qui nuntiaret, adesse me, & responsum expectare. Ad hoc ille, Patris, inquit, mei legatus decem in Lusitania annos fuit, nec potuit tam longo tempore negotium suum conficere; æquum igitur est, vt Lusitani Regis legatus responsum meum patienter expectet. Intellexi, quod ista tenderent, nec ampliùs morandum ratus, facultatem per internuntium petij in Indiam redeundi. Callidè rem distulit; neque enim decere, vt qui tantus essem vic, tanta redirem celeritate; præsertim cum illuc venissem de summis rebus acturus: neque posse

me

me alibi fructuosius, quàm audiendis illic Lusitano-
rum confessionibus operam impendere. Si tamen o-
mnino discedere statuerem, mensis adhuc vnus spa-
tium ipsi concederem ad respondendum; eo finito
quamuis nihil responderet, datam fingerem respon-
sionem, & quod luberet, abirem. Post hæc, quarto
Nonas Octobris misit ad me Imperatoris mater, fa-
mulum quemdam, qui diceret, optare se mecum lo-
qui, & calicem videre, quem Goa portaueram; valde
enim extolli inter suos, vti rem præclaram & dignam
visu. Accepto nuntio profectus illicò sum cum ali-
quot Lusitanis, quos ipsa voluit vnà mecum ingredi
ad se omnes. Paucis præmissis, vbi ad Religionis ne-
gotium ventum est, ita dixit: Cùm vestra nostraque
fides nihil prorsus differant, sed vna atque eadem sit,
quid, quæso, oportuit, hac de re quidquam scribere,
& quietos animos sine causa sollicitare? Ad hoc, sic
ego breuiter: Nū Abassini tui rectam teneant verita-
tis viam, ex iis quæ scripsi, poteris agnoscere. Hoc ti-
bi Augusta, verissimè affirmo, quamuis errore alio
non teneremini, vnus ille, quod à Romano Pontifice
Christi in terris Vicario separati estis, satis vobis su-
pérque esset ad sempiternum interitum. Respondet,
se, & gentem suam Petro ac Paulo Apostolis, ipsique
inprimis Christo subditam esse. Negavi Christo sub-
iici qui eius Vicario non subiicitur; cùm idem Chri-
stus dicat, *Qui vos audit, me audit; qui vos spernit, me
spernit.* Quod si verum est, quod ex eodem Domino
Euan gelista Ioannes refert, vnum fore ouile, & vnum
pastorem, quem nam crederet, eum esse pastorem?
Respondit, S. Petrum. Si hic, inquam, vnus ille pastor
est, oportet vt tale munus iis quoque competat, qui
eidem Petro ordine succedunt. Iterum illa: Neque ego,

inquit, neque mei sancto Petro obedientiam negamus. In eadem nunc sumus fide, in qua fuimus ab initio: ea si recta non erat, cur per tot ætates ac sæcula nemo repertus est, qui nos errantes commoneret? Hic ego, non potuisse Romanum Pontificem, qui totius Christi Ecclesiæ pastor est, præteritis retro annis Doctores in Abassiā mittere, eo quod Mahumetani omnia circumdarent, nec vllum ad ipsos aditum relinquerent. Nunc verò aperta iam maritima ad Æthiopiā via, id præstare, quod nequiuit prius. Sciret Christi Rempublicam, vbicumque terrarum sit, vnicum esse mysticū corpus, quod in cœlo habeat Christum caput; in terra Christi Vicarium, qui Christianorum omnium caput est. Dubitari non posse, quin mēbra capiti debeant subiici, atque ab eo dirigi & gubernari. A condita Christi Ecclesia vsque ad annum quadringentesimum octogesimum octauum apud Abassinōs, & in toto Alexandriae patriarchatu rectē rem habuisse; exinde cœpisse in interitum ruere. Si assequi salutem vellent, iterum se cum suo legitimo capite coniungerent, & vnum cum eo corpus efficerent; ipsū enim Christum voce sua asseruisse, vnum tantum in Ecclesia esse ouile, & vnum tantum pastorem: at corpus vnum, nisi valde monstruosum sit, vnum dumtaxat caput habere: esse autem Christi corpus perfectissimū, atque ab omni alienum fœditate. Tunc illa, Tantum, inquit, opus, quantum istud est, vt nimirum cum Romano capite mēbra cætera coniungantur, nihil ad te, neque etiam ad me pertinet, necessum est, vt alij Patriarchæ cum Romano congregati de re tanta deliberent, & quid faciendum sit, auctoritate sua decernant; veteres enim mores ac ritus priuato consilio deserere, nouosque suscipere, res est pericu

periculi & offensionis plena. Ego contrà, perantiqua
 ellè quæ vera fides docet, neque in iis noui quidquã
 reperiri, propterea tollere potius offensiones debere,
 quàm concitare, quidquid ex fidei præscripto fiat. Post
 hæc, & huiusmodi alia, sic deinde in eadem epistola
 Gonzalus. Paucos post dies castra mouit Imperator
 ad locum bidui itinere distantem. Secuti euntem su-
 mus. Cùm in quodam campo essemus, tres ad me
 monachi venere, ex iis vnus literatus habebatur, ma-
 gnòque mei videndi & alloquendi tenebatur deside-
 rio, vt de religione ageret. In ipso sermonis exordio
 falsus est, omnia nostra sibi mirificè placere; probare
 tamen non posse, quòd neque sabbatum seruaremus,
 neque à porcina carne & leporina abstinere. Cũ-
 que ad hæc adderet alia, magnam euomuit veneni
 copiam. Afferuit enim iustorum hominum ex hac vi-
 ta decedentium animas, etsi nihil purgandum ha-
 beant, nõ ideo tamen statim in cœlo recipi, vt Deum
 videant, sed ad terrestrem duci paradysum, mundi fi-
 nem expectaturas. Spiritum sanctum à solo Patre
 procedere. Filium esse Patri quoad humanitatem æ-
 qualem. Mahumetanos tantum & Ethnicos post
 mortem detrudi ad Inferos, vt ibi perpetuò sint; Chri-
 stianæ legis professores, qui flagitiosè viuunt, tamdiu
 gehennæ igne torquendos, donec peccata purgent:
 omnes enim qui Baptismatis caractere erunt signa-
 ti, ad beatitudinem tandem rapiendos; atque id aper-
 tè constare ex illis Christi verbis; *Qui crediderit, & ba-
 ptizatus fuerit, saluus erit.* Verum hos ego errores tum
 rationibus, tum Scripturæ testimoniis ita coargui, vt
 propius accedens significatit factum sibi satis. Ne ve-
 rò eius socij, qui idiotæ erant, quidquam audirent, ita
 mihi insusurrauit: Vera sunt, quæ doces; ea ego omnia

animo seruuabo meo. His dictis abiit. Intei hæc exactus est mensis, quem Imperator ad parandam responsionem petierat. Eum adij, simulque responsum & facultatem petij ad discedendum. Liberum, inquit, tibi sit, cum libuerit, discedere. Quod attinet ad religiosos, quos Ioannes Rex tuus ad me mittit, cum Mazuam peruenerint, præsto ibi erit, qui venientes excipiat, & conducat ad me: lubenter eos audiam de fide differentes. Tum ab eo discessi, meque statim in viam dedi. Ex itinere aliqua inuisi Lusitanorum oppida. In iis multorum excepi confessiones; quosdam à pellicatu ad legitima traduxi coniugia, pellicibus primum, quæ genere & secta Abassinæ erant, Romana doctrina instructis, & ad fidem reuocatis. Quoniam huius regionis sana schismaticorum sacris dicata sunt, neque aras habent nostris vsibus accommodatas; altare nobiscum portabamus ad rem diuinam faciendam. Cum in vno essem ex hisce oppidis, quidam illuc me salutatum venit. Missus hic erat ab insigni quodam Archimandrita, qui ad sex circiter miliaria duobus magnis præerat cœnobiis, quorum in vno Monachi, in altero moniales morabantur. Illi Belibanos seu Plurimanes nomen, per ea loca satis celebre. Ab eo enim exit quidquid est in tota Abassia credendum; quoniam ibi putatur esse regula fidei: & ob hanc causam Cœnobiarcha ipse summo apud omnes in honore est. Congruum iudicaui, hæc inuisere cœnobia. Profectus ad ea sum simul cum Lusitanis itineris sociis. Aberat Archimandrita. Cœnobia breuiter lustraui. Tam ipsa, quàm Monachi longè à nostris differunt. Suam quisque habet ædiculam ab aliis seiunctam, suam habet agri partem, quam sibi colit. Sic omnes & habitatione & occupatione diuisi sunt,

sunt, ut non cœnobium vnum, sed pagum exiguum te videre credas. Quamquam verò ex parte vna Monachi, ex alia habitent Moniales, non aded tamen separati sunt, quin multi inter eos filij dicantur gigni. Horum familia nec Franciscana est, nec Dominicana. Tecleay Manot vocatur. Hoc institutoris nomē fuit; quod apud eam gentem fidei columnam sonat. Magnam hic habet inter Abassinos sanctitatis opinionem. Multa dicitur patrasse miracula. Illud præ cæteris celebratur, quod occiderit serpentem ab Ethnicis habitum pro Deo; atque ipsos deinde Ethnicos ad Christi primùm fidem; ad hanc deinde viuendi formam multos eorum conuerterit. Hæc omnia in suis literis Gonzalus. Labet nunc alia in hanc eadē sententiam seorsim addere.

*Qualis fuerit Imperatoris Claudij in Romanam
Ecclesiam, & ad recipiendum Patriar-
cham animus.*

C A P V T X I X .

Alfonsus de Francia homo fuit Lusitanus, honesto natus loco, qui inter Imperatorem & Gonzalum egerat interpretem. Is à Gonzali discessu de iisdem rebus longam habuit cum eodem Claudio disputationem. Quid in ea sit actum, in epistola collegit, quam ad ipsum postea Gonzalum Goam misit. Sic orditur. Imperator eadem mihi, quæ tibi, Gonzale, tetendit retia, ut quia te non potuit, me saltem caperet istiusmodi rerum minùs scientem. Coram o-

mibus Lusitanis mihi inprimis obiecit, quod ego &
 ipsum, & Dioscorum, & totam Abassinorum gen-
 tem hæreseos damnarem. Respondi liberè, ab annis
 plusquam mille (sic enim à doctis audieram) Abassi-
 nos Dioscoto auctore ac duce à Romana Ecclesia, ac
 proinde à vera fide defecisse. Eos verò à recto aber-
 rare, & ex Scriptura sacra, & Sanctorum auctoritate,
 Conciliorum optimè probari posse. Ad hæc ille: Si
 vestra, inquit, scriptura ita sentit de nobis nouit Deus
 quid de vobis sentiat nostra. Certò, inquam, scio Ro-
 manæ fidei sectatores in hæreticorum numero à suis
 Abassinis reponi, & Nestorianos haberi, quasi duas
 in Christo admittamus personas, sicut duas admitti-
 mus naturas; id enim mihi frequenter ab ipsis falsò
 & cum probro obiectum. Si ut nobiscum credas, quæ
 credimus, satis ea non sunt, quæ de fidei veritate sunt
 à Gonzalo doctè & copiosè scripta, conice oculos,
 Imperator, in tot reges ac principes potentissimos &
 maximos per vniuersam Europam vnius fidei vincu-
 lo coniunctos. Intellige facilius esse te vnum, quàm
 tot alios à vero detlectere. Iterum ille ad hæc, huc-
 usque se cum Europæis regibus ac principibus Chri-
 stum agnoscentibus pacem & Societatem conseruas-
 se; me causam esse, cur iam inciperet aduersum ab eis
 animum habere. Atqui ego, inquam, à Romano Põ-
 tifice & Lusitano Rege ad se missus sum, ut hanc ti-
 bi, quam proposui, veritatem patefacerem. Nihil est,
 quod pro ea confitenda non feram libenter; mortem
 quoque, si oporteat alacriter oppetam. Neque com-
 mittam vñquam, Deo iuuante, ut quod legi Christia-
 næ, quam sequor, quod regi meo, à quo sum missus,
 me debere sentio, vlllo metu aut vitæ periculo omit-
 tam. Questus præterea de me est, quod dixerim, ipso-
 rum

tum Abunam à Turcarum Imperatore ad hæc loca mitti. Ad quod respondi, certum esse, non mitti illum à Pontifice Romano, qui omnium est maximus, & solus habet ius mittendi. Si adeò, inquit, Romano nomini ac Romanæ fidei addictus es, quamobrem hominem hoc misisti, qui verbis tuis à me peteret, ut curam alicui demandarem Baptismi & Eucharistiæ sacramenta tibi ministrandi? Negavi constanter, vniquam me ab eo aut ab ullo alio Baptismum petiisse, cum octauo ab ortu die, Christiano more, sacra vnda fuerim lotus; Seiamque nefas esse hoc sacramentum, semel ritè collatum, iterum conferri aut suscipi. Eucharistiæ quidem pabulum postulasse, cum vicinus morti essem; quod à peritis didicissem, talibus in euentis, si Catholici desiderentur ministri, haud esse illicitum hoc diuino pane ab hæreticis cibari atque ex hac doctrina iterum me id facturum, si ad idem deuenirem vitæ discrimen, nec catholicum habeant sacerdotem, qui eo me viatico ad instantem mortem queat præparare. Tum ille, ideo noluisse se Eucharistiæ ministrum mihi petiti concedere, quia scriptum à Paulo est, *Vna fides, unum Baptisma*. Si ita, inquam, Paulus scripsit, quæ, obsecro, causa est, cur annis singulis baptizaris? Hæc illi interrogatio vehementer stomachum mouit. Verba igitur iactans plena furoris, gladium minaciter arripuit. Persisto immotus & animo intrepido; si quod, inquam, supplicium merui, ne inferre differas, Imperator: quælibet aduersa pati paratus sum. Nullæ me vllius terreni regis minæ, nulli terrent cruciatus; quominus summi Regis Christi prædicem veritatem. Nec alium metuo regem, præter eum, cui cum Propheta dicimus, *Domine ne in furore tuo arguas me, neque in ira tua corripias me*; qui quic

potest animam & corpus perdere in gehennam. Tu, si placet, sævi torque, occide, rem mihi feceris gratissimam. Hæc ego magna vocis contentione & vultu imperterrito. Cùm talem in me animum esse cerne-
ret, qualem numquam antea fuerat expertus, disputa-
tione relicta, aliò secessit. Ego Gonzale, sic existi-
mo, Imperatorem hūc multo libentiùs sub durissimo
Saracenorum iugo, quàm sub Romani Pontificis leni
mitique imperio futurum. Et hæc semper mihi fuit
de ipso opinio: nolui tamen priùs mentem meam ti-
bi aperire, ne aliquomodo vota tua retardarem. Ha-
cenus Alfonso. Ex his verò qualis fuerit, qualis ho-
die sit Abassinorum religio, perspicuum est. Sed iam
ad Patriarchæ protectionem.

*Patriarcha cum Ouiedo Episcopo & aliis sociis
Olisipone in Indiam soluit.*

C A P V T XX.

Tertio Calēdas Apriles, anno salutis nostræ quin-
gentesimo quinquagesimo sexto supra millesi-
mum Ioannes Nonius Barretus Æthiopix Patriar-
cha, Andreas Ouiedus Episcopus Hierapolitanus, &
alii Societatis religiosi Olisipone soluentes varia for-
tuna in Orientem nauigarunt. Patriarcha vehebat
illa ipsa naui, qua Ioannes Menesius Classis præfe-
ctus, nomen ipsi naui Flos maris. Cum extanti viri
cōsortio plurima commoda Menesius percepit; tum
inprimis illud, quòd cùm fœda tempestas derepente
excitata, pèrque dies aliquot furiosè sæuiens, nauim
ipsam atque omnium vitā in summum discrimen ad-
duxi

duxisset, Patriarchę precibus, absque ullius damno sedata est. Acceptam enim in vase aquam, solitis Ecclesię verbis linteatus benedicens, & partim in tumētes maris fluctus, partim in vela ac rudentes, aliásque nauis partes certa precationis forma iniiciens, effecit, vt positis ventis quiescerent maria, pacémque nauigantibus & lætitiám restituerent. Reliqua vsque in Indiam nauigatio nec citatior cursu, nec successu felicior esse poterat. Post menses enim quatuor & dies decem, quod pæne inauditum est, cùm dies etiam duo de triginta, iactis anchoris in Mosambico morati essent, Goam incolumes tenuere. Inter nauigandum ægrotos, qui semper in hisce Indicis nauibus solent esse permulti, frequentissimè Patriarcha inuisebat; corúmque non verbo magis, quàm opere, labores, molestias, indigentiam, alleuabat. Si quid enim siue ad recuperandam sanitatem, siue ad leniendum dolorem, siue ad mœstitiam depellendam, cuiquam opus erat, id nullo modo ei deesset, impigrè procurabat. Confessionibus vectorum audiendis, tam eorum, qui prospera, quàm qui aduersa utebantur valetudine, sic erat intentus, vt mercede magis ad id munus conductus, quàm illud sponte obire videretur. Sæpius omnium, quotquot illa naui vehebantur, qui & numero plurimi, & consciētiæ ac vitæ ratione erāt valde dispares, magno quidem labore, sed non minore vtilitate, cum altero Societatis sacerdote excepit confessiones. Is erat Franciscus Rodericus Lusitanus, qui tum propter singularia animi ornamenta, quibus mirificè excelluit; tum quia in eadem nauigatione operam suam cū Patriarchæ opera coniungens illustrem fecit Societatis caritatem, iure me adstringit, vt aliquam ipsius hoc loco memoriám relinquam. Vir fuit notæ apud omnes

potest animam & corpus perdere in gehennam. Tu, si placet, sæui torque, occide, rem mihi feceris gratissimam. Hæc ego magna vocis contentione & vultu imperterrito. Cùm talem in me animum esse cerne-
ret, qualem numquam antea fuerat expertus, disputa-
tione relicta, aliò secessit. Ego Gonzale, sic existi-
mo, Imperatorem hûc multo libentiùs sub durissimo
Saracenorum iugo, quàm sub Romani Pontificis leni
mitique imperio futurum. Et hæc semper mihi fuit
de ipso opinio: nolui tamen priùs mentem meam ti-
bi aperire, ne aliquomodo vota tua retardarem. Ha-
ctenus Alfonsus. Ex his verò qualis fuerit, qualis ho-
die sit Abassinorum religio, perspicuum est. Sed iam
ad Patriarchæ profectionem.

*Patriarcha cum Ouiedo Episcopo & aliis sociis
Olisipone in Indiam soluit.*

C A P V T XX.

Tertio Calédas Apriles, anno salutis nostræ quin-
gentesimo quinquagesimo sexto supra millesi-
mum Ioannes Nonius Barretus Æthiopix Patriar-
cha, Andreas Ouiedus Episcopus Hierapolitanus, &
alij Societatis religiosi Olisipone soluentes varia for-
tuna in Orientem nauigarunt. Patriarcha vehetur
illa ipsa naui, qua Ioannes Menesius Classis præfe-
ctus, nomen ipsi naui Flos maris. Cum extanti viri
côsortio plurima commoda Menesius percepit; tum
inprimis illud, quòd cùm fœda tempestas derepente
excitata, pèrque dies aliquot furiosè sæuiens, nauim
ipsam atque omnium vitā in summum discrimen ad-
duxi

duxisset, Patriarchę precibus, absque ullius damno sedata est. Acceptam enim in vase aquam, solitis Ecclesię verbis linteatus benedicens, & partim in tumētes maris fluctus, partim in vela ac rudentes, aliásque naus partes certa precationis forma iniiciens, edēcit, ut positis ventis quiescerent maria, pacémque nauigantibus & lætitiā restituerent. Reliqua vsque in Indiam nauigatio nec citatior cursu, nec successu felicior esse poterat. Post menses enim quatuor & dies decem, quod pæne inauditum est, cū dies etiam duo de triginta, iactis anchoris in Mosambico morati essent, Goam incolumes tenuere. Inter nauigandum ægrotos, qui semper in hisce Indicis nauibus solent esse permulti, frequentissimè Patriarcha inuisebat; eorūque non verbo magis, quàm opere, labores, molestias, indigentiam, allenabat. Si quid enim siue ad recuperandam sanitatem, siue ad leniendum dolorem, siue ad mœstitiā depellendam, cuiquam opus erat, id nullo modo ei deesset, impigrè procurabat. Confessionibus vectorum audiendis, tam eorum, qui prospera, quàm qui aduersa utebantur valetudine, sic erat intentus, ut mercede magis ad id munus conductus, quàm illud sponte obire videretur. Sæpius omnium, quotquot illa naui vehebantur, qui & numero plurimi, & consçientiæ ac vitæ ratione erāt valde dispares, magno quidem labore, sed non minore vtilitate, cum altero Societatis sacerdote excepit confessiones. Is erat Franciscus Rodericus Lusitanus, qui tum propter singularia animi ornamenta, quibus mirificè excelluit; tum quia in eadem nauigatione operam suam cū Patriarchæ opera coniungens illustrem fecit Societatis caritatem, iure me adstringit, ut aliquam ipsius hoc loco memoriā relinquam. Vir fuit notæ apud omnes

mnes probitatis & prudentiæ laude clarus. Non Phylas tantum & mathematicas, sed utramque etiam apprimè calluit Theologiam, & quæ speculatrix dicitur, & quam moralem, appellant. Olisipone in collegio sancti Antonij Abbatis primus ex Societate, cōscientiæ, ut vocant, casus, & sphaeræ scientiam publice professus est. Concionandi munus tum in Lusitania, tum in India magna omnium approbatione & fructu multos annos exercuit. Multos quoque Goanum collegium rexit. Summo ardebat & Ethnicos ad fidem & ad iustitiam impios perducendi desiderio: neque omittebat quidquam, quod crederet ad utrorumque salutem attinere; quo etiam nomine ita erat cognitus, ut quamvis pedum vitio præpeditus numquam Goa egrederetur, nemo tamen alius per vastas illas orientis orbis oras illo tunc esset fama celebrior. Erat utroque captus pede; nec sustentare rectum corpus, nec mouere sine aliquo adminiculo poterat. Domi quibusdam utebatur ligneis furculis (Cruces Itali, Lusitani Muletas vocant) quibus innixus deambulabat. Iumento insidens exhibat foras, cum erat opus. Hominum manibus ponebatur in suggesto. Huiusmodi cum esset, diu multumque laborauit, ut ad Indos mitteretur; cumque illi à superiore quodam fuisset aliquando responsum, satis constare, ipsum ad talem missionem esse ineptum, desineret proinde incassum fatigari, qui ne passum vnum quidem posset absque furculis conficere. At ego, inquit, non ambulandi peto facultatem, sed nauigandi. Hæc res cum vento & velis, non pedibus fiat, satis constat, posse me ad illam sine pedibus iudicari aptum. Denique pulsus ab aliis, à B. Ignatio, cum quo tandem ea de negotio per literas egit, factam sibi proficiscendi copiam tanto gaudio est

est amplexus, vt apertissimè significarit, nihil sibi gratius concedi potuisse. Cùm iam hominum humeris deportatus nauim conscenderet, actis Deo pro singulari illo beneficio palàm gratibus, ad socios, qui aderant, conuersus, Vellem, inquit, Patres, si possem, horum adminiculorum, atque horum etiam pedum effigiem aliquam in Lusitania veluti monumentum relinquare; non quidem, vt esset vllus, qui huius vilissimi homunculi sempiterna digni obliuione, vel momento temporis recordaretur; sed vt nemo vmquam esset, qui talem intuens imaginem desperaret, id se assequi posse, quod ego sum assecutus; omnesque cæci, claudi, aridi, debiles, manibus & pedibus capti, quocumque affecti corporis vitio, quacumque notati deformitate certò scirent, esse sibi in hac piscina remedium, nec ab ea aliàs excludi, quàm qui voluntate sua excludi volunt. Dum erat in naui, simul cum Patriarcha, suis fultus furculis, corpúsque per tabulata, perque foros & per gulas trahens à vectoribus cogebat stipem, qua egenos agrósque ex parte iuaret. Cùm Mosambicum venit, Saracenos adiit, insulæ habitatores, vt aliquam eis, si posset, Euangelij lucem impertiret. Habuit cum eis de religione quæstiones, & contra nequissimum pseudopropheta sic egit, vt Mahumetani cùm plurima dicerent deuia & pugnantia, tandem, quod impudentium hominum proprium perfugium est, rem totam risu soluerent, per ludibriū iactantes stare non posse, quæ homo diceret captus pedibus; nec posse quidquam rectè ab eo concludi; qui pæne truncus esset; ac sic de re ageretur, quam manibus aut pedibus, non ratione & voce confici oporteret. Cùm verò pedum vitium eo magis obiicerent illudentes, quo se victos fuisse ferebant ægrius,
Videte,

Videte, inquit Franciscus, vter deformior sit, egone, qui tantum pedibus careo, an Mahumetus vestier, ipsa nequitia nequior, qui sectam vobis tradidit nec pedes habentem, nec caput. His illi puncti verbis, a risu in indignationem versi à conspectu recessere.

A Mosambico Patriarcha Goam peruenit, & ibi manet, misso in Aethiopiam Oniedo.

C A P V T X X I.

VNo ferè mēse in Mosambico exacto, resecti sique per eam quietem viribus, cū nauigationis continuandæ tempus adesset, ad nauim Patriarcha & socij recepti, soluunt è portu, & fauoniis spiritantibus pandunt vela, cursūque prospero ac propere immensam maris vastitatem inter Africam & Asiam tractu longissimo interiectam superantes, Goam perueniūt. A Petro Mascarenâ Indico Prorege, & à cæteris, qui alicuius erant in ea vrbe nominis, cum summa beneuolentiæ & honoris significatione exceptus Patriarcha est. Ipsi potissimum canonici, qui per eos dies Episcopo carebant, magnam ex eius aduentu cepere lætitiæ voluptatem; quodd præter cætera haberent, qui munia exercere posset Pontificalia, quorum tunc vsus maximè erat Goræ & Goanæ diocesi necessarius. Cæterum vix Goanum solum Patriarcha tetigerat, cū statim ingens quædam tristitæ procella in hominem irruens, quod ex omnium ordinum studio & beneuolentiæ gaudium conceperat, ab eius pectore longè pepulit. Ex Gonzali Roderici literis agnouit, A bassinorum Imperatorem ita suis hæcere erroribus, vt eos se-

cus,

cus, ac promiserat, pugnacillimè defenderet; & pertinaciter negaret, vllam se vñquam Romano Põifici obedientiam præstiturum. Res illa magis, quàm dici potest, sanctissimi viri animum affixit; quòd hac vna ratione videret, suæ sibi Æthiopiæ adẽundẽ vel omnino interclusam esse viam, vel tanto obseptam impedimento, vt in ea aperienda satis superque sibi esset desudandum. Postquam sæpius de negotio tanto & cū Patribus Societatis primùm, & cum ipso deinde prorege multa in vtramque partem priuatim disseruit; ad multorum iudicia rem putauit deferendam. Petiit igitur à Prorege, vt auctoritate sua Concilium cogat sapientium, quorum quid in præsentī difficultate sit agendum, consultationi cõmittat. Placet petitio. Satim Prorex ad se acciri iubet tum ex religioso, tum ex senatorio ordine non paucos, prudentia & probitate insignes, qui rem ancipitem suis agitent sententiis, & quod factu optimum cuique visum, in medio ponant. Congregata in prætorio concione, ita Patriarcha primus dicere orsus est. Optimè tenes, Prorex inclyte, nec vos latet, viri clarissimi, quanto sæper studio Ioannes Rex inuictissimus & maximus contenderit, vt Abassinorum populis à recta fide aberrantibus aliquod veræ lucis subsidium per suos suppeditaret; quātumque iam inde ab eo tẽpore, quo ignotæ terræ & ignotiora maria Lusitanorum industria & armis aperiri cœpta, & sua & Pontificis maximi auctoritate effecerit, vt miseram gentem ab suo capite pestifera diuisione seiunctam ad coniunctionem reduceret; putrẽque ac putidum membrum adhibito concordie medicamento redderet sanitati. Rem ab exordio repetere, & aures vestras longa narrationum serie obtundere, animus mihi non est. Velim tantummodo considerare

tis, quid in re præfenti agendum fit. quod & Chriftianæ Reipublicę dignitati, & Lufitani Regis auctoritati confentaneum videatur. Scitis Claudium Abaffinorum Imperatorem accepturum fe Catholicas leges, & Romano Pontifici fubmiffurum caput (quod pater eius David facere antea decreuerat) nõ ita pridem promiffiffe eamque fuiſſe cauſam, cur non ſolum nouus ad eum deſtinatus fit Patriarcha, cuius opera auulſis hæreſum erroribus ad ſanam doctrinam & antiquæ fidei ſinceritatem redire cum ſuis poſſet; ſed magnifica etiam cum pretioſiſſimis donis decreta legatio, quam qui obiturus erat, Fernandus Soſia, vir prudentia & nobilitate nemini veſtrũ ignotus, magno meo dolore, ne minore rerum noſtrarum incommodo, vitæ prius, quàm nauigationis finiuit curſum. Feſellit Claudius datam Pontifici & Regi fidem: ſpes noſtras & vora eluſit. Suas ſic amat, vt feront, tenebras. ipſos vt acerbiffimè oderit nuntios veritatis; periculũque ſit, nec infernis agitatoſ furiis, eoſdem vi ferroque abſumat. Vereor, vt ad illam colluſionem ſclerũ, ex quibus aiunt eſſe conflatum, quidquam aliud ad extremum addat, quo & ſacroſanctam Romanæ Eccleſiæ amplitudinem, & Regis noſtri maieltatem offendat. Ego quidem, quod ad me a tinet, adeò Æthiõpiam adire non reformido, nihil vt ardentius appetam, quàm eò deferri, vbi inter mihi commiſſas oues & viuere poſſim, & mori. Quid enim vllis deterreat aut laborum incommodis, aut vitæ periculis, cum ante oculos mentis Chriſtum habeam paſtorem ſummum, qui poſt infinita mala indigniſſimè tolerata animam tandem ſuam poſuit pro ouibus ſuis? Vehementer igitur à te peto, optime Maſcaregna, vt parati mihi quamocyſſime nauim iubeas, qua

ad meos traiciam Abassinos, cum quibus viuam & moriar. Eos ego, si ad sanam mentem reuocare, & Romanæ Ecclesiæ restituere non potero, debito saltem dolore, & lacrymis, dum vita erit, coram prosequar, & cum diem extremum egero, hoc vnum mihi erit inter cætera solatium, quod inter eos, qui meæ fidei crediti sunt, ad vltimum vsque spiritum firmiter perstiterim. Nemo in concione fuit, cui non visum, & à maiestate Romanæ sedis, & à Lusitani Regis grauitate alienum esse, tantum ac talem virum, tam sublimi decoratum dignitate, sine valido armatorum hominum comitatu ad eas oras proficisci, in quibus ex maximis suis laboribus, difficillimo illo tempore, fructum alium capere non posset, nisi iniquissimæ gentis probra, maledicta, illusiones, ludibria, ad quæ vulgo proclues sunt, qui religionem Christi, quam profitentur, falsis opinionibus deprauant. Fuere igitur qui sentirent, proficiscendum quidem esse Patriarchæ, sed dandam illi septingentorum saltem militum egregiam manum, qua & personæ suæ dignitatem tueri posset, & barbaro principi terrorem incutere, nequid contra ipsum impudenter machinaretur. Multo maior concionis pars eò inclinauit, vt crederet donec Ioannes Rex de mutata Claudij mente, deque statu rerum fieret certior, suamque super his indicaret voluntatem, haud esse decens, Patriarcham Goa efferre pedem. Hæc approbata sententia est. Ne tamen aut timore aliquo, aut vlla forte negligentia deferi videretur ea prouincia, quæ tanto summi Pontificis & Ioannis Regis studio fuerat suscepta, communi consensu statutum, vt relicto Nonio Patriarcha, Andreas Ouiedus cum aliquot ex Societate religiosi Æthiopiam peteret, remque ipse tentaret per se, & cum per-

fido Imperatore liberius ageret de religione, de qua idē Imperator Gonzalum Rodericū, quod nulla prædictus esset Ecclesiastica dignitate, secum egillē, iniquē tulit, & conquestus est: ut verò ex eo decreto non modicā Nonius tristitiam, ita summam Andreas concepit animo voluptatem. Neque enim quidquam ipsi peterat optabilius accidere; cum immensam quādam sitim, quā perpetuò æstuabat, & mortales omnes iugandi, & durissima quæque pro Christo perferendi, non alibi melius, quam apud barbaras illas Æthiopum gentes explere se posse speraret. Paucos igitur post dies consociis ē Goano portu soluens in Abassiam lætus discessit.

Vita præsentis præclaris virtutum operibus exercita finem Patriarcha imponit.

C A P V T X X I I .

EXtremus vitæ Ioannis Patriarchæ actus sex circiter continetur annis quibus Goæ corpore, in Abassia animo fuit. Toto hoc tempore, donec ad metam ventum, rem Æthiopicam supremo rerum moderatori, & Indico Proregi, suo cuique modo, ardentissimè commendavit. A Deo precibus assiduè petit, ut illam gentem amicis oculis despiciat ē sublimi, eamque Romanæ matri firmissimo incorruptæ fidei vinculo coniungat; nec patiatur tamdiu sibi ad onus suas intercludi aditum. Protegem frequenter & sollicitè precatur, ut si aliud aut non possit, aut certè nolit, vnum sibi saltem iubeat parari catorem (exiguū & parum tuti nauigij genus est) quo in Æthiopiam vehatur,

hatur, nec discessum suum, suâque optata, tamdiu remoreretur: se à Deo & à Pontifice maximo Christi Vicario datum, illis populis pastorem ac ducem; æquū non esse, ut tam longo ab iis tempore, tantoque locorum interuallo sit disiunctus. Si quid periculi, siue à Turcis occurrat in mari, siue ab ipsis Æthiopibus in terra, id subire se & velle libenter, & iure debere, ne contra Christi præscriptum boni pastoris partes & officium deserat. Ipsum igitur per æterni Numinis maiestatem, perque omnes cœlites immortales orare & obsecrare, ne ullam sui aut dignitatis suæ habere velit rationem; abire se permittat sine classe, sine militum præsidio, sine vlllo comitatu, satis per se tutum esse, quem ipsa pericula & res aduersæ, quo plus affertant damni, eo faciunt illustriorem. Cùm Prorex, quia sciebat Abassinorum Imperatoris ac totius illius populi voluntates ipsa obstinatione rueri in peius, & portus illos, ad quos appellere nostri ex India poterant, Turcarum armis occupari, omnesque ad terram aditus eorundem classibus præcludi, hisce aliisque talibus Patriarchæ precibus flecti se nequaquam sineret; tentauit Ioannes Patriarchatus dignitate se abdicare: & ea super re ad Ludouicum Gózaluiū de Camera, veterem in Africana missione socium, in Lusitaniā scripsit. Eius epistolæ hæc sunt verba, ad rem præsentem attinentia, ex Lusitano sermone in Latinum fideliter conuersa. Obsecro te propter Deū, mi Ludouice, ut qui magna ex parte causa fuisti, cur graue hoc Patriarchatus onus, quo pressus planè suecumbo, hisce debilibus humeris imponeretur, eius quoque alleuandi mihi causa sis. Eris autem, si diligentissimè cures, ut à serenissimo Rege ad Indicum prætorem mittantur literæ, quibus ipsi præcisè man-

det, vt eo modo, quo iudicabitur fieri Deo gratias, nostram ad Abassinos profectionem quamprimum expediat. Quòd si & Rex ipse, propter præsentem rerum statum, in eadem, in qua eius prætor, sententia sit, nobisque nulla ratione in Æthiopiam eundū putet, duo reliqua sunt, quæ ab ipso mihi impetrare totis viribus conabere. Primum, vt per legatum suum, quem habet in vrbe, à summo Pontifice petat, ab hoc me pastoris munere omnino eximat; mihiq; vt ab eo me abdicem, faciat potestatem. Alterum, si Æthiopica liberer procuratione, quod, nisi fallor, Patris nostri Ignatij consilio & consensu fiet; nullo modo alia mihi demandetur. Imò etiam & à te & à cæteris omnibus Societatis nostræ religiosis per ipsa Christi vulnera, pèrque acerbissimam mortem, quam est in cruce passus, summè contendo, vt Regem ab hac mēte quamlongissime auertant, nec patiantur tanto me salutis periculo exponi. Cur enim ero hac in parte aliis inferior, vt potuerint illi eas effugere, ad quas expetebantur dignitates, nō possim ego, qui sum prorsus ad omnia ineptus, atque vt ab huiusmodi me exolverem curis, Societatis institutum sum amplexus? Debebantur ista quidem, non infiteor, peccatis meis, propter quæ, vt nihil est tam durum, quod pati non merear, ita etiam, vt debitas eorum luam pœnas, iustissimum est. Et verò satis luo; cū innumerabiles oves fidei meæ curæque sint commissæ, quæ neque pasci possunt à me, neque volunt. Hæc ex illa Ioannis epistola. Interim ille dum ex Lusitania responsum, aut aliquem ex Æthiopia lætiorem nuntium expectaret, cum seruabat vitæ modum, qui quanto erat ab omni honoris specie remotior, tanto maiorem ipsi conciliabat apud omnes beneuolentiam, maiorem
excita

excitabat admirationem. Nullus præteribat dies, in quo rem sacram non faceret. Sex quotidie horas diuinarum rerum contemplationi dabat. Veluti vnus de cætero sacerdotum numero, absque vlllo ordinis & dignitatis discrimine tam Indorum, quàm Lusitanorum confessiones in templo audiebat. A prandio, cùm tantisper à grauioribus negotiis quiescendum erat, ægros, si qui domi essent, inuisebat, & dulcibus colloquiis recreabat. Interdum eodem tempore culinam petebat, vt si quid tunc esset agendum, coquum iuaret, vel vtiles de iis, quæ spectant ad animum, sermones cum illo conferret. Suis ipse manibus vestes suas, cùm erant detritæ, resarciebat. Cubiculum suū, & domum reliquam, vt quiuis alius, scopis munda-
bat, & sordes colligebat, atque ad destinatum locum deportabat. Peregrinorum frequenter, nouitiorum verò statis diebus, flexo genu lauabat pedes. Cupiebat maximè, próque sua virili conabatur, vt quàm optima esset prima tyronum educatio, quod ab ea reliquam religiosæ vitæ institutionem, & totum ferè progressum pendere crederet: & ob hanc rem quà exemplo, quod vires habet ad mouédos animos magis efficaces, quàm consiliis & monitis ad omnium virtutum, atque inprimis ad veræ cuiusdam ac solidæ animi submissionis amorem, propriique odij studium eos incitabat. Legum omnium, morum, consuetudinum, atque institutorum, quibus governari Societas solet, erat obseruantissimus. Qui præter Pontificem maximum neque in Societate, neque alibi vllum habebat magistratum, cui parere aliqua lege teneretur, sic vnumquemque venerabatur, vt obedientiæ iure omnibus videretur subiectus. Néc verò solùm Indiæ prouincialem, & Goani collegij rectorem ac mini-

strum mirabili obseruâtia reuerebatur; sed etiam domesticarum rerum adiutorem quemdam, quod prominstro esset, quoties videndi occurtebat occasio, ipsi assurgere, caput aperire, & aliis externis intimæ demissionis signis ita officio se colere, vt homo ille, ne verecundari toties cogeretur, Patriarchæ cōspectum, quoad posset, deuītaret. Otiosa, & superflua, quæ ad animi vtilitatem non conducerent, aut dixisse aut fecisse, à nullo vñquam animaduersum. Neminem ipse nec iocosè vñquā perstringebat, neque vt quisquam coram se quemuis alium, siue præsentem, siue absentem vel leuissimè perstringeret, vlla ratione patiebatur, ex Hieronymo dicens, detractoris & detractionem probantis parem esse culpam. Quamquam erat à Societatis magistratibus statutum, vt habitatione dignitatis, in victu & cultu à cæteris distingueretur; ipse tamen nulla vñquam in re quidquam vsurpabat, in quo vel à minimo quouis domestico videretur differre. Quidquid habebat ex annuis redditibus, totum id, nulla sibi parte retenta, ad subleuandos pauperes atque ad alia pietatis opera conferebat. Externa illi oris ac totius corporis compositio rara fuit. Vix vñquam visus est alicuius vultum rectè aspicerre. Cùm loquebatur cum aliquo, quisquis is esset, oculos tenebat moderatè depressos, & ad omnem modestiam religiosè compositos. Talis Ioannes Patriarcha fuit. Neque de eo quidquam à nobis dictum, quod ab aliquo acceperimus incertæ fidei auctore, sed ab iis ipsis, qui probè hominem nouere, ciúsque amicitia & familiaritate in Lusitania & in India multum diùque vsi sunt. Aderat tempus, cùm summo Imperatori placitum, transferre militem suum de laboriosa mortalis vitæ statione ad æternam requietem. Siue

igitur

igitur Patriarcha à Deo fuerit præmonitus, extremū tibi instare diem, siue id arcano aliquo instinctu præsenferit (humanus enim animus euentuum sibi suorum certus esse vates aliquando solet) siue, vt immensas, quibus assidue angebatur, Ecclesiæ suæ sollicitudines aliqua ex parte releuaret, secretiūs agens cū Deo; transmissō Goano fluuio in Chioranum, vicinam insulam, vbi Societatis templum est, solitarius secessit. Eo loco cū se totum ac penitus ad contemplationē rerum cœlestium atque ad preces & supplicationes conferret; magisq̃ue gemitibus & lacrymis, quā cibo alio pasceretur, ex malè affecto iccinorē acutissimam febrem morbumque lethalem breui contraxit. Medicorum iudicio ad Goanum collegium reductus, paulatim viribus & vitali vigore cœpit destitui. Tum confessionis, Eucharistiæ, & extremę vnctionis munitus sacramentis, à Melchiorē Carnerio Nicæno Episcopo ritē ministratis; verbis suauissimis compellans Christum, ab eoque peccatorū veniā & misericordiam implorans, inter circūstantium sociorum fletus & singultus, relictis in medio corporis exuijs, liber in cœlum euolatit, decimotertio Calendas Ianuarias, anno à partu Virginis millesimo quingentesimo sexagesimo secundo. Funeris exequias magno omnium ordinum concursu & dolore prosecutus est Goanus Antistes apparatu pontificio: lignea capsula serico cōtecta stragulo cadauer excepit; idque in Goano Societatis templo conseruat ad extremum mundi diem glorioso animo fideliter redditura.

Libri secundi finis.



DE
PATRIARCHA ANDREA
OVIEDO, ET SOCIIS,
LIBER TERTIVS.

De ingressu Oviedi in Societatem & in virtutibus progressu.

CAPVT I.



ANDREAS Oviedus patria Castellanus fuit, Ileschæ natus, quod oppidum est in agro Toletano ab ipsa Toleti vrbe quindecim prope, & à Mantua Carpetanorum, quæ nunc Madritium dicitur, totidem ferè milliaribus distans. Adolescens Louanij in Belgio Philosophicis & Theologicis literis accuratè operam dedit, & egregiè profecit. Cùm Petrus Faber à Paulo III. Pontifice maximo ad Alemanicos conuentus cum Mutinensi Episcopo missus Louanio transfret, hunc Andream reperit, quem cum octo Belgis in re literaria bene instructis, atque ad negocia

cia Christianæ religionis idoneis, in Societatem recepit, & ad Simonem Rodericum in Lusitaniam misit. Belgarum nomina hæc sunt: Hermes, Leonardus, Iacobus, Daniel, Cornelius, Thomas, Maximilianus Capella, Ioannes Couillonius, is quem postea serenissimus Boicorum Dux ad Concilium Tridentinum Theologum suum delegavit. Ad eos additi insuper Hispani duo, Moses Ioannes Aragonius, & Franciscus Strada Castellanus. Hunc Neapolim ex Hispania euntem, ut aulicam disciplinam, quam deseruerat, cum bellica commutaret, B. Ignatius ex Cassinate monte Romam rediens, obuiam habuit in itinere; & breui quidem, sed efficaci mollitum sermone transtulit ad militiam Christi. Illum Faber ipse ex itineris socio, instituti quoque sui socium effecit. Cum enim ex oppido Ocagna Toletum profisceretur, Maria & Ioanna Caroli V. Imperatoris filiae, quarum prior Maximiliano Cæsari II. posterior Ioanni Lusitanæ Principi, Ioannis II I. filio, in matrimonium postea locatæ sunt, Mose Ioanni mandarunt, ut se Fabro Toletum usque comitem daret. Ille mandata exequens, ita suauissima Fabri consuetudine captus est, ut cum ab eo diuelli non posset, à principibus foeminis, quibus & à sacris erat, & valde carus, facultatem impetrarit in Germaniam Fabrum comitandi, & eius viuendi rationem suscipiendi. Omnes igitur hi, de quibus Ouiedi causa memini, anno salutis millesimo quingentesimo quadragesimo quarto fuere à Fabro missi Conimbricam, quod tunc, uti in commune quoddam sociorum receptaculum, ex omnibus ferè Europæ partibus plurimi concurrebant, ut literis & virtutibus aucti, in varia orbis totius loca inde postea diuiderentur. Ita inter cæteros Andreas emi-

nebat, vt submissione animi, odio sui, corporis maceratione, humanarum rerum contemptu, cederet nemini. Eius sanctitatis fama non Lusitanis conclusa limitibus est; Romam breui peruasit, & Ignatij Loiole impleuit aures. Hinc factum, vt cum B. Pater virum quæreret idoneum, qui Gandiæ Collegij prima iaceret fundamenta, Andream ad id munus destinaret; cuius & assignatione iussuque Fabri, qui tunc in Hispania erat, anno insequente Gadiam petit, Collegium inchoat, primus eius rector instituitur. Inter cætera virtutum opera quibus in ea urbe rem Christianam magnopere iuuat, illud vnum fuit, quod est omni mortalium generi valde salutare, vt non seculares tantum personas, verumetiam religiosas, & potissimum moniales, sumpto ab iis, quæ præerant, exordio, cœlestium rerum meditationibus diligenter exercuerit. Quam vberes verò animorum fructus hac ex re collecti sint, inde notum; quod alioquin bene morata ac bene instituta ciuitas in aliam transmutata vix seipsam agnosceret. Tale autem tamque ad reparandas & augendas animi vires opportunum remedium, quod aliis Andreas adhibebat, haud patiebatur deesse sibi. Frequenter igitur cum paucis tantum panibus, & simplicis aquæ amphora, abdebat se in cubiculo; ibique dum vigiliis, flagris, ieiuniis extenuabat corpus, diuinis epulis animum saginabat. Ferre hoc, humani generis hostis, qui bona semper opera iniquè fert, nulla ratione poterat. Sæpius hominem inuadebat diuina meditantem, eo immaniùs, quo magis erat contemplationis captus dulcedine; ignominiosius increpabat verbis, tundeat pugnibus, arrepto flagello duriter verberabat, tantæque atrocitate in eum sauebat, vt clamores aliquando ab inuito extorqueret.

Qui

Qui prope erant, & ipso furentis dæmonis strepitu, & patientis hominis vocibus excitati, accurrebant nonnūquam ad cubiculum, operam illi suam, quacumque in te opus foret, pollicentes; quos ipse vultu blando & grato animo excipiens, ita ab se remittebat, vt facile significaret, eo tibi cum hoste certamen esse, qui sola vi cœlesti superari posset. Quæ ad ista Ouiedus addebat, vt corpus animo perfectissimè subiiceret, etsi erant admiranda, fuere tamen ipsi per totam vitam communia: nec semel tantum à nobis memoranda erunt. Tamdiu Gandiæ fuit, donec Franciscus Borgia Gandiensem dux, vt sociorum numero ab B. Ignatio adscriberetur, ipso comite Romam petiit. Eò vbi cum Duce Andreas peruenit, statim ab eodem Ignatio Neapolitani Collegij rector creatus, paucos intra dies vrbe relicta Neapolim discessit.

Creatus Andreas Episcopus & Nonij Patriarchæ successor mira prabet submissionis animi exempla.

C A P V T II.

PER id tempus, quo Andreas Neapolitanum Collegium Rector administrabat, Ioannes III. inuictissimus Lusitiæ rex, renouata Æthiopiciæ expeditionis sollicitudine, viros ex Societate quærebat, vitæ sanctimonia & literis præcellētes, quos in Abassiā cum fructu mitteret. Potestatem à summo Pontifice acceperat, Æthiopiciæ Patriarcham deligendi, & vnum insuper, vel alterum, qui esset Patriarchæ, dum viuere

viueret, adiutor, quique mortuo in eadem dignitate & procuratione succederet. Re cum Ignatio Loyola per literas communicata, rex ipse in Lusitania Ioannem Nonium Barretum, quem ex Mauritanica missione & aliunde probè norat, Patriarcham creat, successorem nominandi curam Ignatio relinquit. Is cum Andreæ Ouiedi virtutem multis iam in rebus exploratam perspectamque haberet, nec dubitaret, quintalis esset vir, cuius neque summissio in dignitate periclitaretur, nec laborum inagnitudini animus subcumberet, cum ad Episcopatum legit, & socium ac successorem Patriarchæ Nonio adiunxit. Ne verò oblatum recusaret honorem, pro imperio & potestate mandauit. Andreas, etsi ipsum dignitatis titulum nimis quidem grauare, quæ tamen cum eo munere cōiuncta esse mala præuidebat, labores, ærumnas, sollicitudines, pericula, & cætera generis eiusdem libentissimè amplectens, sine vlla cunctatione Ignatij iussis obtemperauit. Neapoli igitur in Lusitaniam quamprimum profectus Olisiponem peruenit. Ibi simul cum Patriarcha Barreto, anno millesimo quingentesimo quinquagesimo quinto, in eo, cuius suprà meminimus, sanctissimæ Trinitatis templo, Hierapolis titulo insignitus ad pōtificiam euehitur dignitatem. Quæ suprà Barretum diximus post gradum Patriarchatus ad hominum exemplum & vtilitatem, domi forisque præstitisse, eadem prorsus post honorem Pontificium præstitit Andreas; tanto vterque ardore & alacritate, vt de caritate in Deum & homines, de submissione animi, de virtutibus cæteris inter se contendere viderentur. Itaque pœnitentiæ sacramentum & in templo valentibus, & ægris in sua cuique domo, locisque aliis frequentissimè Ouiedus ministrabat. Cùm ire
foras

foras opus, non secus ac quiuis alius de Societate pontificiis insignibus communi pallio tectis, vno tantum socio ibat comitatus. In triclinio cibos accumbentibus apponebat, vt reliqui; coquinæ officia obibat tanta facilitate, quanta vix alius; sternebat ægrotis lectum; verrebat domum; cætera domestica ministeria, quæ erant natura aut æstimatione viliora, maiori studio prosequabatur. Aliorum pedes abluere magno habebat in pretio, eo quod munus illud Christus optimus maximus, summus Pontifex, tum maximè præstitit, cum Apostolos suos creauit Episcopos; exemplo docens episcopalem dignitatem ex re tali decorem capere, non turpitudinem. Aded verò abluendorum pedum ministerio & delectabatur simul & honorabatur, vix vt vllus aliunde ex sociis adueniret, cui id officium ab alio exhiberi pateretur. Carebat eo tempore Olisiponensis domus aqua ad potum vsusque alios necessaria; eam ipsi religiosi foras quæsitum ibant ad vicinum puteum, ex quo ferreis haustam situlis, in fistiles deinde amphoras infusam, dorsoque impositam, onerati asportabant. hoc se in opere cum reliquis sociis Hieropolitanum Antistitem, cum ad abluendos hospitum pedes indigeret aqua, iterum & sæpius exercuisse, multoque ex eo magnificentius ac studiosius ab omnibus habitum, nobis compertum est. Aded mentis submissio in dignitatibus eminens conciliat animos, vt quod se magis demittit dignitas, maiori simul in honore & amore habeatur.

Andreas

Andreas Eborensē diœcesim, Henrici principis rogatu, cum fructu & exemplo lustrat.

C A P V T III.

CVM illo ipſo anno milleſimo quingentefimo quinquageſimo quinto nondum in Luſitania parata eſſent illa, quæ ad Æthiopicam expeditionem cenſebantur neceſſaria, Patriarchæ & Epifcopi profeſſio regis imperio in annum inſequentem reieſta eſt. Hinc Henrico Cardinali, regis fratri, principi æterna digno memoria, qui tunc Eborensis erat Archiepiſcopus, data occaſio ab Andrea poſtulandi, vt Eborensē diœceſim luſtrare vellet, & eos, quibus eſſet opus, ſacro confirmationis Chriſmate inungere. Cognita ille tanti principis voluntate, nihil eſt cūctatus. Oliſipone profeſſus Eboram venit. Sacris ibi ordinibus multos primū initiat, ad cætera deinde diœceſis loca iturus, vnum ſibi dumtaxat, eūque ex Societate, itineris comitem ſeligit, & vile accipit ſumentum, quo ferre libros aliquot & quandoque ſuam ac ſocij laſſitudinem leuare poſſit. Valde laboratum ab Henrico eſt, vt mulas & equos atque eū acciperet famulantium comitatum, qui videretur Epifcopum decere. Aded rei vtrique firmus reſtitit, vt miſſimus princeps, tum ne cariſſimum ſibi hominem, quem ob ſanctimoniam vitæ ſummopere ſuſpiciebat, aliqua moleſtia afficeret, tum vt ſingulari noui Antiſtitis exemplo memoriam refricaret Pôriſicum eorum, quos Chriſti Eccleſia, cū ab ortu ſuo progrediens felici-

ter adoleſceret, ſanctiſſimos habuit & integerrimos, omni cohibita violentia tam piæ tandem conſtantie cedendum putauerit. Siquis erit, qui ſacris hiſce dignitatibus adimere velit externum illum rerum apparatus, quo ipſæ eminere vulgo ſolent, credâtque pauperes, humiles, opibus & copiis omnique potentia deſtitutos debere eſſe Eccleſiæ principes, is ſanè iniquiſſimè ſentiat; cùm ad ſplendorem ordinis, ad commendationem muneris, ad obſervantiam dignitatis, ad refranandam impiorum ſuperbiam, audaciã, pertinaciam, atque ad omnes furentium impetus & conatus cohibendos, vi ſæpe opus ſit & potentia, quæ niſi timeant, & quandoque experiantur improbi, animos, manûſque ab ſcelere nequaquam abſtineât. Submiſſi tamen cuiuſdam animi, atque hæc, quæ magna & excelsa putantur, deſpicientis ad continendos in officio ſubditos vis tanta eſt, vt quod nonnumquam violentiſſimis potentie armis fieri nequit, inertui iubentis principis modestia facile obtineatur. Et verò opus erat Oniedo, in ea, ad quam fuerat euectus, Episcopii dignitate, huic humili viuendi rationi allueſceret, ne ab amplitudine poſtea deiectus ferre æquo animo non poſſet. quæ ipſum, ſtatim, vbi in Æthiopia veſtigium impreſſit, omnis generis mala cateru- tim inualere. Sed de his in loco dicendum. Illum modò per Tranſtaganam comitemur regionem, pagos & oppida luſtrantem. Cùm igitur videret Henricus Andree conſtantiam in admittendo Pontificio apparatus vinci non poſſe; ne nonnemo eſſet, qui teſtificaretur miſſum à ſe ad cõferendum Chriſma, quique conſe- renti miniſtraret, vnum illi adiunxit Capellannm, cui etiam ſecretò præcepit, daret diligenter operam, ne vlla in re Episcopio deeſſet, nève aliter illi, quàm ſibi
ipſi,

ipsi, vbi opus esset, famularetur. Hinc inter Andream & Capellanum assidua quædam erat, sed vtraque ex parte pia atque laudabilis, contentio, ac propriè dissidium. Capellanus Episcopum præire, hortari populum, vt venientem exciperet, Ecclesiasticos, vt domum ab officiis redeuntem comitarentur; cōmodum illi hospitium, & necessaria ad victum præparare. Andreas contrà nihil horum pati, nihil vel honoris, vel commoditatis admittere; socium monere, vt homines doceat, dum cum ipso loquentur, à splendidis titulis, & ab omni honorifica appellatione abstineant, satis esse, veluti simplicem Sacerdotem reuerentiæ ipsum vocabulo appellare. Vicit in omnibus inuicta Episcopi modestia. Toto enim in itinere numquā ephippiato equo vel mulo, aliquoties clitellato iumento defatigationis leuandæ vsus est. Numquam permisit aut solemnem pompam (vti solet) venientem se excipi, aut ad diuersorium redeuntem à clero deferri. Ad cōmuniā semper diuertebat pauperum xenedochia; cum pauperibus semper sumebat cibum; neque vllus vnquam, aut tam vilis, aut tã sordidus ab ipso habitus, quem indignum æstimaret, qui in eadem secum mensa assideret. Neminem, ne temporis quidem puncto coram se aperto capite esse patiebatur, cum apud animum suū tanti omnes faceret, vt nulli se crederet anteferendum. Diebus singulis priusquam exire è loco, in quo noctu fuerat, rem diuinam faciebat. Toto deinde itinere effundendis precibus, & diuinis rebus meditandis occupabat animum ac tempus. Eos, ad quos diuertebat, antequam abiret, mercedis loco ad rectè viuendum breui sermone hortabatur, optimis consiliis aduersùm scelera muniebat, ad excitandum in animis studium pietatis aliquot deprecationunculas

edocebat. Confirmationis sacramentum in omnibus parochiis, quibus erat opus, ministrabat; dum iter faceret, si quam domum, aut viculum videbat ab eo, in quo sistendum erat, loco seiunctum, illuc ex itinere conferebat sese, & vocem contendens, omnes monebat, ut templum peterent, in quo esset Chrismatis sacramentum celebrandum. Quam verò accuratè in hoc munus incubuerit, illud argumento est, quòd ne quis non vinctus relinqueretur, sæpe ad altam usque noctem in templo erat, donec esset omnibus factum satis. Id etiam tunc euenit; cum iam de loco vno ad aliud descensus asino insideret, audiens adductum de nouo puellum, qui posset facile in tempus aliud differri, nihilominus subito desiliens templum repetiit, & sacro Chrismate puerum confirmauit. Antequam inungendi aggrediretur ministerium, omnes, qui aderant, paucis hortabatur ad frequenter scelerum expiationem. Persuasit multis, quibus intellexit opus esse, ut à prima ætate repeterent confessiones, idque ut facilius facerent & utiliùs, ad Eborense illos collegium expiandos misit, & erudiendos. Inter alios, quos reperit animi sui perniciosè oblitos, Æthiopica ancilla fuit, planè stupida, nec hebes minus, quàm pecus. Quindecim erant anni, cum sacro fuerat mundata lauacro: animi sordes pœnitentiæ sacramento numquam prorsus deterferat. Hanc ille maximo cum labore & molestia fidei primùm institutis imbuit; ad confessionem deinde præparauit; tunc confitentem audiuit; ad extremum sanctæ confirmationis oleo roborauit. Cætera quæ in hoc genere à diligentissimo quoque fieri solent, sic ille, quocumque in loco fuit, studiosè & exquisitè perfecit, ut nec optari quidem amplius posset. Sed operæ erit, quædam hinc meminisse, quæ in hoc itinere ipsi

contingere. Quodam in oppido magnopere laborabant primates quidam, ut ad hospitium diuenteret, quod ipsi, ut in tali loco, magnificè apparauerant; cum firmiter resisteret, & pernegaret alibi se, quàm cum pauperibus habitaturum; mirari illi, atque etiam dicere; non solere Episcopos in huiusmodi verticulis hospitari. At ego, inquit, scio, xenodochium esse locum valde honestum & splendidum, cum domicilium sit sanctissimæ paupertatis, cuius hospitio conditor ille rerum; cum ad homines homo venit, excipi voluit. Sed age, demus vobis ad hæc communia mendicorum hospitia non solere Episcopos diuertere, quid obsecro vel publicæ rei, vel priuatæ cuiuspiam damni erit, si ab vno me hæc incipiat consuetudo? Obmutuere nobiles illi viri, non ratione magis, quàm Episcopi modestia, victi. Aliquando sub noctem ad oppidulum quoddam ignotus peruenit. Is, qui xenodochio præerat, affirmabat lectum ibi non esse, in quo posset quiescere, pergeret proinde aliò, non defuturum ipsi locum commodiorem. De lecto, inquit, nulla tibi cura sit; quando alibi non potero, inter ipsos ero medicos: nam & ego vnus ex illis sum. Non dixit tantum, sed etiam fecit; cum illa enim hominum sæce, vili ac sordido tectus stragulo, humo pro culcitra, librorum sarcina pro cervicali utens, noctem integram letus transiit. Alio loco, vbi quonque ignotus erat, nullis precibus impetrare à Xenodochio poterat, ut admitteretur. Instabat supplex, capite aperto, se quolibet exiguo domus angulo esse contentum, nec velle amplius, si hospitium illud ad recipiendos pauperes esset institutum, se pauperem esse; si lectus desit, posse se in rudi tegere, vel etiam nuda humo cubare; ne cui verò fastidio aut in re vlla impedimento sit, diligenter operam

daturum. Dum sic Andreas tenebroso iam ac pluui-
coelo cum Xenodocho ageret, manu vna pileum, al-
tera iumentum capistrum tenens, quidam accessit, cui
à Capellano præparandæ domus imposita cura erat.
Hic leuiter primum hospitio Episcopum inuitare; de-
in repugnantem virgere; tandè omni rationum & pre-
cum opè uti, ut in præparatam domum illum pertrahat.
Sed nihil effectum. Obtinuit Andreas, quem opta-
bat, inter pauperes locum, pro quo non illum dumtaxat
hospitium, sed magnificatissima Regum palatia
floccipendebat. Cùm iam Transaganæ regionis non
exiguam partem hoc modo perlustrasset, princeps
Henricus, ad quem & multorum literæ, & longè latè-
que vulgata per eam prouinciam fama rem omnem
detulerat, reputans haud æquum esse, tantum virum la-
bore tanto, tantisque incommodis sua causa vexari,
vnum mittit ex suis, hominem industrium & rei pe-
ritum, cui strictè mandat, ut inuito etiam ac repu-
gnanti paret, & subministret omnia, quæ non modò
necessaria, sed etiam commoda videbuntur; nec omni-
no patiatur, vel in re minima quidquam ipsi euenire,
quod pontificiæ dignitati, & Andreæ meritis consen-
taneum non sit. Præstò se homo ante Episcopum si-
stit, & cur veniat, quæve sit principis sui voluntas, ex-
ponit. Sed neque hac ratione quidquam efficitur. Af-
firmat Andreas non aliter se, quàm ut antè egerat,
deinceps acturum; frustra ergo de se esse sollicitum;
neque ullam maiorem sibi ab eo posse molestiam in-
ferri, quàm si sua causa ullam suscipiat molestiam: nò
esse putandum, velle Henricum, ut ipse ab instituto
suo recedat, plùsve corpus curet, quàm animum, aut
suar potius, quàm communi vtilitati, & Dei honori
deseruiat; haud par esse credere, æquissimo principi

356 *De Patr. Andr. Ouiedo, & Sociis,*
gratum fore, vt oblatam sibi de Deo deque homini-
bus benemerendi materiam aut omnino tollat, aut
aliqua ex parte imminuat. Itaque si sibi commodè
esse velit, desinat de ipsius commodis cogitare. Hac
Ouiedi oratione sic obstructum hominis os, & ligatæ
manus, vt non sit ausus quidquam amplius hac de re
mutire, aut agere. Admiratione igitur obstupescens
ad Henticum redit, sanctissimi viri constantiæ & vir-
tutum reliquatum assiduus prædicator. Interim An-
dreas, quod erat procurationis suæ reliquum, pari cu-
ra & vitæ exemplo perficiens, diuinis & immortalibus
meritis cumulat Olisiponem redit, paulo post
in Indiam profecturus.

*Ex Lusitania Goam, inde in Aethiopiam Ouie-
duz proficiscitur.*

C A P V T IV.

Patriarcham Nonium, Andream Episcopum, &
alios de Societate numero duodecim, pluribus di-
stributos nauibus, anno à partu Virginis millesimo
quingentesimo quinquagesimo sexto, Olisipone in
Orientem soluisse, iam supra à nobis commemora-
tum est. Quo autem modo inter nauigandum se
Ouiedus gesserit, qualis in se, qualis in vectores fue-
rit, cogitent, qui volent. Meminerint tamen robustas
ac valentes eius animi virtutes nihil fuisse maritimis
laboribus debilitatas, sed multo firmiùs stabilitas, per-
que beneagendi occasionem creuillè in eo caritatem,
despicientiam sui, iuuandi alios studium, tolerantiam
casuum aduersorum, contemptionem fortunæ, ma-
gna

gnanimitatem, constantiam, cætera animi decora, & prætidia; nec in mari, quàm in terra minora dedisse omnium documenta virtutum. Si dixero omnibus in rebus, quæ rectè fieri in navi possunt, hemini fuisse inferiorem, superiorem plurimis, parem summis, nihil dicam fide indignum, neque eam mihi difficile habebit, cui Andreas notus. Quidquid enim excogitari potest, quod vel ad disciplinam morum, vel ad remediũ & solatium ægrotantium, vel ad commodum valentium, vel ad vllam sanctimoniz partem, conferre censeatur, id ab ipso cumulatè & eximie præstitum, literarum monumentis proditum est. Quare ne sæpius eadem vel affinia repetantur, nauigationem totam silentio prætereo, qua ille peracta Goam tenuit. In ea vrbe cùm paululum quiesset, expeditionis Æthiopice plenius spe, quæ audissimum animum nequaquam fefellit, in concilio plurium grauiũque virorum à Prorege habito decretum est, vt Patriarcha Nonius in India maneret, ad Abassinos Andreas cum quibusdã aliis proficisceretur. Talis ego decreti causas, & rei totius seriem libro superiori, cùm de Barreto agerem, quantum ibi visum, explicauì. Anhò igitur insequente millesimo quingentesimo quinquagesimo septimo, Idibus Februarij, cum quinque alijs ex Societate religiosi, moribus & vita probatis, atque ad subeundas superandãsque aduersarum rerum procellas inprimis idoneis, armatam biremem conscendit; ac simul cum classe ad maris custodiam missa ex Goano portu in Æthiopiam soluit. Sociorum nomina hæc, Antonius Fernandius Societati in India adiunctus, Emanuel Fernandius, Andreas Gualdanes, Gonzalus Cardosus, Frãciscus Lupius ex Lusitania profecti. Extremi duo in ipsa postea Æthiopia sacris ordi-

nibus initiati sunt. Præter hos erant in Andrez comitatu viginti circiter Lusitani, quos Protegis consilio acceperat, ut apud gentem illam in hoc qualicumque apparatu aliqua esset commendatio pontificiæ dignitatis. Omnia tam quæ ad viam, quàm quæ ad rem divinam necessaria, Episcopo & sociis Prætoris imperio ex regio æratio satis superque suppeditata. Et à Turcis prædonibus prospera, & ab impetu ventorum tuta vsi nauigatione, in ipso Erythræi freti sinu portum tenere, Arquicho oppido coniunctum: vbi exscensione facta, pacificè & beneuolè ab incolis recepti sunt. Ut autem in Æthiopiam tunc ierint, cursumque secunda nauigatione confecerint, ac sine periculo & difficultate portum appulerint, singularis quidam fuit diuinæ benignitatis fauor, & demonstratio. Nam si dies dumtaxat quinque serius peruenissent, tentare Abassix ingressum absque euidenti vitæ discrimine nequirent. Quatto enim Nonas Aprilis insulam maris rubri Mazuam, quam Ptolemaidam ferarum olim dictam dixi, ingenti armatorum manu Turcicæ classis præfectus occupauit. Ferebat hic suppetias regulo Zeilæ, nactusque opportunam ea loca inuadendi occasionem, non solum Mazuam, sed & oppidum Arquichum è regione positum, quod solum ex maritimis Abassino parebat, facile cepit, atque ita milite & arce muniuit, omnesque oræ illius aditus & exitus interclusit, ut annos plurimos aut illuc ingredi, aut inde egredi, neque Lusitano, neque alteri Christiani nominis professori concessum fuerit. Minus æquè de diuina providentia sentire videbitur, qui non sentiat peculiari eius consilio & nutu factum, ut cum Goræ tam variæ tamque discrepantes extiterint optimatum de hac profectioe sententiæ, multique omnino

omittendam, plurimi in tempus aliud differendam dicerent, statutum tamen sit, iis ipsis, qui statuerant, pene inuitis ac repugnantibus, ut quamprimum cum sociis Andreas proficisceretur: quod nisi tunc fieret, necessum fore, ut illæ nostratum Christianorum reliquæ, quæ tunc apud Abassinos erant, & quædam quasi inter mortuas veræ fidei scintillas egrè fouebant, illorum erroribus oppressæ tandem extinguerentur. Effectum igitur summo Dei beneficio, ut eo maximè tempore Ouiedus & socij Abassiam tenuerint, ne per annos insequentēs Lusitanorum posteris ad conseruandam augendamque quam à parentibus acceperant, Christi fidem, necessariā deesset institutio. Nihil enim, quamdiu Patres illi in viuis fuere, non sunt aggressi, & passi, ut inter tot tamque noxios superstitionum vepres, multiplici & erratico serpentes lapsu, vineam illam non ita quidem tunc latè diffusam, sed paulatim incrementem, ab omni contagione puram illasamque seruari. Quos autem labores, quas difficultates, quæ vitæ pericula, & in hac Lusitani generis propagine excolenda, & in ipsa Abassinorum gente ad frugem meliorem, atque ad fidei veritatem reuocanda, quoad cuique vita fuit, subierint, narratu difficile est. Traiecit rei fama immensam Oceani vastitatem, & vniuersas Orientis oras, longo maris terræque intervallo disiunctas, ingenti rumore penetrauit; atque Alexium Menesium Goanum tunc Antistitem, Indiarum primatum, nunc Archiepiscopum Bracharensem; primatem Hispaniarum, virum cum genere & literis, prudentiæ & pietatis laude clarissimum vehemèter mouit, ne tam suauem & gloriosam talium virorum memoriam iniuriis temporum sueretur obliterari. Ergo Michaeli Syluio, suo in-

illis Æthiopiæ partibus generali Vicario commisit, ut in Andreæ & reliquorum è Societate sacerdotum vitam morèsq; diligentissimè inquireret, curarètque ab incorruptis atque integris testibus recognoscere quas res præclare gesserint, qualè humanarum rerum cursum decurrerint, quidquid denique esset, à quo eorum sanctimonia habere posset apud Deum & homines commendationem, hoc Syluius accuratè & ex fide præstitit; multàque reperit, quæ verè testantur sic eos in illo durissimo Æthiopiæ exilio traduxisse vitam, ut dubitandum non sit, quin inter summos viros, atque omni memoria & immortalitate dignissimos reponi debeant. Quæ igitur ab eisdem illis testibus tradita, & iureiurando firmata sunt, quæque ex multorum hominum, quorum grauitas & autoritas fidem faciunt, partim literis, partim narratione accepimus, proponenda nobis erunt, ut qualis & quantus vir Andreas fuerit, agnosci queat.

De ingressu Andreæ in Aethiopiam, de accessu ad Imperatorem, & quæ inter illos gesta.

C A P V T V.

QUæ hoc loco dicam, ex literis constant Emanue-
lis Fernandij, qui cæteris erat Societatis religiosus
in Abassia præfectus. Is ad Iacobum Lainem, genera-
lem eiusdem Societatis præpositum, anno millesimo
quingentesimo sexagesimo secundo hac de re epi-
stolam scripsit suo & reliquorum Sociorum nomini-
bus subscriptam. Hæc prima fuit, quæ ab Ouiedi in-
gressu ex illis locis in Europa recepta est. Placet, rem,

vt est ab Emanuele scripta , sed verbis Latinis ex fide proponere. Anno, inquit, salutis humanæ quingentesimo quinquagesimo septimo supra millesimum, mense Martio, ipso die , qui Deiparæ virginis annunciationi sacer est , peruenimus Baroam, urbem nobilem. Cùm Barnagassus , qui ibi erat, factus esset de nostro aduentu certior, obuiâ exiit venientibus, & Andream inprimis cum eximia quadam honoris & beneuolentiæ significatione excepit. Mira fuit populi Episcopum videntis exultatio. Ad manus osculum accedebant omnes cū ingenti lætitia & alacritate. In ea vrbe viginti & amplius dies permansimus. Incidit tunc patientis Christi cōmemoratio. Illius ergo sacratoris hebdomadæ mysteria, quanta potuimus pietate, peregrimus. Feria sexta pompam instituimus, vt in illis locis, magnificam. Quo verò incolarum beneuolentiâ, & nobis sacrisque nostris existimationem conciliaremus, è templo nostro ad eorum templum supplicantes processimus. Magnus per illos dies factus est ad nos omnium ordinum concursus, Romanos ritus approbantium, & cum admiratione prosequentium. Bonam temporis dedimus partem audiendis Lusitanorum confessionibus, & rebus aliis ad rem Christianam salutemque animarum pertinentibus. Multi eorundem Lusitanorum filij seruique sacro Chrismate ab Episcopo sunt inuncti. Eum sæpius, dum hic fuit, Barnagassus ipse , ac principes alij salutandi & confabulandi causa adiere. Semper tamen Andreas de religione inferebat sermones, eosque, quamquā frustra, ad Romanæ Ecclesiæ obedientiam hortabatur. Vere iam appetēte, cū ea Barnagassi loca Turcarum metu turbari inciperent , Baroa relicta ad Imperatorem contendimus. Quinquaginta in itinere consumpti

dies, causa fuit. quòd omnibus ferè in locis Lusitano è genere multos haberemus obuios, quibus sacramenta ministrare erat opus. Dies ferè octo ante nostrum ad Imperatoris castra accessum, missus ab eo ex primoribus quidam, qui verbis ipsius Episcopum salutaret. Mularum insuper oneribus vehendis multitudo ingens còducta. Die pæne extremo nuntius aduenit, qui Imperatoris nomine diceret, ne absque nouo ipsius mandato vltius progredieremur. Duos tamen post dies facta proseguendæ viæ facultas, Cùm parum distaremus à castris, Imperatore per nuntium iubente, tetendimus tabernacula, in quibus nox ea peracta. Die insequente, sub meridiem, multi regio ex sanguine aliique non pauci ex prima nobilitate, exquisitis inditi vestibus, equisque optimis insidentes conuenere nos, in ipsis adhuc tentoriis commorantes. Duo inter hos autoritate eminebant, quibus data ab Imperatore vocandi ad se & deducendi Episcopum cura. Interim ipse Imperator cum matre & fratribus in editum conscendit locum, vnde aspiceret venientes. Vbi peruentum, statuit Preteiannes, vt honoris gratia primùm in atrium, præter aulæ consuetudinem, equites ingrederemur. Ante ingressum atrij secundum in quo erat Augustale, ex equis descēdimus. Ad ostium tentorij vtrique ex parte plurimi erant nobilitate & senio venerandi, optimo ordine dispositi, ac scipionibus innixi. Paululum hoc loco substitimus. Tunc egressi duo (vnus Ilacus Bargasassus erat) non modica totius corporis demissione salutauere Episcopum, & nobis comitantibus ad Imperatorem introducere. Is quoque non exigua honoris & amoris signa præstitit venienti. Postquam mutuis colloquiis nihil temporis consumptum; quas Ouedus ab Indico

Protege à Patriarcha Ioanne, & ab aliis acceperat in India ad Imperatorem literas, protulit in medium. Lectæ confestim sunt coram omnibus, qui aderant. Eas Imperator audiens non mediocriter turbatus est, nec celare potuit auersam à Romana Ecclesia voluntatem: sed qua erat prudentia, & bene affecto in Lusitanos animo, conatus est, quoad potuit, erumpentem mœsticiam compescere, vultûque hilaritatem simulare. Id ita fecit, vt aperta nihilominus ostenderet perfidiæ indicia. Atenim quamquam sic erat in suis erroribus obstinatus, vt eos relinquere numquam in animum induxerit; in his tamen initiis semper Andream bene habuit, ipsique ac sociis necessaria abundè suppeditauit. Nec erat vllus, qui re aut verbo lædere nos auderet, quos sciret Principis beneuolentia esse munitos. Si perfidiam excipias, in toto Abassino Imperio erat nemo, quem Claudius Imperator prudentia, magnanimitate, cæteriisque regiis virtutibus non superaret. Urbanitate & comitate erga Episcopum utebatur eximia, tantoque illum prosequabatur studio, vt numquam reducendi sui spem ipsi ademerit. Vbi de religione agi cœptum, petiit ab eo Ouiedus, vt simul cum his, qui apud Abassinos docti haberentur, adesse vellet disputationibus. Annuit ille, & cum magna literatorum cæterua sæpe audiit Episcopum de rebus fidei disserentem. Præ Claudio muti erant ex eius factione reliqui. Vnus ipse & dicendi ardore, & studio vincendi superabat omnes, quos in certamen adducebat secum; tanta etiam ingenij dexteritate errores suos nonnumquam tuebatur, vt nobis nonnihil faceretur negotij. Ceterum licet ex congressu semper Ouiedus reportaret victoriam, aduersarij tamen (qui pertinacium animorum mos est) cachinnis & incôdi-

364 *De Patr. Andr. Oviedo, & Sociis,*
tis clamoribus victores se prædicabant. Cùm igitur
Episcopus videret, nihil se hac disputandi via profice-
re, scripto collegit præua dogmata Abassinorum, &
rationibus ac testimoniis confutata obtulit legenda
Imperatori. Accepit ille, & legit, atque ad singula, vt
potuit, scripto respondens, pertinaciter asseuerat, nū-
quam se Romano Pontifici præstiturū obedientiam,
neque à parentum suorum vestigiis in iis, quæ de re-
ligione sunt, recessurum; eam velle tenere fidem, quā
iidem tenere; ipsam proinde vt aliquo modo relin-
quat, frustra ab vllō mortalium laborari. Inter hæc
cœpit etiam quædam aduersus Andream ostendere
indignationis signa; palamque asserere, ingratum sibi
esse eius conspectum. Is ergo, ne hominis impotentis
in se ac suos irritaret furorem, ratus temporibus ce-
dendum, Imperatore relicto, ad inculcandā aliis veri-
tatem se conuertit. Hæc omnia in epistola Emanuel.

*Quid postea inter Oviedum & Claudium actum,
deque morte Claudij, atque eius
successore.*

C A P V T V I.

QUamquam in respuenda sana fidei doctrina per-
tinax erat Imperatoris mens, nonnulli tamē re-
liquo de grege partim plebei, partim nobiles, & mo-
nachi Andree ac sociorum opera ab errorum tene-
bris quotidie transferebant sese ad lucem veritatis.
Delata ad aures Claudij fama, vehementer eius ani-
mum concitauit. Erāt non pauci, præsertim ex cœno-
biarchis,

biarchis , qui lamentationibus & querimoniis stimulos adderent ultro futenti. Cohibere igitur iram nequit Imperator; vocat Andream ad se, alperè & acerbè increpat, eique seuerè præcipit, vt cum suis, si velit, Lusitanis ac Lusitanorum posteris agat de rebus fidei; cum Abassinis ne verbum mutiat de religione; néve ab Alexandrini Patriarchæ & Abunæ obedientia quemquam eorum audeat abducere. Ad hæc Andreas, Ego, inquit, inclyte princeps, missus huc sum, vt tibi ac tuis Abassinis ostendam salutis viam, à qua longè aberratis; denuntiémque desectere à recto, quicumque Pontifici Romano, Petri Apostoli successori, & Christi Vicario debitam non exhibet obedientiam. Tu ipse, qua es prudentia, iudica, an tanto in negotio silere debeam; cuiue mihi patendum sit, Deo ne, an homini? Ego non dubito, quin diuinum Imperium anteponendum sit humano; neque adducar vnuquam, vt quod mei muneris est, vlla de causa præteream. Quid enim respondere olim potero præpotenti Deo de vestro interitu mecum expositulanti, si mea culpa intereatis? aut vlllo debilitatus metu inculcare desinam, quæ debeo? Minare, si placet, manus iniice, percutere, eripe vitam; citius ista patiar, quàm vt te ac tuos pernicioso silentio in barathrum sinam ruerè. In extremum furore actus hisce verbis Imperator, mox iniquo ferro Andream de medio sustulisset, nisi mortem, quam vir pius maiorem in modum optabat, hostis hominum inuidisset. A cæde igitur abstinens, ignominiosis verbis ab se hominem repellit, & iracundè imperat, ne coram se amplius compareat. Addit insuper hæc: Scias in re, de qua agis, operâ te & tempus perdere; neque vnuquam futurum, vt Romani Antistitis iugum mihi aut meis imponi sinam. Acta hæc sunt

sunt anno reparati mundi millesimo quingentesimo quinquagesimo nono, ineunte Ianuario. Haud multum dilata ultoris Numinis vindicta. Intra duos menses meritas perfidiæ poenas dedit impius Imperator. Sub initium enim insequentis Februarij irruere in ea loca ij Saraceni qui Malachales dicuntur, Amalecitarum forsitan polteri. Proximo deinde Martio, feria quinta sanctioris Hebdomadæ, commissum est inter Abassinos & Mahumetanos prælium; in quo metus maior, quam hostium vis Imperatoris castra inuadens, copias fudit fugauitque. Imperator ipse media in acie à suis relictus, lethali vulnere accepto, miserrime occubuit. Duo de viginti Lusitani milites, cum ipso cecidere. Caput Imperatoris ab humeris abscissum & hasta appensum ad Adelis regem, quo cum crudeles gerebat inimicitias, magno cum ludibrio ac dedecore, deportatur. Saracenorum Dux vt inspiratam victoriâ soli Deo referret acceptam, ex equo superstitiosè desiliit, & consensu a fello triumphauit. Claudio interfecto, cum liberos non haberet, successit in Imperio eius frater Adamas Seguedus, homo ingenio ferox, moribus pessimus, Catholicæ fidei sæuissimus oppugnator. Fuerat hic à Saracenis in bello captus, & in Arabiam ductus, vbi abiurata Christi religione Mahumetanæ se impietati addixerat; sed ab eodẽ Claudio, rebus Imperij Lusitanorum ope restitutis, postea redemptus, ad Abassinos rediit errores. Ad hunc Andreas, quamquam eius animum & naturam probe norat, gratulandi causa statim adiit, à quo & bene tunc habitus, & cum nonnulla honoris significatione dimissus.

Sunt

Sævit in Andream Adamas, eúmque in exilium eiicit.

CAPVT VII.

VT omnis libido impotens est, ac præceps, non multum fuit, quin Adamas animi sui virus expromeret, iniquissimam occasionem ex æquissima causa accipiens. Quosdam Andreas per id tempus, non ignoti nominis homines, Romanæ Ecclesiæ obedi-
dientes fecerat. Hoc vnum Tyranno satis. lubet pro imperio, quamprimum ad se Andream adduci, vt commissi facinoris rationem reddat. Nihil ille cunctatus coram comparet, non vultu mæsto, non trepidus, sed lætitiâ & spe plenus. Tyrannus contrâ ignominiosis ac minacibus verbis excipit ad se ingrellum; & furentis more, Quid, inquit, tragediarum excitator maxime, quiescere me & gentem meam non sinis? tanta tibi in tuis artibus fiducia? Quamdiu hac abute-
re impunitate, quæ tibi liberè peccandi illecebra est? hucusque flagitia tua desidiosius magis, quàm æquis animis tulimus: nō erimus deinceps ignaui. Per quid-
quid sacrum ac sanctum vsipiam est, pèrque auorum meorum & vtriusque parentis Manes iterum atque iterum iuro, non minore tibi mercede, quàm ipsa vita soluendam, si quod posthac scelus contra religionem nostram ab hoc puncto temporis commiseris. Tunc Andreas, Mortem mihi, inquit, minitaris? An nescis, nihil posse animo meo gratius euenire, quàm vt pro Christo aut ferro collum submittam, aut obijciam feris corpus? Agè, Imperator, sæui in me, vt lubet; veritatem vt timidè aut ignauè suppressam, nullis minis,
nullo

nullo mortis metu efficies. Hæc vbi dixit, ingenti correptus spiritus ardore, demittit ex humeris pallium, oculos cum manibus attollit in cælum, proque veræ fidei prædicatione ac defensione conceptis verbis Deo immortali caput suum ac sanguinem deuouet. Nihil tunc fieri potuit, quod Adamas ferret acerbius: tanto percitus furore est, vt actum esset de Andrea, nisi impotentissimi hominis pugionem vis diuina tenuisset. Sæuissimas tamen in illum manus tanto impetu iniecit, vt tunicam homini absciderit. Tunc vero huc & illuc violenter impulsus, verbisque asperissimis indignissimè tractatus reiecit à se; atque vt in montem editissimum, incultum, sterilem, fetis obnoxium, vnà cum socio Francisco Lupio exulatum eat, nec inde iniussu exeat, pœna mortis proposita, seuerrissimè mandat. Addit & huic flagitio aliud exulibus molestius, quo non contentus sæuire in corpora, simul etiam in animos sæuiat, ne scilicet litare queat, iubet auferri calicem, non dubitans ea se ratione multo eos durius, quàm vlllo corporis cruciatu afflicturum. Omnia illi sedato ferunt animo; & iniquæ sententiæ promptè obtemperantes, illicò in exilium secedunt. Octo ibi menses translegere. Quæ & quanta sint mala passi, vix queam dicere. Fames, sitis, temporum iniuriæ fuere leuiores. Erant pro ædibus subterraneæ specus; dura ac nuda saxa pro lecto; syluestres herbæ gustui ingratae præbebant cibum; & in summa rerum difficultate mors ante oculos perpetuò obuersabatur. Eum namque in montem excursus latronesque permulci, quibus regio abundat, interdum abdebant se; vt inde de improviso egressi, qui prope facerent iter, incautos adorirentur, occiderent, spoliarent. Ingens ab istis & continuum erat Andree & socio

peri

periculum; nec erat dubia mors, si essent reperti. Latabant ergo, & diuina latentes contemplabantur, atque ad perferenda exilij incommoda à cœlo vires auxiliûmque petebant. Nec minus Tyrannum ipsum, totûmque imperium commendabant Deo: ac demû piis inter se colloquiis suos intendum labores & ærumnas solabantur. Dum hæc agerent, aliarum rerum ignari, ecce sibi primaria quædam scœmina vinculo consanguinitatis Imperatori coniuncta, domo egreditur; illum in montem, cuius ipsa domina erat, vt Andream inuisat, diuino absque dubio acta impulsu, p. operè contendit; ad speluncam accedens, in qua latent exules, ingenti eam cernit circumfusam luce, tamque fulgentes ipso ostio euomētē radios, vt inuentis oculi splendore perstringantur, vehementi primûm admiratione obstupescita subsistit. Non modico dein percussa metu gradû retro refert; domûmque repetens, quacumque transit, insignem exulum prædicat sanctitatem. Nec mora, Imperatorem adit, atque vt Andream & socium exilio liberet, sollicitè precatur. Victus ille precum vir, redeûdi facit potestatem: sed tamen ea lege, vt si cum aliquo Abassino vlla de re agant, grauissimis sint plectendi suppliciis.

Abassinos suos Adamas persequitur, & Andream iterum in exilium mittit.

C A P V T V I I I.

Non solum in Andream; sed etiam in eos, quos ille ad veritatis agnitionem adduxerat, acriter est ab Imperatore Adama animaduersum. Illuc inprimis

Tyrannus vires intendit, ut quotquot erant Abassino ex genere, qui Andree & sociorum opera Romanis se legibus subdidissent, ad schismaticos ritus & pristinos gentis mores confestim redirent. Ex his quidam declinandæ mortis causa solum vertere; alij nihil agere palam, ex quo quid profiterentur, agnosci posset, retenta animo, sed non publica fide: nonnulli divina roborati constantia, non intus tantum, domique, sed in omnium oculis & auribus Abassinos damnare errores, & Romanæ Ecclesiæ prædicare veritatem, Ex his aliqui ad Tyrannum adducti, nullis deterriti minis, nulla allecti præmiorum spe, firmi, fortes, infractique perstitere. Longeuos aliquot senes toto pullos Imperio in externas ac longè distitas regiones amandat. Iuvenes ætate florentes & genere claros obtruncat. Miris, alios sæuisque modis vsque ad internecionem, persequitur. Res inter hæc traditur mirabilis, magno testium consensu & approbatione firmata. Quinque erant, qui coram impio Tyranno Romanam fidem tanta libertate prædicauerant, ut eius in se furorem vehementius incitauerint. Iubet hos leonibus fame prope enectis deuorandos immitti. Bestiæ, siue metu perturbatæ, siue amore delinitæ, deposita feritate succumbunt pronæ; nec magistrorum audiunt voces, nec vultus agnoscunt; magisque mitescunt, quo magis irritantur. Re Imperator audita stupet, & horret, sed recrudescit timendo furor. Breuem sanctis hominibus inuidet mortem, ut intolerabili eos exilio conficiat, ac diutius torquendo vitam reddat morte sæuiorem. Ergo & hos quinque, & quotquot eadem de causa habebat in vinculis, & cum iis Andream in remotas terras & accessu asperas exterminat, additque trucem militum custodiam,

ne quis toto exulum de numero secus faciat ac iustus. Omnes igitur iter aggrediuntur permolestum ac perdifficile, deserta & æstiuosa via, nulla ipsis ad corporis sustentationem cibaria; res nulla ex iis, quibus vitam tuemur. Neque enim ullus per eam regionem erat, qui subleuare egenos posset, locis quippe propter asperitates saxorum, montiumque altitudines, & rupium sterilitatem, prorsus incultis. Processerant aliquantulum; sed cum iam lassī vix possent firma ponere in solo vestigia; neque esset quidquam, quo vires reficerent, consiliter aliqui; alij in terram ruere; sic omnes fame confici, ut parum abessent ab interitu. Tunc Andreas tam lugubri cominotus spectaculo à clementissimo pauperum patre remedium per preces sibi querendum ratus, ad genua procumbit, cor, & oculos, manusque leuat in sublime, atque ingentem profundens vim lacrymarum, Vbi, inquit, sunt misericordiæ tuæ antiquæ, Domine? Vbi illi tui pleni clementiæ & benignitatis oculi, quibus soles miseros respicere? Hebræorum olim populum ex Ægypto egressum, perque vastas terrarum solitudines aberrantem tot modis ac tanta prouidentia aluisti. Illos tres quondam reges Iudæ, Israelis, Edonis, eorumque exercitus sitī pæne consumptos in desertis & aridis Idumææ campis grandi aquarum copia satiaisti. Longo deinde post tempore, multiplicatis insigni miraculo paucis panibus & paucioribus piscibus, multa hominum millia iuxta Betsaidæ lacum, in loco deserto largiter pauiisti. Numquid nunc oblitus tui aut tuorum es? Anne deest tibi facultas, qua valeas, aut benignitas, qua velis, seruis tuis tua causa laborantibus, & extremum iam spiritum trahentibus præsentī ope succurrere? Intuere misericordibus oculis hunc

gregem tuum, non quidem numero, sed fide magnū, qui ne tuas caulas desereret, ad has redactus est, quas vides, & animi & corporis angustias. Huc homines istos non aliqua egit voluptatis illecebra, non honoris aut gloriæ studium, non opum rerūve humanarum vlla cupiditas; sed tuarum legum defensio, honoris tui propugnatio, tuæ veritatis confessio adegerunt. Noli igitur, amantissime hominum parens, filios tuos penitus deserere. Quos à Tyranni gladio liberaisti, ne eos patere in hac solitudine fame interire. His dictis, extemplo flumen ingens, præter quod tūc erat exulibus iter, sicut olim ad illius mysticæ Arcæ conspectum Iordani contigit, qua parte rapidior ferebatur, cursum continens, siccum alueum reliquit, tantāque in eo piscium multitudinem, vt statim quibusdam, partim assis, partim elixis, famem omnes depulerint; & ex iis, qui superfuere, ad futurum com meatum multos mulos onerarint. Vbi recepti pisces, reductæ iterum ad propriam naturam aquæ, atque in alueum effusæ, mirabili celeritate solitum cursum instaurauere. Milites, qui erant in comitatu, tanti miraculi nouitate attoniti, in partes varias versabant animum. Quidam vix oculis credebant, & videbantur sibi somniare magis, quàm repressum amnem & reuolutos liquores re ipsa videre. Alij vim diuinam extollebant, exulum causam & pietatem probabant; de Andræ ac sociorum conquerebantur iniuriis; Adamæ tyrannidem & nequitiam execrabantur; Romanæ Ecclesiæ concedebant primas. Exules in fide crescebant, ac firmius roborabantur; summo Deo decantabant laudes; immensāque agebant gratias, quodd opem tulerit laborantibus; quodd à lethi faucibus pereuntes eripuerit; quodd nominis sui gloriam celebra-

lebrarit, quòd denique tam insigni portento & sanam Catholicorum doctrinam stabilierit, & Æthiopicam falsitatem confutarit. At res ipsa tunc statim in regiam curiam & Imperatoris aulam delata, pèrque vniuersam latè regionem breui diffusa, grandi stupore omnium aures animòsque occupauit; & Barbarorum mentibus adeò hæsit, vt quo tempore de rebus ab Andrea gestis Syluius quærebat, fuerit nemo, qui non illam summa cum admiratione in medium protulerit. Et tunc etiam reperti duo, qui præsentes adfuere, cùm patratum miraculum est. Vnus ex iis erat, qui pro veritatis defensione in exilium ibant: alter ex numero militum, quibus fuerat exulum custodia à Tyranno demandata. Hic eo tunc ostento permotus ad partes transiit Catholicorum. Tam portentosi autem euentus fama, simulque multa & præclara Andreae in quosdam optimates promerita, eosdem adegere, vt de ipso ac sociis restituendis enixè agerent cum Imperatore; à quo tandem, vt redeundi facultatem concederet, impetrarunt. Accepto exules de libertate nuntio, in domos quisque suas rediere.

Tertium Andreas cum Catholicis exillo mulctatur, & variis modis affligitur.

C A P V T IX.

ANdreas ab exilio reuocatus, antequam oppidum ingrederetur, obuios habuit quotquot in eo Catholici erant; qui acceptis de reditu eius nuntiis exultantes ac gestientes foras exeunt, in agròsque effusi non minori alacritate, redeuntem excipiunt, quàm

prioribus olim sæculis Athanasium , Chrysostomum aliósque sanctissimos Antistites ab exilio reuertentes ab Alexandria , Byzantio, & vrbibus aliis , exceptos, literarum monumentis traditum est. Inter cæteras virtutes, quas in Andrea sūmas esse nemo dubitabat, illa inprimis inaudita patiētia; qua tot labores, tótque non dubia vitæ peticula tam frequenter, támque intrepidè & animosè subibat , præcipua quadam commendatione per omnium ora ferebatur. Et verò hæc vna virtus (quæ sicut optima parens altrixque probitatis est, ita admirationis & benevolentia est egregia conciliatrix) tantopere Barbaris illis hunc hominem commendabat, vt variis è locis hãc vnam ob causam magnus ad eum fieret Abassinorum concursus. Aderant cum reliquis monachi non pauci , quos partim tanti viri videndi & audiendi cupiditas, partim etiam indagandæ veritatis studium concitabat. Nulli Andreas in re vlla deerat: cunctos ad timorem Numinis atque ad omnem hortabatur iustitiam. Monebat potissimū, vt Romanam Ecclesiam agnoscerent , eius fidem sequerentur, & ad Catholicos mores vitam instituerēt, Dei magis quàm Adamæ , vel alterius Tyranni iram formidarent, sæuire homines posse in corpora: Deum neglectum & corpora torquere & animos: humanæ crudelitatis vim, & tempore breuem esse, & potestate infirmam; at vindictam Numinis , quæ scelestos apud inferos torquet, nec sæculorum terminis claudi, nec vlla ex parte imminui: oblatam sibi salutis suæ occasionem ne incassum abire sinant? Dei inuisentis se ac vocantis agnoscant beneficium; hoc sibi tempus ad pacem dari; metuant meritò ne frustra elapso bellum exurgat magis animis, quàm corporibus exitiale: Hierosolymæ meminerint; Christi monita & prædicatione

ctiones respicientis ; intelligant nullam esse causam, cur magis ipsi, quàm veteres Hebræi fœdri & expectari debeant à diuinâ benignitate. Hæc & talia quædam cùm Andreas non minori tunc libertate, maiori prope ardore, quàm antea Abassinis inculcater, multosque eorū veritatis luce perfunderet, ac Romani Pontificis iugo subiiceret, defertur ad Imperatorem; quiescere non posse Europæos Sacerdotes; minus quietum reliquis eorum Episcopum Andream, qui hominum corda sollicitaret, permisceret omnia, Æthiopicis ritus dānaret, Romanos mirabiliter efferret, multos deciperet, atque ad suam traheret factionem. Ni adhibeantur extrema, breui futurum, vt in Romaniam religionem Æthiopica vertatur. His Imperator stimulis maiorem in modum commotus, venire ad se Andream iubet, cuius aspectu in rabiem actus, Quod exilium, inquit, repetitum non efficit, ferrum efficiet; hoc tuæ imponet finem pertinaciæ. Nescis mortaliū pessime, truncandi tui mihi esse potestatem? Quid tam impudenter meam abuteris & lædis clementiam? Tibi ne in regnis meis, an mihi parēdum? Nihil iniquius, quàm specie religionis Imperatoriam violare maiestatem. An non multo maxima religionis pars est, reuereri principes, iisque dicto esse audientem? Quid agis? Quid à me atque à sanctissimis maiorū meorum legibus gentem meam auertis? Hocce ferendum? Quin ego tibi hoc ense vitam eripio? Hæc dicens; ensē amens liberat è vagina, furiosè petit innoxium collum, quod Andreas, brachiis prius in modum crucis ad pectus conformatis, tantisper inflexerat, & percutere tentantē aprarat. Verū ictu irrito cadit ferrum è manu Tyranni, omnibus, qui aderant; vehementer stupentibus. Solus Adamas nihil euentu

motus(adeò furentis animus cæcus est) arrepto rur-
 sum gladio innocentis collum denuo impetit. Tum
 Augusta, quæ & ipsa præsens erat, tam attonita suc-
 cessu, quàm Andreæ commiseratione concussa, iectum
 exceptura mediam se inter vtrumque infert, & horri-
 bilem attollens vocem acriter Imperatorem incre-
 pat, manúmque sceleratam & conatum cohibet: Non
 te pudet, inquit, cùm Imperator sis, carnificem agere?
 Hoc tu facinus regia dextra dignum putas? Hanc Lu-
 sitanis, quibus tot nominibus deuinctus es, pro acce-
 ptis beneficiis rependis gratiam? Quid ageres, si quis
 ex tuis simili correptus insania talem virum, tantis il-
 lustrem virtutibus, tanta decoratum dignitate, non
 confoderet destrieto ferro, sed leuiter dumtaxat ma-
 nu percuteret? Quod tu in nullo tuorum, ne amanti-
 simo quidem, pateretis, id propriis manibus per sum-
 mum scelus efficere conaris? Pudeat te sine causa fu-
 rere, & virtuti esse iniurium. Hæc Augusta. Alia pro
 Andrea alij viri primarij, sed mitiùs & precantium
 more Imperatori subiecere; intèrque reliqua summo-
 pere conati sunt eius animum à cæde auocare. Tunc
 ille indignationem corde premens, vultúque simu-
 lans lenitatem, ab se Ouiedum dimisit; & quosdam
 secretò monuit, vt illum qua possent arte, è viuis au-
 ferrent. Sed Imperatoris nequitia cognita, ab iisdem
 illis optimatibus curatum sedulò, vt eius monita fie-
 rent irrita. Cùm igitur videret, valde sibi esse difficile,
 optimo Pontifici vitam eripere, nec suum aduersùs
 ipsum odium satis posset exsaturare, ab se, eoque ab
 loco quamlongissime ablegare statuit. Tertiò igitur
 Andream mulctat exilio; & socios illi adiungit Lusit-
 tanos omnes; atque hos sine vxoribus ac liberis iubet
 proficisci, asserens liberos ipsos seruitutis iure sibi
 esse

esse addictos, & mancipio ac nexu proprios; quamuis ad eam diem passus sit, usu & fructu parentum fuisse. Cur verò vxoribus vetuerit viros sequi, incertum. Fortè quòd Abassinorum de genere essent; vel vt miseris hominibus diriozem efficeret exilij pœnam. Tyranni Imperium adeò vrgebat, vt nec tergiuersandi daretur locus, nec tutum esset, paululum cunctari. Omnes quamprimum se viæ committunt. Andreas, & qui ab eius latere numquam discedebat, Franciscus Lupius, quia nihil habebāt carius, quàm vt pro Christi fide vexarentur, ibant admodum læti, & hilares. Cæteri etsi per summum nefas à charissimis vxoribus liberisque abduci morte grauius ferebant; mœrorem tamen suum Andrææ præsentia & conspectu lenientes, eo exilij calamitatem amplectabantur libentiùs, quòd se viderint in tanti viri societate, Dei causa malè mulctari. Illos igitur pius Antistes vt æquo animo ærumnas tolerarent, atque ad eos casus, quibus humana vita subiecta est, firmis conscientiz præsidiiis munirentur, omnesque Tyranni iniurias & cruciatus spernerent, vt firmam denique atque stabilem in vno Deo spem ponerent, eique agerent grarias, quòd ipsos vellet esse de numero eorum, qui ab hostibus fidei religionis causa aliquid patiuntur, grauibz & efficacibus verbis hortabatur. Nec verò, inquit, vxorum vestrarum & liberorum cura vos nimium torqueat, commilitones mei & optimi Christi milites, præstò aderit & optatum vobis ab diuina misericordia remedium, & debitum Tyranno à diuina iustitia supplicium. Pergite alacres & erecti; exiguum post tempus in domos vestras reuersuri. Vbi ad exilij locum peruentum, miles quidam, cui creditus Andreas cum præciso mandato, vt curaret dili-

genter, ne aliò se ferret, ipsum aggreditur, postulát-
 que vt pro suscepto tam longinquæ tamque asperæ
 viæ labore meritam persoluat mercedem. Ego, fili
 mi, inquit, operam tuam non conduxí; ecquam tibi
 debeo siue itineris, siue custodiæ mercedem? quam-
 quam verò nihil me tibi ob hanc operam debere,
 sentio, (Illustrissimi Martyris Cypriani exemplo, qui
 viginti nummis aureis tortorem suum donauit,) libè-
 ter tibi darem, siquid haberem; sed habeo nihil, quod
 dare queam. Nihil ille his verbis mótus, instat & vr-
 get; atque aliquod sibi laboris sui extorquere præ-
 mium, omnino statuit. Videns autem perdere se pe-
 tendo tempus, manus iniicit, & sacrum linteum ac
 stolam vi rapit. Animo Andreas nihilo secius tran-
 quillo ac sedato, ne verbum quidem raptorem per-
 stringit; oculos tamen ad cælum tollens, has ab imo
 pectore semel & iterum voces profert: Ah Domine
 Deus, ah Domine Deus, vix iniquus raptor duo con-
 fecerat passuum millia, cum subito aliena vi corre-
 ptus, refert è viā pedem, cursūque præcipiti ac volan-
 ti magis, quam currenti similis, Andream repetit; pro-
 priusque accedens, nescio quid mussitando, ad eius pe-
 des quæ abstulerat, proiicit. Tum pernicitate pari eò
 se proripiens, vnde venerat, sic euauit, vt visus am-
 plius à nullo sit. Quadraginta prope agebantur an-
 ni, quando Michael Syluius rem à testibus accepit,
 qui non solum iureiurando affirmarunt, miserum ho-
 minem à suis expectatum & diligenter quæsitum
 numquam deinceps apparuisse; verum etiam locum
 fecisse dictò, quod apud Abassinos hodièque prouer-
 bij vice per illam plagam usurpatur, nemo ab inuito
 Lusitano vestimenti quidpiam abripiat, nisi velit ipse
 venti instar per inane abripi.

Gravi bello scelerum suorum pœnas luit Imperator Adamas, Andreas cum sociis diuinitus seruatur.

CAPVT X.

Tanto Adamas Romanam fidem insequabatur odio, vt cùm certò sciret, plurimis se cum externis, tum domesticis hostibus esse vndique circumseptum, nullam tamen in rem incumberet diligentius, quàm vt Catholicos miris modis & immaniter diuexatos ad vnum omnes deleret. Quare quam eius frater Claudius concesserat facultatem, vt Abassinæ fœminæ Lusitanis nuptæ Romanis viuere possent legibus, eam ipse continuò reuocauit, pœnis etiam acerbissimis vetuit, ne quis Abassinus, cuiuscumque sexus & conditionis esset, Catholicam profiteretur religionem, nèue Lusitanorum adiret templa. Ex quo factum, vt aliqui eo de genere, quod secus fecissent, in vincula fuerint coniecti, & flagellis cæsi. Fuere etiam, qui mortis metu compulsi à suscepta fide defecerunt. Nec in suos tantum, sed etiam in externos ob eandem causam impius Imperator furorem effudit. Armenij erant ex Schismaticis Catholici, quos, quia ad pristinos redire errores recusabant, partim exilio, partim mortis pœna multauit. Dùm ergo in omnem nequitiam ac sæuitiam effrænate raperetur, essetque cum aliis in exilio Andreas; summus ille rerum moderator, qui neque vmquam pios omnino deserit, neque patitur malos diutius florere; & afflictis succurrere exulibus, & meritis perfidiæ ac scelerum pœnas

poenas ab Adama repetere, iustissimè decreuit. Ita res habet. Barnagassus Illacus, & plurimi alij principes viri, insanam pessimi Imperatoris crudelitatem morésque intractabiles exosi, communi consensu in eius pernitiem conspirantes, Betancum Zarcarum fratris natu maioris vita iam functi, ex illegitimo thoro filium Imperatorem crearunt. Adamas coniuratione cognita, quamocysime delectum habet, collectisque viribus exercitum parat, ut tempus fert, copiosum. Quo verò Lusitanorum sibi conciliet voluntates, eosque habeat in bello socios, Andream cum reliquis acciri iubet ab exilio, & in castra venire. Ter reperio inter aduersas factiones acie fuisse decretum. Primo prælio Adamas victus è campo recessit. Altero Zarcarum viuum cepit & obtruncauit. Tertio Barnagassus Illacus alium legitimum Zarcari fratrem Imperatorem nominans, vocatisque in auxilium Turcis irruentem Adamam vi tormentorum territauit, castris exiit, cum toto exercitu vertit in fugam, & quidquid aduersum aut obuium fuit, igni ferroque absumpsit. Patres, qui cum Adama erant, ut cuique commodum, in diuersa effusi loca, præsentis se periculo eripuerunt. Solus Andreas cum Lupio, & quodam alio ex familiaribus, patente in campo relictus, dum militaris adhuc furor sæuaret, prædæque & cædi victor exercitus incumberet, manus ac mentem ad Deum erigens, inter media Turcarum & Abassinorum furentium tela cum utroque socio saluus & incolumis permansit. Vim ibi diuinam agnouere socij, & se Andree precibus à nece liberatos confessi sunt. Haud dubitarim, renouatum in hoc euentu vetus portentum, cum Elifzo deprecante Syrij regis milites cæcitate perculsi, quæ ante oculos & in conspectu erant,

non

non conspexere. Huc illuc hostes cruoris auidi ferebantur; non sexui, non ætati, non conditioni parcebant. In medio Andreas cum duobus illis erat, non abditus in tenebris, non vlllo in recessu aut latebra clausus, sed obuius furentibus, & hostili crudelitati palam expositus; non minus tamen ab omni belli periculo & iniuria liber integérque euasit, quàm si editissimo tutissimoque ex loco spectasset pugnam. Simul atque precandi finem fecit, Lupiū intuitus, Laudetur, inquit, Deus immortalis; reliqui Patres in potestate hostium sunt: sed nihil timendum; propitio Numine res prosperè cedent: nostris interim obsecrationibus ipsos iuuenus. Haud dubia prædictio fuit. Erant tunc Patres cæteri à Turcis capti, spoliati, iniuriis affecti, periniquè tractati; sed non multo post nobili Abassino petente, donati libertate ad Andream rediere. Rebus pæne compositis cum se ad Lusitanorum vicum socij reciperent, occurrit in via ex factione contraria Abassinus miles. Hic turbido adhuc ex dimicatione animo, Andream verbis asperis & minacibus laceffit, adeoque rabidè furit, vt parum absit, quin sancto viro manus iniiciat, & cædem faciat. Mula Andreas vehabatur; ex ea vt statim defiliat, trux homo imperat. Paret ille sine mora, nec impatiens, nec queribundus, & quod itineris reliquum est, pedibus conficit. Miles præda lætus mulam ascendit, malique ignarus futuri, mortem miser domum defert. vix limen tangit, cum subito & vxor & duo liberi exanimati cadunt; vnūque rapinæ scelus triplici soluit interitu infelix raptor. Agnoscit tamen ultorem Deum, grauique dolore pressus, querit Andream; largè lacrymans ad eius se abiicit pedes, mulam restituit, veniam rogat, & obnixè petit, vt precibus suis irati

irati Numinis vindictā arceat; valde enim timere se, ne qui solus auctor delicti fuerit, cæteris interemptis, acerbius puniatur. Hominem Andreas blandè acceptum monet, in primis, ut susceptum execretur flagitium, quantum potest; bono deinde animo esse iubet, omnesque suas in clementissimo parente spes & rationes collocare; tandem tuta omnia pollicetur. Is deinceps, quamdiu ei per vitam licuit, verbis, ac rebus aded te Oviedo deunctum, obnoxiumque præbuit, ut solitus sit salutandi gratia ipsum frequenter convenire, & munuscula deferre, benevolentia magis, quàm pretio, æstimanda.

Quid in Imperio, quid Oviedo acciderit mortuo Adama.

C A P V T X I.

ANnus agebatur ab ortu salutis millesimus quingentesimus sexagesimus secundus, cum Adamas à Bernagasso ac Turcis victus, à locis maritimis malè constantes copias ad interiora regni retraxit. Anno deinde insequente plurimis & maximis afflictus bellorum calamitatibus excessit è vita. Mox turbari magis imperium, & varias in partes discindi cœpit. Qui ab Adama erant, eius filium creatunt Imperatorem. Illum Zarcarifratem, quem suprà memini, Barnagassus sequebatur. In partes alias vertebantur alij. Andreas, qui anno illo sexagesimo secundo, mortuo Goæ Nonio in Patriarchæ titulum successerat, cum maiori Lusitanorum parte ad Tygrium regnum contulit se; ibique prope eum locum, ubi celebre est Abbaguarima

riana cœnobium, humilem abiectumque incoluit vicum, cui Fremona nomē: atque in eo annos sedecim, quibus cum viuis fuit, commoratus, nullum deinceps vidit Abassix Imperatorem. Toto enim hoc tempore sic omnia bellorum motibus æstuarunt, vt quamuis Abassini fuerint, qui prioribus depositis, ad Romanam conuersi sint veritatem; cum quo tamen de Abassix totius reductione agi posset, nemo extiterit. Nam Malafeguetus Adamæ filius non nisi septemdecim post obitum parentis annos, & Illaco Barnagallo iam defuncto, imperium obtinuit. Interea dum Abassini per domesticas ciuileſque seditiones pertinaciæ suæ pœnas pendunt, Casum illorum, quos Galas vocant, vis ingens suis ab sedibus profecta eorum terras ingreditur, agros vastat, oppida diripit, ac diruit, quoscumque aduersos habet, siue incenibus bellum propulsent, siue ad obsistendum copias in acie educant, ferro flammisque domat, & horribilem vbi-cumque pedem ponit, stragem edit; tanta demum & facilitate & felicitate Barbari illi in Abassinum Imperium se intulere, vt plusquam centum, regiones, maiorem quippe imperij partem, breui temporis spatio victricibus armis occuparint. Qui in eodem vico Catholici cum Andrea erant, in tanta rerum difficultate cœpere grauitèr angī, cū viderent, neque eo in loco vitare se hostilem furorem ac necem posse; neque vllam esse alibi sedem à Galarum iniuriis tutam, ad quam ipsis foret liberum commigrare. Turbati igitur ac trepidantes Andream adeunt, ab eoque & consilium in dubiis, & remedium in malis petunt. Iacentes animos erigit vir Deo plenus, & nutantes confirmat. Iubet bene sperare de diuina benignitate, haud esse dubitandum, quin Numinis præsidio inter
medias

medicis hostium turmas, intérque districtos enses non modò tuti esse possint, verumeriam securi. Ab his dictis solitam ad arcem recipit sese, rem quippe diuinam facit, & quid sibi ac suis sit agendum, à Deo litando sciscitatur. Res mita, vox auditur de cœlo lapsa, bis repetens Fremonam. Intelligit haud dubie, non oportere aliò discedere, tutam ibi esse stationem. Peraçto sacrificio ad expectantem populum, & pauore defixum egreditur; monet, ne quis loco moueatur, vllòve sollicitetur timore; cunctos Fremonæ omnem vim belli sine dāno vitaturos. Sic euenit; summâque omnium animos tanti euentus tenuit admiratio. Cuncta circum oppida, castella, vicos, & Mapalia Galæ Turcæque pererrarunt: nulli rei hostium immanitas pepercit. Æquati solo muri, diremptæ atque euerse domus, quotquot in his locis reperti mortales, miserabili cæde strati. Fremona, vicus exiguus, vidua ab aliis distans milliaria, patente in campo atque in militari situs via, nullis naturæ, nullis artis septus præfidiis, hostili expositus furori, cæterisque pagis ad iniuriam promptior, sine vllò detrimento fuit. Tam insigne Dei beneficium Andræ precibus acceptum Fremonenses retulerunt; quorum nonnullis Lusitano de genere magno per id tempus constitit, non habuisse fidem viro sanctissimo salutaria præmonenti. Ad bellum isti, quod alio loco gerendum erat, nulla adaçti necessitate, sed vltro parabant sese. Eis Andreas, ne illud petant, seriò suadet, addens, si secus faciant, ad vnum omnes interituros. Insana illi bellandi, aut qua aliâ obcæcati cupiditate ad bellum profecti, occumbentes sensere, haud spernenda esse, quæ probatæ virtutis viri prænuntiant futura. Post hæc hostes varij armata manu Æthiopiam ingressi, res

Abassinorum adeò cōtriuere, vt Imperium redactum sit ad extrema. Turcæ inprimis à maritima orâ, quam vi occupant, ad interiora sæpius penetrantes, multos mortalium partim dederunt neci, partim in seruitutem abduxere. Ad Catholicos etiam, qui regnum Tigrum incolabant, belli calamitas pertinuit. Multis ij modis duriter vexati, oppidis quoque hostili flamma incensis ac disruptis, ad Dambeæ regnum coacti sunt commigrare. Pauci eodem in loco, ne desererent Andream iustis de causis inibi remanentem, vltro perstiterere.

Iubetur Andreas à Pio V. Pontifice maximo Aethiopiam relinquere, & ad Iaponios ac Sinas proficisci.

C A P V T XII.

PER id tempus Andreas summa rerum omnium difficultate pressus, plurimâque & maxima, à Turcis, & Saracenis, à Galis, atque ab ipsis etiam Abassinis passus incommoda, valde ærumnosam ac miseris plenam ducebat vitam. Inerat etiam in illis schismaticis tanta cordis durities, vt perexiguus esset animorum fructus, quo vir sanctissimus vtcumque leuare posset labores suos. Id ex literis eorum, quos secum Patriarcha habebat, in Æuropam & Indiam missis cùm Sebastianus Rex cognouisset, rei indignitate cōmotus per legatum suum, qui erat in Vrbe, agere seriò cum Pontifice cœpit, vt quia nulla tunc Abassiarum reducendæ videbatur esse spes; alia verò ex parte apud

Iaponios multa hominum millia, neglecto idolorum cultu, Christianis se ouibus idemtidem coniungebāt, iuberet pro imperio, vt Andreas Patriarcha ex Æthiopia in Indiam traiciens conferret sese ad Iaponicas insulas, vbi cum maiori & dignitatis suæ splendore, & industriæ fructu posset rei Christianæ operam nauare. Pius V. egregius æquè & prudens Pontifex (is tunc Romano in solio sedebat) re probè cognita, & diligenter examinata, anno millesimo quingentesimo sexagesimo sexto, quarto Nonas Februarij, Pontificiū diploma ad Andream in Æthiopiam misit; quod etsi omitti à nobis iure posset, cū ab aliis scriptoribus referatur, quoad ea tamen, quæ huc pertinent, iisdem verbis exscribendum duximus. Venerabili fratri Andree de Ouiedo Patriarchæ Æthiopiæ, venerabilis frater salutem, &c. Ex literis carissimi in Christo filij nostri Sebastiani Portugaliz regis illustris, ad oratorem ipsius, qui apud nos residet, missis, & ab aliis, quibus fidem meritò habuimus, cognouimus, paternitatem tuam in istis Æthiopiæ partibus, ad quas, à sede fueris Apostolica missus, vt istos populos ad fidei Orthodoxæ agnitionem, & ad vnitatem Ecclesiæ Catholicæ reduceres, inter tot annos, quibus isthic mansisti, propter duritiam cordis eorum, & in vetustis erroribus suis retinendis animi pertinaciam, opera & pia industria tua nihil proficere potuisse; quòd si ad Insulam, quæ Iapam appellatur, & in Sinarum regionem, quæ à Gentilibus incoluntur, mittaris, in quibus Prouinciis Domini nostri Iesu Christi fides magna deuotione suscipi cœpit, sperandum esse, Deo adiuuante, vt illic opera tua valde sit utilis; propterea quòd messis illic multa sit, operarij autem paucissimi. Quibus auditis fraterna sanè caritate tibi compassus sumus,

sumus, qui tot tantorumque laborum, & tam diuturnæ peregrinationis fructum optatum capere minimè potueris: sed si opera tua illis fuit populis inutilis; non tu tamen, qui tam multa, & tam gravia pro Christo Domino nostro passus es, frustrà laborasti; pietatis enim, & obedientiæ, & caritatis tuæ præmium à Domino habebis. Quia igitur in hac sancta sede, licet sine nostris meritis constituti, omnibus nos agnoscimus debitores, & pro commisso nobis officio debemus inservire omnipotentis Dei honori & gloriæ, & animarum saluti consulere, fraterna caritate salutantes te, de cuius pio zelo & propagandæ Catholicæ religionis studio gravissima testimonia habuimus, hortamur in Domino, & in virtute sanctæ obedientiæ, atque in remissionem peccatorum, iniungimus, ut postquam has literas acceperis, cum primum tutè potueris, & nauigandi facultatem habueris, ad Insulam Iapam, & ad Sinatum regionem te conferas, & in illis locis verbum Dei iuxta doctrinam sanctæ Romanæ Ecclesiæ, omnium Christi fidelium matris ac magistræ docendo & prædicando, & sacramenta, quæ Pontificalis sunt officij, ministrando, quamplurimas poteris animas lucrari studeas, diuinæ fretus misericordiæ auxilio. Hæc in diplomate, & quædam similia. In eo volo, obseruentur potissimum duo, quibus nouus ille auctor, de quo sæpe suprà memini, abrogare fidè veritus non est. Primum, Gentem Abassinam certo atque indubitato Pij Pontificis iudicio, ab Romana fide esse auersam, plurimisque maiorum suorum inuolutam erroribus; ideoque à sede Apostolica in Æthiopiam missum Andreæ, ut illam ad agnitionem veritatis, & Catholicæ Ecclesiæ obedientiam reduceret. Alterum, affirmare Pontificem, se illam Andreæ

ex Æthiopia ad Sinas ac Iaponios migrationem non ob id solum decreuisse, quòd de misero Andree statu atque Abassinæ gentis duritiæ à Lusitano Rege factus fuerit certior (quamquam ut decerneret, id erat satis) verumetiam, quòd rem eandem ab aliis cognoverit, quibus meritissimè fidem habuerit. Hisce enim verbis planum fit tam esse certum pontificium illud diploma non fuisse fraudulenter extortum; quàm certum est, ipsum Pontificem debitam in hoc negotio diligentiam prudentiamque adhibuisse. Et tamen est, qui asserere audeat, deceptum fuisse Pontificem, & ob eam causam quod expedit diploma nihil habuisse momenti. Sed quid Patriarcha responderit, iam videndum.

Oviedi Patriarchæ circa suum ex Æthiopia exitum responsio.

C A P V T XIII.

PONTIFICIUM diploma anno superioris sæculi sexagesimo septimo, mense Martio receptum à Patriarcha in Abassia est. Iunio statim insequente ad summum Pontificem, ad Sebastianum Regem, ad Iacobum Laynem Præpositum generalem Societatis Iesu literas dedit, simulque ad Regem & ad Indicum prætorem tum Andree socij, tum Lusitanorum militum in Abassia præfectus, & quotquot ibi erant alicuius nominis Lusitani de re eadem scripsere. Inter eos nemo fuit, qui scriberet quidquam iis contrarium rationibus, quibus Pontifex motus diploma expedit. Si quid enim in eo poneretur à vero dissidens, haud

haud erat dubium, quin in tanto grauium piorum-
 que hominum numero vel vnus reperiretur, qui aut
 Regem aut Pontificem de deceptione moneret. Quin
 etiam Patriarcha ipse, qua erat fide & religione, non
 sineret circa rem tantam vllō Pontificem in errore
 esse; apertēque assereret, aliter rem habere, atque in
 diplomate sibi misso cōtineretur. Possem omnium hīc
 epistolas proponere; sed nec vacat, nec opus est. Vna
 ipsius Andreæ ad Pontificem scripta rem totam ex-
 plicabit. Ita ferē habet. Beatissime Pater, hoc anno
 millesimo quingētesimo sexagesimo septimo à Goa-
 no collegio Societatis Iesu literas accepi; cum iis Pō-
 tificij cuiusdam sanctitatis vestræ diplomatis exem-
 plum, in quo erat, vt quo primo tempore tutō pos-
 sem, Æthiopia relicta, siquidem nulla eius reducen-
 dæ spes esset, omni religione & conscientia vincu-
 lo exolutus ad Sinas & Iaponios transferrem me. Qua
 ipsum diploma acciperem, si mihi missum fuisset, ea-
 dem eius exemplum veneratione accepi; animūque
 ad obediendum quamprimum applicui. Quominus
 tamen Æthiopiam deferam, multa obstant. Ipsa in-
 primis difficultas nauigandi; fieri enim non potest, vt
 absque certissimo vitæ periculo discessum tentem.
 Nam cū in Mazuano portu, ex quo mihi erit neces-
 sariū proficiscendum (cū alius vnde id facere queā,
 non sit) plurima reperiantur Saracenorum nauigia;
 nullum propterea est, cui me tutō possim committere;
 tanta est eius gentis perfidia, tanto in Christianos ar-
 dent odio. Quoad reliqua ita sentio Primum si quin-
 genti damtaxat ad nos ex India mittantur Lusitani
 milites, quos iam diu & votis omnibus optamus, &
 vehementissimē poscimus, & adhuc fauente Numi-
 ne habituros speramus; non erit dubium, quin non so-

lùm ad Romanæ Ecclesiæ obedientiam rebelles Abassini, verumetiam ad Christi doctrinam multi Ethnicorũ populi venturi sint. Habitant enim hanc Æthiopiam gentes innumeræ inanum cultrices simulacrorum, quas & adire nullo traiecto mari, & ad fidem nostram perducere non difficile possumus. Certò scimus ex regno Damutis, quod aiunt ad Mosambicum vsque, atque ad Sofalam, pertingere, multos ad Imperatorem venissè, qui Christianis sacris imbui cuperent, idque vt sibi concederetur, supplices precarentur, quos tamen impius princeps ob priuatas repulit vtilitates, malens eos habere conditione mancipia quàm religione fratres. Fuerunt etiam tres ante annos ex regione Sinaxi (sic appellant) qui cum principe quodam Imperatoris propinquo, à quo animis armisq; dissidebant, inire pacem vellent, atque ad tributa soluenda, nostramque religionem amplectendam offerrent sese: sed isti quoque fuere reiecti, odio & auaritia caritatem superantibus. Infiniti prope sunt ex circum vicinis Ethnicis, quos Saraceni mercatores emunt, Turcísque vendunt, omnes isti libenter darent Christo nomina, nisi malesuada habendi cupido principes ipsos, à quibus res pendet, transuersos ageret. Obstare hisce malis possent quingenti illi, quos dixi, Lusitani milites, cum magno & rei Lusitanæ commodo, & Indicæ ditionis stabilimento. Nam si Turcæ, quod procliue est, Æthiopiam priores occupent, vix dici potest, quantum inde rebus Indicis inferre damnum queant; cùm parata in his locis habeant, quæ ad instruendas ornandasque classes consentur necessaria; ferrum ad arma, alimenta ad exercitum, seruitia ad opera, & quæ sunt generis eiusdem. Imperator ille, qui hostiliter Romanam fidem inse-

que

quebatur, sanctus vita est. Filius successit ætate adole-
lescens, iudicio parum firmus, & nomine magis, quã
potestate Imperator. Eosdem enim habet, qui in eius
parentem conspirauerant, aduersarios; qui & nobili-
tate inter Æthiopes primi, & complures numero
sunt. Quamobrem aded turbata sunt omnia, ac ciui-
lium dissensionum, externorumque bellorum tempe-
statibus concussa, nihil ut cuiquam sit optabilius, quã
ut aliquod habere possit consequendæ fruendæque
pacis perfugium, quod in Romana fide constitutum
esse, plerique norunt. Deinde etsi communiter Mo-
nachi, & ex nobilibus multi doctrinam nostram acriter
oppugnant, nostrósque Catholicos impiè inse-
ctantur; ipsa tamen plebs, ad veritatis agnitionem eo
promptior, quo rerum humanarum vinculis minus
est irretita, Romana probat laudatque instituta, sunt
etiam viri primarij non pauci, quos eadem tenet sen-
tentia. Vtrorumque saluti damus operam; & publicis
priuatísque, qua disputationibus, qua concionibus
vulgamus veritatem; scriptis etiam scripta refellimus;
nec proficimus nihil. Aliqui enim se nobis fide con-
iungunt; & coniungerent plures, nisi pœnarum obsta-
ret metus, atrox in abiectis animis veritatis hostis hæc
causa est, cur in his maximè locis armatam Religio
desideret manum, ut ad Catholica castra accedant
intrepidi, qui velint; & firmi persistant, qui accesserint.
Existimo, Pater sanctissime, hoc Æthiopicum
negotium eorum esse de numero, quæ ad Catholicæ
religionis amplificationem & splendorem summo-
pere conferunt; propterea nulla esse de causa omit-
tendum; quamuis, quod res magnæ habent, plurimis
videatur implicatum difficultatibus. Quinetiam, ni
valde fallor, vix vlla hodie offerri poterit expeditio,

quæ Romanæ Ecclesiæ maius ornamentum, vel maiorem Catholicis rebus afferre queat accessionem. Hic ubi nunc sum, in regno Tigrio, ducenti circiter & triginta habitant Catholici, duobus diuisi oppidulis, quæ non ita pridem eam ob causam ædificauimus, ut qui antea cum magno rei temporalis damno, maiori animorum periculo, peregrinorum more per varias vagabantur Æthiopiar partes, fixam habeant sedem, ubi commodè possint salutaribus imbui fidei documentis, & Christiana sacra frequenter suscipere. Veniunt ad nos ex diuersis locis alij, augeturque in dies singulos grex Christi. Nec pauci alibi sunt, qui ut huc possint sine periculo commeare, opportunitatem expectant. Oues istas deferere & lupis relinquere deuorandas, haud humanum est; longèque abest, à caritate summi Pastoris Christi Iesu, qui ne vnâ quidem perire passus est; sed nonaginta nouem in tuto relictis, errantem quæsiuit, suisque impositam humeris in ouile reduxit. Si gregem hunc tot inter feras relinquam, ecqua mihi reddenda erit Iudici Christo muneris mei ratio? Quid in ipso mortis puncto respondebo Deo de tanta crudelitate mecum expostulanti? Qui enim vni Thomæ ne periret, vulnera obtulit, non videnda solum, sed etiam tangenda, & digitis ac manibus contrectanda, quas à me pœnas repetet, si non hominem vnum, aut paucos, sed propè infinitos, meæ curæ fideique commissos negligenter deferam, eosque in barathrum sinam ruere. Pater sanctissime, ad te quoque oves istæ pertinent; tuo etiam ex ouili sunt: ne illas patiari ab stygiis lupis discerpi. Hoc vnicum est, quod secundum Deum adhiberi ad earum salutem remedium possit, si ad hæc loca illam, quam sæpius dixi, militum manum Rex Lusitanus

mit

mittat. Vt verò quod sentio, vno verbo semel dicam; tam pia hæc Æthiopiz causa nullo modo videretur deferenda. Hoc tamen ita dico, vt si vestra sanctitati aliud videatur, submittam caput, idque putem placere Deo. Cæterum, si omnino statuatur, vt hinc abeamus, opus erit præ grandem ad nos classem mittere, vt tuti à Saracenis ac Turcis, qui in Mazuano portu plurimi sunt, multasque habent præsidiarias naues ad bellum egregie instructas, traicere in Indiam possimus. Hæc habeo, quæ proponam. Si quid aliud erit, quod sanctitas vestra nobis faciendum iudicet, quomodocumque id significabitur, promptissimè exequemur. Quod ad me priuatim attinet, velim scias, ita ad omnia paratum esse, vt quascumque ad gentes, siue Iaponios, siue Sinas, siue Mauros, siue Turcas, siue quem alium truculentiorum orbis populorum ire iubeas, nullo negotio sim profecturus. Imò verò si Patriarchali me exuas dignitate, & ad abiectissima quæque munera addicas, nihil me, quæ Dei gratia est, experire repugnantem. Hæc ad Pontificem Andreas. Paria ad regem, paria ad Præpositum generalem Societatis, quæ propterea referre supersedeo. Probatæ Pontifici atque Regi Patriarchæ rationes; & vtrisque visum, Catholicæ rei interesse, vt in Æthiopia Patriarcha cum sociis maneret; neque illam deferret vineam, cuius colendæ ac propagandæ causa tantopere ad id tempus laborauerat. Itaque, quoad vixit, Fremonam incoluit oppidulum, vt dixi. in regno Tigrio perexiguum; nullam interim præteriri passus occasionem, in qua de sexcentis illis aut quingentis militibus Lusitanis in Abassiam mittendis ad eosdem principes atque ad Indicos prætores non scriberet. Anno enim millesimo quingentesimo septuagesimo

sexto, cum Æthiopicus Imperator super eodem militum præsidio nuntium in Indiam destinaret; iterum Patriarcha eadem de re scripsit ad Pontificem, multas enumerans, quæ inde ad stabiliendam in illis rebus sinceram fidem detuari possent, utilitates. Anno rursus insequente septuagesimo septimo, sexto Idus Iunias, aliam dedit, quæ vltima fuisse videtur, ad Pontificem Epistolam, in qua erat præsentire se vitæ suæ finem; reliquos item Socios, quos secum habebat, declinare ad senectam, nec posse diutius superesse; vehementer igitur eius sanctitatem precari, ut eò mitterentur alij, quibus traderent lâpada; ne si ipsi absque successoribus decederent, illæ quoque exstinguerentur, quæ tunc erant, Catholicorum scintillæ, atque ita de tota actum esset Æthiopia.

De quibusdam Andrea Patriarcha virtutibus.

C A P V T X I V .

Licet Ouiedus apud Abassinorum Imperatores, quorum aliquos diuersis temporibus vidit, & quoad poruit, ad Romanam fidem hortatus est, nihil omnino efficeret, in reliquis certe siue Catholicis instituendis & confirmandis, siue schismaticis ab errore auocandis non infructuosam, quamdiu vixit, operam collocavit. Cum verò apud vtrumque genus hominum monendo exhortandoque non parum proficeret, Catholicos tamen & hæreticos nulla re magis, quàm præclaræ vitæ exemplo alliciebat ad sese. Illi parentem habebant, & pastorem; isti virum fatebantur omni cumulatam genere virtutum: vtrique non
homi

hominem vnum de cæteris, sed lapsum de cælo prædicabant. Princeps quidam generis propinquitate Imperatori coniunctus, de Andrea rogatus, quid sentiret, respondit, eum in ipsa hominum frequentia, rerumque omnium confusione ac turba videri sibi persimilem iis, qui initio surgentis Ecclesiæ ab oppidis remoti vastas incoluere solitudines, diuinamque magis, quàm humanam vixere vitam. Adeò verò eius se virtutes admirari, vt ipsius quoque fidem & doctrinam non dubitaret absque vlla cunctatione sequi, multosque alios in eandem sententiam pertrahere, nisi insanissimi Imperatoris crudelitatem timeret; fieri enim non posse, vt tam sancti, tam pij, tam religiosi mores cum falsa religione cohærent. Idem de illo erat Æthiopum monachorum iudicium. Ex iis vnus audiens nonnullas Catholicorum terras à Turcis esse occupatas, scripsit viro cuidam, qui ex illis vnam incolebat, quamdiu secum haberent Andream, nihil prorsus formidarent; neque enim aduersus hostium iniurias vllum esse præsidium firmitus posse. Caerent igitur, ne illum permetterent aliò transmigrare: nam si casu aliquo inde abesset, tum verò iure timendum, nec iratum ob scelera Numen hostibus faceret potestatem crudeliter in ipsos sæuendi. Religiosus alter summæ apud Abassinos auctoritatis, ac toto in Regno ab Imperatore secundus, Andream sanctitatem eo habebat in pretio, vt agrè pateretur ipsi decisse, quæ erant ad vitam necessaria. Cùm ergo aliquando nosset, maxima illum premi rerum egestate, primum quemdam ac locuplerem hominẽ hortatus est, vt egenti succurreret, nec sineret eum perire, cuius precibus Imperium staret. Ille etsi à Romana Ecclesia diffidebat, multa tamen sæpe ac satis largè misit

indigenti munera, non alia ab illo petens volensque actionem gratiarum, quam ut, cum litaret, precareturve, aut modo alio ageret cum Deo, tantisper sui meminisset. Huic eidem verò postea accidit, ut cum de morte Oviedi nec opinatò nuncios accepisset, barbam suà præ tristicia vellet, & colaphos impingeret, flebiliter adiciens, Abassinorum Imperium cum Andrea cecidisse. Reliqui omnes, cæteroqui Romanæ veritatis hoïtes, eam quoque de ipso conceperant opinionem, ut si quod inter se magni momenti negotium essent transacturi, quod valde firmum fixumque vellent esse, ad sepulchrũ defuncti Patriarchæ simul pergerent, ibique ad servandam fidem iureiurando se adstringerent; existimantes, haud impunè futurum ei, qui ab ea perfidiosè recederet. Quamquam Andreas cunctis in rebus ita se hostiliter insequabatur, ut nihil esse, quod insensius odisset; abstinentiam tamen tantopere coluit, ut à statu mortalium longè abesse videretur. Iuratus testis, qui sub eodem cum illo tecto pluribus annis vixit, absolute affirmavit, nihil carnis, quod edi posset, non modò in eius os, sed ne domum quidem, toto eo tempore fuisse ingressum; solitum semine quodam velci insuaui & amaro, cuius ex farina placentas, quibus victitat, conficit vulgus inops. Quæ aliquando à viris nobilibus dono accipiebat, ea confestim distribuebat in pauperes, nec partem sibi minimam, ut totus à Deo penderet, retinebat: eamdemque ob causam, quoad fieri ppterat, nihil rerum earum, quæ in quotidiano solent esse usu, à die vno in alterum conservabat. Nihil ipsi pauperum causis videbatur carius; aded non abriter tantum, sed hilariter etiam eas tractabat; sibi que quàm illis necessaria deesse, multo æquius ferebat. Bouem

habe

habebat vnum, quo solebat uti, quemadmodum illis in locis moris est, ad deportandam ex templis quibusdam ad alia templa sacram suppellectilem, cum erat pontificio apparatu sacrificaturus; sciens pagi cuiusdam incolas fame vexari, animal iussit occidi, diuidi in frusta, & per singulos particulatim distribui. Valde tunc quidam ex domesticis contendebat (is ipse est, qui rem hanc proprio firmavit testimonio) ne bove suo ad ea, quæ dixi. munera, atque ad plura alia tantopere necessarium se priuaret; Sine, inquit, fili, sine obsecro, occidi animal, & opem ferre indigentibus, cras enim, ne dubita. optimus ac beneficentissimus parens gratiam rependet. Euenit, quod prædixit. Nobilis enim quidam & pecuniosus homo quamquam Catholicæ religioni contrarius, audiens Andream summa inopia laborare, quadraginta ipse vaccas, octoginta lintheos pannos, quorum illic esse solet ad res varias vsus. magnam eduliorum copiam die insequente dono dedit: quibus ille rebus per dies plures & suam & aliorum subleuauit egestatem. Locanda cuidam in matrimonio erat puella, orba parentibus. Deerat dos; eam ob causam res differebatur. Vbi id cognouit Andreas, vnam, quam solum ad longiora itinera habebat mulam, misit ad foeminam. Hoc autem in genere eius caritas eò prouecta est, ut quod legimus fecisse olim Antistites quosdam, insigni notos virtute, id Andream fecisse certum sit. Aliquoties quæ erant dicata sacris, ut aliquos à vitæ periculo liberaret, fertur vendidisse; indeque non semel effectum, ut alba veste careret, qua rem diuinam faceret. Nec solum se spoliens sua dabat indigentibus, verumetiam ad eos sustentandos sæpe pagos circumuicinos, octo ac decem, pluraque inter se distantes milliaia pedibus

per

peragrans, ostiatim mendicabat, quæ à singulis colligebat, propriis imposita humeris, asportabat domum, & conuenientibus illuc pauperibus distribuebat. Nō Catholicorum tantum subueniebat miseris; sed iis quoque suam impendebat operam, qui Romanæ Ecclesiæ erant infensi. Accepit schismaticum quemdam eiusmodi grauari morbo, qui & contagione noceret, & intolerabilem ex se exhalaret foetorem; atque ea de causa ab ipsis etiam propinquis esse derelictum, quod nemo illum, nec sine nausea videre, nec sine salutis periculo tractare posset. Hunc adiit Andreas, ipsique atque eius saluti totum se ac penitus addixit: & accuratius necessaria ministravit, quàm si illi esset vel natura parens, vel officio seruus. Cibus ægroto parat, suisque manibus in os infert: lectum sternit; versat hominem, mutat, mundat; verrit domum, pannos & linamenta lauat; nec prætermittit quidquam, quod vel ægroti necessitas, vel ægritudinis conditio statúsque desideret. Hac ratione, Deo auxiliante, utique infirmo restituit sanitatem. Is enim tanta commotus victúsque Catholici Antistitis caritate, supremam Romanæ sedis potestatem cōfiteri adactus est; vltroque illi ceruicem submisit. Quid Andreas egerit, ut schismaticos, quod in opus sollicitè incumberebat, cum Romano capite copularet, difficile dictu & creditu est. Id ut ipse per se facilius, quàm per interpretes, præstaret, homo natu grandis summam in perdiscenda Abassinorum lingua adhibuit diligentiam; idémque ut socij facerent, etiam curauit. Ut autem eos nouit qualemcumque adeptos peritiam fuisse, in pagos statim ac vicos misit, quo veræ fidei lucem ostenderent incolis, eosdémque sanis moribus & Catholicæ Ecclesiæ congruentibus instituerent.

Ipse

Ipse quidem tantum in eius linguæ cognitione profecit, vt familiariter cum Abassinis colloqueretur, confitentes audiret, conciones haberet, aptè demum ex linguis aliis in Abassinam transferret multa, quæ Catholicis, vt in fide perseverarent, & hæreticis, vt errores suos agnoscerent, atque execrarentur, valde conducebant. Transferendi labori ita se dabat, vt omnem prorsus curam deponeret sui. Dum quædam attentius aliquando conuerteret, sic abstractam à rebus aliis habebat mentem, vt ad leuandam sitim, quæ fortè premebatur, plenum oleo vasculum ori per imprudentiam admouerit, & oleum biberit pro aqua. Nec tunc agnouit factum, neque agnosceret postea, nisi Franciscus Lupius vas vacuum reperiens, & quid actum esset de oleo rogans, errorem patefecisset. Cæterùm tam singularem Abassinis iuandi Patriarchæ laborem multiplici fructu solabatur Deus, & aliquando ostentis cœlestibus faciebat illustrem. Per ea enim tempora visus insomnis est homini hæretico, qui locum incolebat vnus circiter mensis itinere à Catholicorum pagis distantem. Hic cùm duos post annos eò fortè veniret, vbi Andreas erat, simulatque ipsum est intuitus, agnouit ex facie, & illū esse dixit, qui sibi antè fuerat per quietem conspectus. Quamobrem diuino incitatus impulsu, adit secretò Patriarcham; quid viderit, narrat; quid deinceps facturus sit, vt rectè viuat, eius arbitrio committit. Catholicis illum præceptionibus vir sanctus instruit, & in Romana fide ita roborat, vt grauissima postea eius conseruandæ pressus difficultate, constans firmusque permanferit. Nam à Turcis captus, sapiusque, vt ad Mahumeticam nequitiam transfret, vi magna impulsus, obnixè restitit. Dúmque libertate ommissa ferreis onustus

onustus catenis, laboribus oppressus, propèque enectus fame, & mœstitia planè consumptus, mortem magis, quàm vitam optaret, ad Andream misit, qui nuntiaret, quo esset in statu, verbisque suis ab illo peteret, ut libertatem sibi, & in vera religione constantiam suis à Deo precibus obtineret. Plurima quidem se & maxima pati mala; sed nullo affligi acerbius, quàm immani illa & incoheranda importunitate, qua ut a Christo deficiat, ab ipsis Christi hostibus instigatur. Eum igitur iterum atque iterum obsecrare, ut quoad potest, precibus suis misero succurrat; cōfidere enim, si causam suam suscipiat. Numen se propitium habiturum; & quādo aliud nihil, in recta fide ad mortem usque constantem permanfurum. Pro signo autem suæ in ipsum fiduciæ, pileum mittere; id enim solum è suis bonis sibi esse relictum, quod mittere queat. Accepto Ouiedus sub noctem nuntio, vehementer indoluit; statimque in preces effusus, libertatem homini breui impetrauit. Eadem quippe nocte à vinculis euadendi oblata est captiuo occasio; cūque esset omnino ignarus nandi (nare enim ad fugam oportebat) non exiguum maris tractum nando traiecit; quantāque potuit diligentia ad Patriarcham contendit, & ad eius prouolatus pedes, rem ordine narrans, suam ipsi libertatem retulit acceptam.

De aliis Andreae virtutibus, & obitu.

C A P V T X V .

Variis sæpe modis, vi quoque interdum adhibita, tum Abassinorum Abuna, tum Abassini monachi

chi tentarunt, vt Lusitanorum vxores, quæ ex Abassi-
 no erant genere, templa & sacra frequentarent hæ-
 reticorum. Verùm Malac Seguetus Adamæ filius, quã-
 uis contumacia patri non impar, mitior tamen in cæ-
 teris, cum apud ipsum ea de re nostri conquererentur,
 non solum Abunæ & Monachorum importunita-
 tem coercuit, sed assignauit certa Catholicis loca, vbi
 cum vxoribus ac liberis catholico ritu viuerent, tem-
 plaque ædificarent, in quibus à reliquis separati sua
 sacra peragerent. Hæc loca Ouiedus quamdiu super-
 fuit, sedulo lustrabat; fidei morumque doctrinam in-
 colis tradebat; illis conferebat sacramenta, & reliqua
 eiusmodi summa cum beneuolentia & caritate dili-
 gentissimè procurabat. Licet autem hisce continere-
 tur exiguis oppidulorum terminis, neque ad remo-
 tiora, nisi raro digrederetur oppida; ferebatur tamen
 per longinquas regiones cum illustri commendatio-
 ne eius sanctimonie fama, qua multiplex genus ho-
 minum hinc inde commotum ad ipsum turmatim
 ventitabat. Ex iis verò nemo ferè explicatam ab ipso
 veritatem non agnoscebat; multi agnitam amplecte-
 bantur; non pauci etiam metu, aut quo alio impediti
 affectu respuebant. Ita tamen omnes, tam qui fideles
 Christo erant, quàm qui à vera fide aberant, de illo
 sentiebant, vt non dubitarent ea ab ipso petere quæ
 sola effici naturæ potestate non possunt. Hoc verò
 & ex aliis quæ iam dixi, & ex his colligitur, quæ nunc
 dicam. Cum die quadam litaret, templum ingreditur
 hæreticus homo, filium paruo natu portans vlnis, o-
 mnino desperatum ac pæne mortuum. Eum suppo-
 nit litantis pedibus sanitati restituendum; nec dubi-
 tat, quin sanum recipiat. Ita fit. Puellum Patriarcha
 ante pedes despiciet moribundum; intelligit vitam illi

à patre & sanitatem quaeri. Rem à Deo petit, & obtinet; sacroque peracto integrum reddit filium parenti, villo absque signo pristinae infirmitatis. Ex Catholicis alter filium item habebat nondum rationis competentem, oculis captum; & pessima affectum constitutione corporis; optabat eum potius mortuum, quam viuum; vt ea ratione magno filius labore, non minore pater ipse doloris sensu eximeretur. Petiit igitur ab Andrea, vt si talem miser infans vitam esset victurus, precibus ipsi suis mortem à Deo impetraret; id enim vtrique utile & gratum fore. Nec verò, inquit, time ne quam fortè iniuriam inferas innocenti, dum ei mortem procurabis; conferes haud dubie beneficium; siquidam non tam finiet moriendo vitam, quàm longam mortem cum breui commutabit. Rem diuinam Andreas peregit; idemque & sacrificij & puelli finis fuit. Mox enim ex hac mortali ereptus cecitate, mentisque oculos diuino persusos lumine aperiens, æternæ pulchritudinis splendorem est intuitus. Cum aliquando tanta vis locustarum ad ea loca conuolasset, vt instar densæ nubis obtegerent cælum, ramosque arborum, quibus insidebant, ipso pondere frangerent, & vasta strage omnia late denastarent, nihil denique in agris relinquerent, quo sustentari homines possent, hæretici simul, & catholici consensu ad Andream accurrerunt; opem imploraturi. Congregatis ille in templum Catholicis Deiparam Virginem, ceterosque coelites immortales litaniis inuocauit. Obseruatum est, vt paulatim preces fundebantur, ita sensim locustarum exercitum minui, aliasque super alias mortuas in terram cadere; finita demum precatione tanto ex numero, ferunt ne vnā quidem superfuisse. Illud etiam diuino tunc effectum beneficio est,

ut quamdiu postea Patriarcha vixit, tale genus calamitatis, quod natium & quasi domesticum erat, nunquam ea regio fuerit experta. Cæterum cum ciuilibus discordiis ita res Abassina turbata esset, ut multa passim per totum Imperium bella fierent; qui de Lusitana gente erant, coacti sunt, domo relicta, in diuersa se conferre loca, in iisque accepto stipendio signa sequi principum diuersorum. Tum verò tantam Andreas rerum necessariatum passus est egestatem, ut virtute magis diuina, quam humano subsidio sustentari crederetur. Vestibus tempore vsuque magna ex parte consumptis, quo se tegeret, vix habebat. Eò deuenit, ut cum opus esset de Æthiopicis rebus Sebastianum Regem per literas monere, quoniam aliam, in qua scriberet, chartam non habebat, ex initio Breuiarij primum folium, in quo nihil erat descriptum, ad scribendum abstulerit. Cum rursus de se, deque statu rerum Pio V. Pontifici maximo rationem esset per literas redditurus, ex eodem, quo ad recitandas horas utebatur, Breuiario extremas abscidit foliorum partes, inque iis ad modum libri filo colligatis scribens, docuit sublimia dignitatum decora nihil depri-
mi paupertate, sed illustriora effici, maioremque apud bene sentientes admirationem sortiri. Hanc eius epistolam Pius Pontifex in manus postea accipiens, neque legere, neque videre sine lacrymis potuit, considerans, quantus vir quantam esset ad inopiam redactus. Denique postquam viginti annos eo modo, quo dictum est, in illa Æthiopica vinea laborauit, summis calculi cruciatus doloribus ad metam peruenit. Cum sub extremum spiritum vi morbi acerbissimè torqueretur, miseratione, qui aderant, permoti, precari Deum cœpere, ne permitteret, tam innocen-

tem, tamque immerentem virum tam grauitè afflic-
tari; solueret potiùs ærumnosæ vitæ laqueos, & ani-
mum ad se reciperet cœlestibus gaudiis recreandum.
Eos ille audiens, A verbis, inquit, talibus abstinete, fi-
lij; non mortem mihi, sed patientiam, qua dolores
istos æquo animo feram, ab immortali Deo vestris
precibus deposcite. Ego enim si qua ratione vobis
vtilis esse queam, in hisce grauissimis doloribus tri-
ginta adhuc & amplius annos libentissimè viuam.
Sinite Deum efficere, quod ipsi placet. Absit, vt ego
velim aliud, quàm quod vult; aut doletes istos finire
morte cupiam, quibus ipsi placitum vt viuens cru-
cier. His dictis, ad Deum conuertitur, eique sese in
omnem euentum offert; iubeat mori aut viuere, vexa-
ri doloribus, aut iis liberari; nihil se vñquam recusa-
turum; animum tantùm & vires sufficiat. Dum per
hæc & similia se Deo vouet, cùm priùs esset salutari-
bus Ecclesiæ sacramentis ritè munitus, inter summos
cruciatus expirauit, mense Septembri anno à partu
Virginis millesimo quingentesimo septuagesimo se-
ptimo. Vt mortuum viderunt, qui assisteabant, ingen-
tem edidere eiulatum; quo foris audito incredibilis
comploratio toto pago excitata, graui mœrore omniũ
animos impleuit. Mortis fama frequenti rumore
per loca alia diffusa ab ipsis quoque Schismaticis do-
lorem & lacrymas extorsit. Non in monte Amara, vt
à nono auctore fictum diximus, sed in ipso, quod Ca-
tholicis Fremonæ erat, per exiguo templo, maiori
Fremoneusium pietate, quàm exequiarum apparatu
corpus eius sepultum est. Ea hæreticis de ipso fue-
rat existimatio, vt cùm firmissimè sibi persuaderent,
demortui animum cum beatissimis patriæ cœlestis
ciuibus æquo frui sempiterno, ad sepulchrum, in quo
ossa

ossa quiescebant, sapissime concurrerent, ibique uti
 fieri in Abassia iis solet, qui sunt beatitate donati,
 frumentum offerrent, thuráque & alios odores vene-
 rabundi incenderent. Multa ad idem sepulchrum ab
 eius statim obitu f'erant edita miracula, ex quibus se-
 quentia sunt, quæ iurati narrauerunt testes. Fœmina
 erat ex genere regio, cuius vitam difficillima ægritu-
 do adduxerat in discrimen. Hæc paululum terræ ex
 Patriarchæ tumulo sibi allatæ immiscuit aquæ, quam
 ut bibit, depulso morbo repentè conualuit. Cuidam
 homini artis medicæ perito diuturnum ac permole-
 stum erat in latere vlcus, cui multa incassum adhi-
 buerat medicamenta. Visus iste sibi est vocem hu-
 iusmodi in somnis audire: Mitte hæc remedia, quæ
 malo tuo tam frequenter adhibes; si recuperare sani-
 tatem vis, terram capito ex Patriarchæ sepultura, ef-
 ficito ex ea emplastrum, vlcери tuo illud impone, sis
 confestim sanus. Ita accidit. vbi terra vulnus tetigit,
 quidquid infirmum erat, noua carne restituta, solidè
 confirmatum. Idem ipse medicus, cum de mandato
 Imperatoris quamdam se in arcem conferret, captus
 est à Turcis, & in vincula coniectus, die insequente
 transfigendus palo, quòd, explorator crederetur. In
 hoc vitæ periculo, cum ab Andrea, quem viuentem
 nouerat, auxilium obnixè peteret, visus ecce ipsi mul-
 ta circumfusus luce idem Andreas, eiúsque appre-
 hendens manum leuat à terra procumbentem, & his
 verbis omnem ex afflictio animo pellit timorem. Ne
 metue quæ impendere tibi videntur ab Turcis mala;
 euades omne vitæ discrimen; & die crastino, quo te
 mactandum putas, sine dâmino exhibis è custodia. Di-
 xit, & ex oculis subitò euannit. Vbi postera illuxit dies,
 aperto præter morem à Turcis carcere, data homini

excundi, & abeundi, quò vellet, libera facultas. Tanta aliquando ob pluuiæ defectum illis in locis siccitas fuit, vt arescerent segetes, & facile apparet, annum non solum homini, sed etiam pecori fore exitiosum. Conueniunt inter se quotquot ibi reperti, de querendo remedio deliberaturi; & quamquam à Romana fide alieni, statuunt tamen ad Patriarchæ sepulturam, tamquam ad aram confugere. Eò gregatim pergunt; simul attollunt voces, & magna cum fiducia hunc in modum precantur: Patriarcha sanctissime respice hos agros, ex quibus victus nobis & vita. Cerne vt ariditate sterilecant; & frugum inopia extremum nobis minentur exitium. Auerie, quæ imminet mala. In cælo nunc degens cum Deo, ne illud nobis auxilium nega, quod libenter præstabas, cum apud nos degebas in terris. Si opem fetas perditis rebus, quam nobis tradebas fidei doctrinam, iam nunc cordè, & eum oportebit, ore & opere palam profitebimur. Has preces tantus statim consequutus est aquarum imber, vt omnem sterilitatis metum ex agrestium animis abegerit.

Quales Andrea socij, quòmodo vitam finierint.

C A P V T XVI.

NE immensus ille sanctissimi Patriarchæ labor tot per annos tanta caritate pro Abassinis susceptus eius morte peiret, à Patre misericordiarum clementissime prouisum est. Quinque eius socios superstites esse, & in eadem vinea colenda ita exerceri voluit, vt quod ipsi hæretici confessi sunt, ad insignem quemdam cuncti fuerint gradum sanctitatis. Iurati testes dixe

dixerat, eos plenam rectè factis, & verè Apostolicam
vixisse vitam, quam admirari quidem possent, satis
explicare non possent. Cum salutem omnium enixè
promouerabatur, vel maxime in pertrahendis ad ve-
ritatem Monachis, vehementer insudabant, quòd vi-
derent ubi his, qui apud eos habentur ceteris doctio-
res, nobilium aequè & ignobilium conversionem pè-
dere. Omnes, quibus cum ipsis erat de religione dis-
ceptatio, nullo negotio convincebant, non tamen
admodum multos, nec sine magno labore (tanta in-
ueteratæ consuetudinis vis est) ad amplectendam ag-
nitam veritatem compellebāt. Ex his quinque sociis,
tres sacerdotes erant, reliqui duo nullis initiati sacris,
ad rem domesticam iuuandam in Societatem admissi.
Hos Patriarcha, ut suum post obitum, plures Catho-
licis relinqueret factorum administratos, quos necessa-
rios fore animo præuidebat, aptè prius instructos, non
multo ante, quàm diem obiret, ad ordines promouit,
& sacerdotes creauit. Id diuino factum esse consilio,
euentus ostendit. Lupius enim, qui vnus fuit ex illis,
& sociorum vltimus excessit è terris, vllò absque so-
cio Catholicam in Abassia fidem doctrina & exem-
plo diu conseruauit, donec vno ferè post eius mortem
annò ab Alexio Menesio, Goano tunc Antistite, in
Æthiopiam missus est Michael Syluius, de quo supra
dixi, insigni sacerdos pietate, qui vineam eandem, ne
errorum spiritus omnino syluesceret, ad aliorum vsque
aduentum diligenter excoluit. Moriens Patriarcha re-
liquis sociis Antonium Fernandū præfecit, virum
cū rebus alijs excellentem, tum verò omnium in-
structum virtutum apparatu. Caritate & tolerantia
ferunt fuisse admodum singulari. Primus sociorum
fuit, quem ab illo exilio ad sedes beatas Deus auoca-

uit. Illum consequutus est Gonzalus Cardosus, de quo hæc accepimus præter alia, quæ ipsi fuere cum reliquis communia. Dies noctesque Catholicis æquæ & hæreticis infatigabilem præstabat operam. Labores & pericula ipsi erant delectationis materia. Alienarum videbatur arbitet voluntatum. Magna facilitate conciliabat discordes; atque in hoc genere, quo quemque vellet, nullo negotio flectebat. Mortem suam diuinitus prænouit, æ prænunciavit. Cum in pagum quendam quindecim dierum itinere distantem, Francisco Lupio comitante, mitteretur, ut Catholicos loci incolas sacramentorum pabulo & doctrina pasceret, Patri mittenti ita fertur dixisse: Læto atque hilari animo hoc iter suscipio, quod obedientia, quæ mihi vitæ carior est, suscipiendum præcipit. Scias tamen neque me peruenturum Dambeam, neque ad te amplius reuersurum. Haud plura his, mox se cum socio in viâ dat. Partem itineris confecerant; cum Cardosus Lupium monet instaret tempus moriendi; ipsum quoque in eodem futurum periculo; consulat tamen diligenter sibi, & ad communem vtilitatem seruet vitam. Non multo post, cum simul pergerent, latrones quidam ex sylvis egressi imparatos adoriuntur. Lupius vulnere accepto in secretum se locum abdit, & vitam tuetur. Cardosus primo ferè ictu mortuus cadens oraculi patefecit veritatem. Tertius ad cælum abiit Andreas Gualdarius. Tantus huic inerat mentis ardor, & amica veritatis simplicitas, ut dici de eo soletet, quod de Nathanaele dixit Christus, verum esse Israelitam, ab omni alienum dolo. Cum summo iuuandi Abassinos desiderio æstnaret, simulatque ea loca tetigit, ingenti conatu ad perdiscendum gentis idioma applicuit animum; illudque sine doctore intra sex menses

ses adeò perfectè calluit, vt multa ex nostris ad Religionem spectantia aptè traduxerit, quæ & Catholicis ad conseruandam fidem, sectandamque pietatem, & hæreticis ad errores depellendos magno vsui fuere. Mors ita contigit. Præfecti sui iussu Mazuam petens, in Turcas incidit, quibus ex vestitu proditus, cū Christianus & sacerdos esse agnosceretur, vnà cum Lustano aliò, quem habebat itineris comitem, Barbarorum telis confossus viam & vitam felici exitu absoluit. Quarto loco discessit ad superos Emanuel Fernandius. Hic adulta iam ætate & sacerdotio decoratus, anno salutis millesimo quingentesimo quinquagesimo tertio in Conimbricensi Collegio nomen dedit Societati. Ante Religionis ingressum Cardinali Hénrico erat cognitus, & in prudentium atque piorum hominum numero habitus. Hanc ob causam aliquot non exigui momenti negotia ab eodem principe agenda suscepit, & fideliter ac sedulò administravit. Apud Abassinos cū multis in rebus, tum in eo maximè eius virtus enituit, quòd ad sacra infirmis ac valentibus ministranda plurimos longèque distantes Christianorum pagos pedibus lustrabat; adeò quidem assidue, vt in via magis, quàm vllò certo in loco domicilium haberet. Nec pauca nec modica in hisce itineribus subibat vitæ discrimina, quibus tātum abest, vt à proposito retardaretur, potius vt ad eam ipsam rem difficultatibus ipsis promptior fieret, & alacrior. Multa ferunt diuino instinctu vaticinatum. Hæc à iuratis testibus accepimus. Cū Monachus quidam hæreticus Imperatorem, apud quem auctoritate & gratia valebat, vehementer sollicitaret, vt quotquot Abassini essent, qui ab Alexandrini Patriarchæ factione ad Romani Pontificis obediētiam transissent,

eos vt seditiosos ac perduelles interfici iuberet; rem
 famam ad Catholicos detulit; & tanto eos perculit ti-
 more, vt quip possent modo imminēs periculum eua-
 dere, solliciti & anxii quærere cœperint. Ex his vnus
 quid ageretur Emanueli nuntiavit. simul & consiliū
 in se difficillima petiit. Sedato ille volu hominem in-
 uenire. Vade, inquit, meis verbis Catholicos roborā. &
 metu solue. Ceterò pronuncia, nullum ab hac parte
 esse periculum; neque enim iniqua suasionē mouen-
 dum Imperatoris animum. Eum verò, qui vobis mo-
 liatur interitum, intra duos menses auferendum ē vita.
 Itaque cepit, vt ab Emanuele prædictum. Cūm discede-
 ret quodam ex loco, videretque hoc discessu non nihil
 anilem hominem turbari, Obsecro, inquit, te, ne fe-
 cas agere me hinc abire; iam ad viuentium vocor Re-
 gionem, & optatum adest tēpus, quo terram hanc,
 quam baiulo, deponam in terra, euolēmq; in cœlum.
 Ad templum consero me, in quo sanctissimi Patriar-
 chæ requiescunt ossa, vt prope ipsum sepeliar. Abiis
 ad designatum peruenit locum; paucis post aduētum
 diebus animam egit. Cūm moriturus decumberet,
 quemdam rogauit ex iis, qui assidebant, quantum di-
 staret dies Christi natalitiis sacer? Haud procul abest,
 inquit ille. Tūc Emanuel, hunc diem expecto, vt mū-
 do moriens nascenti in terris, Christo viuere in cœlo
 incipiam. Vbi dictus illuxit dies, Catholicos, qui in
 loco erant, vocari iussit ad se, simul cum iis, rei diuinæ
 intetfuit, sacrificio finito data acceptaque mutuo sa-
 lute, dulcibus verbis domum quemque remisit suam.
 Vestra, inquit, tecta repetite, reficite cibo corpora; hæc
 frequentes à prandio adeste. Faciunt, quod iusserat,
 futuri ignari. Cibos sumunt; pransi conueniunt, sicut
 ad Emanuelem redeunt; corpus reperiunt exanime,
 rigant

rigant lacrymis, venerabundi osculantur, supremæ reginæ aspectu creditur in obitu recreatus. Conuersus enim ad vnum cubiculi angulum, inter mortuis quidem, sed iucundissimis vocibus clamare cœpit, Ah domina mea, ah domina mea! Tunc Franciscus Lupius, qui aderat morienti, agnoscendæ rei cupidus, quid viderit, interrogat. Vidi, inquit, Virginem deiparam diuina mirabilem pulchritudine; sine me abeuntem sequi. His dictis, migrat è corpore.

*De Francisco Lupio, Patriarchæ socio, qui omnium
postremus diem obiit.*

C A P V T X V I I .

VLtimus ex sociis mortalem vitam Franciscus Lupius reliquit, anno millesimo quingentesimo nonagesimo septimo, mense Maio. Vix scribi possunt, quæ de hoc viro à iuratis testibus tradita sunt. Eum summis equanere cœlitibus. Affirmarunt, nullam esse partem veræ germanæque sanctitatis, in qua non excelluerit. Ego pauca quædam & leuiter attingam. Illud primum sit. Lupium per annos viginti Ouiedi Patriarchæ fuisse in Æthiopia domesticum socium, eodémque cum ipso labores, & easdem subiisse difficultates; atque in omni genere virtutum sic illum esse imitatum, vt expressa quædam viuaque eiusdem Patriarchæ imago extiterit. Ita corpus verberibus, ingdia; modisque aliis exetenuauit, vt solis ossibus constare videretur pelle tectis. Solitus erat dicere, vitam hanc non ob alium à Deo nobis concessam finem, nisi vt laborando assequeremur æternam, tritum Iobi v-

surpans

surpans verbum: Homo nascitur ad laborem, ut ad volatum avis. Hinc erat, nulli ut unquam labori parceret. Cæteris sociis vita functis, mox egenis disperit, quidquid erat domi; & ad reliqua pallium adiecit scissum in partes, ut ad plures pertingeret. Denique & ipsam tunicam, quam sibi ex vestitu exteriori solam reliquerat, in frusta quoque divisam distribuit pauperibus, interno tantum amictu, quod illis in locis indecorum non est, nuda tegens membra. Cū tamen hyeme varios Catholicorum pagos erat lustraturus, ad propulsandas frigidi cæli iniurias aliqua pelle utebatur. Reperit aliquando femine vita functæ nudum atque inhumatum in via cadaver; mox in secretum se recipiens locum, exiit subuculam, mortuum corpus deceter operuit, & terræ mandavit. Nuda humo cubabat. Cū ab homine quodam saccum accepisset, quem supponeret corpori, illum confestim dedit ægroto, qui frigida quoque ac dura in terra iacebat. Ad eam devenit rerum penuriam, ut cū à vita cessit, nihil sit apud ipsum repertum, præter frustam laceri ac triti corij, cui incubuit ægròtans, ut eo cadaver tectum sepulturæ daretur. Visus sæpe est, cū sacrificium faceret, cūque secretò diuina contempleretur, tanto perfusus splendore, ut Solis instar intuentium oculos perstringeret. Idem qui videre testati sunt, adque erat crebris inter Catholicos peruiulgatum sermonibus. Fuit ex ipsis, qui affirmaret, sæpe sibi à parente suo dictum: Fili, hunc Franciscum Lupium, qui nobiscum est, quēque frequenter videre & alloqui possumus, ne tamquā vnum de cæteris hominibus existimes esse; summa præditus est sanctimonia. Illum ego aliquoties vidi, cū faceret sacrum, seque ad circumstantem populum verteret, oculis & ore

flam

flāmas iaculati, ac toto capite luce mirabili splendescere. Quod reliquum est, curabis, summo eū habere in pretio, & eximie venerari. In morbum incidit: cū haberet in dies peius, ingens Catholicos de iactura tāti viri incessit sollicitudo. Cōsumebātur mīserore, quōd eum sibi viderent auferri, cuius ē vita pendeāt. Summis ergo precibus & multis cum lacrymis à Deo petunt, ne velit illum mori, sine quo ipsi nequeunt vivere. Placuit Numini pia deprecatio, & restituta egro sanitas est. Vno vel altero à recuperata sanitate die pergit in tēplum, vt sacrificet; conueniunt etiam frequentes Catholici, vt facienti intersint. Peracto sacrificio, ita illos dicitur allocutus. Ad finem laborum venerā, Deo vocante. Mihi quidem nihil esse optatius poterat, si mea comoda respicerem, quā vt dissoluerer, & cū Christo essem. Audite preces vestrae à clementissimo Domino sunt. Duos adhuc vobiscum commorabor annos; sic illi placet, qui vitæ & necis Dominus est. Si velit, vt multo longius proferam vitendi terminos, nō recuso; siue enim viuo, siue morior, ipse sum. Vestra etiam, fratres mei, causa valde me in hac ægritudine anxium habebat. Quī possem enim non maximè angī, cū viderem post obitum meum vos futuros sine magistro, sine pastore, sine sacerdote? Quī possētis item vos, vestriūque liberi ita deserti inter Romanæ religionis hostes in vera fide constantes integriūque persistere? Gratias igitur agite & habere benignissimo Patri quammaximas, & quod in vos contulit beneficium, sēpius vobiscum recognoscite. Quod attinet ad me, quamquam exacta iam ætate, viribus affectis, hebetato etiam magna ex parte animi vigore, nihil tamen his duobus annis prætermittam, quod vobis vtile esse iudicabo. Deum precor immortalem,

quam

quam noscitur virtutem mihi opus esse, largè suppeditet ne cuiquam desim. Hæc effatus, concionē dimisit. Reliquo vitæ tempore sic egit omnia, siue, quæ corporis, siue quæ animi robur desiderât, ut appareret vtriusque partis vires non ægritudine perditas, aut ætate immi-
nutas, sed morbo potius illo, uti salutari medicamento fuisse in lauratas. Vbi tandem ad metam ventum octo ante dies, quam exiret è vita, iussit Catholicos conuenire, ad quos plenam optimis consiliis habuit concionem. Principio eos monet, elapsum esse, quod diuino munere acceperat biennij tempus, nec iam plus quàm septem vitæ dies superesse; orare se & obtestari omnes vehementer, ne de diuina misericordia desperent; fore, ut vnum circiter post annum illuc veniat, qui diligenter eorum curam gerat; si quid interim habent, quod præstare ipsū velint, ne morentur proponere. Deinde hortatur quanto potest animi ardore, ut in Ecclesiæ Romanæ doctrina & obedientia firmissimè perseuerent; à colloquiis & consortio, nedum à connubiis hæreticorum abhorreant ac fugiant; iustitiam, pietatem, virtutes reliquas sectentur; nullam iis, qui foris sunt, ansam præbeant malæ de ipsis sentiendi; pacem denique inter se & concordiam seruent; atq; ita viuant, ut verè Catholici & verè fratres esse videantur. Post hæc desinito die, summo omnium Catholicorum dolore, mortalis vitæ molestias curasque cum corpore relinquens, ad quietem abiit sempiternam. Nondum exacto ab eius obitu anno Melchior Syluius Mazuam appulit, indeque ad Abassinos confestim transiens, fidem à Lupio Catholicis vaticinando datam aduentu suo liberauit.

F I N I S.

A01 1469872





